



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.

About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

Consignes d'utilisation

Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>



Walter S. Johnson
Fund

STANFORD UNIVERSITY
LIBRARIES





L'HYSTOYRE
ET PLAISANTE CRONICQUE
DU
Petit Jehan de Saintré
ET DE LA JEUNE DAME
DES BELLES COUSINES



L'HYSTOYRE

ET PLAISANTE CRONICQUE

DU

Petit Jehan de Saintré

ET DE LA

JEUNE DAME DES BELLES COUSINES

PAR ANTOINE DE LA SALE

Publiée avec Préface, Notes et Glossaire

PAR

GUSTAVE HELLÈNY



NOTE TO THE READER

The paper in this volume is brittle or the inner margins are extremely narrow.

We have bound or rebound the volume utilizing the best means possible.

PLEASE HANDLE WITH CARE



PRÉFACE

La fin du moyen âge n'est pas une ligne idéale tracée arbitrairement à travers l'histoire de l'Europe : elle coïncide, en France, avec la décomposition de la société féodale et avec l'avènement précoce, mais éphémère, d'une bourgeoisie ambitieuse et remuante dont l'importance a tout à coup grandi dans la lutte entre le roi et les grands vassaux. L'ancien ordre s'effondre; mais quel ordre nouveau lui succédera? La couronne paraît si faible encore qu'on peut douter de son affermissement définitif; et, tandis que les municipalités triomphent par le désordre, les châteaux dressent toujours

vers le ciel leurs orgueilleux donjons, et caressent l'espoir d'une domination sans fin. Tel est, en peu de mots, l'aspect de la société française pendant le second quart du xv^e siècle, lorsque l'Anglais a encore plus d'un pied sur le sol national, et que, dans les villages, tout est ruine et désolation.

Tel état social, telle littérature. Quels sont les grands écrivains de ce temps? faut-il nommer Alain Chartier et Georges Chastelain, le premier, savant élève d'Eustache Deschamps, expert en l'art de bien dire, mais poète transi, sans imagination et sans verve; le second, déclamateur prétentieux et ampoulé? au-dessous d'eux s'agite le flot de leurs imitateurs, gens célèbres alors, mais dont les noms, aujourd'hui, fuient devant la mémoire. Il y a Charles d'Orléans : revenu d'Angleterre, il joue innocemment son rôle dans la triste politique d'alors; mais, comme poète, ce prince, rêveur délicat, est absolument ignoré de ses contemporains; et d'ailleurs ses vers, éclos dans la serre chaude de la capti-

tivité, relèvent d'une poétique antérieure, et n'appartiennent à cette époque qu'au point de vue chronologique. L'Histoire est représentée par un bataillon de chroniqueurs généralement médiocres et souvent partiiaux. Chaque parti a le sien : Bourgogne a Chastelain, Orléans a Cousinot; Jean Chartier, écrivain officiel, continue les *Chroniques de France*, tandis que le plat Monstrelet s'attribue, sans rougir, la succession de Froissart. Enfin les lauriers, dès longtemps flétris du roman épique, achèvent de s'effeuiller. Pendant le xiv^e siècle, ce rejeton bâtard de la chanson de geste avait occupé presque seul le domaine entier de l'Imagination; plus d'histoires gracieuses comme *Aucassin et Nicolette*, touchantes comme la *Châtelaine de Vergi*, plus de fableaux moqueurs; les continueurs du *Roman de Renart* s'étaient vus forcés d'armer leurs héros : Noble et Isengrin chevauchaient et maniaient la lance; ce n'étaient plus le lion ni le loup, mais le roi et le vassal. Sur son déclin, l'esprit féodal voulait dominer partout et ne

supportait aucune œuvre qui n'affirmât sa puissance : comme certains vieillards, il s'était pris d'avarice et d'absolutisme.

Le caractère général de cette littérature, c'est le manque d'imagination et de pensée. Ces attributs de l'esprit sont remplacés, chez les poètes, par la science du rythme et le précieux des mots, dans la chronique par l'invective quand les faits ne parlent pas d'eux-mêmes, dans le roman, par d'informes compilations d'épisodes. Après un siècle de décadence et de luttes fratricides, l'art de la France, comme son sol, se trouvait dans un état voisin de l'aridité. Si le siècle avait dû s'achever de la sorte, les hommes de la Renaissance auraient-ils eu les matériaux nécessaires à la construction de leur brillant édifice?... l'étude de l'antiquité a pu leur fournir une esthétique, mais la littérature est vie avant tout, et la vie est l'œuvre ininterrompue des générations.

Peut-être la Renaissance française aurait-elle été entravée ou retardée, mais sûrement elle n'aurait pas donné tous ses fruits, s'il ne s'était trouvé des

hommes assez peu soucieux de la mode, assez peu jaloux de l'estime de leurs contemporains pour aller chercher leurs modèles dans un passé déjà lointain, pour rajeunir, renouveler l'art du moyen âge qu'au siècle précédent Froissart et deux ou trois conteurs avaient sauvé à grand'peine. Ce n'est que vers 1450 que commence ce qu'on peut appeler la partie vivante du xv^e siècle. Alors Villon paraît et lègue au monde, dans ses deux *Testaments*, son inappréciable trésor de poésie populaire; et, à la même époque, toute une série d'œuvres purement satiriques comme les *Quinze Joyes de Mariage* et les *Cent Nouvelles nouvelles*, ou gracieuses comme le *Petit Jehan de Saintré*, des farces sans nombre dont *Pathelin* est la plus célèbre, font revivre sous des formes nouvelles l'art des fableaux, (1)

(1) Ici nous étendons un peu le sens de ce mot pour l'appliquer à tout récit exempt de surnaturel et relatif à la vie privée. « Les récits circulant oralement, dit M. G. Paris dans son *Manuel d'ancien français*, s'appelaient *conte*,

que le xvi^e siècle modifiera à son tour, et auquel le xvii^e siècle donnera la forme définitive du roman de mœurs.

Des ouvrages que nous venons de mentionner, chacun a son caractère et son intérêt propre; si l'on excepte les *Cent Nouvelles*, qui sont, en somme, le plus original de tous les recueils de contes, ils ne doivent rien à l'imitation; tous ont le charme d'un style aisé et naturel, et ces deux qualités éminemment française, la finesse et la netteté. Entre tous, le *Petit Jehan de Saintré* se recommande par son sujet même autant que par la grâce, souvent exquise, du récit. Les autres nous dépeignent les ridicules et

aventure, fable; les récits en vers fablel. » Ceci n'est pas rigoureusement exact, car nombre de poèmes sont désignés, par leurs auteurs même, comme des contes. Les fableaux proprement dits étaient des anecdotes mises en vers, le plus souvent plaisantes, et à tendances très réalistes. Quant au mot de *roman*, on sait qu'il s'appliquait dans l'origine à tout récit, en prose ou en vers, même historique, écrit dans la langue nationale, par opposition au latin.

les vices d'une bourgeoisie peu digne de sa passagère fortune; *Saintré*, au contraire, nous transporte au sein du monde aristocratique : son théâtre, c'est la cour; le héros est un chevalier, ou plutôt, c'est le chevalier. Par ce côté, il semble se rapprocher du roman épique; mais, dans le fond, il en est éloigné de toute la distance qui sépare l'observation de la convention. Écrit sous l'influence des idées féodales et consacré vraisemblablement à l'instruction des jeunes chevaliers, il offre l'exemple rare d'un livre didactique moulé, en quelque sorte, dans une amusante fiction, où l'enseignement entre si parfaitement dans le cadre du récit, qu'ils se complètent l'un par l'autre et semblent inséparables. Si l'on songe à ce qu'une combinaison si heureuse exige d'art secret, on ne s'étonnera pas de l'estime particulière dont les lettrés ont honoré ce roman. Accueilli au xvi^e siècle avec une faveur qu'affirment six éditions successives, réimprimé au commencement du xviii^e siècle, le *Petit Jehan de Saintré* eut à subir, à l'approche de la

Révolution, une autre espèce d'honneur, dont il se serait bien passé : le comte de Tressan, qui dut une célébrité spéciale à ce genre de travail, en fit un rajeunissement de son goût; il en retrancha toute la partie didactique, donna au livre ainsi diminué la couleur libertine qui plaisait à ses contemporains, et le répandit dans les boudoirs. Ce fut un succès; et, grâce au comte de Tressan, le *Petit Jehan de Saintré* passa, durant un demi-siècle, pour un de ces livres qu'on n'expose pas à la curiosité des visiteurs, mais que l'on cache au plus profond des bibliothèques. En 1830 seulement il fut rétabli dans sa forme primitive et rendu à son véritable auteur, Antoine de La Sale. Depuis lors, la gloire de ce dernier n'a fait que grandir. En cette même année 1830, Pottier lui attribuait les *Quinze Joyes de Mariage*, et les raisons sur lesquelles il se fonde laissent peu de doute; un peu plus tard, Leroux de Lincy concluait de même à l'égard des *Cent Nouvelles nouvelles*. Si ces opinions se changeaient en certitude, Antoine de

La Sale prendrait la maîtresse place parmi les conteurs de son temps, et devrait être mis au nombre des meilleurs prosateurs de la période qui commence à l'avènement des Valois et précède immédiatement la Renaissance; mais sa part serait encore belle, s'il n'avait écrit que le *Petit Jehan de Saintré*.

*
* *

Jean de Saintré n'est pas un héros imaginaire. Il appartient à l'histoire et semble même avoir joui d'une honorable célébrité, car Froissart nous apprend qu'il était tenu « pour le meilleur et le plus vaillant chevalier de France ». On le voit, dès l'année 1350, prendre part aux guerres contre les Anglais dans l'ouest (ce qui le fait beaucoup plus vieux qu'il ne paraît dans le roman). Il fut fait prisonnier à Poitiers. Nous le trouvons mentionné dans les *Chroniques de Saint-Denis* au nombre des six chevaliers envoyés par le roi Jean (janvier

1358) pour soumettre au duc de Normandie et au conseil de régence, les propositions de paix qui devaient aboutir au traité de Brétigny. Cette mission remplie, le régent lui confia le soin d'accompagner les ambassadeurs du roi d'Angleterre. Plus tard il fut l'un des quatre commissaires chargés de remettre aux Anglais, en exécution du traité, les provinces de Poitou, Saintonge et Angoumois.

De ces indications biographiques, on ne trouvera nulle trace dans le roman. Antoine de La Sale a pris le nom d'un chevalier connu, mais il ne lui attribue que des actions imaginaires. Sans doute, le jugement de Froissart a déterminé son choix. D'ailleurs, il fait très bon marché de l'histoire : le roi qu'il nous présente n'a aucun des traits de Jean le Bon; il change à son gré le nom et la personne de la reine; et, en fait d'hostilités contre les Anglais, un pas d'armes lui suffit. Les mœurs, le costume, le luxe frivole qu'il étale complaisamment appartiennent plutôt au xv^e siècle qu'au

xiv^e, et certains personnages sont ses contemporains. Il nous peint, jusque dans ses moindres détails, la vie aristocratique de son époque; mais en même temps il la poétise. Son chevalier idéal nous semble porter avec lui les souvenirs et les espérances de la féodalité. Dans l'histoire, il n'a pas eu une grande page depuis Poitiers et Azincourt. Tandis qu'il troublait le royaume, qu'il n'avait pas su défendre, le vilain, humble mais tenace, faisait ses *enfances* (1) dans la chasse à l'Anglais. Mais l'exemple venu de si bas n'a pas abattu l'orgueil du chevalier : il ignore jusqu'aux noms des Guillaume l'Aloue, des Jean Boschier, des Philippe le Cat (2), ces héros et

(1) *Enfances*, premiers exploits d'un héros, dans les chansons de geste.

(2) L'histoire de Guillaume l'Aloue et de son lieutenant, le grand Ferré, paysans du Beauvaisis (1358-59), nous a été conservée par la chronique latine de Jean de Venette; il en est parlé dans les « Histoires de France » les plus récentes. — Jean Boschier, l'un des chefs des trente mille paysans normands qui, en 1434,

ces martyrs obscurs du patriotisme, défenseurs dévoués d'une terre pour eux si avare ! L'insuccès n'a pu mordre sur ses illusions : il leur donne carrière sur la lice d'un tournoi, à défaut d'un champ de bataille plus vaste et plus sanglant ; dans la pompe des cérémonies, il rêve aux brillantes chevauchées ; il se fait faire des récits de croisades. Le voilà déjà prêt pour cette fameuse conquête de Naples, où on le verra, tout enflé d'une vaine gloire, négliger de vaincre, dans sa hâte de triompher : prestigieux et mémorable triomphe, dont seul, trente années plus tard, le désastre de Pavie calmera l'ivresse !

Le faste surprenant que nous dépeignent les chroniqueurs et les romanciers

marchèrent sur Caen occupé par les Anglais. — Philippe le Cat ou le Chat, de Cherbourg, prit part à un complot ayant pour but de rendre cette place aux Français. Découvert, il fut décapité. On trouva chez lui, pour tout meuble, une harpe, son unique bien. (Voy. *La France pendant la guerre de Cent ans*, par Si-méon Luce.)

du xiv^e au xv^e siècle fait songer au costume d'apparat dont on revêt, pour un jour, les morts illustres. Ce n'est déjà plus la chevalerie, c'est son cadavre brillamment paré, que nous voyons là. Pendant près de deux siècles, la chevalerie a vécu du souvenir des guerres saintes; comme ses poètes, elle a refait sans cesse le même roman, sans voir qu'autour d'elle tout se modifiait. Maintenant deux siècles de progrès la séparent du monde qu'elle prétend diriger encore : elle est bien morte ! Ce qu'il en reste n'est qu'un vain spectacle, une représentation pompeuse du passé, bonne à divertir quelque temps une société nouvelle. A quatre cents ans de distance, éclairés par une longue suite d'événements, nous en jugeons ainsi, et notre tardive clairvoyance est sans mérite. Mais le contemporain des faits, l'homme qui vivait à l'ombre des grands, dans une petite cour rivale de la cour de France par l'orgueil et par le luxe, et qui se prétendait souveraine, celui-là voyait l'élan de la jeunesse où nous

voyons l'agitation sans but d'une vieille rebelle; il devait croire la chevalerie encore en sa fleur; et, heureusement pour son œuvre et pour notre plaisir, son récit a gardé le reflet de cette illusion.

*
* *

Antoine de La Sale, en effet, passa toute sa vie au service des grands feudataires de la Couronne. Né en 1398, en Bourgogne, s'il faut en croire l'auteur des *Mémoires de la République séquannoise* (1), en Touraine selon d'autres, nous le trouvons à Rome en 1422; à son retour, il devient secrétaire de Louis III d'Anjou; en 1424, il est viguier d'Arles, ville dépendante de ce seigneur. Plus tard il passe au service de René d'Anjou, roi sans couronne et troubadour. Ce fut alors qu'il composa le pre-

(1) Voy. la note de la page 295.

mier de ses livres : la *Salade*, ainsi nommée parce que en la *salade* se met plusieurs bonnes herbes. Il est dédié à Jean d'Anjou, fils de René, alors tout jeune homme, et dont Antoine de La Sale était gouverneur. *La Salade* n'est qu'un pot-pourri d'ouvrages d'éducation, où l'on trouve réunis un traité de morale d'après Cicéron, une chronique des rois de Sicile dont Jean était l'héritier, puis de nombreux détails sur le cérémonial des cours, le blason, l'art de la chevalerie, etc. A tout cela, La Sale, en bon précepteur, n'oublie pas de joindre la récréation nécessaire à tout écolier, une merveilleuse histoire, intitulée *le Paradis de la reine Sibille*. On a de la *Salade* deux éditions, la première sans date, la seconde publiée en 1527 par Philippe le Noir. — C'est de 1450 qu'est daté le petit livre des *Quinze Joyes de Mariage*, attribué par plusieurs critiques à notre auteur. — Les *Cent Nouvelles nouvelles* suivent les *Quinze Joyes* à faible distance; Antoine de La Sale y est donné pour le narrateur de la 50^e nouvelle et qualifié *premier maistre*

d'hostel de monseigneur le duc (de Bourgogne). Cette nouvelle est plus que grivoise et, à notre sens, la moins avouable du recueil. Peut-être est-ce une raison pour attribuer à La Sale la paternité du livre : il aurait ainsi, par probité d'auteur, pris à son compte un récit dont personne n'eût envié d'être le parrain. — Il a donné à son dernier ouvrage son propre nom pour titre : *Lasale*. Il a dédié cet écrit, terminé en 1461, deux années après le *Petit Jehan de Saintré*, au comte de Saint-Pol, dont il élevait alors les trois fils. — N'oublions pas une *Addition extraite des cronicques de Flandres* : c'est une courte relation de la victoire remportée en 1340 par Eudes, duc de Bourgogne, sur Robert d'Artois; l'auteur y a joint les lettres de défi d'Édouard III, roi d'Angleterre, à Philippe de Valois. Cet opuscule, ainsi qu'on le verra plus loin, semble avoir été fait pour remplir quelques pages laissées libres dans le manuscrit original du *Petit Jehan de Saintré*; c'est ainsi, selon nous, qu'il faut comprendre le titre d'*Addition*.

*
* *

L'*Hystoyre et plaisante cronicque du Petit Jehan de Saintré et de la jeune Dame des Belles cousines*, dont la Bibliothèque nationale possède trois manuscrits, porte la date de 1459. Dans le plus correct et le plus complet de ces manuscrits (anc. fonds, n° 7569), elle est suivie de l'épître dédicatoire que nous reproduisons en tête de notre édition; puis viennent à la suite le roman de *Floridan et Ellinde*, traduit du latin de Nicolas de Clamanges par Rasse de Brinchamel, et l'*Addiction extraite des cronicques de Flandres* que nous avons mentionnée plus haut; elle porte la signature d'Antoine de La Sale. Le tout est précédé d'une lettre d'envoi adressée à Jean d'Anjou et relative aux trois ouvrages.

Le xvi^e siècle vit paraître six éditions du *Petit Jehan de Saintré*. La première, imprimée par Michel Le Noir (Paris, 1517, in-folio), a servi de modèle aux

suivantes. Elle renferme les trois ouvrages contenus au manuscrit 7569 ; mais elle est fort incorrecte, comme toutes les éditions de cette époque, qui fut pour l'imprimerie un temps de fièvre.

Cette édition fut réimprimée telle quelle en 1520, 1523, 1528, 1533 ; la sixième, sans date, est de Jehan Trep-perel, qui reproduisit purement et simplement les précédentes. Le xvii^e siècle, tout occupé de son propre culte, parut ignorer qu'il y eût eu une littérature française avant Malherbe, et il nous faut descendre jusqu'à l'année 1724 pour trouver une nouvelle édition du *Petit Jehan de Saintré* ; elle reproduit, d'ailleurs, avec toutes ses incorrections, le texte des éditions du xvi^e siècle, auquel Gueulette a joint des notes souvent fort hasardées. Enfin deux éditions ont vu le jour en notre siècle. La première, parue en 1830 chez Firmin-Didot, marque un progrès sur les précédentes ; cependant elle renferme encore nombre d'incorrections, et même des contresens que le dernier éditeur, M. Marie Guichard,

s'est complu à signaler. Pour nous, sans suivre M. Marie Guichard sur ce terrain, nous nous contenterons de dire que son édition (Paris, Gosselin, 1843) est la seule, jusqu'à ce jour, qui renferme un texte suffisamment bon du *Petit Jehan de Saintré*. Il a cru devoir faire quelques corrections au texte des manuscrits ; nous les avons adoptées, en nous réservant de signaler les plus importantes dans nos notes. Nous avons aussi, à notre tour, corrigé un petit nombre de fautes trop évidentes pour n'être pas des erreurs de copie (1). Mais nous avons scrupuleuse-

(1) Ainsi, page 66, le texte des manuscrits donne : *Gardez vous bien que dame ou damoiselle ne soit blasmée pour vous, ne pour autre femme ;* nous avons mis *ne autre femme*. — Page 181 : *Je suis Jehan de Saintré, venu au jour et heure que le très excellent prince..., ainsi qu'il nous a ordonné ;* nous avons supprimé *ainsi qu'il*. — Ailleurs le texte portait *planter* au lieu de *planté* (Voir au Glossaire), *ceur* pour *cueur*, *donray* pour *donrez* (p. 102), *vindre* pour *vindrent*, *eul suffist* pour *eust suffi* (p. 218), des singuliers pour des pluriels, des masculins pour des féminins, etc....

ment respecté les leçons douteuses, et notamment celles qui nous ont paru dériver des anciens usages. En effet, la transformation de la grammaire, au xv^e siècle, n'a pas été l'œuvre d'un jour, et la grammaire du moyen âge a laissé longtemps des traces. On en trouvera quelques-unes dans ce roman : c'était notre devoir de les conserver.

GUSTAVE HELLÉNY.

L'HYSTOYRE ET PLAISANTE CRONIQUE
DU
PETIT JEHAN DE SAINTRE
et de la jeune dame
DES BELLES COUSINES



L'ACTEUR,

A vous, très excellent et puissant prince, monseigneur Jehan d'Anjou, duc de Calabre et de Lorraine, marchis et marquis du Pont, et mon très redoubté seigneur.

Se aucunement, pour trop ou peu escripre, j'avoye failly; ce que de legier pourroye faire, actendu que ne suis saige ne aussi clerc, il vous plaise, aussi à tous et à toutes, le moy pardonner; car maintes fois tel fait du mieulx qu'il peut, qui ne fait gueres bien, dont n'est mye merveilles, moy qui suis et ay tousjours esté rude et de gros engin en maintien, en faiz et en diz. Mais, pour accomplir voz prieres qui, entre tous les seigneurs, me sont entiers commandemens, j'ay fait escripre ce livre, dict

SAINTRÉ, que en façon d'une lectre je vous envoie, en vous suppliant que le preignez en gré. Et sur ce, pour le present, mon très redoubté seigneur, aultre chose ne vous escripts, fors que si très humblement, comme je sçay et puis, me recommande à vostre très bonne et desirée grace où que je soye; et prie le Dieu des Dieulx qu'il vous doint entiere joye de trestous voz desirs. Escript à Genepe en Brebant, le xxv^e jour de septembre, l'an de nostre Seigneur mil CCC cinquante et neuf.

Vostre très humble et très obéissant
serviteur,

ANTHOINE DE LA SALE.



L'HYSTOYRE
ET PLAISANTE CRONICQUE
du
PETIT JEHAN DE SAINTRE
ET DE LA JEUNE DAME
DES BELLES COUSINES

CHAPITRE PREMIER

Comment Jehan de Saintré servoit en la court du roy Jehan de France d'enfant d'honneur et de paige seullement, allant après le roy. Et premierement de madicte dame des Belles Cousines, et de Saintré.

OU temps du roy Jehan de France, filz aîné du roy Phelippes de Vallois, estoit en sa court le seigneur de Pouilly en Touraine, qui en son ostel avoit ung très debonnaire et gracieux jouvencel

nommé Jehan, et aisé filz au seigneur de Saintré, en Touraine aussi. Lequel jouvencel, par sa debonnaireté, vint en grace au roy, et tellement que il le vult avoir en sa court, car il estoit encore bien jeune, l'ordonna à estre son paige, pour seullement après luy chevauchier, et au sourplus servir en salle comme ses aultres paiges et enfans d'honneur. Lequel Jehan de Saintré, sur tous les aultres paiges et nobles enfans, servoit ung chascun à table illecques très dilligemment, et assez plus que nulz des aultres, et especialement les dames; en tous les plaisirs, honneurs et services que elles luy commandoient, il le faisoit à son pover; du sourplus, selon son aage de xiiij ans, estoit prompt, habille et hardy jouvencel, feust pour servir ou chevauchier ung bien rigoureux coursier, feust à chanter, à danser ou à jouer à la paulme, à courir, à saillir, et à tous aultres affaires et esbas qu'il veoit aux hommes faire; à toutes choses celui jouvencel se vouloit bien et joyeusement employer, combien que sa personne estoit et feust toujours linge et menue. Mais son cueur estoit entre les aultres tout fer et acier. Par lesquelles habillitez et douceurs, courtoisies et debonnairetez, estoit si très bien amé, prisé et loué du roy, de la royne, des seigneurs, des dames et de toutes gens, tant que chascun jugoit et disoit que vraiment il seroit

bien ung des renommez gentilz hommes de France, se il vivoit. Et vraiment ainsi fut il, car, à son trespassement de ce monde, il fut tenu des chevaliers le plus prudent et vaillant, ainsi que de une partie de ses fais cy, après l'istioire fera mencion.

CHAPITRE II

Comment en la court de la royne de France estoit une jeune dame qui point ne se vouloit remarier, nonobstant qu'elle en fut fort sollicitée. Et des responcez qu'elle faisoit touchant les dames anciennes.

L'ACTEUR. — En celui temps, en la court de la royne Bonne de Bouesme, femme dudict roy Jehan, avoit une assez jeune dame vefve, qui des Belles Cousines de France estoit : mais de son nom et seignourie l'istioire s'en taist, à cause de ce que cy après pourrez veoir et oyr. Laquelle dame, oncques puis le trespas de feu monseigneur son mary, ne se vouldt remarier pour

quelque occasion que ce feust, ou pour ressembler aux autres vrayes vefves de jadis, dont les histoires romaines, qui sont les suppellatives de toutes, font tant de glorieuses mentions ; desquelles pour lors je me passe pour abregier ma matiere et venir à mon propos de ceste dame, qui oncques puyt qu'elle fut vefve, à nul mary ne se vouldt accompaignier. Si me semble, de prime face, que elle vouloit ensieuvir les anciennes vefves de jadis ; si comme les histoires dient que les Romains avoient une très loable coustume de très grandement exaulcier, loer et honnorer les bonnes femmes vefves, celles qui, après le trespas de leurs premiers maris, jamais plus ne se vouloient remariier ; ains pour la très grande et loyalle amour qu'elles leur portoient, vouloient garder honnesteté et entiere chasteté. Et de ce dit l'Apostre en sa premiere Epistre *ad Thymotheum*, ou V^e chapitre : Honnore les vefves. Celles ne sont droictes vefves, qui ne se remariient, pour ce qu'elles ne treuvent à qui ; c'est assavoir à l'empire de leur delict ou aussi à leur prouffit, ou pour aucune autre cause ; et ne le font mie pour l'amour de Dieu, ne pour l'amour qu'elles avoient à leurs premiers maris ; comme les aultres qui ne se veullent acompaignier à pires ne à meilleurs. Si comme dit Virgille au quart livre de Eneas, lequel Eneas tant

ama Dydo que il en mouroit ; mais Dydo de son amour ne tenoit compte, car tant avoit amé et encore amoit son mary tout mort, qu'elle ne le pouvoit oublier ; et à Anne sa sœur, quant elle lui parloit de marier, disoit les paroles qui s'ensuivent :

*Ille meos primus qui me sibi junxit amores
Abstulit, ille habeat secum, servetque sepulchro.*

Duquel vers la sentence est telle : Celui qui premier me joignist à lui, laisse moi ! il emporta mes vraies amours, lequel je vueil qu'il les ait tousjours, et qu'il les garde en son sepulcre avecques lui. Les Romains, ainsi qu'ilz honnoient de couronnes ceulx qui faisoient les grans vaillances d'armes, si comme celui qui premier passoit le fossé ou le palis de l'ost aux ennemis, estoit couronné de la couronne Valere, et celui qui premier montoit sur l'eschielle et sur les murs, à l'assault d'une cité ou chastel ou ville, estoit couronné de la couronne Muralle, et ainsi des aultres vaillances pareillement avoient ilz acoustumé ; et semblablement couronnoient ilz très solemnellement les femmes vefves, qui pour l'amour et honneur de leurs marys premiers ne se vouloient plus marier et vouloient honnestement garder leur chasteté, de la couronne de Chasteté, qui estoient trop plus honnorées

que les aultres vefves n'estoient. Et sur ce dist saint Jerosme au second livre, parlant contre Jovinian, de celles vefves, et met exemple de plusieurs qui ne voudrent nulz secons maris; si comme de Marcia qui estoit fille de Cathon, qui sans cesser estoit en deuil de son mary. Ses amis en la reconfortant lui demandoient et disoient : « Las! et quant cessera vostre dueil? » Et elle leur respondi qu'il cesseroit le très benoist et dernier jour qu'elle mourroit. Encore recite d'une aultre nommée Lucia, qui jour et nuyt ne cessoit de plourer et ramentevoir son bon mary mort; et pour la jecter hors de son deuil, son pere luy parla d'un aultre nouvel mary. « Helas! dist elle, sire, pour Dieu, ne m'en parlez plus. » Et quant son pere la blasmoit de ainsi jeune vefve demourer, elle, pour conclusion, luy respondoit : « Sire, j'amoye tant cestuy, que je ne pourroye jamais nul aultre tant soit peu amer; et se, par ma desordonnée simplesse, je en prenoye ung qui me feust bon, jamais mon cueur, pour doubte de le perdre, joie ne pourroit avoir; et s'il m'estoit fier ou rigoureux, ma doloureuse vie finiroit brièvement. » Dont par ainsi vult en cest estat toute sa vie demourer. Et maint biaux aultres exemples met ledit benoit saint Jherosme, desquelz je me delaisse, car là les pourra veoir qui veult. Entre lesquelz exemples de mariage, il en met

ung aultre, qui est riabie au iiii xx xvj de son Epistre. C'est d'une femme à Rome, qui ne fut point de ces très parfaictes vefves ; car elle espousa xxij maris, dont il advint que par aventure se trouva ung homme de la ville qui avoit eu xx femmes espousées : desquels à grant riz et à grant feste le mariage se fist, dont le peuple de Rome en eut grant soulas et joye, desirans veoir lequel d'eulx l'autre surmonteroit. Si advint que la femme morut premier. Alors vindrent tous les gallans de Rome qui lui baillèrent en sa main une branche de lorier, en signe de sa victoire sur celle qui avoit desconfit xxij maris, et sur son chief, en signe de grant joie, luy misrent ung chappel de rame vert ; et ainsi le menerent par la ville à tambours et busines en le acompaignant, cryant par tout : « Vive, vive Palmo, qui a desconfit la femme aux xxij maris. » Et cy donrray fin à ces exemples pour revenir à l'istoire de ma dame et du petit Saintré.

CHAPITRE III

Comment ladite jeune dame delibera en soy de faire renommer le petit Saintré, et le fist appeller en sa chambre, l'interrogant qui estoit sa dame par amours; de laquelle chose le petit Saintré fut tout honteux et ne respondoit parolle du monde, fors qu'en la fin dist qu'il n'en avoit point.

L'ACTEUR. — Ceste dame, comme dit est, ayant emprins pour quelque occasion que ce feust de jamais plus soy marier; et nonobstant ce, elle ayant son cueur en diverses pensées, entre lesquelles par maintes fois se appensa que vraiment elle vouloit en ce monde faire d'aucun jeune chevalier ou escuyer, ung renommé homme; et en celle pensée se arresta totalement. Si regarda par plusieurs jours, çà et là, les bonnes meurs et condicions de tous les jeunes gentils hommes en enfans de la court, pour en choisir ung le plus à son gré. Mais à la parfin sur le petit Saintré s'arresta. Si advint que elle, pour veoir son maintieng et son parler, plusieurs fois publicquement de plusieurs choses l'arraisonna, dont, tant plus à lui elle parloit, et

tant plus lui venoit à plaisir. Mais d'aultre chose qui d'amours touchast, ne s'en osoit, ne vouloit descouvrir. Si advint ainsi que, fortune et amours l'eurent permis, ma dame venoit en sa chambre, qui sur ce jour avoit mis la royne à dormir, et en passant sur les galleries avec ses escuiers, dames et damoiselles, qui après elle venoient, trouva le petit Saintré là, qui regardoit bas en la court les joueurs de paulmes jouer. Et quant il vit les escuiers de ma dame passer, incontinent à genoulx se mist, faisant sa reverence. Mais quant ma dame le vit, elle fut bien aise, et en passant outre, lui dist : « Saintré, que faictes vous cy? Esse la contenance d'un escuyer de bien, que de non convoyer les dames? Or çà, maistre, passez et vous mettez devant. » Alors le petit Saintré, tout honteux, le viz de honte tout enflambé, soy inclinant, se met devant avec les aultres. Et quant ma dame le vit devant, alors s'en alla tout en riant avecques ses femmes et leur dist : « Mais que soyons en la chambre, nous rirons. » Lors dist dame Jehanne : « Ma dame, et de quoy? — De quoy, dist ma dame, vous verrez tantost la bataille du petit Saintré et de moy. — Helas! ma dame, dist dame Katherine, et que a il fait? il est si bon filz. » Et entendisque ces parolles estoient, ma dame en sa chambre entra, alors dist à tous ses gens : « Allez deshors entre vous

hommes, et nous laissez icy. » A ces parolles chascun saillit dehors, et le petit Saintré à genoulx print congié; et quant ma dame le vit à genoulx, elle lui dist : « Vous demourrez, maistre, vous n'estes pas au compte des hommes ; je vueil cy parler à vous. » Alors la porte fut close. Ma dame, assise sur les piés du petit lit, le fist entre elle et ses femmes venir; et lors print sa foy de lui dire de toutes ses demandes la verité. Mais le povre jouvencel qui ne pensoit pas à ce où ma dame vouloit venir, si lui promist, et en ce faisant pensoit : « Las ! que ay je fait ? mais que sera cecy ? » Et en ces pensemens, ma dame, en soubzriant à ses femmes, lui dist : « Or çà, maistre, par la foy que j'ay de vous, dictes moy tout premier combien il y a que vous ne veistes vostre dame par amours ? » Et quant il oy parler de dame par amours, comme celui qui oncques ne l'avoit empensé, les yeulx lui lermoyent, le cueur lui fremist, et le viz lui palist, si qu'il ne sceut ung seul mot sonner. Alors ma dame lui dist : « Et qu'esse cy ? maistre, et que veult dire ceste chiere ? » Les autres dames, qui entour rioyent, lui dirent : « Et, Saintré, mon amy, pourquoy ne dictes vous à ma dame, puis quant vostre dame ne veistes ? ce n'est pas grant demande ; » et tant le presserent, qu'il dist : « Ma dame, je n'en ay point. — N'en avez vous point ? dist

ma dame, et qui seroit la bien heureuse qui ung tel ami aroit? peult bien estre que n'en avez point, bien le croy; mais de celle que plus vous aimez, et voudriez que feust vostre dame, puis quant ne la veistes vous? » Le petit Saintré, qui, comme dit est, n'avoit senty ne gousté des amoureux desirs nullement, dont par ce avoit perdu toute contenance, fors de entortiller le pendant de sa sainture entour ses dois, sans mot parler fust longuement; et quant ma dame veit qu'il ne respondoit riens, si lui dist: « Et, beau sire, quelle contenance est la vostre? Ne dictes vous mot? Se je vous demande puis quant ne veistes celle que plus desirez à estre sien, je ne vous fais nul tort. » Alors dame Jehanne, dame Katherine, Ysabel et les autres, qui de ce toutes rioyent, en heurent pitié. Lors dirent à ma dame: « Il n'est pas ores pourveu de vous faire telle responce, mais se il vous plaist ceste fois lui pardonner, il la vous fera demain. — Demain, dist ma dame, ains qu'il parte d'icy, je le vueil sçavoir. » Alors toutes lui dirent, l'une « mon filz, » l'autre « mon amy, » et l'autre « petit Saintré, dictes sceurement à ma dame puis quant ne veistes vostre dame, ou aultrement vous estes son prisonnier. » Et quant il fut bien d'elles tout assailly, alors il dist: « Que voulez vous que je vous dye? quant je n'en ay point, et se j'en eusse,

je le diroye volentiers. — Dictes sans plus, dirent elles, de celle que plus vous amez. — De celle que plus j'ayme, dist il, c'est ma dame ma mere, et après Jacqueline ma soeur. » Alors ma dame lui dist : « Sire, je n'entens point de vostre mere, ne de vostre soeur ; car l'amour de mere, de soeur et de parens est toute differente à celle de dame par amours ; mais je demande de celles qui riens ne vous sont. — De celles qui rien ne me sont, dist il, sur ma foy, ma dame, je n'en ayme nulle. » Alors ma dame lui dist : « Vous n'en amez nulle ? Ha ! failly gentil homme ? Et dictes vous que n'en amez nulle ? A ce cop congnois je bien que jamais ne vaudrez riens ; et failly cueur que vous estes, d'où sont venues les grans vaillances, les grans emprises et les chevalereux fais de Lancelot, de Gauvain, de Tristan, de Giron le Courtois et des autres preux de la Table Ronde ; aussi de Ponthus et de tant d'autres si très vaillans chevaliers et escuyers de ce royaume, et autres sans nombre, que je bien nommeroye se j'avoye temps, sinon par le service d'amours acquerir, et eulx entretenir en la grace de leur très desirée dame ; dont j'en congnoys aucuns qui, pour estre vrais amoureux et bien servir loyaulment leurs dames, sont venus en si hault honneur, que à tousjours en sera nouvelle ; et s'ilz ne l'eussent esté, d'eux ne seroit plus de conte ne

que d'un simple compaignon. Et vous, sire, dictes doncques que vous n'avez dame, ne desirastes oncques de l'avoir; et puisque ainsi est, comme le plus failly des aultres, vous en allez. » Lesquelles parolles par ma dame dictes en soubzriant, les dames congneurent bien que combien que feussent vrayes, que n'estoient que pour farcer. Mais de ce si très crueux congié le povre Saintré qui ne pensoit pas moins que estre deshonnouré se print merveilleusement à plourer. Alors ma dame Jehanne, dame Katherine, Ysabel, et les aultres damoiselles en eurent grant pitié. Lors en riant, toutes à genoulx devant ma dame se misrent, priant que pour celle fois lui vouldist pardonner, en promettant pour lui que, devant deux jours, il auroit choisi et fait dame pour servir. « Nennil, dist ma dame, vous vous abusez que ung cueur failly feist jamais tant de bien. — Et si fera, ma dame, disent elles. — Qu'en dictes vous? sire, dist ma dame, vous dormez, seroit en vous jamais tant de bien comme elles dient? » Alors le povre desconfit print cueur : « Oil, ma dame, puisqu'il vous plaist. — Et ainsi me le promettez? — Oy, ma dame, sur ma foy. — Or doncques, dist ma dame, vous en allez, et faictes, comment qu'il soit, que demain vous soyez ès galleries à l'heure que je vous ay trouvé, ou aultrement tenez vous pour salué. » Alors le

povre desprisonné print à genoulx de ma dame congié et puis des aultres, lors s'en va; et au congié d'elles lui dirent : « Souviengne vous de la promesse, car nous sommes pleiges pour vous. » Et quant il fut hors de la chambre, lors commença tant qu'il peult à fuyr, comme s'il feust de cinquante loupz chassié. Ma dame et ses autres dames, qui sur jour dormir devoient, ne cesserent de rire et raisonner du grand effroy qu'il avait eu en son logis, et tant en rirent et raisonnerent, que vespres sonnerent, et sans dormir les convint lever. Et quant Saintré eut les autres enffans ses compaignons trouvés, Dieu scet s'il leur compta de ses adventures nouvelles. Lors de la grant joye qu'il avoit d'estre eschappé, peu à peu sa promesse oublia, fors de tant qu'il veoit ma dame et ses aultres femmes qu'il fuyoit comme le venin, dont elles s'en rioyent par grand delit. Mais, une des fois au disner, les deux dames estant à table le veoient çà et là par les tables servir toutes les aultres dames et damoiselles, comme il avoit acoustumé, fors que elles seulement; si le firent à elles venir, puis luy dirent : « Et, beau sire Saintré, à quel jeu vous avons nous perdu? Vous nous souliez servir comme les autres, et ores vous nous fuyez? — Mes dames, dist il, baissant les yeulx de honte, sauf vostre grace; » et en disant ce, il s'en partit. Alors commença

le ris moult longuement de l'une à l'autre. Ma dame, qui estoit assise au bas bout de la table du roy et de la royne, d'aventure vit devant elle le petit Saintré, et vit aussi comment elles rioyent après lui ; si leur demanda, après que les tables furent levées, ce que le petit Saintré leur avoit dit de quoy elles tant rioyent. Lors lui dirent comment il servoit toutes les dames fors que elles, et ce qu'elles lui avoient dit et ce qu'il avoit respondu en passant oultre. « Or, laissez moy faire, dist ma dame, encore en rirons nous plus avant, mais que ma dame soit couchiée. » Et quant vint au vin de congié prendre, ma dame qui vit le petit Saintré portant une tasse à servir, le fist à soy venir et luy dist : « Saintré, allez vous en ès galleries et là me attendez, comment qu'il soit, car je vous vueil envoyer en la ville pour moy faire ung plaisir, et vous serez bien mon amy. » Le petit Saintré, qui oyt ma dame si doucement parler, fut bien content, et pensa qu'elle eust toute sa promesse mis en oubly, si lui dist : « Ma dame, très volentiers. » Alors le roy se retraist, et aussi fist la royne. Lors le petit Saintré s'en alla aux galleries, si ne tarda guaires que le roy ne se mist à dormir, et que ma dame revint en sa chambre où elle trouva le petit Saintré, comme elle lui avoit dict ; lors lui dit : « Allez devant avecques les aultres. » Et quant elle fut

en sa chambre, assise sur les piez du petit lit, dist à tous ses escuiers et aultres qu'ilz s'en allassent hors. Alors appella le petit Saintré et lui dit : « Or, sire, vous ay je ci, où est vostre foy, que par deux foys me promistes, et par quatre jours vous fuyez de moy? quelle vengeance et quelle pugnicion doit on prendre d'ung homme qui a menty sa foy? » A ces dures et cruelles parolles ne pensa moins que d'estre mort; lors tout à coup à genoulx et à mains jointes se mist, requerant à ma dame mercy, disant que vrayement il avoit eu grandement à faire. Ma dame, qui derriere luy veoit ses femmes rire, s'en tenoit le plus qu'elle pouvoit, si luy dist : « Or bien, sire, prenons qu'il soit ainsi comme vous dictes; en ces quatre jours avez vous dame choisie? » Et quant il ouyt de ce parler, il ne pris plus sa vie que sa mort; lors commencerent ses yeulx à plourer, son viz à pallir et à tressuer comme celluy qui avoit jà tout ce oublié, si ne sceut plus que dire, ne comment soy excuser. Lors ma dame, qui le vit en tel party, en soubzriant à ses femmes dist : « Que diriez vous d'ung failly escuyer, qui par deux fois a donné sa foy à une dame, comme vous savez bien, et pour si peu de chose il a failly; quelle pugnicion doit il avoir? Et à vous, dame Jehanne, j'en demande tout premier. » Et quant le povre gentil homme

se ouyt ainsi de ma dame reprocher, il ne cuyda pas moins que à ce coup il ne fust perdu et à tousjours deshonoré. Lors à jointes mains, estans toujours à genoulx, requist de rechief à ma dame, pour Dieu, mercy; puis se tournoit envers les aultres dames que toutes priaissent pour luy. Ma dame, qui de tout ce estoit très aise, et tant plus qu'elle le veoit si humble et innocent, l'aymoit trop mieulx, pensant que se elle pouvoit par bonne façon en son service l'acquérir, qu'elle le mettroit bien à son ploy; et neantmoins vult elle à dame Jehanne et aux autres sa demande entretenir. Dame Jehanne esmeue de toute pitié, ne prenant pas garde, non faisoient nulles des autres, là où ma dame vouloit saillir, luy dist : « Helas ! ma dame, s'il a failly dans sa promesse, vous avez ouy son excuse, pour les grans affaires qu'il a euz, dont il vous en requiert, à genoulx et à mains jointes, très humblement mercy, et aussi faisons nous toutes pour luy. — Et vous, dame Katherine, qu'en dictes vous ? — Helas ! ma dame, je ne sçay que dire, fors que il s'en repent, et le trouverez ainsi ; si vous requiers pour luy mercy. — Et vous, Ysabel, qui estes la plus ainsnée, qu'en dictes vous ? — Ma dame, j'en dy comme les aultres ; et oultre plus vous sçavez que le povre prisonnier vous confessa loyaulment qu'il n'avoit point de dame advisée

pour servir, dont je le croy mieulx que aultrement; ma dame, pardonnez luy, car il a bien à penser le cueur d'ung nouvel amant deliberé de loyaulment servir, comme le sien est, de bien choisir, et soy du tout asservir aux entiers commandemens de sa dame, s'il n'est d'amours bien grandement amy; mais sur ma foy, ma dame, je croy que amours il ne vit oncques, ne ne parla à luy; et n'est il pas vray, dit Ysabel, mon filz? — Par ma foy, Ysabel ma mere, ouy, que oncques je ne parlay à luy, ne ne le vy. — Or regardez doncques, ma dame, ce povre suppliant qui oncques ne le vit, ne le congust, ne parla à luy, comment pourroit si tost avoir choisi dame? car ceulx qui jà en ont esté accointez, doubtant le reffuz, y font de pensemens assez. Et pour ce, ma dame, je dis que vrayement pour ceste fois il luy doit estre pardonné. — Et qu'en dictes vous, Marguerite, Aliz et vous aultres femmes? Je vueil que chascune en dye son dit. » Alors toutes ensemble s'arrestèrent à l'oppinion de Ysabel, comme la plus ancienne et qui plus avoit veu et avoit ouy.

CHAPITRE IV

Comment le petit Saintré respondit à la dame, comme contrainct, et celluy qui point n'avoit encor gousté les estincelles d'amours, que Matheline de Coursy estoit sa dame, qui n'avoit encore que dix ans.

LA DAME. — Or dit ma dame : « J'ay oui de vous toutes voz oppinions qui, au regard de la foi mentie et du pardon, sont de l'opinion de Ysabel, et quant à moi, pour l'amour de vous toutes, pour ceste fois je luy pardonne ; mais d'une chose vous advise, qu'il a failly en tant qu'il devoit avoir dame choisie, et ne l'a point faict. — Ha ! ma dame, dirent elles en riant, et que si. — Et que non, dit ma dame. — Et, dirent elles, cuydez vous, ma dame, qu'il ait mis quatre jours, fors que pour bien choisir celle qu'il voudra servir ? — Et que non, dit ma dame. — Et que si, dirent elles, nous nous faisons fortes pour luy. » Lors elles lui dirent : « N'est il pas vray, mon filz ? » Le povre tout esbahi, et ainsi jehenné d'elles, force luy fut de dire oui. Lors ma dame luy dit : « Or, estes

vous homme de bien ? mais que ainsi soit ; or, nous dictes qui elle est, et vous serez bien mon amy. » A ces paroles luy fut force d'en nommer une ; dont ses yeulx commencerent à plourer, et sa vive face à couleur changer, comme celuy qui oncques ne l'avoit empris. Alors ma dame à ses femmes dit : « Et ne vous le disois je pas bien, qu'il n'a ce dit fors pour eschapper ? — Helas ! dirent elles, Saintré, dites le à ma dame seurement ; et vous, ma dame, tirez le à part, si vous le dira ; cuidez vous que ung vray amant doibve ainsi publier le nom de sa dame, qu'il ayme tant ? » Alors ma dame luy dit : « Or vous tirez donc ça, » et puis lui dist : « Saintré, mon ami, icy n'a que vous et moy qui nous peust ouyr ; or, le me dictes seurement. » Et quant le petit Saintré veit qu'autrement n'en peut eschapper, luy dit : « Helas ! ma dame, qu'il me soit pardonné, et puis que tant en voulez savoir. » En pensant de laquelle il diroit, ainsi que nature desire et actraict les cueurs à son semblable, se appensa de nommer une jeune fille de la court et de l'aage de dix ans. « Lors, dit il, ma dame, c'est Matheline de Coursy. » Et quant ma dame ouyt nommer Matheline de Coursy, pensa bien que amours d'enfance et ignorance y ouvroit. Neantmoins plus que par avant fist un grand effroy en son logis, et luy dist : « Or, voy je bien que vraye-

ment vous estes un très failly escuyer de avoir choisi Matheline à servir. Je ne dy pas que Matheline ne soit une très belle fille et de bon lieu et meilleur, sire, qu'à vous n'appartient ; mais quel bien, quel prouffit, quel honneur, quel subcide, quel advantaige, quel confort, quel ayde et quel conseil pour vous mettre sus, vous en peult advenir pour estre vaillant homme ? Quelz sont les biens que vous povez avoir de Matheline, qui n'est encore que ung enfant ? Sire, devez vous choisir dame qui soit de haut et noble sang, saige, et qui ayt de quoy vous ayder, et mectre sus à voz besongnes, et celle tant servir et loyaulment aymer, pour quelque peine que en ayez à souffrir, qu'elle congnoisse bien la parfaicte amour que sans deshonneur luy portez. Et ne creez que s'ainsi est que, au long aller, qui qu'elle soit, se elle n'est sur toutes la plus cruelle, ce que oncques je ne ouys, qu'elle n'ayt congnoissance, pitié, mercy et misericorde de vous, ou qu'elle ne vous en saiche très bon gré ; et par ainsi deviendrez homme de bien. Aultrement je ne donne de vous, ne de voz faitz une pomme. Ainsi que sur ce dit le Maistre, en sa balade qui dit ainsi :

« LE MAISTRE.

« C'est tout que d'aymer loyaulment,
En ung tout seul lieu c'est assez ;

Quiconques le fait autrement,
Il est de bien faire lassez
Et tous ses beaulx faitz sont passez.
Car ung cueur qui par tout s'espert
Et requert dames de tous lez,
En doit avoir petite part.

« Se part en a, c'est meschamment,
Et vient de lieux mal renommés,
Et ne se peult faire autrement;
Et puis quant il s'y est boutté
Et s'est après bien advisez,
Dieu scet s'il congnoist lors à part,
Comment des riches biens cellez
En doit avoir petite part.

« Celle part ne vault pas gramment,
Quant plusieurs s'y sont ahurtez;
N'amours n'accorde nullement
Que telles gens soient aimez,
Ains soient par tout diffamez;
Car ung cueur qui par tout s'espert
Et requiert dames de tous lez,
En doit avoir petite part.

CHAPITRE V

Comment la dame enseigna le petit Saintré de maintes bonnes choses et salutaires doctrines, touchant la maniere comment on doit fuyr les sept pechiez mortels.

ENCORE sur ce propos vous dis je plus, que celui qui entend à loyaulment une telle dame servir, je dis qu'il peult estre sauvé en ame et en corps, et veez cy la raison comment : au regard de l'ame nous devons sçavoir que qui se garde de pechier mortellement, qu'il est sauvé ; car les aultres pechiez veniels, par vraye confession, sont estaintz et anullez à bien peu de penitence. Dont pour soy garder de pechié mortel, s'il ayme ainsi que s'ensuit, il est sauvé.

« Et premier, au regard du pechié d'orgueil, l'amant, pour acquerir la très desirée grace de sa dame, s'efforcera d'estre doux, humble, courtoys et gracieux, affin que nul deshonneste parler ne-peust estre dit de luy. En ensuivant le dit du sage Talles de Milesie, qui dit ainsi :

Si tibi copia, si sapientia formaque detur ;
Sola superbia destruit omnia, si committetur.

« C'est à dire, mon amy : Se tu as habondance de richesses, se tu as sagesse, se tu as noblesse et toute perfection de corps, le seul orgueil, s'il est en toy, destruiect toutes les vertus. Et à ce propos dit Socrates :

*Quantumcumque bonus fueris, essendo superbus,
Totum depravat, te sola superbia dampnat.*

« C'est à dire, mon amy : Combien que tu soyes bon, se tu es orgueilleux, tout est gasté, ton seul orgueil te dampne. Et à ce propos dit encore Themistides, le philosophe :

*Ut non inferis, memor esto quod morieris ;
Unde venis, cerne quo vadis, te quoque sperne.*

« Affin que tu ne soies orgueilleux, souviengne toy que tu mourras. Regarde dont tu viens, et où tu vas ; si te despiteras.

« Et tant d'autres auctoritez qui trop longues seroient à escrire, desquelles à présent je me vueil delaisser pour venir à mon propos que ung vray amoureux, tel que je dis, les ensuyvra toutes pour acquerir la très désirée grace de sa très belle dame ; dont par ainsi bannira ce très desplaisant et abhominable pechié d'orgueil et de toutes ses circonstances, et se accompagnera de la très douce vertu de

humilité, dont par ainsi il sera de pechié quicte et sauve.

LA DAME. — « Et quant au deuziesme pechié, qui est de ire, certes oncques vray amoureux ne fut ireux. J'ay bien ouy que aucunes fois amours leur ont donné desplaisance pour les essayer ; mais ce n'estoit pas ire, s'ilz n'estoient feruz d'autre mal que d'amours. Et pour ce, mon amy, que ce pechié est à Dieu desplaisant, si est il à l'honneur et au corps de celluy qui l'est. Et pour ce vueilles le fouyr à ton pouoir et ensuivre le dit du philosophe qui dit :

*Tristiclam mentis caveas plusquam mala dentis ;
Segniciem fugias, nunquam piger ad bona fias.*

« C'est à dire, mon amy : Fuy tristesse de pensée plus que le mal des dens. Aussi fuy paresse, pour passer la douleur de ton cueur, et fay tousjours bien. Et sur ce propos dit Pitacus de Mitilene :

*Effugias yram, ne pestem det tibi diram ;
Juris delira, nutrix est schismatis ira.*

« C'est à dire, mon amy : Fuy courroux et ire, affin qu'ilz ne te baillent pas leur cruelle pestilence ; car ce sont les voyes qui font forvoyer du droit chemin, et sont nourrices de

tous scismes et divisions. Et à ce propos dit l'Évangile :

Non odias aliquem, sed eum potius tibi placā ;
 Quisquis odit fratrem, censetur ab hoc homicida.

« C'est à dire, mon amy : Que ne portes à nul ire, ne haine, mais que vous pacifiez à chascun ; car quiconques hait son prochain, il est homicide, comme dit l'Évangile. Et à ce propos dit saint Augustin, en une de ses Epistres, que tout ainsi que le mauvais vin gaste et corromp le vaissel s'il y demeure longuement, tout ainsi yre gaste et corrompt les cueurs où elle se tient. Et à ce propos s'accorde l'Apostre qui dit : *Sol non occidat super iracundiam vestram*. C'est à dire que le soleil ne se doit pas esconser sur vostre courroux, ne yre. Et encore à ce propos dit Cathon :

Impedit yra animum, ne possit cernere verum.

« C'est à dire, mon amy, que yre et courroux empeschent et aveuglent le couraige de la personne, en telle façon qu'elle ne peult regarder à ce qui est vray. Et pour ce, mon amy, que le vray amoureux, tel que je dis, est tousjours et doit estre joyeux, esperant que, par bien et loyaulment servir, en amours et en sa très desirée dame il trouvera mercy. Et par ainsi il

chante, dance et est joyeux en ensuivant le dit de Salomon, qui en la fin de son derrain livre conclud et dit : *Bene vivere et letari*. C'est à dire : Bien vivre et joyusement ; mais ce bien vivre ne s'entent pas seulement pour manger bonnes viandes, boire bons vins et dormir longues matinées et en bons lits, et le surplus vivre en tous delicts ; mais s'entend vivre premier avec Dieu, bien soy maintenir veritablement honnestement, et en ce joyusement. Dont par ainsi je dy que tous vray amoureux qui, pour acquerir la très desirée grace de leurs belles dames, fuient à tout pover ce très desplaisant à Dieu et au monde pechié d'ire, et se acompagne à celle très amoureuse vertu de pascience ; dont par ainsi sont du très desplaisant et envieux pechié d'yre quictez.

LA DAME. — « Et quant au troyziesme pechié qui est d'envye, ce vray amoureux, tel que je dis, jamais sur homme ne sera envieux, car s'il venoit à congnoissance de sa dame, il la perdrait vrayement ; car oncques dame d'honneur ne peust aymer homme envieux, se ne feust les bonnes vertus pour en estre le meilleur ; comme à l'eglise le plus devost, à table le plus honneste mengeant, en compaignie de dames le plus gracieux et plaisant, aux armes armigeres et aux armes courtoyses le plus vaillant, et de ce avoir envie pour faire

le mieulx et non autrement. Et à ce propos dit Seneque :

*Quid melius auro? jaspis. Quid jaspide? sensus.
Quid sensu? racio. Quid racione? modus.
Omnibus adde modum, modus est pulcherrima virtus.*

« C'est à dire, mon filz et amy : Quel chose est meilleur que l'or? jaspe. Quel chose est meilleur que jaspe? sens. Quel chose est meilleur que sens? raison. Quel chose est meilleur que raison? maniere; car maniere est la couronne de toutes vertus. Et encores à ce propos dit le philosophe :

*Filius ancille moratus plus valet ille
Quam regis natus, si non sit moriginatus.*

« C'est à dire, mon amy, que le filz de la chambriere, bien moriginé, vault assez plus que le filz d'ung roy qui est mal condicionné. Et encores à ce propos, pour entretenir les bonnes meurs, je vous recorde le dit du sage Solon d'Athenes qui dit ainsi :

*Per vinum miser, per talos et mulieres;
Hec tria si sequeris, semper egenus eris.*

« C'est à dire, mon amy, que par vin, par jeu de dez, et compaignie de femmes folles, de les hanter, serez tousjours povre, meschant e

malheureux, et hay de toutes bonnes gens. Et encores de ce vil pechié d'envye dit Plato :

*Invidiam fugere studeas et amore carere
Que reddit siccum corpus, faciens cor inicum.*

« Estudie toy à fuyr envye, car envye est sans amour, et seiche le corps, et fait le cueur inique et mauvais ; et pour ce, mon amy, fuyt tous vices et toutes gens vicieux ; car amours et dames d'honneur le commandent à tous vrays amoureux, en ensuyvant le dit du philosophe qui dit :

Malo mori fame quam nomen perdere fame.

« C'est à dire, mon bon amy : J'ayme mieulx mourir de fain que perdre le nom de bonne renommée. Dont pour conclure, mon amy, souviene vous de ce dit que j'ay plus chier mourir de fain, que perdre ma bonne renommée. Et encores au propos de ce dit du philosophe, le sage Chilon de Lacedemonie dit ainsi :

*Nobilis es genere, debes nobilis magis esse ;
Nobilitas morum pluris est quam genitorum ;
Nobilitas generis mortem superare nequibit.*

« C'est à dire, mon amy : Se tu es noble de lignée, tu dois estre plus noble de vertu ; car la

noblesse des bonnes meurs vault trop mieulx que la noblesse des parens, et ne peult la noblesse, tant soit elle grande ne puissante, surmonter la mort; doncques pour estre ce vray amoureux que je dis, vous escheverez ce très deshonneste pechié d'envie, et vous vous acompaignerez de celle très glorieuse vertu de charité, qui est fille de Dieu et qu'il nous a tant recommandé comme dit est; si serez net, quitte et saulve, au regard de ce pechié.

LA DAME. — « Et quant au quatriesme pechié, qui est avarice; certes avarice ne vrayes amours ne pevent loger en ung cueur ensemble. Et se l'aver par quelque cause est amoureux, n'est point à croire que ce ne soit de meschant et vile chose, pour n'avoir cause de riens despendre. Mais le vray et loyal amoureux ne contendra que, à toute largesse, honnorablement servir sa dame et amours, pour soy tenir bien habillé, bien monté et toutes ses gens selon son estat. Et qui plus en fait qu'il ne peult, il en sera fol et mal content; car amours et dames d'honneurs n'ayment nulz amoureux prodigues, ne telz gens; mais aiment ceulx qui selon leur estat se gouvernent honnestement; c'est assavoir pour eulx monstrier en armes, en tournois, en joustes et en toutes nobles assemblées, honnestement à leur pouvoir, sans fol despens, et qui de leurs biens

donnent pour Dieu aux plus nécessaires lieux, en ensuivant l'Evangile qui dit : *Beati misericordes : quoniam ipsi misericordiam consequentur. Mathei V. cap.* C'est à dire, mon amy : Bien sont heureux ceulx qui sont misericords ; car misericorde ilz ensuyvront. Et ainsi que dit Periander de Corinthe :

Ut sis preclarus, non sis cupidus nec avarus.

« C'est à dire, mon amy : Affin que tu soyes très clerc, ne soyez pas convoiteux, ne avaricieux, et eusses jà des richesses assez ; car homme de telle condition ne peult estre de nully aymé, ains est hay de tous. Et à ce s'accorde le philosophe qui dit :

Furtum, rapinam, fenus, fraudem, simoniam,
Causat avaritia, luctam, perjuriam, bella,
Radix cunctorum, sit nempe cupido malorum.

« C'est à dire, mon amy, que avarice est cause de larrecin, de rapine, d'usure, de fraude, de symonnie, de parjuremens, de batailles, et conclusion de tous les maux. Et à ce s'accorde Bias de Prienne qui dit ainsi :

Plus fiet perdendo cupidus, quam gaudet habendo ;
Et magis est servus, cum plus sibi crescit acervus.

« C'est à dire, mon amy : Le convoiteux plus pleure en perdant, qu'il ne s'esjouyst en ayant ; et plus amasse, et plus est serf et chetif. Et sur ce dit saint Augustin, que le cueur avaricieux est semblable à enfer ; car enfer ne scet tant engloutir des ames qu'il die : C'est assez. Et ainsi est de l'avaricieux, car se tous les tresors du monde estoient en son povoir, jamais ne diroit qu'il en eust assez. Et à ce propos dit l'Escripture : *Insatiabilis oculus cupidi, in parte iniquitatis : non saciabitur, etc. Ecclesiastici. Cap. XIV.* C'est à dire, mon amy : L'oeil du convoiteux est insaciable, et il ne sera pas saoul en partie d'iniquité. Et tant d'autres auctorités, qui se trouveroient très longues à dire, que pour le departir me fault laisser. Dont par ce, le vray amoureux, tel que je dy, pour acquerir la très désirée grace de sa très belle dame, toutes les acomplist, et laisse ce très desplaisant pechié d'avarice, et se acompaigne avec celle très douce et très amiable vertu de largesse qui est amye de Dieu, et honorée du monde ; et par ainsi est il sauvé.

LA DAME. — « Et quant au cinquiesme pechié qui est de paresse ; certes, mon amy, oncques vray amoureux ne fut paresseux ; car le très doux et amoureux penser qu'il a, jour et nuyt, pour acquerir la très désirée grace de sa très belle dame, ne le pourroit consentir. Car,

soit pour chanter, soit pour dancier, sur tous les aultres il est le plus diligent et le plus joyeux ; lever matin, dire ses heures, ouyr messe devotement, aller à la chasse et au gibyer là où les pouacres d'amours sont à dormir ; et lors fuit ce pechié, en ensuivant le dict du philosophe Epicurus qui dit :

Otia, vina, dapes caveas, ne sint tibi labes ;
Vix homo sit castus requiescens, et bene pastus.

« C'est à dire, mon amy : Eschieve oyseuse superfluité de vins et de viandes, affin qu'en luxure tu ne soyes souillé ; car la personne oyseuse et bien repeue, à grant peine, peut garder chasteté. Et encore de ce meschant pechié de paresse dict saint Bernard : *Vidi stultos se excusantes sub fortunam ; vix autem diligentiam, cum infortunis sociabis*. C'est à dire, mon amy : J'ay veu aucuns folz eulx excuser sur fortune, à peine trouveras que un diligent peust estre infortuné ; mais tousjours verras que de paresse et de infortune seront toujours acompaignés, Et à ce propos dit encores saint Bernard : *Revidere que sua sunt, quomodo sunt, summa prudentia est*. C'est à dire, mon amy, que revoir ses choses quelles et comment elles sont, est souveraine prudence. Et ne dit pas seulement veoir ses choses, mais revoir, et ce revoir

s'entend que nul ne le peut trop veoir. Et à ce propos dit encores Atheneus le poete où il dit :

*Otia sunt juvenum menti plerumque venenum ;
Et juvenum viciorum corpora, maxima causa.*

« C'est à dire, mon amy, que oysivetés sont souvent le venin de la pensée des jeunes gens ; car le corps des jeunes est especialle cause des vices. Et à ce propos dict Senecque :

*Pigritiam linque que dat mala tedia vite ;
Tedia virtutis fuge, nam sunt damna salutis.*

« C'est à dire, mon amy : Laisse paresse, laquelle donne à la vie mauvais ennuy, et fuy les ennemys et ennemyes de la chose vertueuse. Pour ce, mon amy, que les amoureux, telz que je dis, sont par telles vertuz saulvez, habandonnent ce très vil et maleureux pechié de paresse, pour eulx acompaigner avec la très resplandissante vertu de diligence, vous prie que soyez de ceulx. Et lors serez de ce maleureux pechié de paresse saulve et quicte.

LA DAME. — « Et quant au sixiesme pechié qui est de gueulle ou de gloutonnie, certes le vray amoureux n'en a tant soit peu ; car ce qu'il mange et boit n'est que pour vivre seullement sobrement ; ainsi que le philosophe dit que l'on doit seullement manger et boire pour vivre, et

non pas vivre pour boire et pour manger, comme les pourceaulx font; et sur ce le saige Tales de Milesnes dit :

Pone gule frenum, ne sumas inde venenum;
Nam male digestus cibus exstat sepe molestus.

« C'est à dire, mon amy : Metz le frain à ta bouche, affin que par elle tu ne preigne le venin; car habondances de viandes mal digerées sont au corps très nuysables venins. Encores sur ce dit le saige Solon d'Athenes :

Ne confunderis, nunquam vino replearis;
Villis diceris, nisi te vino moderaris.

« C'est à dire, mon amy : Tu ne soyes jamais remply de vin, affin que tu ne puisses estre confondu; car tu seras reputé à villain, se tu ne fais attremprance de toy ou vin, et du vin à toy. Encores sur ce propos de glouttonnie dict saint Bernard, es Moralles, que quant le vice de glouttonnie prend à seigneurir la personne, elle pert tout le bien qu'elle a jamais fait; et quant le ventre n'est retraits par droicte ordre de abstinence, toutes les vertuz sont en luy noyées. Et sur ce dict saint Pol : *Quorum finis interitus: quorum Deus venter est : et gloria in confusione ipsorum qui terrena sapiunt. Ad Philip. III, cap.* C'est à dire, mon amy, que la fin de ceulx qui

assavourent les choses terriennes, est la mort ; desquelz aussi font de leur ventre leur Dieu ; et ceste leur gloire sera d'ames, d'honneur et de corps leurs confusions. Si vous prie que ne soyez pas de ceulx ; ains ensuivez le dit de Avicenne, pour eschever tout ce que dit est :

*Sic semper comedas, ut surgas esuriendo ;
Sic etiam sumas moderate vina bibendo.*

« C'est à dire, mon amy : Mange toujours en telle maniere que quant tu te leveras de la table, ton appetit ne soit pas saoul, et aussi ton boire soit prins attrempeement ; dont par ainsi vivras par cours de nature très longuement, et seras en la grace de Dieu. Au regard de ce pechié, aussi d'amours et de vostre dame, et par ainsi aurez laissé ce très villain et deshonneste pechié de gueulle, et vous vous acompaignerez avec la très douce vertu de abstinence, fleur de toutes vertus, et lors serez de ce pechié quicte et saulve. Et si vous donneray fin au saulvement des vrays et loyaulx amoureux, touchant le sixiesme pechié mortel qui est de gueulle.

LA DAME.— « Et quant au septiesme pechié qui est de luxure ; vrayement, mon amy, ce pechié est au cueur du vray amant bien estaint ; car tant sont grandes les doubtes que sa dame n'en preigne desplaisir, qu'ung seul deshonn-

neste penser n'en est en luy ; dont par ainsi il ensuit le dict de saint Augustin qui dict ainsi :

*Luxuriam fugito, ne vili nomine fias,
Carni non credas, ne Christum nomine ledas.*

« C'est à dire, mon amy : Fuy luxure à ce que tu ne soyes brouillé en deshonneste renommée ; aussi ne croys point ta chair, affin que par pechié tu ne blesses Jesus Christ. Et à ce propos encores se accorde saint Pierre l'Apostre, en sa premiere Epistre où il dit : *Obsecro vos, tanquam advenas et peregrinos, abstinere vos à carnalibus desideriis que militant adversus animam. Prima Ep. II. cap.* C'est à dire, mon amy : Je vous prie, comme estrangiers et pellerins, que vous vous abstenez des delits charnels ; car ilz bataillent jour et nuyt à l'encontre de l'ame. Et à ce propos dict encores le philosophe :

*Sex perdunt vere homines in muliere :
Ingenium, mores, animam, vim, lumina, vocem.*

« C'est à dire, mon amy, que homme qui hante les folles femmes, pert six choses, dont la premiere est que pert l'ame, la seconde l'engin, la troiziesme ses bonnes meurs, la quatriesme sa force, la cinquiesme sa clarté, et la sixiesme sa voix. Et pour ce, mon amy, fuy ce pechié et

toutes ses circonstances, ainsi comme dit est. Cassiodore dict, sur le Psaultier, que vanité feist devenir l'ange dyable, et au premier home donna la mort et vuida de la bienheureté qui luy estoit octroyée, et que vanité est nourrisse de tous maulx, la fontaine de tous vices, la voye d'iniquité qui met home hors de la grace de Dieu. Et à ce propos dit David en son Psaultier en parlant à Dieu : *Odisti observantes vanitates supervacue, Psal. xxx.* C'est à dire, mon amy : Tu, mon seul Dieu, as hay et haiz tous ceulx qui gardent vanitez. Et tant d'aultres autoritez ont escript les saintz docteurs de sainte Eglise, et qui plus est, les philosophes, les poetes et aultres saiges payens, qui encores n'avoient senty la vraye cognoissance, la très sainte et très amoureuse grace de nostre vray Dieu, le saint Esperit, qui ont ce pechié tant blasmé, que les escripteures en seroient trop longues à reciter ; desquelles je me vueil passer pour ensuivre le surplus, fors seulement du dict de Boece, qui sur ce dict : *Luxuria est ardor in accessu, foetor in recessu, brevis delectatio corporis, et anime destructio.* C'est à dire, mon amy, que luxure est ardeur à l'assembler, puantise au departir, briefve delectation du corps, et de l'ame destruction. Et pour ce, mon amy, que ce pechié est si très deshonneste, le vray amoureux, come j'ay dit, pour doubte que sa dame

n'en preigne desplaisir, pour acquerir sa grace, à tout povoir le fuit ; et se, par vive contrainte d'amours, aucunement il y encheoit, tant et sy très tant sont les angoisseuses peines et dangiers pour les grans perilz et dangiers qui s'en pevent ensuivre, que les très angoisseux cueurs des loyaulx amans ont à souffrir, que ce ne leur doibt point estre compté à pechié mortel ; et se aucun pechié y a, vrayement il doibt bien estre estainct par lesdictes peines, qu'ilz en ont tant à souffrir ; dont par ainsi je puis bien dire que le vray amoureux, tel que je dy, de ce mortel pechié et de tous les aultres est quicte, franc et sauvé.

CHAPITRE VI

Comment la dame donne d'aultres enseignemens au petit Saintré, touchant les vertus, l'estat, et moyen de noblesse.

LA DAME. — « Et quant au sauvement du corps, que j'ay dit que le vray amoureux tel peut estre sauvé en ame et en corps. Après le sauvement des sept pechiez mortelz, qui

touchent à l'ame, je vous diray le sauvement du corps, et par plusieurs façons, dont le premier est sur le faict d'amours.

« Le vray et loyal amoureux, qui est gentilhome sain et nect de sens et de corps, et qui nuyct et jour tend à l'amoureuse queste et grace de sa très belle dame, et par les sept façons contraires aux sept pechez mortelz, si comme j'ay dict : laquelle dame sera, quant à honneur, la nompareille des autres ; j'appelle toutes dames, car toutes sont dames en amours ; prenons qu'elle n'ayt jamais volonté d'aymer ne luy, ne autre, par amours : si veult nature, droit et raison, qu'elle l'en doit trop mieulx aymer, priser et honorer ; et tellement que de son bien, de son honneur, et de tout son avancement elle en sera joyeuse, et par contraire, dolente de son desplaisir, quelque dame qu'elle soit. Et luy, pour quelque gentilhomme qu'il soit, tel que j'ay dit, de ses biens à son besoing ne luy fauldra jamais, ou elle de nature aultrement seroit villaine, ingrante et digne d'estre bannye de toutes gens de bien, et puis gectée au très grant et puant abisme du pechié de ingratitude, en ame et en corps ; combien que jamais n'en ouy parler de nulle que telle fut. Et par ainsi le vray amoureux qui est sauvé en ame, se peut ainsi sauver en corps.

LA DAME. — « Et quant au surplus, touchant

l'autre sauvement du corps, le vray amoureux gentilhomme qui n'est point ordonné, ne disposé aux estudes des très prudentes et saintes sciences de theologie, des decretz, des loix, ne aultres estudes de science, fors que à très noble et illustre science et mestier d'armes; auquel pour acquerir honneur à la très desirée grace de sa très belle dame, quant il y est, c'est celluy qui se monstre et qui se presente le premier, et fait tant que entre les aultres il est nouvelle de luy. Et quant il est à la messe, c'est le plus devost; à table le plus honneste; en compaignie de seigneurs et de dames le plus advenant; de ses oreilles nul villain mot escouter, de ses yeulx ung faulx regard; de sa bouche ung deshonneste parler; de ses mains nulz faulx sermens, ne attouchemens; de ses piez en nul lieu deshonneste aller. Que vous dirois je? Il sur tous sera le mieulx condicionné, et en faitcz d'armes le mieulx et le plus nouvellement armé, monté et habillé, et pour l'amour de sa dame, fera armes à cheval et à pié: et jaçoit ce qu'on pourroit dire que ces armes sont faictes de vanitez, qui sont par l'Eglise deffendues, ainsi que au decret est escript, qui dit ainsi comme j'ay ouy recorder et premier où il dit: *Non temptabis Dominum Deum tuum*. Car on veult savoir se Dieu aidera à celuy qui a bon droit. *Item, cap. Predestinationes, XXIII. Quest. IV.* Où experience,

ne droict ne permet ce faict. Encores vueil prouver que c'est pour tempter Dieu, car les clerchez dient que demander chose contre nature est pour miracle, ou pour tempter Dieu. Et puis : *De purgatione vulgari, per totum, in capit. Consultuisti. ij. Quest. v. Item capit. Predestinationes XXXIII, Questione IV. Et notabiliter in capit. Gloriosus de veneratione sanctorum, lib. VI. Item, capit. Ut nemo in propria causa jus sibi dicat, per totum, capit. De gladiatoribus tollendis, lege una, lib. XI.* Et des autres decretz sans nombre, defendans tous gaiges de bataille, et ces armes que je dis : mais les empereurs, les rois et les autres princes terriens, selon leurs droitz et costumes de seigneuries temporelles, telles batailles ont ordonnées et maintenues en cas que la chose le requiere; et de ceste question fut ung grant debat, entre le saint pere pape Urbain cinquiesme en celluy nom, et le bon roy Jehan de France, d'un gaige de bataille qu'il tint de deux chevaliers, l'ung françois, l'autre anglois, à la ville neufve d'Avignon. Et combien que le pape vouldist garder les droits des decretz, commanda et fist mectre cedulle, par toutes les portes des eglises, que personne sur peine d'excommunication ne allast veoir ceste bataille; et non pourtant le très chrestien roy, pour garder ses privileges royaulx, ne s'en voulut point detenir, et voulut user des loix des

princes temporels, qui dient ainsi : *Leges Fe. De pace et ejus. §. Si quis hominem. Eadem lege et una. §. Si quis alium. L. Lombarda que incipit : Si quis. §. ultimo. L. Lombarda de homicidio. L. Si quem in Lombarda de adulterio. L. iij.* Et maintes autres sur ce fait de batailles par querelles ; les loix qui se dient Lombardes, les permettent longuement et en plusieurs façons. Toutesfois aujourd'huy elles sont moult deffendues par l'ordonnance du très chrestien roy, le bon roy Phelippes, desquelles aujourd'huy nous usons, c'est assavoir par quatre choses seulement et pour nulle plus.

« La premiere cause est qu'il soit chose no-
toire, certaine et evidente, que le malefice soit
advenu ; et ce signifie la clause, où il apperra
evidamment homicide, trahyson, ou autre vray
semblable malefice par evidente suspeccion. La
seconde cause est que le cas soit tel, que mort
naturelle s'en doye ensuyvir. La tierce est que
nul ne peut estre pugny, aultrement que par
voye de gaigne ; et ce signifie la clause du
meurdre, ou de trahyson reponste : si que cel-
luy qui l'auroit faicte, ne se pourroit deffendre
que par son corps. La quatriesme est que celuy
que on veult appeller, soit diffamé du faict, par
incides, ou presumptions semblables à verité ;
et ce signifie la clause des incides. Et jaçoit ce
que ces gaignes de batailles soient ainsi deffen-

duz et reservez pour les clauses que l'Eglise et decret ont ordonné, les ungs pour les pechiez de tempter Dieu, les autres de vanitez; le vray amoureux, retournant à mon propos, ne le fait pour nul de ces deux pechiez, fors scuellement pour accroistre son honneur, et sans querelle, ne le prejudice de nully; car je respons pour luy, que à l'entrer des armes il ne voudroit le mal, ne le deshonneur de celluy à qui il le ferroit, autant que le sien; et à ce on doit requerre Dieu en ayde et en tesmoing, dont en tant que touche à luy, et que Dieu le vueille mieulx ouir, ilz vont, confez et repentans, pour les perilz qui s'en pevent ensuyvir; des sermens qu'ilz font, et des serimonies, je m'en passe à present pour abreger. Mais quant le vray amoureux part de son pavillon, tout armé, comme il doit estre garny de sa payesme et de tous ses bastons que sur luy il doit porter, lors fait le grant signe de la croix, puis baisse sa banerolle. Et lors on luy baille en sa dextre main sa lance, ou son espée de gect pour offendre, et soy defendre au mieulx que il peut. Et là est assis sus l'escabel, ou sur ses piez jusques à l'appel ou dit du juge, ou mareschal du camp. Alors ce vray et loyal amoureux desmarche et se part hardiement et fierement, semblant qu'il doye tout manger, et fait aussi sur sa garde les premiers coups mesurement et attrempeement,

ainsi que dit Valerius Maximus en son cinquième livre, où il dit que c'est grant blasme au duc de la bataille, ou combatteur de dire : Je ne cuidoye pas qu'il fist ainsi, car entre toutes les choses qui se concluent et finissent par fer, comme font les batailles qui sont les plus périlleuses ; car nul, pour les amander, ne les peut refaire deux fois, et semblablement des faitz de guerre, qui se doivent conclure et puis conduyre par meur et sain conseil. Et à ce conferme Vegece en son premier livre de l'Art de chevalerie, où il dit : Ceulx qui errent en toutes choses sans raison, tout se peut amender, fors que les erreurs désordonnées, guerres et batailles, ausquelz n'est nul qui se puist opposer, car la peine incontinent ensuit son meffaict. Et pour ce, mon amy, le sage, vray et leal amoureux, est loyal, et doit estre en tous ses faitz et dictz ordonné et amesuré, et ce sont ceulx qui communement, jaçoit ce qu'ilz ne soient de corps ou de gens d'armes les plus fors ou puissans, occient souvent es batailles et soubzmectent les armigeres guerres et les corps, en ensuyvant le dit du saige qui dit comme est dit devant :

Malo mori fame, quam nomen perdere fame.

« C'est à dire, mon amy : J'aime mieulx mourir de faim, que perdre bonne renommée. Et

encores ce parfaict amoureux à tous ceulx qui bien luy ont fait, ou feront, fut à conseiller, en chastoy, ou en dons, il ensuit tous les jours le dit de Aristote qui dit : *Diis, parentibus et doctoribus non possumus reddere equivalentes*. C'est à dire, mon amy, que aux dieux, aux parens, est entendu qu'à Dieu, aux peres, meres, et autres de son sang, et amis de doctrine, jamais ne pourrons rendre l'equivalent des biens qu'ilz nous ont fait.

CHAPITRE VII

Comment la dame s'efforçoit de sçavoir l'intencion du petit Saintré, touchant le fait d'amours.

LA DAME ENCORES. — « Ores, mon amy, je vous ay remonstré et dit beaucoup de choses ; si prie à Dieu que tout, ou la plus grant partie, vous doint bien avoir ouy et retenu ; qu'en dites vous ? Vostre cueur s'en sent il assez, par temps advenir, puissant de ce faire ? Or me dictes vostre intencion ? »

L'ACTEUR. — Et quant ma dame eut ainsi ses paroles finées, Saintré, comme enfant et tout esprins de tant de belles doctrines, ne respondi riens. Lors celle luy dit : « Et, beau sire, qu'en dictes vous? Auriez vous cueur de faire ainsi? » Alors le povre conjuré, en levant ses yeulx sur elle, en basse voyx luy dit : « Ouy bien, ma dame, volentiers. — Feriez, mon amy? — Ma dame, ouy de bon cueur; mais qui est la dame telle que vous dictes qui voudroit mon service, et amer ung tel que je suis? — Et pourquoy non? dict ma dame, n'estes vous pas gentil homme? N'estes vous pas beau jeune filz? N'avez vous yeulx pour regarder, oreilles pour ouyr, bouche et langue pour parler? Bras et mains pour servir? Jambes et piez pour aller? Cueur et corps pour accomplir, et loyaument vous employer à ce qu'elle vous voudroit commander? — Ma dame, si ay. — Et doncques, dit elle, pourquoy ne vous aventurez vous? Cuydez vous que pour quelque bien qui soit en vous, il soit dame qui ayme tant soit peu son honneur que de la servir elle vous doye prier? Combien que aucunes sont tant contrainctes par amours, que par force leur est de monstrier doucement le bon vouloir qu'elles ont, et par ce donnent façon de proceder; et doncques pourquoy ne vous aventurez vous? Car tant plus sera la dame de bien, jaçoit ce qu'elle

honnestement se deslivre de vous, si vous en prisera elle mieulx. »

SAINTRÉ. — « Ma dame, j'aymeroyz aussi chier mourir, que de moy offrir et estre reffusé, et puis estre mocqué et farcé, ainsy comme d'autres ont esté, que j'ay ouy dire. Et pour ce, ma dame, il me vault mieulx estre tel que je suis. » Et quant ma dame l'oyt ainsi parler, et par raison qu'il n'entend pas où elle veult venir, lors ne se peut tenir de son cueur descouvrir et luy dit :

CHAPITRE VIII

Comment la dame ouvrit son couraige au petit Saintré, luy monstrant qu'elle le vouloit aymer.

LA DAME. — « Or çà, comme bon chrestien et gentilhomme que vous estes, vous me promectez sur Dieu, sur vostre foy de chrestien, et sur vostre honneur, cy n'a que vous et moy qui nous puisse ouyr, que de choses que

je vous die, à personne qui puisse vivre ne mourir, par quelque façon que ce soit, vous ne direz, ne découvrirez, ne ferez savoir ce que je vous diray presentement, ne autres fois ; et que ainsi de vostre main en la mienne le me prometiez ? — Oui, dict il, ma dame, sur ma foy. »

LA DAME. — Alors ma dame luy dist : « Or çà, Saintré, se j'estoye celle que vous ay dit, et vous voulsisse, pour moy servir loyaulment, faire des biens, et à grant honneur parvenir ; me voudriez vous obeyr ? »

L'ACTEUR. — Le petit Saintré qui en service de telle dame d'amours oncques n'avoit eu pensée, ne sceut que dire, fors soy agenouiller, et dit : « Ma dame, je feroye tout ce que vous me voudriez commander. — Ainsi de vostre main en la mienne vostre foy me prometiez ? — Ouy, par ma foy et par ma loyauté, ma dame, ainsi que je le vous prometiz, le tiendray, et feray tout ce que me voudrez commander. — Or vous levez et entendez bien mes parolles et les retenez.

CHAPITRE IX

Comment la dame admonesta le jeune Saintre, touchant les dix commandemens de la Loy, et l'estat des vertus et bonnes meurs.

LA DAME. — « Tout premier je vueil et commande que sur toutes choses vous ayez Dieu de tout vostre cueur, selon les commandemens de sainte Eglise, au mieulx que pourrez et saurez. Encore vueil et vous commande que après Dieu vous aimez et servez la benoïste vierge Marie, sur toutes les autres choses, le mieulx que vous pourrez. Encores vueil et vous commande que vous ayez et vous recommandez à la très benoïste vraye croix ; sur laquelle, pour nous saulver, nostre Seigneur fut mort et passionné, qui est nostre vray signe et deffence à l'encontre de tous nos ennemys et mauvais esprits. Encores vueil et vous commande que, tous les jours, de quelque *Pater noster*, ou aultre oraison, vous servez et vous recommandez à vostre bon ange, auquel nostre Seigneur a donné le commandement et

garde de l'ame et du corps de vous ; qu'il vous conduise, garde et deffende, se par vous n'est, et qu'il soit à vostre vie et à vostre mort. Encores vueil et vous commande que ayez saint Michel, saint Gabriel, ou aucun aultre ange, saintz ou saintes de paradis en vostre cueur, à tous les jours, affin que ilz soient enyers nostre Seigneur et nostre Dame voz advocatz, procureurs et ambassadeurs : ainsi que ont communement en la court des roys et aultres grants seigneurs, ceulx qui ne les pevent veoir, ne à eux parler. Encores vueil et vous commande que les dix commandemens de la Loy, à vostre povoir, vous accomplissez et gardez. Si vous les declaireray :

Premierement, tu ne adoreras nulles ydoles, ne nulz faux dieux.

Tu ne jureras point le nom de Dieu en vain.

Tu garderas les dimenches et festes commandées.

Tu honoreras pere et mere.

Tu ne feras point homicide.

Tu ne feras point adultere

Tu ne feras point larrecin.

Tu ne feras point faulx tesmoignage.

Tu ne desireras, ou convoiteras la femme de ton prochain ;

Et sy ne convoiteras point l'autruy.

LA DAME. — « Encores vueil et vous commande que totalement vous croyez les douze articles de la Foy, qui sont Vertus theologien-

nes, meres au bon esperit; ainsi que dit Casiodore, en l'exposicion du *Credo*, que foy est la lumiere de l'ame, la porte de paradis, la fenestre de vie, et le fondement de salut pardurable; car sans foy ne peult nul à Dieu plaire. Et à ce propos dit saint Pol l'Apostre : *Sine fide autem impossibile est placere Deo. Ad Hebr. XI cap.* C'est à dire, mon amy, que sans avoir foy, il est impossible que nul fust plaisant à Dieu. Dont les six articles regardent la divinité de Dieu le pere, et les aultres six la humanité de Jesus-Christ; lesquelz six appartenans à la divinité de Dieu le père sont telz :

« Croire en Dieu le pere tout puissant, createur du ciel et de la terre. Croire en son vray filz et homme Jesus Christ, nostre vray sauveur. Croire en Dieu le saint Esperit, vray zel et amour de Dieu le pere et de Dieu le filz. Croire en la sainte Eglise et à ses commandemens. Croire en la communion des saintz et remission des pechiez. Croire en la generale resurrection de la chair et de la vie pardurable.

« Et les six appartenans à l'humanité de Jesus Christ sont tieulx :

« Croire que la seconde personne de la Trinité, c'est assavoir que Jesus, le filz de Dieu le pere, fut conceu du saint Esperit et né de la

vierge Marie. Croire qu'il fut crucifié, mort et ensepvely dessoubz Ponce Pylate. Croire que incontinent qu'il fut mort, il descendit aux enfers pour delivrer les saintz prophetes et justes personnes qui là estoient. Croire que au tiers jour il ressuscita, par sa propre puissance, de mort à vie. Croire que quarante jours après qu'il fut ressuscité, il monta es cieulx en corps glorifié, et que là sied à la dextre de Dieu le père. Croire qu'il viendra juger les vifs et les morts au très espouvantable jour du jugement.

« Encores vueil je et vous commande que les sept vertus principalles soient en vous, dont les trois sont divines, les quatre sont moralles. Les trois qui sont divines, sont : foy, esperance et charité ; et les quatre moralles sont : prudence, attrempance, force et justice.

« Encores vueil je et vous commande que les sept dons du saint Esperit, vous devez croire et obeyr ; c'est assavoir : le don de paour, le don de pitié, le don de science, le don de force, le don de conseil, le don d'entendement, le don de sapience.

« Encores vueil et vous commande que les huit beatitudes veuillez ensuivre et croire ; et premier : povreté d'esperit, debonnaireté de cueur, pleurs de voz pechiez et des aultres, desir d'execution de vraye justice, estre en

cueur piteux et misericors, avoir purté d'esperit, paix à chascun, et estre pacient.

« Encores vueil et vous commande que es quatre douaires du corps vous delictiez ; c'est assavoir : en clarté, en subtilité, en agilité, en paisibleté.

« Encores vueil et vous commande que les sept oeuvres de misericorde spirituelles soient tousjours en vous ; c'est assavoir les ygnorans enseigner, les deffailans corriger, les errans et desvoyez addresser, les vices d'aultruy celler, les injures supporter, les desconfortez consoler et pour tous les pecheurs prier.

« Encores vueil et vous commande que les autres sept oeuvres de misericorde corporelles vous accomplissez ; et tout premier : repaistre les affamez, abbreuver ceux qui ont soif, herberger les povres, vestir les nudz, visiter les malades, rachepter les prisonniers, ensepvelir les morts. Et sur ce, dit monseigneur saint Jherosme, en son Epistre à Nepotian : Je ne suis point souvenant avoir leu ne ouy parler que nul soit mort de malle mort, qui ait voulu complies les oeuvres de misericorde ; car Monseigneur a tant de intercesseurs qu'il est possible que les prieres de plusieurs ne soient exaulcées ; et à ce propos dit nostre Seigneur en l'Evangile : *Beati misericordes : quoniam ipsi misericordiam consequentur. Matthei V.*

Cap. C'est à dire, mon amy : Bien sont eureux ceulx qui sont misericors, car ilz ensuyvront misericorde; à tant de intercesseurs qu'il est possible.

« Encores vueil et vous commande que fermement vous croyez les sept sacremens de sainte Eglise; c'est assavoir : Au saint baptesme, en la sainte confirmation, en la vraye penitence, au saint sacrement de l'autel, aux saintes ordres, au saint ordre de mariage et en la sainte unction.

« Encores vueil et vous commande que à tout vostre pouvoir vous gardez de cheoir en aucuns des sept pechiez mortelz. Et premier : d'orgueil, d'envie, d'avarice, de paresse, de glouttonnie, de yre et de luxure.

« Encores vueil et vous commande que bien vous gardez d'encheoir, ne tomber pour chose qu'il vous puisse advenir, en nul des sept pechiez contre le saint Esperit; c'est assavoir : de desesperacion, de presumption, de impugner verité, de endurcir en pechié d'envye fraternelle et de lesion de charité, desesperacion finale de penitence.

« Encores vueil et vous commande que les sermons et les services de sainte Eglise, quant vous porrez, les oyez. Et pour abreger, tout ce que sainte Eglise veult et commande, quoy que nul dye, vous obeissez.

« Encores vueil et vous commande que à l'entrée ou au melleu de Karesme, à Pasques, à la Penthecouste, et aux cinq festes de nostre Dame, à la Toussains, à Noel, vous confessez ; et querez bon medecin de l'ame, ainsi que querriez pour la guarison du corps.

« Encores vueil et vous commande, pour quelque compaignie de roy, de royne, de seigneurs et de dames, où que vous soyez, soit par champs, par villes, par maisons, quant vous verrez les ymages de nostre Seigneur, de nostre Dame, en quelque façon qu'ilz soyent, aussi de la croix, des anges, des saints et saintes, ausquelz vous ayez vostre devocion, que, pour honte du parler ne du penser des gens, vous ne laissez à oster votre chaperon, chapel ou barette, dessus vostre chief, se vous luy avez, et sinon que de vostre cueur le saluez. Et le semblable soit il des povres qui vous requerront aulmosne, se vous povez, et sinon que en vostre cueur au moins vous en deuillez et appelez Dieu à tesmoing. Et se de ce faire, pour la honte des gens vous laissez, vous pechiez mortellement, tout ainsi que feriez par vaine gloire et vanité du monde.

LA DAME ENCORES. — « Encores vueil et vous commande que quant vous serez grant, et que vous suyvrez les très nobles faits d'armes,

comme les hommes de bien font, qui sont ès batailles, par mer, par terre, corps à corps, ou en compagnies, en rencontres, en mines, en saillies, en eschielles, en barrières, en escarmouches, ou autrement, vous n'oubliez pas ceste très sainte beneisson que nostre Seigneur dit à Moyse pour la dire à Aaron son frere, qui estoit prestre de la Loy pour beignir les filz d'Israel, si comme dit la Bible, ou livre des Nombres, et au sixiesme chap. : *Benedicat tibi Dominus, et custodiat te. Ostendat tibi faciem suam Dominus, et misereatur tui. Convertat Dominus vultum suum ad te, et det tibi pacem.* Car ceste beneisson partant de la bouche vraye de nostre Seigneur me semble estre plus louable et plus profitable que nulle que je sache ; et pour ce, la vous recommande au lever et au coucher de vostre lict. Mais il me semble que vous, en la disant, benirez les autres et non pas vous ; pour ce me semble que en faisant sur vous le signe de la croix, devez dire, c'est assavoir : *Benedicat michi Dominus, et custodiat me. Ostendat michi faciem suam Dominus, et misereatur mei. Convertat Dominus vultum suum ad me, et det michi pacem.* Et puis faictes ce que devrez faire liement ; car jà mal ne vous en pourra venir. Laquelle beneisson monseigneur saint François dist à frere Lion son compaignon, tempté

d'aucune diabolique temptation, laquelle oncques puis ne lui vint.

LA DAME. — « Encores vueil et vous commande que quant vous serez et yrez aux faits des armes et aux batailles, et quant vous serez seigneur de voz ennemis, et que serez tempté de vengeance ou de cruelle chaleur, qu'il vous souviengne des parolles que Dieu dist au premier livre de la Bible de Genesis : *Quicumque effuderit humanum sanguinem, fundetur sanguis illius*. Encores dit-il en sa Passion : *Qui gladio percusserit, gladio peribit*. Encores dit-il à David : *Non edificabis michi domum, quia vir sanguinis es*. Encores dit il par la bouche de David : *Vir sanguineus et dolosus non videbit dies suos*. C'est à dire, mon amy, que l'homme de sang ne vera jà la fin de son age ; et dit, mon amy, cy devant, que qui de coustel tue, de coustel sera tué ; encores dist il : *Virum sanguinum et dolosum abominabitur Dominus*. C'est à dire, mon amy, que l'homme de sang et malicieux est abominable à nostre Seigneur ; encores dist il par la bouche de David : *Si occideris, Deus, peccatores : viri sanguinum, declinate a me*. C'est à dire, mon amy : Se tu tues les pecheurs, o Dieu, que les hommes de sang s'esloignent de moy. Et tant d'autres petites misericordes nous a il recommandées et monstrees en sa propre personne ; dont

toutes les escriptures en sont plaines, que trop seroit longue chose, à plus grant clerc, les vouloir toutes exposer ; et pour ce, mon amy, de ce très inhumain pechié, comme de tous les autres, vueil et vous commande que vous gardez à tout povoir de offendre Dieu, nostre Dame et toute la court de paradis, et prendre exemple aux très belles parolles de Senecque qui estoit payen, qui dit : *Si scirem Deos ignosciturus, et homines ignoraturus, non tamen dignarer peccare propter vilitatem ipsius peccati.* C'est à dire, mon amy : Se je sçavoie les dieux n'avoir point de congnoissancé et que tous hommes fussent ignorants, si ne daigneroie je pecher pour la grande vileté qui est de pecher. Or advise doncques, mon amy, de cestuy Senecque qui estoit payen et tant abhominait les vices et pechiés : dont les devons bien abhominer, nous qui sommes, par vray baptesme, en la sainte foy de Jesus Christ ; lesquelles choses je vueil et vous prie que faictes vostre povoir de les accomplir.

LA DAME ENCORES. — Et quant au surplus qui touche vostre personne, je vueil et commande que tous les matins quand vous levez, et tous les soirs quant vous coucherez, vous vous seignez, en faisant le signe de la croix bien parfaitement, et qu'il ne soit ne par tors ne par biaiz, ainsi que vous ay dit, et que ces

dyabolicques caracteres font; et à Dieu, et à nostre Dame et à la vraye croix, et à vostre bon Ange, et à tous saintz et saintes voz advocatz, vous recommandez; et assez matin vous levez, et habillez le plus joyeusement et honestement que vous pourrez, et sans grant bruyt. Et quant serez en vostre porpoint laccé, et voz chausses bien nectes et bien tendues, et voz soulliers bien nectz, lors vous peignez, et voz mains et vostre face lavez, puis nectioiez voz ongles, et s'il est besoing les roingnez; alors vous saignez et vostre robbe bien cueilliez. Et quant serez tout habillé, à l'yssir de vostre chambre, faictes le signe de la croix; à nostre Seigneur, et à nostre Dame, et à vostre bon Ange, et à tous saintz et saintes vous recommandez, et faites ce que dit est. Saint Augustin dit : *Primo querite regnum Dei*. C'est que, avant nulle euvre, quelle qu'elle soit, à l'église vous en allez, et prenez de l'eau benoiste; puis oyez messe se la trouvez. Et sinon, devant la figure et remembrance de nostre Seigneur Jesus Christ à genoux vous mettez, et aussi devant nostre Dame; et à jointes mains, sans regarder çà ne là, faictes voz prieres et oraisons de tout vostre cueur; non pas à eulx, mais pour l'amour de celluy qui est es cieulx. Et puis en la chambre de parement vous en allez; et là, avec les aultres chevaliers et

escuyers, actendez tant que mon seigneur le roy et ma dame la royne, ou l'ung d'eulx, voise la messe ouyr, et aussi les convoyez ; et se vous n'avez ouy messe, lors à genoulx vous mettez, sans regarder nulle part : fors advisez que ne soyez devant quelque seigneur ou dame, qui par honneur voise devant vous. Et aussi ne vous mettez pas ou nombre des varletz ; car des tous estas le moyen est le meilleur, ainsi que dit le philosophe en Ethiques où il dit : *Virtus consistit in medio*. C'est à dire, mon amy, que la vertu consiste es choses moyennes. Et le vercifieur sur ce dit : *Medium tenere beati*. C'est à dire, mon amy, que les gens qui ne cherchent monter trop hault, et sont contens de raison, ilz sont benoistz. Et là honnestement et de bon cueur oyant messe, dictes voz heures, et aultre service que avez accoustumé de dire quand vous l'oyez, et puis mon seigneur et ma dame honnestement reconvoiez ; et se vous avez fain ou soif, allez seurement desjeuner, et legierement, actendant le disner ; mais que ce ne soit pas gloutonnie de boire ou de mangier, fors ainsi que le philosophe dit que l'en doit seulement mengier et boire pour vivre, et non pas vivre pour boire et pour mengier. Et est bien vray le commun dict des maistres, que la goulle tue plus de gens que les cousteaulx ne font. Et encores vous deffens que ne soyez

noyseux, ne menteux, ne rapporteur de choses mal dictes, dont nul mal s'en peust ensievir. Cassiodore dict au livre des louanges saint Pol, que la condicion de mauvaistié est telle, que d'elle mesme, où elle n'a nulz contredisans, si deschiet elle et se publie à l'apparant de tous ; mais au contraire est la condicion de verité, car elle est très estable, et si ferme que tant plus a elle de contredisans, s'eslieve elle plus et croist. Et à ce propos dit la sainte Escripiture : *Super omnia veritas. Secund. Esdre. iij. cap.* C'est à dire, que verité est sur toutes choses. Et pour ce, mon amy, soyez tousjours ferme et veritable, et fuyez la compaignie des bourdeurs et des rumoreux, où trop perilleuses gens sont. Aussi que soyez loyal de bouche, de mains, et servez chascun à vostre povoir, sans desservir et sans nul service reprocher. Suivez la compaignie des bons, oyez et retenez leurs parlers ; soyez humble et courtoys, où que vous soyez, sans vous vanter ne trop parler, ne aussi estre muet ; car le proverbe dit que pour trop parler et estre muet, peut on estre pour fol tenu. Gardez vous bien que dame ou damoiselle ne soit blasmée pour vous, ne autre femme, quelle qu'elle soit. Et se vous trouvez en compaignie que l'on en parle deshonestement, monstrez par vostre gracieux parler qu'il vous en desplaist, et vous en departez.

LA DAME ENCORES. — « Encores vueil et vous commande que des povres soyez piteux, et ne diffamez povreté à autruy, et selon vostre puissance de voz biens leur departez. Et vous souviengne du dict Albertus :

Non tua claudatur ad vocem pauperis auris.

« C'est à dire, mon amy : Que tes oreilles ne soient pas closes à la voix des povres gens.

« Encores vueil et vous commande que se Dieu vous avoit, par les dons de fortune, en aucun hault estat monté, que bien gardez de non oublier les très glorieuses et pardurables richesses des cieux, pour celles de ceste tenebreuse et transitoire vie, Sur ce vous avons jà dit le dit du versifieur, qui dit ainsi :

*Quando dives moritur,
In tres partes dividitur :
Caro datur vermibus,
Pecunia parentibus,
Anima demonibus,
Nisi Deus miseretur.*

« C'est à dire, mon amy, que quant le riche sera mort, lui et ses biens seront partis ; et premier la chair sera donnée aux vers, son or, son argent et ses bagues et tout ce qu'il a, à ses parens, et son ame aux dyables, se Dieu de

sa grace n'en a mercy. Et à ce propos, mon amy, souviengne vous de ce très beau dit de Aristote, qui dict ainsi :

Vir bone, quam curas res villes et perituras.
 Nil profituras, damno quandoque futuras.
 Nemo diu mansit in crimine : sed cito transit.
 Et brevis, atque levis in mundo gloria queris.

« C'est à dire, mon amy, que Aristote en sa generale doctrine dit : O tu, homme qui, par advantageuse force, t'efforce de monter ès haulx estats de gloire et de richesses, prens garde que par ces mesmes forces tu ne soyes tresbuché en bas : car oncques nulle efforceuse haultesse ne fut sans grant peril, et quant tout est fait, et qui plus est, il fault mourir.

LA DAME. — « Encores vueil et vous commande, pour vous recorder, que en vostre grant prosperité il vous souviengne du dit Senecque en son sixiesme livre des Benefices, ou xxx chapitre, où il dit, que ceulx qui sont levez aux haulx estatz, qu'ilz n'ont de riens plus grand besoing, fors que on leur die verité. Et sur ce ensuit sa sentence sur les envies et grans debatz qui sont es cours des grans seigneurs, à qui leur pourra mieulx complaire et plus subtilement flater ; et de ce est escrit en Polithique, au huitiesme livre et au neufviesme chapitre, que le flateur est ennemy de toute verité, et

qu'il fiche ainsi que un clou en l'euil droit de son seigneur, quant il l'escoute ; adonc les seigneurs sont aveuglez : par quoi ilz en perdent l'amour de Dieu, honneur et cognoissance d'eulx mesmes, dont ne sceivent les plusieurs quelle chose ilz doivent prendre, ne quelle chose doivent laisser ; et cuident estre très bien louez de ce dont ilz sont très fors blasmez, et blasmez de ce dont ilz seroient fort loés ; et tout ce n'est que par faulte que l'on ne dit pas la verité. Et pour ce, mon amy, entre toutes les aultres choses que je vous ay devant dictes et diray, vous gardez, eschevez et fuyez la très perilleuse compaignie de telz flatteurs, dont, se vous avez estat et dequoy, en trouverez assez. Lesquelles choses je vous ay dictes pour estre vray amy de Dieu, et ung des hommes renommez de ce royaume, voire du monde de ceulx du jourd'huy ; et par ainsi ne pourrez faillir que, en les suivant, au service de vostre dame et d'amours ne soyez vrayement sauvez, non seulement en corps, mais en l'ame et en corps. Sy vous doit suffire pour ceste fois. Et quant je verray que ainsi vous gouvernerez, ou au moins de toutes ces choses ferez le mieulx que vous pourrez, alors je vous ameray, et feray des biens, et serez mon amy vrayement. Et qu'en dites vous de cecy ? avez vous cuer de moy obeir ? »

SAINTRÉ. — Lors le petit Saintré à genoulx se mist, puis dit : « Ma dame, de tout ce je vous remercie, et le feray bien, se à Dieu plaist. »

LA DAME. — « Ferez, dit ma dame, et je verray que vous ferez. Or faictes doncques bonne chere, comment qu'il soit, et de chose que je vous die à présent ne vous souciez : ne aussi vueil je que point vous en riez, affin que mes femmes ne s'apperçoivent de noz [voulentez ; mais devant elles faictes ainsi l'esbahi, comme faisiez par avant, et actendez moy cy, car je revendray tantost. »

L'ACTEUR. — Lors ma dame, qui estoit assise, se lieve, et tout hault à ses femmes dit « Et que cuydez vous de ce faulx garson, l'ay je bien longuement confessé? il n'est en ma puissance que j'aye peu savoir qui sa dame est. » Lors, comme par courroux, luy dist : « Allez vous en, garson, car jamais ne vaudrez riens. » Et à l'entrer de sa garde robe, elle se tourna, comme par courroux, et puis dit : « Actendez moy, maistre, actendez, car je vueil encores compter à vous. » Lors tout assuré, comme elle luy avoit dit, faisant un peu l'esbahy, il se arresta. Si ne tarda guieres que ma dame revint, puis l'appella, et dit hault, si que toutes la povoient bien ouyr : « Or çà, maistre, çà, pourray je savoir qui vostre dame est?

et se je la devinois, par votre foy, le me diriez vous? Est ce point telle, telle, ne telle? — Ma dame, nenny, telle, telle, ne telle. — Or sommes nous desobligées, dit ma dame Ysabelle, car nous vous estions tenues pour luy que à ceste fois il auroit dame choysie, et vous veez que ce n'est de celles aucunes; et doncques fault il qu'il en ait une. Et puisque ainsi est, tirez le à part, et s'il est tel qu'il doit estre, il la vous dira, et sera quicte de sa foy. » Et lors ma dame, tout en riant et par maniere de farce, tout à part le tira, et puis coïement luy dit :

CHAPITRE X

Comment la dame, jà frappée de l'amour du petit Saintré, luy donna douze escuz pour faire se acoustrer et habiller honnestement.

LA DAME. — « Mon amy, je vous donne ceste bourcette, telle qu'elle est, et douze escuz qui sont dedans. Si vueil que les couleurs dont elle est faicte et les lectres entrelacées,

doresnavant pour l'amour de moy vous portiez, et les douze escuz vous les employez en ung pourpoint de damas ou de satin cramoyssi, et deux paires de fines chausses, les unes de fine escarlate et les autres de fine brunette de saint Lo, qui seront toutes brodées du long et par dehors de couleur et devise que la bourse est; et sy en aurez quatre paires de draps linges et quatre coevrechiefs bien deliez, des souliers et des patins qui soient bien faictz; et que je vous voye bien joly dimenche prochain: et se de cecy vous vous gouvernez bien et saigement, bien brief, au plaisir de Dieu, je vous feray mieulx. »

SAINTRÉ. — Le petit Saintré, comme jeune enfant innocent et plain de honte, vult la bourse reffuser, en disant : « Ma dame, je vous en mercie; et, ne vous desplaise, je n'en prendray riens, car je ne vous l'ay pas desservy. »

LA DAME. — « Desservy, dist ma dame, bien sçay que ne le m'avez pas desservy, mais vous le me desservirez, se Dieu plaist. Si vueil et vous commande que vous la preniez. » En disant ce, celleement et coyement, d'ung atour bien enveloppé la luy mist au seing, puis lui dit : « Or vous en allez et pensez de bien faire et que j'aye bonnes nouvelles de vous, et à Dieu soyez, mais ne revenez plus à la gallerie jusques à ce que vous soyez habillé; et pour le

present, aultre chose ne vous die, fors que je prie à Dieu que toutes, ou la plus grant partie des choses que je vous ay dictes, puissent estre en vous. » Alors ma dame, à haulte voix, faignant estre courroucée : « Or, vous en allez, fuyez, failly de cueur et de pensée ; pour ceste fois, allez, mais encores n'estes pas quicte, une aultre fois nous compterons à vous. »

L'ACTEUR. — Et quant il fut hors de la chambre et eut prins son piteux congié, elle dit à ses femmes, en riant : « Je croy que nous perdrons bien nostre temps, et qu'il n'a pas encores tant de sens qu'il entende d'avoir dame, ne qu'il pensast oncques d'estre amoureux ; mais au moins nous en aurons ris, et encore rirons. » Alors ma dame se fait desvestir sa robe et se met à dormir, et ainsi font toutes ; dont à plusieurs ce long parler de ma dame à Saintré, pour le tallent de dormir, leur ennuyoit mallement. Et si me tairay ung peu de ma dame et de ses femmes, pour revenir au petit Saintré.

CHAPITRE XI

Comment le petit Saintré s'acoustra honnestement, comme la dame luy avoit commandé : puis comment la dicte le trouva es galeries ; le faisant venir en sa chambre, et l'interrogant de la devise qu'il portoit, et tout à cause, affin que ses damoiselles ne sceussent de ses amours ; et luy bailla encores soixante escuz en une bourse.

L'ACTEUR ENCORES. — Le petit Saintré, quand il fut bien loing de la chambre, se tira à un costé et regarda de çà et de là, se nul ne le veoit. Lors tira sa bourse de sa manche, et la desveloppa et regarda ; et quant il la veit si belle, et les douze escuz dedans, n'est pas à douter s'il en fut content. Lors commença en son cueur la jolye telle qu'il ne pensoit pas estre moins riche que le roy. Mais pour donner fin aux commandemens de ma dame, et pour estre dimenche ainsi joly, fist en son cueur mains petis pensemens jyeulx. Lors s'en va à Perrin de Solle, qui tailleur du roy estoit, et luy dit : « Perrin, mon amy, pour combien aurois je, dimenche prochain, ung pourpoint pour

moy, tout fait, qui fust de damas bien cramaisy? » Perrin, qui l'advisa ung petit, prit sa mesure, puis luy dist : « Avez vous de l'argent? — Ouy, Perrin, mais qu'il ne me fust pas trop chier. » Et lors Perrin, pour ce qu'il estoit à tous si gracieux, luy dist : « Mon filz Saintré, sur ma foy, je ne puis à moins de six escuz, mais il sera du plus fin. » Adonc Saintré, comme jeune et volentiers, met la main à la bourse et lui bailla les six escuz. Et quant il eut son pourpoint païé, lors s'en va à Jehan de Buffes qui de chausses servoit le roy, fist marché que deux paires de chausses luy cousteroient, l'une parmy l'autre, deux escuz, qu'il paya tantost. Puis vint à François de Nantes, brodeur du roy, et lui monstra la bourse pour broder, ainsi que ma dame l'avoit devisé, dont le marché fust à deux escuz ; et par ainsi ne luy restoient plus que deux escuz. Lors s'en va à une bourgeoise de Paris, à qui le seigneur de Saintré son pere l'avoit plusieurs fois recommandé, et lui dist : « Marie de Lisle, ma bonne mere, aurois je bien deux paires de fins draps linges pour ung escu? — Ouy bien, dist Marie. — Ma mere, veez le cy, et faictes que dimenche je puisse porter les ungs. » Lors de son seing tira la bourse, ainsi enveloppée, et luy monstra les deux escuz. « Et mon filz, dist elle, qui les vous a donnés? — Certes, dist il, ma dame ma

mere m'en a envoyé douze, et vous prie que l'ung soit employé en linges, et l'autre, avecques la bourse, me soit gardé. » Et quant Marie vit la belle bourse, si en fut moult aise pour l'amour de luy, et dist : « Dieu doit bonne vie à ma dame, qui ainsi pense de son filz ! » Puis luy dit : « Et où sont les autres dix escuz ? — Ma mere, dist il, ilz sont jà employez. — Helas ! mon filz, dist elle, je croy que les avez jà perdus, ou très mal employez. — Ma mere, dist il, non ay vrayement, et dimanche vous le verrez. » Et ainsi passa toute celle semaine jusques au dimanche au matin, qu'en la chambre de Jacques Martel, premier escuyer de l'escuyrie du roy, où le petit Saintré et les autres paiges du roy dormoient, vindrent ledit Perrin de Solles, tailleur du roy, Jehan de Buffe, chaussetier, François de Nantes, brodeur, et Guillaume Soldan, cordonnier, tous du roy, qui portoient l'ung le pourpoint, l'autre les chausses brodées, soulliers et patins tout à un coup. Et quant Jacques Martel sceut qu'ilz estoient à l'huy de sa chambre assemblez, leur fist ouvrir ; et quant ilz furent entrez ens, et il leur veit porter ces choses, leur demanda pour qui c'estoit. Nostre maistre, dirent ilz, c'est pour nostre maistre le petit Saintré ; nous sommes tous à luy. Alors Jacques se tourna vers le petit Saintré, et en riant luy dist : « Je

croy, Saintré, que vous avez à voz recepveurs compté. — Nostre maistre, dist il, c'est ma dame ma mere qui y a doncques compté ; car elle m'a envoyé de l'argent pour moy esbanoyer et pour mes necessitez, et me semble que d'argent n'ay je mye grandement à faire, fors pour moy honnestement habiller. — Et vrayement, dist l'escuyer, je vous aymoye bien paravant, mais encores vous ayme je assez mieulx. » Lors se tourna vers les autres gentilz hommes paiges, et leur dit : « Ha ! très mauvais garçons, vous ne feriez empiece ainsi ? Ains les yriez plutost despendre en jeux de dez par cabaretz et par tavernes, et en aultres deshonestes lieux ; si vous en ay je bien batuz pour en estre chastiez. » Et lors il dist aux maistres : « Or sus habillez le moy tost, et le me faictes bien joly. » Et quant il fut du tout habillé, le petit Saintré, qui desjà avoit tout payé, donna aux compaignons la moitié d'ung escu et l'autre moitié aux varlets de l'escuyer, qui jà assez plus que nul des autres paiges l'aymoient, pour ce qu'il leur donnoit de ses despouilles voulentiers. Et quant l'escuyer et tous furent habillez, après luy s'en vont à la messe, puis en la chambre de parement, actendre le roy ; mais ce n'estoit pas sans grans envyes, ne sans grans raisonnemens que les autres paiges sur luy avoient. Et quant le roy saillit de sa chambre,

et veit le petit Saintré ainsi habillé, il se print à rire, et demanda à l'escuyer dont ce venoit qu'il estoit ainsi joly devenu. « Sire, dist il, je fus huy matin très esmerveillé, quant Perrin de Solle, Jehan de Buffe, François de Nantes, Guillaume Soldan et leurs varletz vindrent en ma chambre apporter ses habillemens ; je cuyday bien estre prins. » Lors le roy et tous les seigneurs qui avec luy venoient, commencerent fort à le louer ; puis dist le roy : « Je vouldroye qu'il eust plus trois ou quatre de mes ans, il seroit mon varlet tranchant. » Et à ces parolles, le roy entra en sa chapelle, et la royne qui venoit après luy. Et quant les messes furent dictes, au retourner qu'ilz firent, ma dame veit le petit Saintré ung petit loing, ainsi gracieusement habillé. Lors en allant s'avança, et dist à la royne : « Hée ! ma dame, veez cy le petit et gentil garson Saintré, comment il est joly ! — Ha ! dict la royne, Belle Cousine, vous dictes verité, et vrayement il le fait bon veoir. » Lors entrerent en la grant salle pour disner. Ma dame, à qui ses yeulx ne cessoient de le regarder, pour plus couvèrement le veoir et pouvoir à luy parler, appella les aultres dames, et leur dist : « Voulons nous veoir quelz devises en chausses porte le petit Saintré ? Et n'a pas Dieu bon temps, dit elle, quant telz gens veulent devises porter et contrefaire l'amoureux. — Hée !

ma dame, il luy part de bonne volenté. » Lors dist l'une : « Hée ! pour Dieu, ma dame, voyons que c'est. » Et l'autre dist : « Ma dame, deportons nous en. » Et lors ma dame et elles vers une des fenestres se retrahyrent, puis le firent à elles venir ; si luy dist ma dame, tout ainsi que s'elle n'en sçavoit riens : « Çà ! maistre, çà ! nous voulons sçavoir et veoir quelle devise est que vous portez en voz chausses ? » Alors le petit Saintré, qui à genoulx estoit, se fist aucunement prier. « Certes, dirent elles, nous le verrons, et faisons tost, car le roy veult disner. » Lors l'une prent le bras, l'autre le prent par l'espaule, les aultres parmy le corps, tant que sur piez le font lever ; lors madame et toutes les aultres dames qui là estoient, et plusieurs qui n'y furent pas appellées, ces belles devises virent, dont il fut très loué ; mais du grant plaisir que ma dame en print, son cueur et son corps en fut tout rassasié. Et quant les tables furent levées et les Graces dictes, pour abreger, lors tabours et menestriers commencerent à bien corner, et les cueurs joyeux commencerent à dancier, puis à chanter, tant que le roy, pour soy retraire, demanda les espices et vin de congié. Et endemantiers qu'ilz dançoient, le petit Saintré les yeulx de ma dame ne cessoient de regarder, tant dançoit et chantoit bien. Lors elle s'appensa qu'elle vou-

loit veoir plus à loisir sa devise et à luy parler, car tant plus elle le regardoit, et tant plus il luy plaisoit; car en la cour n'avoit celluy ne celle qui ne le jugeast une fois estre homme de bien. Dont, endemantiers qu'il portoit la tasse ou vin de congié, ma dame en passant luy dist : « Faictes comme l'aultre jour, petit Saintré. » Laquelle parole il entendit bien. Si ne tarda gueres que le roy se retrahit, et que la royne à dormir se mist. Lors ma dame s'en vint en sa chambre, si trouva le petit Saintré aux galleries, comme elle luy avoit dist. Si luy dist, comme demy esbahye : « Hé! maistre, vous estes moult joly, si marchez devant, vous vous estes foy cinq ou six jours, il faut compter à vous. » Puis se tourna à ses femmes, et leur dist : « Il nous fault veoir les devises de ce garson, et sçaurons, se nous povons, dont il les a, et que c'est? je ne puis croire qu'il ait le sens, ne l'entendement d'estre amoureux. » Et en devisant ces choses, elle fut en sa chambre; lors donna à tous congié, fors que à luy, puis fist clore la porte. Et là, au meilleu de toutes, vult ma dame ses devises bien regarder, puis luy dist : « Ha! maistre, maistre, vous dictes que n'avez point de dame, et vous vous faictes si joly. — Ma dame, dist il, c'est, Dieu merci, ma dame ma mere qui m'a fait ainsi joly. — Et comment, dist ma dame, vous a elle fait si

joly? elle qui est en Touraine, et croy que jamais ne fut icy. — Ma dame, dit il, douze escuz qu'elle m'a envoyés en une belle bourse d'or et de soye m'ont fait ainsi joly. — Et vrayement, dist ma dame, il nous faut veoir ceste bourse, et sçavoir où sont ces douze escuz allez; et s'ilz ne sont bien employez, je luy escripray qu'elle ne vous en envoie plus. » Lors le petit Saintré traict du seing la bourse enveloppée d'un fin petit coeuvechief, et ma dame, qui bien assurée estoit que nulle de ses femmes ne la congnoistroit, prend la bourse, et devant toutes la regarde, comme se jamais veue ne l'eust; et puis regarda les devises de ses chausses et celles de la bourse, et vit que toutes estoient semblables; lors luy dit: « Or ça, maistre, tout premier, que vous cousta ce pourpoint? — Ma dame, tout ainsi fait, j'en ay payé à Perrin de Solles six escuz. — Et les chausses, dit ma dame, qui les a faictes, et que vous ont elles cousté? — Ma dame, dist il, ces chausses d'escarlate, et unes aultres de brunette fine de saint Lo, m'ont cousté deux escuz à Jehan de Buffe, et la brodeure de ces chausses m'a cousté de François de Nantes aultres deux escuz. — Et qu'avez vous fait des aultres deux? — Ma dame, de l'ung avec trois sols j'en ay eu deux paires de fins draps linges, et des xx sols j'en ay eu trois

paires de souillers et trois paires de patins, et le surplus donné pour le vin aux compagnons des maistres ouvriers et aux varletz de nostre maistre l'escuyer. » Ma dame, qui de tout ce fut bien aise, et voit que sa gracieuseté devers les maistres ouvriers luy a aydié, aussi la largesse bien employée, dit en riant à ses femmes : « Il en a la moitié cabassé. — Par ma foy, ma dame, dit il, sauf vostre grace, il ne m'en est demouré denier. » Et lors dit ma dame : « A ce coup sçauray je qui est vostre dame ? Or ça, venez parler à moi. — Ha ! ma dame, dirent elles, ha ! par Dieu ! vous luy donnez trop à souffrir pour sçavoir de luy tant de choses. — Ne vous chaille, dist ma dame, tirez vous toutes arriere, car je le vueil sçavoir. » Et quant toutes furent arriere, ma dame luy dit : « Or ça, mon amy, jusques ici je suis bien contente de vous ; pensez tousjours de bien faire, car vous n'en vauldrez que mieulx ; entre toutes choses vous commande que tant soit il vostre amy, qu'il ne saiche rien de noz faitz. — Non sera il, ma dame, car par ma foy je ayerois mieux mourir. — Or ça, mon amy, je vueil que vous aye deux aultres robes, dont l'une sera de fin brunette de saint Lo, qui sera fourrée de martres, et l'autre sera d'ung fin gris de Motteville, qui sera doublée d'ung fin blanc pour vestir à tous les jours, fors quant ve

chevaucherez après monseigneur le roy. Et si aurez deux chapperons, l'ung d'escarlate, l'autre noir ; et si aurez encores un pourpoint de satin bleu, et deux aultres paires de fines chausses, coeuvrechiefs, chemises, patins et aultres choses necessaires. Aussi que vous jouez et esbatez de fois à fois à la paulme, avoir des arcs et flesches qui sont jeux honnestes, et dont les corps par raison en vallent mieulx. Et pour ce faire et vous entretenir, je vous donray soixante escuz, et verray comment vous vous gouvernerez ; car encores n'avez point de varlet ; pour ce vueil je qu'à Gillet, qui est bon et loyal serviteur de l'escuyer, vous donnez tous les mois huit solz de pension, et qu'il preigne bien garde à voz robbes, chausses et habillemens ; et se bien et honnestement vous gouvernez, vous aurez collier et chaisne, ceintures de Bahaigne, robe de damas et aultres biens assez ; mais que soyez loyal, secret et homme de bien. — Ma dame, dist il, si seray je, se à Dieu plaist. — Or, mon amy, entendez à moy : De quelconques menasses, parolles rigoureuses que devant mes femmes, ne ailleurs, je vous dye, vous ne soyez mal content. — Non seray je, ma dame, puisqu'il vous plaist, ne vous esmavez de riens. » Lors ma dame, devant ses damoyelles, et comme de luy très mal contente, devant ses femmes le tança, puis en sa garde robe ouvrit

l'escrinet, en une bourslette de soye mect lx escuz, lors revient, et l'appella : « Ça, maistre, ça, estes vous encores à deviser, et ne vous fieriez vous point en moy? et se à moy ne le voulez dire, dictes le à dame Jehanne, ou à dame Katherine, ou à Ysabel, ou à qui mieulx vous plaira. — Et que vous dirois je, ma dame, quant je n'en ay point? — Et vous portez devises et lectres entrelacées, sire morveux que vous estes, et faictes de l'amoureux? — Ma dame, sur ma foy, je vous ay dit celle que j'ayme mieulx en ce monde, et qui me fait porter ces devises. — Ha! maistre, maistre, vous nous cuydez abuser que ce soit vostre mere; je croy bien que vous aymez vostre mere, et que c'est celle qui vous entretient, mais ce n'est pas celle pour qui vous portez ceste devise; or ça, venez à moy, je me suis appensée d'une aultre que je n'ay pas nommée. » Lors l'appella à part, et luy dist : « Tenez ceste bourslette, gardez bien que ne la perdiez, il y a soixante escuz dedans; or verray bien comment vous vous gouvernerez; et si vueil que vous ne veniez plus aux galleries à l'heure que je y doy passer, ne que trop souvent devant moi vous ne arrestiez, mais quant vous me verrez, que d'une espingle je purgeray mes dens, ce sera signe que je vouldray parler à vous, et lors froterez vostre droit oeil, et par ce congnoistray que

vous m'entendez, et à celle foys y viendrez. Or, avez vous bien entendu ce que je vous ay dit? — Oy, ma dame, très bien. — Or, pensez doncques de bien faire, si vous aymeray; et quant je verray que bien vous gouvernerez, alors je vous tiendray pour mon amy, et vous feray très bien joly. — Ma dame, dist il, si feray je, se à Dieu plaist. — Or, vous en allez, je vueil dormir, et de chose que je vous tance, die et rabroue devant les gens, comme je vous ay dit, ne vous esbahyssez de riens. »

CHAPITRE XII

Comment la dame menaça faintement le petit Saintré, luy disant devant ses dames, qu'il ne vouldroit jamais riens. Et après cela s'en alla ledit Saintré faire tailler aultres habillemens de l'argent que la dame luy avoit baillé; et puis comment la dame parla à luy, à laquelle il dist que sa mere luy avoit envoyé l'argent duquel il s'estoit habillé.

ENCORES L'ACTEUR. — Lors ma dame, comme par courroux, luy dist : « Allez vous en, garson, allez, car jamais ne vaul-

drez riens. — Helas ! ma dame, dirent elles toutes, que ne soit pas le grant congié ! Et pour ce, Saintré, il vous vaulsist mieulx à ma dame dire la verité. » Saintré, qui de ma dame avoit sa leçon, faignant estre couroucé, se agenouilla, et sans dire mot print congié. Alors toutes se prindrent à rire des grans assaulx que ma dame luy faisoit, disans : « Or, l'avons nous perdu, et ne aurons de luy plus nostre desduyt. » Mais elles ne sçavent pas les douces convenances de ma dame et de luy. « Taisez vous, dit ma dame, encore n'est il pas quicte, le bon du jeu ne fait que venir. — Helasse moy dolente ! dist Ysabel, ce povre enfant est bien devant nous gehenné. » Et à tant me tairay cy à ung peu parler des ris et des jeux que ma dame et ses femmes en faisoient, et vendray à parler comment il employa ses soixante escuz.

L'ACTEUR. — Quant le petit Saintré fut party de ma dame, il s'en alla tantost compter son tresor. Et quant il vit telle monjoie d'escuz en sa main, il fut si très ravy, qu'il ne savoit que faire, ne que penser. Toute celle journée fut en pensement où il les pourroit musser ; car à l'escuyer, ne à aultre ne les oseroit bailler en garde, pour ce que ma dame luy avoit très expressement deffendu que nul n'en sceust riens. Si pensa qu'il les musseroit en ses puissettes jusques au lendemain, pour les employer,

et ainsi le fist ; car celle nuyct luy fut si longue, que oncques si longue ne fut, se lui sembloit. Adonc au plus matin qu'il fut levé, et eust ouy messe, il s'en alla à Perrin de Solle, et lui fit faire les trois robes que ma dame lui avoit ordonné, qui furent fourrées, desquelles il en vestit une le dimanche ensuyvant, et le pourpoint de damas bleu ; car, pour accomplir tout, trouva argent assez et assez de demourant.

L'ACTEUR. — Et quant ma dame vit le petit Saintré vestu de sa robe noire fourrée de martres, et son pourpoint de damas bleu, plus qu'elle n'avoit dit, fut très joyeuse ; lors en le guignant, fist de son espingle le signal, auquel il respondit. Et quant ma dame en sa chambre retourna, le trouva ès galleries, et de si loing qu'elle le vit, dist à ses femmes : « Veez là nostre esbatement, il nous fault conter à luy. » Et quant il l'apperceut, fit semblant de soy desvoyer, et prendre aultre chemin. Lors ma dame le fist appeller, puis luy dist : « Ha ! maistre, maistre, esse la façon de fuyr les dames ? Vous n'y faictes riens, or, marchez devant. » Et quant ma dame fut en sa chambre, donna congié à tous ses gens, fors à Jehan de Soussy escuyer de la royne, et à Thibault de Roussy son escuyer ; les deux qui meilleurs bouches avoient pour franchement parler tout

ce que ne pourroient celler, et leur dist : « Je vous ay cy retenuz pour rire avecques nous. » Alors ma dame au petit Saintré commença à dire : « Or, ça, maistre, ça, par tant de fois que nous toutes vous avons prié de nous dire qui vostre dame par amours est, et oncques pour prieres, pour requestes, pour menaces, ne pour injures ne l'avons pu sçavoir ; et puis que ainsi est que de nulle de nous ne vous estes tant voulu fier, au moins dictes le à Jehan de Soussy et à Thibault de Roussy, ou à l'ung d'eulx qui sont bien voz amys. — Et, ma dame, dist Jehan de Soussy, pourquoy le diroit il plus tost à nous qu'il ne l'a voulu dire à vous ? » Le petit Saintré qui jà estoit tout asseuré, et congnoissoit bien les parolles de ma dame, feignant d'estre esbahy, ne disoit mot ; et quant ma dame vit qu'il se taisoit, dist à Jehan et à Thibault : « Ce maistre cy, que vous veez porter robe de martre fourée, pourpoint de soye et chausses brodées et si jolyes, nous veult faire entendre qu'il n'a point de dame, et, qui pis est, qu'il n'est point amoureux ; par ma foy, quant j'ay bien regardé, elle seroit en vous bien assenée d'avoir ung tel amoureux. » Et à ces parolles se montra très rigoureuse contre luy, et puis lui dit : « Or, sire, vous qui estes encores ung paige, combien que soyez de bon hostel, dont vous sont venuz ceste robe et cest

pourpoint ? — Ma dame, dit il, puis qu'il plaist à ma dame ma mere, qui veult que je soye ainsi et me l'a mandé, il fault que je luy obeysse à sa voulenté. — Et combien vous a elle envoyé ? — Soixante escuz, ma dame. — Soixante escuz, dist elle, vous en avez la moytié cabassé. — Non ay, par ma foy, ma dame. — Et ceste robbe, ce chapperon, ce pourpoint et ces chausses, que vous ont elles cousté ? soixante escuz ? je le vueil sçavoir. — Nennil, ma dame ; j'en ay avec tout ce que vous veez une aultre robbe de fin bleu fourrée de fins aigneaux de Romenie, et une aultre robbe de fin gris de Montevillier, doublée de fin blanchet, deux chapperons, deux paires de fines chausses, dont les unes sont de graine, et quatre escuz de demourant. — Et qui a esté vostre conducteur à faire tant de choses ? — Ma dame, nul. — Fors Perrin de Solle, dist ma dame, je say bien qu'il est preudhomme, et à voz affaires l'a bien monstré ; car vostre argent est à mon advis bien employé. Et ne me dictes vous pas dernièrement qu'elle vous avoit envoyé douze escuz, dont estiez si joly ? — Ma dame, ouy. — Et Dieu vous gard telle mere et vueil que vous luy soyez bon filz. Or çà, allez vous en tous, car il nous fault dormir. » A ces parolles tous partirent, et s'en allerent. En allant, Jehan de Soussy et Thibault

de Roussy louerent fort le petit Saintré, et luy dirent que les rigoreuses parolles de ma dame, ne print pas à desplaisir; et d'autre part se plaignoient de ma dame qui parloit ainsi rigoreusement, sans ce que la chose luy touchast, vouloit tant savoir son fait. « Voyre, dist il, et qui prendroit plaisir à tant de malgracieuses parolles qu'elle me dist, pour ce que ne luy dis qui est ma dame, et à ces femmes aussi, et ne me veult point croire que je n'en aye, ne vueille avoir nulle; et par ma foy, se j'en avoye, jamais je ne leur diroie, tant m'ont ennuyé. » Et lors ilz commencerent à rire; et sur ce fut leur departir, que puis à ma dame et à toutes les aultres ilz dirent, dont entre elles en fut grant ris. Si ne tarda gueres que les parolles de ma dame et d'elles toutes avec le petit Saintré, par eulx, en plusieurs lieux furent semées, tout ainsi que ma dame pensoit, et des aultres choses s'ilz l'eussent sceu, dont en fut bien ris. Et par ainsi demoura ceste loyalle et bonne amour secrette jusques à ce que fortune par sa variablté leur voulut le dos donner ainsi que après s'ensuyt.

L'ACTEUR. — Ceste amour ainsi loyalle et secrette dura XVJ ans; entre lesquels, quant ma dame vouloit parler au petit Saintré, pour le faire plus secrettement elle luy dist: « Mon amy, il n'y a que faire d'entrer à la dance,

mais d'en saillir à honneur ; pour ce que assez de fois vous ay fait venir icy de la gallerie, et jaçoit ce que vous dictes que vostre mere vous a ainsi habillé et fait joly, toutesfois plusieurs de gens pourroient penser beaucoup de choses, et n'en fault qu'une pour deviner et publier tout. Et pour ce me suis appensée que je ne vous vueil plus trouver en la gallerie ; mais quant je voudray parler à vous, ou vous à moi, nous ferons nos deux seignaulx ainsi que est dit ; et lors viendrez et ouvrez l'huy de mon preau, quant vous verrez que je m'en seray par nuict retournée en ma chambre, et veez cy la clef. Et là parlerons et deviserons ensemble à noz plaisirs. »

CHAPITRE XIII

Comment la dame advertit la royne de parler au roy, affin qu'il fist le petit Saintré son escuyer trenchant.

L'ACTEUR. — Et quant vint le troysiesme an de leurs amours, qu'il fut, en son seiziesme an, ma dame se appensa que

il estoit jà assez grant pour estre hors de paige, car il savoit bien trencher, et seroit bon pour estre varlet trenchant du roy ou de la royne, se elle pouvoit. Lors elle s'appensa comment elle le pourroit mieulx faire, et dist en soy mesme : « Se tu le dis à l'escuyer qui a de luy la charge, à cause des xij escuz, et puis des aultres choses, il pourroit penser que de toy viendroient ; et se tu le dis à tel seigneur, à tel, ou à tel encores, aucun d'eux pourroit penser la cause ; et toutesfois fault il qu'il soit aydié, et qu'il ne soit plus paige. » Et sy se conclud qu'elle mesme, de par luy, en supplie-roit la royne, qui en feroit la requeste au roy. Lors elle fit le signal de l'espingle, auquel le petit Saintré respondit.

L'ACTEUR. — Et quant ilz furent au preau ensemble, elle en le très amoureusement baisant, luy dist : « Mon très loyal désir, vous estes en l'aage de xvj ans, et doresnavant estes trop grand pour estre paige ; je me suis appensée que pour vous mectre plus avant, je feray à ma dame la royne, de par vous, priere que monseigneur le roy vous en boute hors, et que soyez de l'ung ou de l'autre varlet trenchant ; car, à la première fois qu'il vous vist si joly, il dist en riant qu'il voudroit que eussiez quatre ou cinq de ses ans, qu'il vous ordonneroit à trencher devant luy. Pourquoi je vous

advertiz que se ma dame vous en parloit par quelque façon que ce fust, affin que je ne fusse pas trouvée mensongiere, que très humblement vous l'en merciez. »

L'ACTEUR ENCORES. — De ces paroles le petit Saintré fut très joyeux, et très humblement en remercia ma dame, qui, après ces parolles, en le baisant très doucement, luy donna congié. Lors Saintré se part, et après luy ma dame tout coyement ferma la porte, puis s'en alla dormir.

L'ACTEUR. — Ma dame, qui de avancer son très humble servant jour et nuyct ne cessoit, le matin, au lever de la royne, luy dist en riant : « Ma dame, il faut que je me acquite ce que j'ay par plusieurs jours oublié ; c'est de vous faire une requeste de par ung jeune, très honteux escuyer, et qui est tant craintif qu'il ne la vous ose faire. — Et qui est il ? dist la royne. — Ma dame, c'est le petit Saintré. — Et que veult il ? — Ma dame, il dit qu'il a honte d'estre plus paige, et qu'il a jà xvj ou xvij ans ; qu'il vous plaise faire la requeste à monseigneur le roy qu'il soit son varlet trenchant, et il escripra à son pere et à sa mere qui luy ayderont de chevaulx et à le mectre en point. — Et en verité, dist la royne, sa requeste est raisonnable et honneste ; si le ferons très volentiers, car je say que monseigneur l'ayme

bien, et si est très gracieux jeune filz; et ay espoir, belle dame, qu'il sera une fois très homme de bien. » Laquelle requeste par la royne ne tarda gueres qu'elle ne fust faicte au roy. Le roy, qui par ses gracieusetez et par les bons raports qu'il en avoit, l'accorda très voulentiers. Dont, pour non mettre la chose plus en delay, aussi tost que la royne vist le maistre d'hostel devant le roy, elle l'en fist souvenir. Alors le roy commanda que le petit Saintré le servist de varlet trenchant, et qu'il commençast à ce disner, et eust trois chevaux et deux varletz de livrée. Le maistre d'hostel, qui congneut le bon vouloir du roy et la risée de la royne, et veit le petit Saintré entre les autres gentilz hommes, si l'appella, et puis luy dist : « Petit Saintré, mon amy, comment est vostre nom. — Monsieur le maistre d'hostel, dist il, j'ay nom Jehan. — Jehan, dist il, doresnavant vous ne serez plus paige, le roy vous a son varlet trenchant ordonné, à trois chevaux de livrée et deux varletz : et pour ce, mon filz, se vous fistes oncques bien, faictes tousjours mieulx; car par la relacion de voz gracieulx services, sans desservir nully, le roy vous ayme, si n'en soyez point orgueilleux, car j'espere qu'il vous fera tousjours mieulx; tenez voz mains et voz ongles netz, et le surplus de vostre corps au mieulx que vous

pourrez ; car en tous les offices de servir seigneur à table, le vostre le requiert. » Et tous ceulx de la salle qui ces parolles ouyrent, et de l'avancement du petit Saintré, furent tous bien joyeux. Et pour ce, est très belle et proufitable chose à tous jeunes escuyers de servir sans desservir, d'estre doux, humble et patient, pour acquerir la grace de Dieu et puis de toutes gens, ainsi que dit le proverbe commun : Qui bien ne mal ne peult souffrir, à grant honneur ne peut venir.

CHAPITRE XIV

Comment le petit Saintré remercia le roy, la royne et ma dame, pour ce qu'il avoit esté fait escuyer. Et comment il trancha devant le roy, et fist son office bien saigement.

L'ACTEUR. — Alors Jehan de Saintré, comme humble, doux et gracieux, incontinent à genoux devant le roy se gecta, et le remercia du grant honneur qu'il

luy faisoit. Le roy, comme seigneur saige, doulx et debonnaire, luy dit : « Saintré, faictes bien scullement, et nous le vous recongnissons. » Si se vira au maistre d'hostel, et là, present le roy et tous, le remercia des bons enseignemens qu'il luy disoit, et n'eut pas honte, comme plusieurs auroient, de le remercier publicquement. Et lors se part, et va à la royne, qui estoit en sa chambre; lors publicquement, sans faire nul semblant à ma dame, devant tous ceulx et celles qui là estoient, à genoulx très humblement la mercia. Et la royne lui dist : « Saintré, les services et gracieusetez que avez faitz à tous, et especiallement aux dames, ont avancez voz jours à vous faire saillir de paige et devenir escuyer de monseigneur et de nous; et pour ce, mon amy, pensez tousjours de bien faire et de complaire à chascun, car ung jour viendra qui payera pour tous. » Alors les tables furent dressées, et le maistre d'hostel pour disner la vint querir. Ma dame se montrant ignorante de toutes ces choses, avecques les autres dames et damoiselles, qui de Saintré tout bien disoient, ne dit plus fors que : « En verité il a esté, et est bon valeton. »

L'ACTEUR. — Quant le roy et la royne furent assis, et ma dame au bas bout de la table, le maistre d'hostel print le chenevas d

pain, la serviette, et sur l'espaule Jehan de Saintré la mist; lors il commença à faire son office de varlet tranchant, et si gracieusement que au roy, à la royne et à tous pleut grandement. Ma dame, qui au bas bout de la table seoit, le regardoit, de fois à aultres, moult souvent, et puis pensoit que vrayement il convenoit qu'il eut ses trois chevaulx qui luy estoient ordonnez et ses deux varletz; lors print l'espingle de sa poitrine, en façon de curer ses dens, fist son signal par tant de fois que Jehan de Saintré l'apperceut; et, au plus honnestement qu'il peut, de son signal respondit.

CHAPITRE XV

Comment le petit Saintré fut parler à ma dame en son preau; lequel elle baisa cordialement, et luy bailla cent soixante escus pour avoir ung cheval et autres choses nécessaires.

L'ACTEUR. — Et quant le soir fut venu, il ouvrit le preau, et là actendit ma dame, qui ne tarda pas longue-

ment. Et lors la chiere fut entre eulx telle qu'il n'est celuy ne celle qui penser le peust, se amours ne leur eust fait sçavoir. Puis luy dist : « Mon seul amy et ma très douce pensée, car cy longuement ne povez estre, baisiez moy par vrayes amours; et tenez cy en ceste bourssette cent et soixante escus d'or, que je vous donne pour achapter ung gent, frisque et fringant cheval de compaignon, qui soit bien vif et saillant, quoyqu'il vous couste jusques à quatre vingtz escuz; et ung autre de bonne taille, pour vostre chevaucher à tous les jours, du prix de vingt escuz; et ung aultre cheval double, pour porter vostre malle et ung varlet, du prix de trente escuz; et sont xxx escuz qui resteront : tous semblables vous en ferez faire de beaulx harnoys de draps, et vestirez voz gens et serviteurs de vostre livrée quant chevaucherez, et du demourant vous servirez tant qu'ilz dureront; et quant ilz fauldront, faictes moy seignal, sans plus. » Et à ces parolles dit : « A Dieu, mon ami, à Dieu, mon espoir et tout mon bien, et à Dieu, à Dieu mon tresor. — A Dieu et à Dieu, ma dame, celle qui me peut plus commander, et que je doy et vueil plus obeir. » Et à ces parolles ilz s'en vont.

L'ACTEUR. — Jehan de Saintré pour celle nuyct s'en va coucher en la chambre de l'escuyer, qui luy dist : « Mon filz Saintré, j'ay

grant regret que nous laissez ; mais je suis très joyeux de vostre bien. » Et puis dist aux aultres paiges du roy, qui entour luy estoient : « Or advisez, mes enfans, n'est ce pas belle chose que de bien faire et d'estre doux, humble et paisible et à chascun gracieux ? veez cy vostre compaignon qui, pour estre tel, a acquis la grace du roy et de la royne, et de tous. Et vous, qui estes noyseux, joueurs de cartes et de dez, et suivez deshonestes gens, tavernes et cabaretz, ne pour battre qu'on vous face, ne vous en puis chastier ; dont par ainsi combien que de bon lieu vous estes, tant plus croissez, se ne vous amandez, et plus chetifz et meschans serez. » Et en disant ces paroles, tous furent despouillez et s'en vont couchier.

L'ACTEUR. — Le petit Saintré, qui n'osoit descouvrir l'embusche de ses cent soixante escus, en ses puissettes celle nuyct les fist dormir, de paour qu'ilz ne luy fussent robez. Dieu scet se celle nuyct luy fut longue, pour les chevaux achapter ; mais quant le jour fut venu, et il fut prest et habillé, après qu'il eut ouy messe, incontinent s'en va à celle bourgeoise Marie de Lisle, et luy dist : « Marie, ma bonne mere, nouvelles vous dy. — Quoy, mon filz ? — Le roy de sa grace m'a osté de paige, et me fit hyer trancher devant luy, et m'a mis en l'ordonnance de trois chevaux et

deux varletz, et puis tout secretement par ung de sa chambre m'a fait donner cent lx escus, pour moy monter et habillier, moy et mes varletz, et que je me trouve bien en point ; moy deffendant que nul ne le saiche, pour l'envie qu'on en pourroit avoir ; si vous prie, ma très bonne mere, que nulle personne du monde n'en puist riens savoir. — Ha ! mon beau filz, dist Marie, que loué en soit Dieu. Or ne le dictes à personne, car jamais, par ma foy, n'en sera parlé. Et comment le ferez vous ? il faut que ayez homme qui se congnoisse bien en chevaulx, et qui vous adresse à avoir bons serviteurs. — M'amye et ma mère, je me suis appensé de l'escripre à monseigneur qu'il m'en envoie un ou deux ; et au regard des chevaulx, nostre maistre l'escuyer m'y aydera très volentiers, et des aultres assez, quant je les voudray prier ; mais je ne m'en vueil pas trop haster pour la suspeccion des gens. »

L'ACTEUR. — Que vous dirois je ? ains qu'il fut ung mois acompli, il eut varletz et fut bien monté, et luy et ses varlets bien rhabillez ; que encores l'ayma plus le roy et le tint chier, si fist la royne, tant qu'il leva bruit. Et quant ma dame aperceut la bonne chiere que le roy luy faisoit, print l'espingle et en fist le signal par tant de fois que Saintré l'aperceut, et lors luy respondit. Et quant ilz furent au preau le

soir ensemble, ma dame luy dist : « Mon amy et mon cueur, j'apperçois bien que monseigneur et ma dame, la mercy Dieu, vous ont bien en grace ; il nous fault penser que vous y puissiez bien entretenir, laquelle chose est en court très forte, par le faulx parler des envieulx ; sy n'est pour acquerir amys les plus prochains de entour eulx, les ungs par dons, les autres par promesses, qu'on ne peult fournir à tous, lesquelles en temps et en lieu se doibvent accomplir ; à l'ung le cheval, à l'aulture la hacquenée ou robbe : car les dons et promesses, quant on les peult accomplir, les honneurs, les bonnes cheres, selon les gens, esjouissent, lient et emprisonnent leurs cueurs, tellement que tous sont siens. Et aux officiers les robes de livrée, affin que pour vous tous soient ; à ma dame la royne aucunes fois la belle hacquenée, aucunes fois le beau cheval pour sa littiere ou pour son chariot. Aux aultres dames, selon ce qu'elles sont ; aux unes les haulx atours, aux aultres les seintures d'argent bien dorées ; aux unes fins tissus seulement, et aux aultres les belles ferrures ; aux unes les gracieulx dyamans, et aux aultres les verges d'or gentement esmaillées ; et les basses damoyselles, gans, bourses, laccetz et espingles, selon ce qu'elles sont ; et par ainsi au regard de vostre largesse, honneur, grace et amour de chascun seront

avecques vous ; et se vous me demandez dont vous doivent venir tant de choses, je vous repons : tant que vous me servirez loyaulment, je vous fourniray du tout. Et quant vous serez aulcunement du corps plus puissant, alors vueil que vous entrepreniez aulcunes gracieuses armes, dont porterez l'emprise que je vous donray ; et si parviendrez encores plus hault en l'amour et grace de monseigneur et de ma dame, aussi de tous. Et pour commencer à ces choses, veez cy en ceste bourse trois centz escuz, dont les cent seront pour une bonne haquenée ou pour ung bon cheval, que premier donrez à ma dame, et la remercierez de l'honneur que monseigneur vous a fait à sa requeste. Et les aultres cent escuz pour faire livrées de robbes à leurs varletz de chambre, toutes d'ung drap et d'une couleur et à voz devises, et pour plus de familiarité, vous en porterez une à ceste feste de Toussains. Et quant serez à la feste de Noel, vous aurez fait pour tous les aultres officiers à chascun sa robbe de vostre mesme devise, et d'aultre couleur de drap. Et les aultres cent escuz seront pour achepter aux aultres dames, damoyselles et autres, tout ce que vous ay dit, pour les estrener à ce premier jour de l'an. Aussi des robbes que donrez aux rois d'armes et heraulx, trompettes et menestriers. Et sur ce cas plus ne povons estre ensemble, mon cueur,

mon bien, et mon très loyal servant, baisez moy, et à Dieu soyez. »

L'ACTEUR. — Jehan de Saintré, qui voit et congnoist les grands biens et honneurs que ma dame luy fait et pourchasse, ainsi jeune qu'il est, à genoulx très humblement la remercia, disant : « Ah ! ma très redoubtée dame, la plus parfaicte en tous biens et en tous honneurs qui au monde soit, las ! comment vous poray je jamais servir à la millesiesme partie de ce que à vous servir suis tenu ; mais, ma très vraye dame, j'en feray ce que je poray, et Dieu, qui scet mon vray penser et mon desir, me acquittera du surplus. » Alors ma dame le fist lever, puis le baisa, en luy disant : « A Dieu soyez. »

CHAPITRE XVI

Comment le petit Saintré s'acoustra de cheualx, comme ma dame luy avoit dit. Puis la vint remercier, lequel elle admonesta de rechief, et apprint à se gouverner en court et en guerre, et en toutes autres sortes.

L'ACTEUR. — Et quant lendemain fut venu, après la messe ouye, Jehan de Saintré ne cessa qu'il eust les palefre-

freniers et les mareschaulx du roy et de la royne. Si les fist en sa chambre bien desjeuner, puis leur dist : « Je voudrois bien employer quatre vingts ou cent escuz pour une belle et bonne hacquenée ; qui la pourroit trouver ? » Alors envoyerent querir des plus souffisans et feables couratiers de chevaulx, et se informerent des plus belles hacquenées qui fussent à Paris, qu'ilz allerent veoir et en achapterent une, dont luy mesme fist son present à la royne, et tout à part luy dist : « Ma souveraine dame, tant et si humblement que je say et puis, vous remercie des biens et honneurs que le roy, à vostre requeste, et vous aussi m'avez tant faitz ; et en souvenance de ces choses, s'il vous plaist ung peu venir à la fenestre, ma dame, vous verrez une petite hacquenée que je vous presente, en vous suppliant que la prenez en gré, car à petit mercier petit panier. » La royne très doucement s'excusa, mais à la parfin elle vint veoir la hacquenée aux fenestres, qui moult belle et bonne estoit, couverte d'ung parement de soye aux couleurs et devises de la royne, dont elle fut très contente. Et quant il se fut departy, lors commença la royne à dire tous les biens de luy ; dont ma dame, sans en monstrier le semblant, en fut très joyeuse. Et quant la feste de Noel fut venue, tous les varletz de chambre, et puis les officiers, rois d'armes, heraulx, trompettes et

menestriers, comme dit est, furent tous vestuz, et les dames eurent leurs estrennes; et ma dame choisit la sienne, qui fut le moindre de tous les rubis. Lors, par toute la court et le royaulme, sa richesse florissoit, combien que ce ne fut pas sans grans envies, ainsi que par toutes cours de coustume est. Toutesfois les bons le louerent tant que le roy et la royne l'eurent plus en grace que jamais n'avoit esté. Et en ceste façon se gouverna tant que, de jour en jour, le roy l'aymoit plus. Si obtint du roy maintes graces, et acquist mains bons amys. Ne pour semblant que le roy fist, ne pour grace qu'il obtint, oncques d'orgueil ne fut surmonté, ains s'efforçoit de complaire à ceulx qui estoient ses enemys couverts. Et ainsi demoura en ceste ordonnance l'espace de trois ou quatre ans. Ma dame, qui veoit et sçavoit toutes ces choses, ne tarda gueres qu'elle vult parler à luy; lors fist son signal de l'espingle, auquel il respondit. Et quant ilz furent au preau ensemble, elle lui dist : « Mon seul amy, la Dieu mercy, il n'est roy, royne, duc, seigneur, dame, ne damoiselle, jusques aux plus petits, que chascun ne s'efforce à dire bien de vous, à cause que avez esté et estes humble et gracieulx; et ores, par vostre largesse, vostre renommée florist. Si vous prie et recorde, que sans nulle folle, ne prodigue despense qui redonde trop plus à honte qu'à

honneur, à dommage qu'à proffit, largesse bien employée vous soit recommandée, car elle porte en soit telles vertus, et premier : elle couronne l'amie de gloire pardurable, elle se garde en l'amour de chascun et sy acquiert nouveaulx amys, elle florist en bonne renommée, elle estaint des cueurs les yres, elle porte toute seureté, car elle fait ennemys, amys. Et pour ce, mon amy, je la vous recommande. Et se, par le plaisir de Dieu, fortune venoit en vostre ayde, employez vostre temps, soit en conquestes d'armes, soit en services de seigneurs ou en estre servy; que vostre desir soit de acquerir l'amour de Dieu et de plusieurs amys; et ne vous fiez pas tant en l'amour de fortune, s'elle vous a jà de ses biens departis, que ne ayez regard au dit de Alanus *in Anti Claudiano*, où il dist :

Tempore felici, multi inveniuntur amici;
Cum fortuna perit, nullus amicus erit.

« C'est à dire, mon amy, que ou temps que fortune est amie de quelque homme et qu'elle l'a mis en aucun estat, alors il trouvera des amis sans nombre; mais quant elle luy tourne le dos, il n'en trouvera ung seul. Et, pour ce, est pire que fol, qui à elle se fie.

CHAPITRE XVII

*Comment la dame conseilla au petit Saintré de
lyre livres et romans, affin de congnoistre les
gestes des nobles du temps passé.*

LA DAME. — « Encores vueil et vous prie que vostre plaisir soit à souvent lire belles hystoires, especialement les auctentiques et merueilleux faictz que les Romains firent sur tous ceulx de la monarchie du monde, lisez Titus Livius ou Orose; se voulez sçavoir des douze Cesaires, lisez Suetonius : et se voulez sçavoir les faicts de Cathiline et de la conspiracion ou conjuraçion, lisez Salustius. Se voulez sçavoir de la très fiere guerre de Jules Cesar et de Pompée, aussi de la souveraine bataille en laquelle ledit Pompée fut desconfit, lisez Lucan; et se voulez sçavoir des roys d'Egypte, lisez Macrobius; et se voulez sçavoir des Troians, lisez Dares Phrigius; et se voulez sçavoir de la diversité des langues, lisez Arnobius; et se voulez sçavoir des Juifs et de la destruction de Jerusalem, lisez Josephus; et

se voulez sçavoir des hystoires d'Affricque, lisez Victor. Mais Pompeius Trogus, selon que Valerius escript, c'est celuy qui a le plus escript de son temps en sus, car il parle ainsi que du commencement de toutes regions et de la situation des terres.

LA DAME. — « Et cy vous donray fin des anciennes hystoires, auxquelles vous prie et commande, que vueillez prendre plaisir à escouter et à lire ; que pour assubillier vostre esperit en toutes nobles et illustres euvres, ne pourrez myeulx vostre temps employer, ainsi que le vercifieur dit :

Ut ver dat florem, flor fructum, fructus odorem ;
Sic studium mores, mos sensum, sensus honorem.

« C'est à dire, mon amy : Comme le printemps donne la fleur, comme la fleur donne le fruit, et comme le fruit donne l'odeur ; ainsi l'estude donne les meurs, et les meurs donnent le sens, et le sens donne les honneurs. Doncques, par ainsi escouter et retenir les nobles hystoires, exemples et enseignemens, pourrez acquerir la pardurable joye de paradis, honneur en armes, honneur en sens, et honneur en richesses, et vivre liement et honorablement ; et quant vostre seigneur, ou aucuns aultres, feablement vous requerront de conseil, ensuivez le dict

Claudien le poete, quant il enhorta Honorius l'empereur, en son deuxiesme panegyrique, quant il luy dist :

Tu civem, patremque geras ; tu consule cunctis,
Non tibi : nec tua te moveant, sed publica vota.

« C'est à dire : Comme pere et amy tu portes des bons conseils, tu les confortes ; à toy seulement ne t'applique, ayme Dieu et le bien publicque. Car ainsi furent les bons Romains, et par ce dominerent en toute la monarchie du monde, et donnerent loix desquelles encores nous usons. Et sur ce saint Augustin, au cinquesme livre de la Cité de Dieu et au douziesme chapitre, recorde les parolles de Cathon, une des auctoritez de Saluste, qui dit : Les choses qui firent noz Romains si très puissans, sont sens, industrie et vray conseil en noz cueurs, et assemblées de conseils. Et pour ce, mon amy, je les vous recommande, afin que le conseil de vostre seigneur et de tous autres qui se fieront en vous, soit loyaulment gardé et tenu secret ; car à ce pend largement de vostre honneur et de ceulx qui aultrement le font.

« Or, mon amy, je vous ay assez dit pour ceste fois ; si prie à Dieu que tout ou la plus grant partie vous doint bien acomplir. »

CHAPITRE XVIII

Comment le petit Saintré se mist à genoulx devant ma dame, et la remercia; puis comment le roy et la royne luy donnerent argent pour soy advencer; et puis comment enfin ma dame luy dist qu'elle vouloit qu'il eust un braccellet esmaillé à sa devise le premier jour de may, et le portast un an entier pour s'esprouver encontre quelque chevalier au faict des armes.

L'ACTEUR. — Et quant ma dame eut ses parolles finées, Jehan de Saintré se mist à genoulx, et lors humblement la remercia, et dist : « Ma très redoubtée dame, celle qui me peut plus commander que tout le surplus du monde, si très humblement que je sçay et puis, vous remercie. » Alors elle, pour l'heure tarde, le baisa, et puis luy dist : « Allez vous en, je say bien que voulez dire, et laissez le surplus faire à moy. »

L'ACTEUR. — Lendemain, aussi tost que le jour apparut, Saintré se leva ; et après la messe dicte, au plus tost qu'il peut, s'en va le premier à la chambre de parement. Et ne tarda guerres

que les aultres chevaliers et escuyers y vindrent ; et lorsque le roy va à la messe et vit Saintré si bien et si gentement habillé, dist au sire d'Ivry : « Je seray bien trompé se Saintré n'est une fois bon homme ; mais dont luy vient ce dont il est si bien habillé ? — Sire, dist le seigneur d'Ivry, j'ai entendu que ma dame sa mere le pourvoit ainsi, et croy bien que c'est du vouloir de son pere, qui luy en donne l'honneur. »

L'ACTEUR. — Le roy se teust à ceste fois, et pensa en luy mesme que il luy vouloit aider ; et quant il fut revenu en sa chambre, manda querir son tresorier, et ordonna que Saintré eut cinq cens escuz. Et quant la royne le sceust luy en fist donner trois cens et une piece de damas. Et fust Saintré tellement en la grace du roy et de la royne, qu'il n'y avoit nul escuyer qui y fust tant ; et tout ce par le bon conseil de ma dame, qui par l'espace de sept ans l'avoit aymé. Et quant il fut en l'aage de vingt à vingt et ung ans, auquel temps le roy luy fist beaucoup de bien ; des aultres fois que ma dame vult parler à luy je m'en passe, car trop seroit long à reciter.

L'ACTEUR ENCORES. — Et quant Saintré fut en l'aage que j'ay dit, ma dame, à qui tous ses esperitz tendoient de le faire homme de bien et renommé, se appensa que vrayement il avoit

cueur et corps assez pour faire parler de luy. Et quant ilz furent assemblez, après leurs amoureuses devises, à chiere très lye, ma dame luy dist : « Mon vray amy, mon cueur et ma très joyeuse pensée, puis que à Dieu plaist que estes tant en grace de monseigneur le roy et de ma dame la royne, et aussi de tout le surplus, je me suis appensée que vous estes desoremais assez homme pour faire en armes quelque bien ; affin qu'il soit, en ce royaulme et dehors, quelques nouvelles de vous ; et, pour ce faire, à ce prochain et premier jour de may, je vueil que pour l'amour de moy vous portez un bracelet d'or esmaillé à noz devises, brodé de six bons diamans, de six bons rubis et de six bonnes et grosses perles, de quatre à cinq caras, qui sont cy dedans enveloppées en une bourssette qui est en ce saichet, auquel sont encore deux mil escuz pour vous mectre en point ; et du surplus de vostre despence d'aller, demourer et retourner, ne vous esmayez ; car je trouveray assez façon que monseigneur, ma dame et mes seigneurs mes beaulx oncles d'Anjou, de Berr et de Bourgogne, et autres seigneurs de nostr sang, chacun vous aydera ; et se ores ne faisoient, mon seul amy, ne vous souciez ta que dix mille escuz pourront durer. »

L'ACTEUR. — Et quant Saintré entend très grans biens, les honneurs et la gr

amour que ma dame luy porte, comme ravy de joye a perdu l'ē parler : toutes fois à genoulx se mist, et tout le mieulx qu'il peut la remercia. Ma dame, qui congneut la façon de son parler, luy dist : « Mon amy, je, qui vous ay sur tous autres pour moy servir choysi, vous prie encores que ne vous souciez fors que d'estre lie et joyeux, et par tout faire bonne chiere ; d'or et d'argent et de bagues, pour vous mectre bien en point à ce vostre commencement, je vous fourniray assez. Et quant vostre bracelet sera parfaict, la nuict de ce premier jour de may, qui sera brièvement, vous venez ici à moy, et je le mectray en vostre bras la premiere fois ; et le jour ensuivant vous le porterez par l'espace d'ung an, se en celui temps, vous n'avez trouvé aucun chevalier ou escuyer de nom et d'armes, sans reprouche, qui, pour acomplir vostre emprise, à cheval ou à pié, le vous ait osté, par convenant de ne le vous rendre jusqu'à ce que par les armes à pié, qu'il fera à vous, s'il a du meilleur, il le ait gaingné, lesquelles armes seront : et premier de course de cheval, l'ung contre l'aultre, en harnois et selles de guerre, tant que l'ung ait premier bien rompu lances ; c'est à sçavoir demi pié au dessous de la douille de fer, et ung pié au devant de la rondelle. Et celui qui premier les aura bien rompues, son compaignon, tout à cheval

present le juge, luy donra ung diamant lye, encore du prix de trois cens escuz ou au dessus, pour donner à sa très belle dame ; et le jour ensuivant, et Dieu ait gardé vostre corps de desloyal exoyne, ou autrement le huitiesme jour à l'heure ordonnée par le juge, tous deux combactrez à pié l'ung contre l'autre, de deux haches d'armes tant scullement ; lesquelles vous delivrez tant que l'ung ou l'autre soit porté par terre, ou des deux mains perdu son baston. Et se au departir de ceste arme vostre compaignon est le meilleur, je vueil et ordonne que, là present, luy donnez vostre dit bracelet ; et se Dieu vous donne le meilleur, il sera quicte pour vous rendre sa hache, là present, et puis pour tout le jour son harnois, quant il sera desarmé.

LA DAME. — « Car, mon amy, vous estes jeune d'aage, et si n'estes pas des plus grans, ne puissans de corps ; mais pour ce ne devez nulz doubter ; car souvent est advenu que le plus foible a desconfit le plus fort ; et en bataille, le moins de nombre assez tost desconfit le plus grant, quant ilz sont bien avecques Dieu ; car à ce mestier les gens combatent, et Dieu donne la victoire à qui luy plaist. Et pour ce, vous, de tout vostre cuer, requerez le conseil, la force, l'ayde de Dieu ; si ne pourrez mal finer. Et se fortune vous estoit contraire, ce que j'es-

pere en Dieu que non, ne vous en souciez, car jà pour ce mon bon vouloir ne changera vers vous, ains vous en aymeray trop mieulx ; car selon les droitz d'honneurs et d'armes, vous en serez plus à priser, et pour ce ne pouvez que bien faire, quelque chose que vous faciez ; mais que Dieu garde vostre corps d'exoine, comme il fera, se de bon cueur à lui vous recommandez, et auroye plus chier que eussiez affaire à ung homme renommé qu'à ung jeune comme vous ; et pour ceste cause, ains qu'ilz vous voient, je loue et vueil, que avant vostre partement ung mois, vous envoyez encores ung roy ou herault à la court premier du roy d'Arragon, puis à celle du roy de Navarre, qui sont des Espaignes les premiers, puis à celle du roy de Castille, et puis du roy de Portingal, qui sont quatre rois chretiens, presenter les lectres de voz armes ; se vraiment il n'est trouvé, à l'une des premieres cours, aucun chevalier ou escuyer, tel que dit est, qui ait emprins de vous delivrer, duquel, sur vostre chemin, il vous rapportera sa lectre et son scel, et se Dieu, comme j'espere, est du tout en partie pour vous, mon amy et mon cueur, vous serez l'escuyer renommé. Et Dieu scet comment monseigneur et ma dame la royne et chascun vous aymera et prisera, et celle seulle pensée est souffisante de desconfire ung geant ; et pour ce, mon amy, pensez d'estre

vaillant et à Dieu requérir vostre conseil et aide, si ne pourrez faillir; et à ces parolles il nous en faut departir, plus ne vous en dis maintenant. »

CHAPITRE XIX

Comment le petit Saintré remercya ma dame, puis fist faire le bracelet comme elle luy avoit commandé, et puis vint à elle, et luy monstra; dont elle fut bien joyeuse.

L'ACTEUR. — Lors Saintré à genoux se met et dist : « Ma très redoubtée dame, ma deesse et mon seul bien, si très humblement que je sçay et puis, du tout vous remercie; et quant aux armes que me ordonnez, Dieu avant, nostre dame et monseigneur saint Michel l'ange, oncques de choses, après vostre grace et amour, je ne fuz si content; car vous orrez, au plaisir de Dieu, nouvelles telles que, vous et messeigneurs, tous serez contens. » Lors print congïé d'elle et par ung amoureux baiser,

dix, quinze ou vingt rendus, et : « à Dieu soyez. »

L'ACTEUR. — Saintré, sur ce nouvel pensement, fut toute celle nuyt. Et quant le jour fut venu et qu'il eut messe ouye, lors fist à soy venir Gilbert Lorin, orfevre du roy, qui renom de preudhomme avoit, et à part lui dist : « Gilbert, mon amy, je voudroye ung bracelet d'or esmaillé de mes couleurs et à ma devise, et brodé aux deux lez de deux diamans, six rubis et six perles que veez cy. » Lors les monstra à Gilbert, qui moult lui pleurent ; et, pour abregger, en deux jours le bracelet fut faict. Et quant Saintré fut en la presence de ma dame, il frota son dextre oeil, pour le signe qui estoit entre eux, auquel ma dame de son espingle respondit ; et quant ilz furent ce soir au preau pour deviser, Saintré lui monstra le bracelet à la clarté de la lune ; mais bien veoir ne se pouvoit. Ma dame luy dist : « Je le verrai à la torche, et aussi demain, puis le vous rendrai demain au soir, quant revendrons cy ensemble et à noz plaisirs deviserons. »

CHAPITRE XX

Comment la dame conseilla au petit Saintré qu'il failloit qu'il fist publier son entreprise par ung herault d'armes, contenant comment le mieulx dansant, fust escuyer ou dame, auroit pris convenable, et luy mist le bracelet au bras; puis comment Saintré fist ung banquet à tous seigneurs et dames; et puis la nuyct retourna au breau parler à la dame, qui luy dist qu'il failloit publier ses lectres d'armes en la court de quatre roys.

ET quant ma dame eust lendemain veu le très bel et riche brasselet, fut très joyeuse; lors à Saintré fit son signal, auquel Saintré promptement respondit. Et quant ilz furent ensemble, ma dame luy dist : « Mon amy, veez cy vostre bracelet, lequel me semble tant bel, que à peine le pourroit estre plus; si me suis appensée, à l'asseoir des tables, que demain, qui sera la veille du premier jour de may, vous donrez ung très bel soupper à plusieurs chevaliers, dames et damoiselles de la court et autres, auquel je ne vueil point estre, combien

que vous m'y convirez. Et lorsque, pour publier vostre emprise plus honnorablement, par le roy d'armes ou herault vous ferez crier, que la dame ou damoiselle, chevalier ou escuyer qui seront les mieulx chantans à icelle feste, la dame ou damoiselle aura de vous ung bel dyamant, et le chevalier ou escuyer aura ung bel rubys ; et semblablement donrez à la dame ou damoiselle, chevalier ou escuyer mieulx dansant ; et, chansons dictes, vous aurez tout prest le bel et gracieulx banquet qui sera d'entremetz et d'autres viandes assez, auquel vous ferez porter le paon et lors les seigneurs, les dames et damoiselles, les chevaliers et escuyers feront leurs veuz ; et quant ilz les auront tous faitz, alors vous vouerez aux dames et au paon, à vostre dame faicte ou à faire, que ce premier jour de may, qui sera demain, vous metrez ung bracelet d'or, tel que sera, en vostre bras senestre par l'espace d'un an ; se dedans icelluy vous ne trouvez chevalier ou escuyer de nom et d'armes, sans reproche, et le surplus comme dist est, retenu sur toute chose le vouloir et plaisir du roy ; et quant vous aurez tout fait et acompagné les dames, portez avecques vous le bracelet au sain, affin que ce soir je le vous mette pour la première fois. — *Ma dame*, dist Saintré, le vray Dieu qui rend tous les biens faitz, le vous veuille rendre, et me doint grace de le vous desservir,

ainsi que mon cueur et ma pensée n'ont aultre desir. » Et ma dame, à l'usance et coustume, lui donna congié.

L'ACTEUR. — Le jour ensuyvant, qui fut le derrain jour d'avril, aussi tost qu'il fust jour, Saintré d'avoir queux et viandes de diverses façons fist diligence, et, pour abreger, fist le soupper et le banquet comme ma dame avoit dit. Puis convia seigneurs, dames, damoiselles, chevaliers, escuyers, bourgeois, bourgeoises de Paris et autres à planté. Et quant le soupper, le banquet, les dances et les veuz furent tous faitz, et Saintré avecques les autres eust convoyées les dames de la court, et que le roy et la royne eurent pris le vin de congié, et que tous furent departiz, Saintré, comme ma dame avoit ordonné, s'en alla au preau. Si ne tarda gueres que ma dame y vint. Et lors elle, pour la premiere fois, le bracelet en son bras senestre luy mist, en le baisant ; et pour ce que l'heure étoit tarde, n'y furent gueres qu'il ne les convint despartir ; mais en luy mectant, lui dist : « Mon amy et mon vray desir, je prie à Dieu et à nostre Dame que en tel heure et en tel point le vous puisse je mectre, que à tout honneur en puissiez revenir ; et se ainsi est, je leur voue que tous les vendredis je ne porteray linge sur ma chair nue, par autant de vendredis ou de samedis que serez dehors. — Ha ! ma dame,

dit il, et que vous ay je merité que une telle dame face telz veuz pour moy ! — Ouy, mon amy, dist elle, car vous estes tel que je vueil. Il m'est advis que le plus tost que vous pourrez, ayant le bon vouloir et congié de monseigneur, que vous envoyez vos lectres d'armes, à quatre cours desdits quatre rois, par quelque herault ou poursuivant qui vous apporte sur le chemin la responce. » Et à ces parolles, ma dame lui donna congié. Et par ainsi les cueurs soupirans, les yeulx l'ung de l'autre lermoyans, s'en departirent.

CHAPITRE XXI

Comment le petit Saintré fut devers le roy et la royne presenter sa lectre d'armes et demander congié de le obtenir, ce que le roy fit quasi comme constrainct.

L'ACTEUR ENCORES. — Le jour ensui-
vant, qui fut le premier jour de may,
Saintré fut tout de neuf et ses gens bien
habillez, et mit son bracelet; puis s'en alla

la messe ouyr, qu'il fit dire du saint Esprit, et là assembla tous ses amis que ma dame lui avoit dit. Lors tout de bon cueur l'accompaignerent devers le roy et furent plusieurs qui à le servir ou voyage se offriront. Et au saillir que le roy fist de sa chambre, où ce jour estoient messeigneurs ses freres et aultres plusieurs de son sang, Saintré et tous ses amis à genoulx se mirent. Lors il commença joyusement à parler et dist : « Nostre souverain seigneur, il est de coustume à tous nobles hommes de accroistre leurs honneurs par le très noble mestier d'armes et en plusieurs façons, dont je, desirant, comme l'ung de ceulx, esperant le congié et licence de vostre bonne grace, et non autrement, vouay arsoir en mon petit banquet, present mes très redoubtez seigneurs, dames et damoiselles, chevaliers, escuyers telz quelz, et plusieurs autres, que cest matin je porteroye en mon bras senestre ung bracelet d'or tel qu'il estoit, lequel veez cy, et le surplus pour la façon que, se vostre bon plaisir est, pourrez veoir cy en escript. » Lors le roy print les lectres d'armes et publiquement les fist lire devant luy, puis à la responce fut longuement, pensant aux armes fortes et à l'aage de Saintré, pour la grant amour que à luy avoit. Et quant il vit la longue response du roy, doubta moult le reffus, lors luy dist : « Hé! sire, pour la

premiere requeste d'armes que oncques je vous fis, pour Dieu vueillez la moi accorder ! Alors messeigneurs ses freres et tous ceulx qui là estoient, voyans sa très grande et bonne vou lenty, prièrent au roy pour luy, et tant que tous lui supplierent qu'il en fut content. Lors le roy s'en alla à la messe, et Saintré, après ce qu'il l'eut très humblement mercié, à la royne qui venoit près lui, se avança, et toute sa compaignie après. Lors à genoulx se mist, puis lui dist : « Nostre souveraine dame, il a pleu au roy moi donner congié de acomplir mon emprise d'armes, dont veez cy le bracelet, à l'ayde de Dieu, de nostre Dame et de monseigneur saint Michel l'ange, ainsi que en ceste lectre d'armes est contenu ; si vous supplie, ma souveraine dame, que ainsi soit vostre bon plaisir. — Et, mon ami, dist la royne, voulez vous jà faire armes ? Qui le vous a conseillé ? — Madame, dist il, Dieu et honneur le m'ont conseillé. — Et puis qu'ilz vous ont conseillé, je leur prie et supplie qu'ilz vous en facent joyeux. — Madame, firent plusieurs, faictes lire les lectres pour en veoir la façon ; nous ferons tant que de la messe reviendrons. » A ces parolles se avança ma dame, qui de très bon euil le regardoit, et aussi toutes les aultres, pour oyr ce qu'il disoit. Alors la royne lui dist : « Saintré, de ce que monseigneur est content, je le dois bien estre ;

si prie à Dieu, à nostre Dame et à monseigneur saint Jehan, puisque ainsi est, que vous en doint toute joye, et telle que desirez. » Lors la royne s'en va à la messe. Au revenir qu'elle eut fait, elle demanda la lectre d'armes et la voulut ouyr; puis dit : « Helas ! ce jeune homme, qui n'est encore que ung enfant, comment a il eu cueur d'entreprendre telles armes ? Il faut dire qu'il luy part de très grant et bon vouloir, et se Dieu le ramene en bon point, il me semble qu'il ne vouldra faire autre chose, puis que si jeune s'y va bouter. » Et à ces parolles la royne s'en va à table pour disner.

CHAPITRE XXII

Comment le petit Saintré entra en joustes, triumpuant et bien acoustré, et se porta vaillamment, si qu'il fut prisé et honoré de chascun.

L'ACTEUR. — Et quant les tables furent ostées, le roy, la royne, les dames et tous vont aux hours pour veoir les joustes qui se vouloient commencer. Lors vint Saintré, sur

son destrier housé d'ung damas blanc, tout brodé à fleurs de ne m'oubliez mye. Et lors commença la joustes de ceulx de dehors à ceulx de dedans, desquelz, pour abreger le conte, je me passe; et aussi de ceulx qui à celle joustes furent, fors de Saintré, qui rompit des lances, bouta un par terre jus de la selle de son destrier, et deux avecques leurs destriers, et tant dura en son heaulme, qu'il fut de tous les joustes premier et derrain sur les rencz. Se ma dame estoit aise, il ne le fault pas demander; et en verité aussi estoient le roy, la royne et tous les aultres de la court, eulx donnans merveilles de son eureux jouter; et pour la premiere fois eust de ceulx de dehors un très bel diamant, qu'il donna à ma dame.

L'ACTEUR. — Le jour ensuivant encores vint il sur les joustes, housé, luy et son destrier, d'ung aultre nouvel parement tout de satin vert à fleurs de pensées. Que vous dirois je? Encores fist il si bien que chascun s'en esmerveilloit; mais pour l'emprise qu'il devoit faire, le roy doubtant aucun inconvenient, l'en fist retraire; et par ainsi durant ces joustes ne josta plus.

CHAPITRE XXIII

Comment Saintré fut au preau parler à ma dame, et luy declara de point en point comment il estoit aconstré, quels gens et officiers il avoit pour parfaire son entreprise; et comment la dame voulut sçavoir de ses couleurs et de ses armes. Puis prindrent congé l'ung de l'autre à très grans pleurs et regrets.

L'ACTEUR ENCORES. — Et quant les premières festes furent passées, Saintré ne cessa de querir puissans destriers, et aussi requerir chevaliers, escuyers, ses parens et amis, rois d'armes, heraulx, trompettes, menestriers et deux tabourins, et de faire robes, orfaveries, harnois, paremens, plumes et autres choses à luy nécessaires pour briefvement faire son voyage et accomplir ses armes; et quant il fut du tout bien en point, il fit à ma dame son seignal. Et quant il fut le soir au preau, il conta et devisa tout ce qu'il avoit fait, et comment il avoit trois chevaliers : « tel, tel et tel, à xiv chevaux; ix escuyers à xxij chevaux; un chapellain à deux chevaux; le roy d'armes

d'Anjou à deux chevaulx ; Thouraine et Lusignen, les heraulx, à quatre chevaulx ; quatre trompettes à six chevaulx, deux tabourins à deux chevaulx, et quatre très beaulx et puisans destriers que beaux petits paiges chevaucheront tout le pais, conduitz par deux varlets à cheval, qui les penseront ; deux queux à trois chevaulx, ung fourier, ung mareschal et ung armurier à quatre chevaulx ; huyt somniers, quatre pour moy et quatre pour ma compaignie ; et douze aultres gens à cheval pour ma chambre servir, et tel à trois chevaulx pour maistre d'hostel ; somme toute iiij. xx. ix. chevaulx, qui tous seront vestus de voz couleurs et de vostre devise. » Lequel nombre de gens et de chevaulx il dit tout coyement, ainsi comme s'il luy semblast trop grant nombre, pour en ordonner à son plaisir.

L'ACTEUR. — Et quant ma dame, qui de l'oyr estoit très joyeuse, luy sembla qu'il eust dit crainctivement, doubtant de trouver la despense et finance à cè nécessaire, lors elle luy dist : « Mon amy, il me semble que avez fait si bien qu'on ne pourroit mieulx. Et quant au regard de la despence, je ne vueil que vous en souciez ; car j'espere que monseigneur, ma dame et messeigneurs mes beaulx oncles, especialement vous y ayderont ; et s'ilz ne le faisoient, pour vostre despence d'ung an, vrayement, mon

amy, vostre honneur ne demourra pas. Et, mon amy, de quoy sont voz paremens? — Ma dame, j'en ay trois, qui sont assez riches, dont l'ung est de damas cramoisy très richement broché de drap d'argent, qui est bordé de martres sebelines; et en ay ung aultre de satin bleu, losengé d'orfaverie à nos lectres branlans, qui sera bordé de lestisses; et si en ai ung aultre de damas noir, dont l'ouvrage est tout pourfillé de fil d'argent, et le champ tout emplí de houlpes couchées de plumes d'autrusse, verdes, violettes et grises à voz couleurs, bordé de houpettes blanches d'autrusse, mouchetées de houpes noires, ainsi que hermines, et sur cestuy j'entens faire mes armes à cheval, retenu vostre bon plaisir: et dit chascun qu'ilz sont très riches, et les fait beau veoir; et si en ai ung autre, et ma cotte d'armes toute semblable, sur lequel je viendray sur les lices pour faire mes armes à pié, qui est de satin cramoisy, tout semé de branlans d'or, esmaillé de rouge cler, à une grant bande de satin blanc, toute semée de branlans d'argent à trois lambeaulx de satin jaulne, tout semé de branlans de fin or luyant qui seront mes armes. — Et, mon amy, je vous prie que vous les blasonnez autrement. — Ma dame, mes armes sont de gueulles à une bande d'argent à quatre lambeaulx d'or. — Hé! Dieux, dist ma dame, et que c'est belle chose en ve-

rité! Je les verrois volentiers, se ne fust la doute du parler des gens; mais j'en trouveray bien honnestement la façon, car je le diray par bonne maniere à ma dame, qui vous en priera. — Or bien, dist Saintré, ma dame, je suis tout prest doresnavant, quant seroit vostre bon plaisir, car il me semble que le plus brief est le meilleur; je pense que ores Lusignen le herault soit là, et se par aventure pour moy delivrer, je debvroie sur mon chemin rencontrer. » Lors prindrent le jour de partement, au quinziesme jour du prouchain moys de juillet ensuyvant. A ces parolles l'ung de l'aulture, à très grans soupirs et très amoureux baisers, se departirent.

CHAPITRE XXIV

Comment la dame advertit la royne que Saintré estoit merueilleusement bien acoustré de coursiers et aultres choses; parquoy ladicte royne dist à Saintré qu'il fist admener ses chevaulx en la gallerie, pour les voir, ce qu'il fist. Et comment le roy et la royne les virent, qui moult le priserent.

L'ACTEUR. — Lendemain au matin, à l'atourner de la royne, ma dame n'eust pas mis en oubly la veue de ses beaulx paremens; si dist à la royne tout bellement : « Ma dame, j'ay ouy dire que ce jeune filz Saintré a fait faire très beaulx paremens à merveilles; vrayement je ne le puis croire; toutefois, ma dame, se c'est vostre bon plaisir, que vous les voyez? et entre nous femmes sans plus, car j'entens qu'il les tient bien serrez; et quant vous l'en prierez, il le fera très voulentiers. — Dicter vous, Belle Cousine, qu'ilz sont si beaulx, selon ce que on dit? — Ma dame, encore plus beaulx, que je ne vous scauroye dire. — Alors, dit la royne, se nous ne sommes

esconduyttes, nous les verrons, ma dame, et saurons que c'est pour ce qu'il les tient si cellées. — Dites luy qu'il face venir ses quatre destriers cy bas en la petite court, et face porter les paremens couverts, lesquelz seront là mis dessus, et vous ferez les portes clorre et bien garder. — Ha ! par ma foy, dist la royne, vous dites très bien ; faictes m'en souvenir quant le verrez. » Et ces parolles finées, la royne va à la messe, et en la chambre de parement vit Saintré qui là estoit. Lors ma dame s'avança, et dist bellement à la royne : « Ma dame, veez là Saintré. » Lors la royne appella Guillaume de Lins, son huysier d'armes, et fit appeller Saintré : « Saintré, se Dieu vous doint joye, dist la royne, de la chose que plus desirez, nous vous prions que puissions veoir voz paremens d'armes sur voz destriers, qu'on dit qui sont si beaulx. — Eh ! ma dame, dist il, saulve l'honneur des diseurs, ce ne sont que paremens à simples compagnons ; ce seroit à moy honte que vous veissiez si povre chose. — Et, beau sire, telz qu'ilz sont, nous vous prions que les veons en ceste basse court après disner, et nous ferons clorre et bien garder les portes ; et pour le faire plus celement, se vous voulez, faictes porter voz paremens couvers par voz gens ; et puis faictes venir tous voz destriers ; et quant ils seront couvers, faictes nous secretement

appeller. — Ma dame, puis que ainsi vous plaist, dit Saintré, voz prieres me sont entiers commandemens. »

L'ACTEUR. — Après que le roy et la royne eurent disné, et que les tables furent levées, Saintré manda querir ses paremens et puis les destriers. Les portes furent closes ainsi que ordonné estoit, et puis les paremens mis sur les destriers. Alors Saintré s'en va à la royne, ainsi qu'elle avoit dict. Lors la royne, hastée de ma dame et du desir qu'elle en avoit, ne se peut tenir. que au roy ne dist la venue des destriers couvers. « Et comment, dist le roy, sont ilz si beaulx ? — Monseigneur, vous les verrez, se vous plaist. — Ouy, vrayement, dist le roy, faisons venir le vin de congié. — Ah ! monseigneur, dist la royne, que gueres de gens n'y soient. » Après le vin de congié, le roy et la royne se partirent, et de dessus les galleries virent les destriers couvers, qui leur semblèrent très riches et très beaulx. Lors toutes dames et damoiselles commencerent à louer Saintré, et à faire veuz et prieres que Dieu luy donnast grace de à grant honneur retourner. Et quant le roy se voulut retraire appella Saintré, et en devisant de plusieurs choses, il fut entré en sa chambre, puis s'en va en sa garde robe ; et ne tarda guere que par Jehan de Seuffle, son varlet de chambre, luy envoya, en trois saichetz,

trois mille escus, pour employer aux affaires de ses armes. Et quant la royne entend que le roi lui a donné trois mille escus, elle en fut très joyeuse. Lors appella ma dame, et luy dist : « Belle Cousine, je suis très joyeuse de ce que monseigneur a donné à Saintré trois mille escuz pour employer à son voyage; vrayement, dist elle, moins de mille ne luy en puis je donner, et je vous prie que luy en donnez deux ou trois cens. — Ha! ma dame, dist ma dame à la royne, vous taillez larges courroies d'autrui cuyr. » Et à ce faire se fit moult prier. Et quant messeigneurs d'Anjou, de Berry et de Bourgoigne sceurent ce que le roy luy avoit donné et la royne, chascun d'eulx luy en donna mille. Ainsi furent sept mille qu'il eust, sans les autres dons que plusieurs aultres seigneurs luy firent. Et en verité il n'en enquist, ne fit enquerir oncques deniers, dont il fut assez plus prisé, et disoit on : « Nous devons nous bien ayder à un tel jeune escuyer, qui n'est encores que ung enfant, et de la bonté de son cueur entreprend tant de vaillance; en verité, il se doit bien aymer. »

CHAPITRE XXV

Comment Saintré, après qu'il fut prest pour partir, vint demander congé au roy pour faire son entreprise, laquelle chose le roy luy conceda, nonobstant qu'il fust marry de son départ.

L'ACTEUR. — Et quant le terme de son partement aproucha, huit ou dix jours avant, Saintré atout ses trois chevaliers, ses neuf escuyers, roys d'armes, heraulx et tout le surplus de ses gens, luy et eulx tous vestuz de robes à sa devise, accompaigné de plusieurs aultres seigneurs, chevalliers et escuyers ses amys, vindrent tous à genoulx devant le roy, presents messeigneurs d'Anjou, de Berry et de Bourgoigne ses freres. Et lors Saintré très humblement luy dist : « Nostre souverain seigneur, il a pleu à vostre Grace estre content que je portasse l'emprise de ce bracelet, pour acomplir armes à cheval et à pié, que vous veistes par escript ; si vous viens très humblement supplier que vostre plaisir soit moy donner congé, tel que le quinziesme jour

du mois de juillet, messeigneurs mes freres et mes amys qui cy sont, et qui de leurs courtoisies me veullent acompaigner, puissions, à l'aide de Dieu, de nostre Dame et de monseigneur saint Michel, partir et commencer mon voyage. »

L'ACTEUR. — Le roy, qui jà comme dist est, avoit donné le congié, dist : « Comment, Saintré, estes vous jà prest ? — Sire, dist il, ouy. » Lors luy dist : « Saintré, vous estes noble homme, en vostre hostel a eu de vaillans gens, Dieu vous doint grace de les ressembler, comme j'espere que si ferez, car vous encommencez bien jeune ; et ne vous souciez quelque chose qui de vous adviengne, car vous n'estes d'armes que ung escollier ; si ayez espoir en Dieu, que par tems vous en serez maistre. Mais d'une chose vous recorde : en quelque façon d'armes que vous soyez, que vous gaignez ou perdez honnestement et joyusement. » Et lors le roy fut content de son partement, dont Saintré très humblement l'en mercia ; et lors le roy se part, et Saintré aussi très humblement remercia mes dicts seigneurs des dons qu'ilz luy avoient faitz.

CHAPITRE XXVI

Comment Saintré fut au preau prendre congié de la dame, qui l'advertit de rechief de tous ses affaires ; et comment en la fin prindrent congié, non pas sans gecter grosses larmes d'une part et d'autre.

L'ACTEUR ENCORES. — Et quant les dix, les douze et les quatorze jours du moys furent venus, ma dame, pour les très grands et angoisseux regretz que elle avoit en luy, tous les jours faisoit son signal de l'espingle, auquel il respondoit. Et quant ilz estoient au preau assemblés, dont pour le très brief partement estoient maints durs soupirs et maintes larmes gectées, lors ma dame luy dist : « Mon seul bien, et tout tant que je puis dire, monseigneur le roy vous a donné trois mille escuz, ma dame mille, messeigneurs mes beaulx oncles chascun mille, qui sont sept mille, sans le surplus des autres seigneurs. Et pour ce qu'on ne scet des aventures, je vous en donray trois mille, qui seront dix mille ; desquelz, sans trop grans

excès, ne prodigues despenses, en pourrez longuement bonne despence maintenir. D'une chose vous prie, que à la fin de vostre messe, chascun jour, vous estant à genoulx, vostre prebstre, après ce que il aura donné la generalle beneysson que nostre Seigneur dist à Moyse de sa propre bouche, si comme est contenu en la Bible, ainsi que devant vous ay dit, que pour la vous ramentevoir encores die : *Benedicat tibi Dominus, et custodiat te. Ostendat faciem suam tibi, et misereatur tui. Convertat Dominus vultum suum ad te, et det tibi pacem.* Laquelle beneysson encores vous prie que, sur le point de desmarcher pour faire voz armes, soit à pié, soit à cheval, vous mesme de bon cueur, en faisant le signe de la croix, faictes en disant : *Benedicat michi Dominus, et custodiat me. Ostendat michi faciem suam Dominus, et misereatur mei. Convertat Dominus vultum suum ad me, et det michi pacem.* Et lors partez seurement, et faictes vertueusement ce que devez faire, car par ainsi ne pourrez faire chose, gaigne ou perte, que tout ne vous soit à honneur; et en adviengne ce qu'il pourra, car jamais ne vous faudray. » Et à ces parolles, la source des larmes de son cueur saillirent de ses yeulx tellement que sa langue cessa pour leur donner paix.

L'ACTEUR. — Et quant Saintré, qui jà, par les grans biens et honneurs que ma dame luy

avoit tant fais, à laquelle il se tenoit sur tous les aultres amans du monde le plus eureux, et tant plus, quant tous les jours de bien en mieulx renouvelloient les biens, les honneurs et les très nobles et chevaleureux records qu'elle luy faisoit, à très grant destresse de son cueur lui dist : « Ha ! maistresse haulte et souveraine deesse sans per, vous qui me deveriez reconforter du très desplaisant dueil que mon cueur a, à cause du departir de vous qui estes mon seul desir, mon seul plaisir et mon bien souverain, et je voy ores que vostre ducil, allié du mien, ont tant assailly et combatu mon cueur, qu'ilz l'ont vaincu et navré à mort ; et par ainsi je m'en vois ailleurs mourir, et ma dame à Dieu soyez. » Et à ces paroles il tourna ses espaulles pour soy partir.

L'ACTEUR. — Ma dame, à qui le ruyssel de ses larmes estoit presque vuidé, oyant les paroles de Saintré, par ung très merveilleux sospir meslé de sa parolle, luy dist : « Hé ! mon amy, revenez se vous voulez, vous savez que nous femmes avons les cueurs tendres et piteux aux choses qui sont par nous aymées, si ne vous soit en desplaisir, car je suis toute reconfortée, esperant que Dieu vous ramenera à très grant joye. Or, mon très loyal amy, or, mon bien, or, ma pensée, or, le tresor de ma vie et de ma mort, faictes bonne chiere, allez

joyeusement ; car, sur ma foy, pour l'amour de vous, je me tiendray joyeuse et lie ; et de voz nouvelles gardez bien que vous ne m'escripvez sur tant que avez ma vie chiere, mais bien à plain à ma dame en escripvez, et de là sans nul danger je sçauray tout à plain ; et sur ce, mon amy, nous fault baisier. » Et là furent donnez baisiers, et baisiers rendus sans compte et sans mesure, tous acompaignez de piteux souspirs. Et tant furent en ce doloireux plaisir et en celle desconfortée joye, que la minuyt sonna, dont furent tout esbahys. Et alors convint que le très doloireux departir se fist. Et au prendre congié, ma dame, le baisant, en l'ung de ses doigtz un très bel et riche dyamant luy mist ; et « à Dieu soyez ! »

CHAPITRE XXVII

Comment Saintré print congié du roy, de la royne et des dames, ausquelles il donna à chascune une verge d'or ; et comment la royne en demanda une, laquelle il luy bailla en s'excusant, disant que il ne cuydoit pas qu'elle eust daigné prendre si petit present.

LACTEUR. — Le matin ensuyvant, quinziesme jour de juillet, que le terme estoit du partir, après la messe ouye, et que le prebstre eust à Saintré donnée la beneysson, Saintré atout sa compaignie, vestu de sa livrée, vindrent prendre congié du roy, qui lui dist : « Saintré, Dieu vous doint bien aller, bien besoingner et à vostre grant honneur retourner ! d'une chose vous ay prié et prie, qu'il vous souviengne de gagner ou de perdre honorablement et honnestement. — Sire, dit il, au plaisir de Dieu, vous n'en orrez jà autrement parler. » Lors le bon roy luy toucha la main. Puis s'en va à la royne, qui lui dist : « Hé ! Saintré, puis qu'il faut que vous en ailliez, nous toutes prions à Dieu qu'il vous

doint pris d'armes, et joye de voz amours. — Ma dame, dist il, il en soit à vostre bon plaisir du prix d'armes, mais mes amours sont à servir vous et le roy aussi. » Et à ces parolles il print congïé d'elle, puis de ma dame assez briefvement, fors que en soupirant elle luy dist : « J'ay jà prins congïé de vous. » Puis va aux autres dames et damoyselles, à chascune desquelles il donna une vergette d'or, toutes esmaillées à fleurs de souviengne vous de moy, dont n'y avoit celle qui tenir se peust de plover, tant l'avoient toutes aymé et l'amoient. Et quant la royne ouyt le bruyt de ces vergettes données, elle apella Saintré, et en riant lui dist : « Et, beau sire, ne sommes nous pas, Belle Cousine et moy, dames comme les autres ? Que ne nous faites vous de vostre livrée ? — Ha ! ma dame, dist Saintré, pour Dieu, qu'il me soit pardonné, car je n'avoye hardement, ne cuydoie que telles dames daignassent prendre de moy si petit don. — Si ferons, dist la royne. » Alors leur donna de toutes celles qu'il avoit, combien que toutes fussent pareilles ; puis luy dirent : « Saintré, grant mercy. » Et à ces parolles, Saintré reprunt congïé. Et à son departement ma dame ne se peut tenir de lermoier ; alors elle, pour son excuse, dist à la royne : « Jamais pour deuil, ne pour regret que j'eusse, je voudroye que je ne peusse

lerme gecter, sinon quant je voy les aultres plorer. — Et en verité, ma dame, dirent les aultres, qui est le cueur de femme qui se porroit tenir de plorer à veoir cest enfant qui va en si grant peril, et qui est nourri avecques nous, et qui tant de plaisir nous a fait tous les jours. »

CHAPITRE XXVIII

Comment, après que Saintré eut prins congié des barons et seigneurs de la court du roy, s'en alla disner avecques ses compaignons, ausquelz comme il disnoit, la royne luy envoya ung très fin drap d'argent, et plusieurs seigneurs aultres dons et largesses; et comment à sa despartie se fit conduire par les heraulx, trompettes et joueurs d'instrumens, et leur donna à soupper au Bourg la Royne, où il logea.

L'ACTEUR SUR LE PARTEMENT DE SAINTRÉ. — Et quant Saintré eut prins congié des dames à l'hostel, il va prendre congié de mesdits seigneurs qui très bonnes parolles chascun luy dist. Et lors s'en va atout

sa compagnie en son hostel disner. Et endementiers qu'ilz disnoient, la royne luy envoya une piece d'ung très fin drap d'argent; monseigneur d'Anjou luy envoya ung très bel courcier très bien en point; et monseigneur de Berry, ung biau mantel et cinq cens doz de fines martres sebelines; et monseigneur de Bourgogne, cinquante mars de vaisselle. Et n'y eut celluy, ne ceulx qui firent les presens, à qui il ne donnast cent escuz pour l'honneur et amour de ma dame la royne et desditz seigneurs. Et quant ilz eurent disnez, tous monterent à cheval, là furent chevaliers et escuyers de la court du roy, de la royne et de mesdits seigneurs, et plusieurs aultres, au nombre d'environ mille chevaulx, touz venus pour le convoyer. Lors il fait partir tous les premiers, ses deux fourriers, ses queux et son chapellain, quatre trompettes portans les banieres de ses armes et puis ses troys heraulx; et après ses trois chevaliers et neuf escuyers, deux à deux et tous leurs gens après, vestuz de sa livrée; ses cinq sommiers, couvers de tappis à ses armes, menés par deux varlets à pié, et puis ses tabourins; et après ses quatre destriers, couvers de paremens de fin taffetas de Florence, gris, vert et violet, à grans lectres d'argent à sa devise, et sur leurs testes chascun ung très bel champffrain d'acier bien garny de très

belles plumes d'autrusse faictes de broderies et bien emplies de branlans d'argent ; et dessus les destriers quatre très gents paiges, vestuz de sa devise, toutes les manches chargées de branlans d'argent, et sur leurs chiefs chascun ung très bel chappel de plumes à ses couleurs. Et après les destriers venoient les deux palle-freniers, et puis le mareschal. Après venoient plusieurs tabourins, et après les menestriers qui le venoient convoyer. Après les menestriers venoient les poursuivans ; et après, les heraulx des seigneurs et puis ceulx du roy, et puis les roys d'armes royaulx. Et après venoient toutes les trompettes et les clairons, premiers ceulx des seigneurs, et puis ceulx du roy. Et après ses trompettes venoit il, vestu de sa devise comme ses paiges, les manches toutes d'orfaveries branlans, et sur son chief ung semblable chappel de plumes, sur le très bel coursier que monseigneur d'Anjou à son partement luy avoit envoyé, et venoit au meilleu de quatre seigneurs, deux devant et deux après, et puis tous les aultres seigneurs, chevaliers, escuyers, comme ilz povoient, et en ce très grant honneur, à son partement de la court, en la ville de Paris une bonne lieue. Et au departir fit venir avec luy tous les roys d'armes, heraulx, poursuivans, trompettes, menestriers, tabourins, et aultres compaignons d'esbatement, soupper avecques

luy au Bourg la Royme, où pour celluy jour il se logea, lesquelz il tint bien aises. Et au matin leur donna cinquante escuz. Et à tant me tairay cy de son partement, et parleray de son chemin et de la venue de Lesignen le pour-suyvant.

CHAPITRE XXIX

Comment Saintré, estant en Avignon, le roy d'armes d'Anjou lui apporta le scelle de la responce de sa lectre d'armes, et luy compta tout comment il avoit parlé à Enguerrant, et monstré sa lectre d'armes, qui en fut moult joyeux.

L'ACTEUR. — Et quant Saintré fut en Avignon, pour la grant nouvelle de sa venue, le roy d'armes d'Anjou, qui le scelle de sa response portoit, au saillir de la messe, à Saintré ledit scelle presenta. Et quant Saintré eut bien leu et devisé ledit scelle, devant chascun publicquement retourna incontinent à l'église remercier Dieu devotement, puis audi

roy demanda devant tous toute la façon de son delivrement, et qui estoit celluy qui emprins avoit à le delivrer. Lors dit Lesiguen : « Je premier arrivay à Barselonne le troisiemesme jour de juing, assez tart, et celle nuyt me reposé. Le matin, après la messe ouye, je revins en mon logis, et vesty vostre cocte d'armes, ainsi que mon droit estoit, et mis la boîte où vostre lectre d'armes estoit, en mon saing, puis par le varlet de l'hostel me fis conduire au palais du roy. Et quant je fuz à l'entrée, je rencontray ung chevalier très bel de corps et bien acompagné, nommé messire Enguerrant de Servillon, lequel en passant je saluay humblement ; et quant il me veit vostre cocte d'armes vestue, subitement il me appela, disant : « Herault que vous estes, au semblant de la cocte d'armes vestue que vous portez, comment est vostre nom ? — Monseigneur, dis je, mon nom de mon office est roy d'armes d'Anjou, de Thouraine et du Maine. » Alors il me dist : « Roy d'armes, vous soyez le bien venu ; il me semble que venez en ceste court du roy pour quelque fait d'armes, et se ainsi est, je vous prie que vous le me declairez. — Monseigneur, dis je, il est vray que je suis envoyé de part ung noble et renommé escuyer du royaume de France, nommé Jehan de Saintré, lequel au premier jour de ce derrain mois de may, par veux fais,

presens plusieurs haultes et nobles dames et damoiselles, seigneurs, chevaliers et escuyers à grant nombre, print emprinse de porter en son bras senestre ung très riche bracelet d'or paré de pierres precieuses, et ce par l'espace d'ung an, et jusques à tant qu'il trouve aucun chevalier ou escuyer de nom et d'armes, sans reproche, qui le veuille délivrer des armes, à cheval et à pié, comme ceste lectre contient ; si luy porteray le scelle de celluy qui le voudra delivrer. Et pour ce faire, il vient en ce royaume, tout premier, en la court de ce très noble roy, où il sera ung mois entier, attendant sa delivrance par ung chevalier ou escuyer tel que j'ay dit. Et au cas qu'il ne le trouve cy, il yra semblablement à la court du roy de Navarre, puis du roy de Castille, puis de Portingal, à chascune court demourer ung mois, s'il ne treuve son expedicion comme j'ay dit. — Ores, roy d'armes, je vous prie que ces lectres je puisse veoir, vous promettant, sur la foy de noble chevalier, que se elles sont armes honorables que, au bon plaisir de Dieu, de monseigneur saint George et de mon souverain seigneur le roy, que je seray celuy qui à mon pouvoir luy accompliray ses armes. » Et quant à son estat bien accompaignié, façon de corps et honneste de parler, aussi la foy qu'il me promettoit, je aperceuz bien que noble estoit : et me sembla

ce que je queroye avoir trouvé. Lors de mon seing je prins voz lectres et les lui baillay, lesquelles à son plaisir leues, me dist : « Roy d'armes, venez vous en avec moy. » Lors il retourna et parla à plusieurs chevaliers et gens de la court, ausquels montra voz lectres. Puis me redist : « Roy, venez à moy. » Lors me print par la main, et me mena devers le roy, qui de sa messe sailloit. Alors luy et moy, tenant l'un l'autre par la main, nous agenouillames et tous les autres aussi, puis en son langaige dist : « Seigneur, moy saillant de ce vostre palais, ay, par bonne advanture, trouvé le roy d'armes d'Anjou qui est cy present, et à la cote d'armes qu'il porte vestue j'ay congneu que, sans cause de quelque fait d'armes, ne la portoit especialement en la court d'ung si très hault prince comme vous estes. Si l'appellay et demanday dont il venoit et la cause pourquoy il portoit cote d'armes vestue, en ceste vostre court, actendu que vous estes en paix avec tous les princes chrestiens. Si me respondit ainsi que s'il vous plaist ouyr je vous diray. »

CHAPITRE XXX

Comment le roy d'armes d'Anjou recita à Saintré que le roy d'Arragon avoit donné congé à Enguerrant pour le delivrer de son entreprise, et luy avoit faicte bonne chiere, parquoy Saintré et ses compaignons furent moult joyeux.

LE ROY D'ARMES. — « En disant ces parolles le roy, qui très fort me regardoit, me dist, en moy touchant la main, que je feusse le très bien venu. Puis me dist, que je disse ce que j'avoie dit à messire Enguerrant de Servillon. Alors je dis de mot à mot tout ce que luy avoie dit ; pour abreger : « Et où sont les lectres, dist le roy. — Seigneur, dist messire Enguerrant, veez les cy. » Lors le roy les fist lyre. Et quant elles furent leues, messire Enguerrant lui dist : « Sire, vous savez que les très nobles previleges mondains et d'honneur requierent aux nobles cueurs que, par le très noble mestier d'armes, chascun de bien en mieulx à son pover se doit employer d'acquerrir la très noble grace d'honneur, soit en armes

d'emprises, ou soit en guerres guerroyables, et en toutes aultres honnestes façons. Et pour ce que la grace de ceste aventure est premier adressée à moy, jaçoit ce que plusieurs aultres sont icy en vostre court, assez meilleurs, plus puissans et plus suffisans que je ne suis ; toutefois, sire, pour l'heur de mon aventure, qui suis le premier, si très humblement que je sçay, que je doy et que je puis, vous requiers et supplie, que se vous accordez ces armes parfaire à nully de vostre court, que ce soit à moy. »

LE ROY D'ARMES. — « Et quant le roy entend sa requeste, comme saige prince, avant qu'il fist responce, se tira à part, et apella plusieurs seigneurs, et aultres chevaliers et escuyers, anciens de conseils, qui là estoient. A laquelle ne demoura gueres qu'il l'appella, et publiquement lui dist : « Messire Enguerrant, nous avons ouy vostre humble et honorable requeste, laquelle, pour l'honneur et amour de vous, aussi du noble escuyer qui porte l'emprise, nous le vous accordons, et donnons jour à voz armes, le quinzième jour après sa venue ; si vraiment que Dieu vous ait tous deux en sa bonne garde ! et par ainsi donrez plaisir aux dames. » De laquelle très gracieuse responce du roy, messire Enguerrant et tous ses amy très humblement le remercierent, et aussi fis j de par vous. Alors le roy se part et va disne

et messire Enguerrant me mena en son hostel, et envoya querir mes chevaulx et mener avecques les siens, puis avecques luy très bien disner, et oster vostre cocte d'armes et despouiller en pourpoint ; puis me donna une très belle et riche robbe de velours bleu figuré, et très richement brochée d'or et fourrée de martres sebelines, laquelle j'ay en ma mallette icy, et puis me fist tout ce jour et le lendemain sejourner, et plus assez se j'eusse voulu. Et endementiers qu'il vous faisoit sa responce, les heraulx du roy me vindrent festoyer et mener par la ville. Et quant mes lectres furent faictes, il me mena prendre congié du roy, qui me fit très bonne chiere, et pour l'amour de notre sire le roy, aussi de vous, me fist donner ung tabart de veloux figuré noir, fourré de martres sebelines et cent florins d'Arragon. Et au prendre congié, très doucement me dist que de sa part vous saluasse. Desquelles voz armes, comme il m'a par plusieurs fois esté dict, la royne, les dames et damoyselles, aussi chevaliers et escuyers, toute la cité et le pays en ont telle joye, que tout en bruyt. Et au prendre congié de messire Enguerrant, il me dist : « Roy, vous me recommanderez bien à mon frere Jehan de Saintré, et luy dictes que, au plaisir de Dieu, je serai tout en point à la journée que le roy nous a donnée, et aussi me recommandez à

toute sa compagnie, et à Dieu soyez ! » Et quant je fuz pour monter à cheval, il m'envoya quarante florins d'Arragon. »

L'ACTEUR. — Et quant Saintré et toute sa compagnie oyrent le rapport et bonnes nouvelles, et sa très briefve delivrance, la joye fut merveilleuse entreulx, et fut ceste nouvelle par tout publiée et portée au roy et à la royne, dont ma dame le sceut, et aussi toute la court, et par le royaume espandue. Alors commencerent dames et damoiselles à jeusner, à faire veuz, pellerinages et prieres pour l'amour de luy; mais de ces bonnes nouvelles, Saintré, comme bon chrestien, et qu'il tenoit de Dieu ses honneurs et ses aydes, retourna arriere au moustier, et là, à genoux, chief descouvert et mains jointes, à Dieu et à nostre Dame faict devotement ses prieres et oblacions; et puis s'en vont disner.

CHAPITRE XXXI

Comment Saintré, estant logé à Parpignen, les nouvelles en vindrent au roy d'Arragon qui ordonna son logis à Barselonne. Et puis comment Enguerrant fut au devant de luy, hors la ville, l'espace d'une lieue, et le receut honnorablement; et des devises et barolles de l'ung à l'autre.

L'ACTEUR DE L'ENTRÉE DE BARCELONNE.
— Endementiers que ces choses estoient, et que messire Enguerrant se mectoit en point, ne tarda gueres que Saintré arriva en la ville de Parpignen. Alors au roi fut fait assavoir sa venue, son grand estat et la belle compaignie qu'il menoit. Lors le roy et tous les aultres seigneurs se apperceurent que vrayement il devoit estre homme de bien; et incontinent ordonna à Barselonne très honnestement son loger, lequel fut à ses fourriers livré deux jours de devant sa venue. Et à l'entrer qu'il fit en la cité, messire Enguerrant, qui jà fut une lieue au devant de luy et plus, très bien accompagné, et plusieurs aultres seigneurs, cheva-

liers et escuyers qui furent très emerveilliés de deux choses : l'une du très jeune aage de Saintré, l'autre de sa très belle ordonnance, où luy et ses gens estoient en sa venue, tout ainsi que au partir de Paris. Et quant messire Enguerrant vit le jeune aage de Saintré, fut esbahy d'avoir telles armes à faire à ung qui poroit estre son filz. Si le regarda très grandement plusieurs fois, soy merveillant de la haulte entreprinse d'ung homme si jeune qu'il estoit. Et quant ilz furent au logis, messire Enguerrant, honteulx des armes que avecques luy devoit faire, à part luy dist : « Jehan de Saintré, mon frere, vous estes ung jeune gentil homme, escuyer, et je suis ung vieil gentil homme, chevalier ; se vostre vouloir estoit me quicter du scelle de ma promesse, je, pour acomplir voz armes, ai compaignon mon propre nepveu, qui est de vostre aage, et chevalier comme je suis ; et de ce vous voldroye bien prier. » Saintré, comme sage et courtois, de soy mesme fist responce, et dist : « Monseigneur messire Enguerrant, il a pleu à Dieu et à ma bonne fortune que mon emprise est premierement venue en voz mains, dont tant comme je puis et say, humblement je vous en remercie, et de vostre grace, comme chevalereux chevalier, m'avez volu, et par vostre scelle promis de delivrer ; et jaçoit ce que monseigneur vostre

nepveu soit souffisant et digne de delivrer le meilleur chevalier du roiaume de France, toutes fois, puisque mon aventure m'a à vous adressé, à vous je me tiens et arreste, et vous prie que le me pardonniez ; et se par aucune occasion, que je ne sçay ne puis penser, de vostre promesse me defailliez, je me tiendray de mon veu pour très honnestement et honorablement quicte et delivré. »

L'ACTEUR. — Et quant messire Enguerrant oy d'un sy très jeune homme son gracieux parler, fust esmerveillié, et comprinst en son cueur qu'il vouloit dire qu'il n'osoit, parquoy il se tiendroit quicte de son veu, lors se delibera de l'accomplir, et luy dist : « Saintré, mon frere, j'ai oy vostre très illustre parler, ce que je vous ay promis par mon scelle, au plaisir de Dieu, de nostre Dame et de monseigneur saint George, je le vous accompliray au jour et heure que le seigneur roy vous a promis et ordonné ; et pour plus tost donner fin à ces choses et plus honorablement, me semble que au saillir des vespres du roy, je vous venray querir ; vous serez tout prest, et vendrez faire la reverance au roy et à la royne, qui vous verront très volentiers ; et là, present le roy, vous deslieray vostre bracetlet. Puis demain le vous rendray, ainsi que en voz armes est contenu, car j'ay espoir en monseigneur saint George que ma

dame y aura bonne part. » Et sur ce prent congié. Dont pour priere nulle Saintré ne vult demourer au disner; mais pour veoir sa contenance et maintien, messire Enguerrant le fist demourer.

CHAPITRE XXXII

Comment messire Enguerrant presenta Saintré au roy et à la royne, qui luy firent très bel recueil et festoyerent sollennellement.

L'ACTEUR ENCORES. — Alors messire Enguerrant va au roy luy conter sa merveilleuse bonté et gracieux parler; dont le roy, qui jà aucunement en avoit ouy conter, l'en prisà très grandement, et eut grand desir de le veoir, aussi la royne et toutes les dames de la court. Et après les vespres, messire Enguerrant très bien accompagné, vint devers Saintré, et le tenant par dessoubz les bras, tout à genoulz le presenta au roy, où la royne estoit, Et quant le roy le commença à

veoir, deux ou trois pas au devant s'advança, puis dist : « Bien vienne ce beau filz et commencement d'escuyer. » Lors les fist lever ; et quant ilz furent levez, messire Enguerrant le mena à la royne presenter, qui luy dist : « Jehan, vous soyez le très bien venu. » Lors le prent et le fait lever. Messire Enguerrant le maine devers les dames, et jaçoit ce qu'il ne fust de coutume, il les lui fit toutes baisier, car ainsi estoit il ordonné. Lors revindrent devers le roy, et tous deux à genoulx se misrent ; messire Enguerrant dist au roy : « Seigneur, vous avez veu la lectre de mon frere de Saintré sur le contenu de ses armes, de vostre grace m'avez donné licence, jour et place pour le delivrer ; doncques à vostre bon congié voulez que je parface ce que en son veu contient, c'est premier : de deslier le bracelet que en son bras senestre il tient. » Alors le roi, comme saige prince, vult de bouche à bouche savoir à Saintré s'il le confessoit, et illecques publiquement fist lire la lectre et sçavoir s'il l'advouoit ; puis luy dist : « Jehan de Saintré, portez vous ce bracelet d'emprinse par la façon que vostre lectre contient ? — Sire, oyl, dist Saintré. — Or doncques, dist le roy, je vous donne congié de le deslier. » Alors messire Enguerrant le bracelet osta, et osté qu'il fut, tout ce jour, par ung très bel cordon de soye et d'or à son col le

porta, et puis le matin luy rendit. Et, ce fait, vont vers la royne et les aultres dames qui très grant honneur et bonne chère luy firent. Puis vont en la chambre de parement, et illec jouerent à maints jeux, tant que l'eure fut de souper. Alors Saintré prinst congié, et messire Enguerant avecques plusieurs chevaliers et escuyers le retint au soupper; dont tout ce soir et plusieurs jours après ne cessa le deviser de la beaulté et gracieuseté de Saintré et de tous les siens. Et au quatriesme jour le roy vult que la royne le fist convyer et semondre, et les gentilz hommes de sa compaignie, tous à disner; et après les dances et chansons, où Saintré, qui très bien dansoit et chantoit, et aucuns de sa compaignie pleurent très grandement au roy, à la royne et à tous. Et ainsi par chascun jour en celle court estoient festoyez. Et du surplus, pour abregier l'hystoire, je m'en delaisse pour venir au fait.

CHAPITRE XXXIII

Comment Saintré entra pompeusement dedans les lices, avecques mainte belle compaignie de princes et chevalliers qui le conduysoient, et de l'ordre qui y fut.

L'ACTEUR SUR LA VENUE DE SAINTRÉ SUR LES LICES. — Quant le xv^e jour après sa venue fut venu, le jour ordonné de commencer leurs armes, auquel jour tous furent habillez et appareilliez; à ce dit jour, sur l'eure de dix heures au matin, le roy, comme saige et très honorable prince, pour honnorer les estrangers, envoya à Saintré, pour l'accompaigner, le conte de Cardonne, don Fedrich de Lune, messire Arnault de Parreilles et messire François de Moncade, quatre moult nobles seigneurs et chevaliers de la court, très bien accompaigniez, pour l'honnorer et aller sur les rens; et ce ordonné, le roy se part, et s'en va sur son hourt, qui à l'ung des costez des lices estoit, très richement tapissié de tous costez, et avecques luy les princes, seigneurs et plusieurs aultres chevaliers et escuyers de son

conseil. Et à sa senestre main, la royne en son hourt, accompagnée de plusieurs princesses, dames et damoyselles de sa court, du roialme, illecques venues pour ces armes veoir. Et quant le roy et la royne furent tous en leurs hours reposez, lors par l'ordonnance du roy, les roys d'armes et heraulx porterent aux deux parties le commandement de faire leurs devoirs. Alors Saintré, qui jà estoit en point comme le commenceur et entrepreneur de l'emprinse, monta à cheval avec toute sa compaignie, et partit par la maniere que s'ensuyt :

Et premier de son logis partirent ses tambourins à cheval, avecques tous les aultres qui estoient venus le convoyer et accompagner, deux à deux.

Après les tambourins venoient ses trois sommiers, qui portoient les coffres de son harnois, tous couvers de tapis à ses armes faitz de broderie, chascun conduit à main par ses varletz ; et après eux venoient à pié les deux armuriers.

Après les armuriers venoient tous les poursuyvans, cottes d'armes vestues de costé, deux à deux.

Et après les poursuivans venoient les menestriers de Saintré.

Et après les menestriers de Saintré venoient les menestriers du roy et les trompettes d'Aragon.

Après les trompettes d'Aragon venoient les heraulx d'Aragon.

Après les heraulx d'Aragon venoient les heraulx françoys.

Après les heraulx françois venoient les deux roys d'armes d'Aragon et d'Anjou, trestous portant les cottes d'armes vestues de leurs seigneurs; et ceulx de France, celle de Saintré moult richement brodée.

Après les rois d'armes, ses quatre trompettes et clairons, et après eulx les chevaliers et escuyers, qui sur leurs cuysses portoient xij grosses lances; dont les six estoient du tout armées et vestues de drap d'argent à ses couleurs, fourrées de martres, et les aultres six très richement peintes en semblable façon.

Après les douze lances venoit sur ung très bel coursier ledit don Bernard de Cardonne, qui sur sa cuysse portoit une lance, où estoit un gonfanon d'ung très fin veloux cramoisy, endossé d'hermines et brodé d'une très riche frange d'or; et à chascun des letz du gonffanon estoient de très riches brodures, les quatre blasons des quatre principales lignées de Saintré.

Après le gonffanon venoit don Federich de Lune, sur son très puissant coursier, qui tenoit ung tronson de lance, vestu et fourré comme les six lances armées, sur lequel estoit son heaulme, qui au dessus avoit une grant fleur de

chardon à quatre grans feuilles d'or, qui toutes couvroient le chief du heaulme ; et au pié de la fleur pendoit une longue touaille de plaisance vollant, moult richement frangée de fil d'or et de grosses perles, et le surplus semée de lectres d'or branlans.

Après le heaulme venoit Saintré sur ung très bel et fringant destrier, qui en son chief portoit ung champfrain d'acier à trois grans plumes en façon d'austrusse, et à ses trois couleurs très richement brodées ; luy et son destrier houssez d'ung satin cramoysy tout semé à cueur d'harmines et bordé de grans franges d'argent capponnées de soye à ses trois couleurs ; sur son chief un très bel et frisque chappel de plumes, et luy armé de ses avant bras, harnoys de ambes et souleretz, sans plus ; et en sa main droicte sa baniere, là où estoit nostre Dame et son enfant, de laquelle de pas à pas il se sei-gnoit.

Après Saintré venoient messire François de Moncade et messire Arnault de Pareilles, chascun son très bel coursier per à per ; et après eulx tous les aultres chevaliers et escuyers à grant nombre, qui par l'ordonnance du roy l'accompaignoient. Et, atout celle ordonnance et très belle compaignie, vint descendre en sa grant loge, toute bien tendue, que le roy aux entrées hors des lices pour chascun avoit fait

faire, et illecques descendit, et avec luy ses quatre seigneurs conseillers, et des siens ceulx qu'il avoit ordonnez.

Et s'y venoient, après ledit Saintré et devant lesdictz seigneurs, ses quatre paiges montez sur quatre coursiers couvers de paremens qu'ilz avoient, et les paiges habilliez ainsi qu'ilz estoient à l'issue et au departement de Paris, comme cy devant est dit.

CHAPITRE XXXIV

Comment messire Enguerrant entra pareillement dedans les lices en moult triumphant arroy.

L'ACTEUR DE LA VENUE DE MESSIRE ENGUERRANT ES LICES. — Et quant Saintré fut descendu, incontinent les roys d'armes, heraulx, poursuivans, trompettes et menestriers, pour faire honneur et compagnie, furent à messire Enguerrant, lequel aussy trouverent tout en point prest à monter; et aussy partirent tout premier les tambourins; et après les menestriers, venoient plusieurs seigneurs,

chevaliers et escuyers, qui venus estoient pour le convoyer.

Après les chevaliers et escuyers venoient ses trois destriers sellez, et leurs selles couvertes de mesme drap d'or dont ilz estoient houssez, dont le premier destrier estoit housé d'ung très riche satin bleu, figuré et brochié d'or, à grans hourletz de fin gris. Le second destrier estoit housé d'ung aultre satin figuré bleu et brochié d'or, à grans bors de martres sebelines. Le troi-siesme destrier housé d'ung aultre très riche satin figuré en coulleur de pourpre tout broché d'or, qui estoient ses trois couleurs, et brodez d'ermes, et conduitz à main par trois varlets à pié.

Après les trois destriers venoient douze chevaliers sur beaulx coursiers qui portoient douze lances ; dont les six estoient deux à deux des trois mesmes draps d'or, et semblablement ourlés comme estoient les paremens.

Après ces douze lances venoient les trompettes du roy, et après eux le roy d'armes d'Aragon, qui vestue avoit sa très riche cocte d'armes, et à son col portoit une moult luyante et legiere targe d'acier ouvrée par tiers de trois draps d'or, et à chascun des quatre quartiers de la targe, avoit ung blason de ses quatre lignées dont il estoit yssu, et au milieu des quatre blasons le sien.

Après le roy d'armes, venoit le comte d'Orgel qui, sur ung très bel et puissant coursier, portoit sur ung tronsson de lance le demi heaulme de messire Enguerrant, sur lequel estoit ung demy cerf, d'or macif, portant un collier où estoient par tiers un très bel rubis, et ung très bel diamant et ung très bel balaiz, chacun enclos entre deux belles perles.

Après le demy heaulme venoit messire Enguerrant armé de toutes ses armes, excepté du chief, auquel il portoit ung très bel chapellet de diverses fleurs et feuilles, sur ung très bel et puissant destrier, housé d'un très riche veloux cramoyse, figuré, tout brodé d'or sur or, et bordé à grant bort d'ermine, et en sa dextre main ung tronçon de lance sur lequel son bras se reposoit.

Après messire Enguerrant, venoient le comte de Prades et le comte de Cardonne, ses conseillers, et puis les autres seigneurs, chevaliers et escuyers, sans nombre, venuz pour le convoyer; et ainsi vint descendre en sa loge, et illecques fut armé de son demy heaulme, et servi de ce qu'il luy falloit.

CHAPITRE XXXV

Comment le roy fist mesurer les lances des deux champions, et comment Saintré se contenoit honnestement quant il passoit par devant le roy et la royne, estans en leurs hours.

L'ACTEUR SUR LES ARMES. — Et quant ilz furent venus, le roy incontinent fist mesurer leurs lances, qui devoient estre de la poincte jusques à l'arrest de xiiij piés de long; et quant elles furent mesurées et à chascune partie livrées, le roy manda à Saintré qu'il saillist le premier, et ainsi fist il; mais quant il fut à cheval sur son destrier, il demanda sa banerolle, et en fist un grant signe de la croix, en disant sa benediccion, que madame luy avoit enseignée, comme dit est. Et ainsy, soy seignant, pas à pas entra dedans les lices, en son reng ordonné, et avecques luy ses quatre seigneurs, ses conseillers, et ceulx à cheval et à pié, par semblable nombre, comme estoit ordonné. Et fist son tour d'aller et de venir tout le long de la toille qui toute estoit de fin

drap vermeil ; et tant de l'aller que du venir, quant il estoit devant les hours où le roy et la royne estoient, tant bas qu'il pouvoit se inclinoit, et leur faisoit reverence ; par laquelle chose le roy dist à ses gens. « Et vraiment, cest escuyer, en tous ses fais et en tous ses dis, monstre bien qu'il est gentil, et qu'il est nourry en la court et à l'escolle de tout honneur. » La royne et toutes ses aultres dames ne le louerent pas moins ; car n'y avoit celle qui ne dist bien et honneur de luy, dont la plus grant partie prioient Dieu qu'il luy feust en ayde. Lors pas à pas s'en va mettre au bout de son reng, et là print sa lance sur sa cuisse ; puis, en son arrest la coucha, et très fringamment d'aler et de retourner, la tourne de bout à aultre.

Le roy fait messire Enguerrant venir, qui, pour abrégier, tout ainsi que Saintré vint faire, fist. Quant ilz furent en leurs bouts des rencz, le roy ordonna qu'ilz feissent ce que faire devoient.

CHAPITRE XXXVI

Comment Saintré fist le signe de la croix par trois fois devant que esbranler sa lance, puis coururent les deux champions vaillamment. Et comment à la première journée le roy fist saillir Enguerrant le premier des lices, disant que Saintré avoit gagné pour ce jour la victoire.

L'ACTEUR SUR LA PREMIERE JOURNÉE.
 — Alors Saintré, qui sa banerolle tenoit, recommença à faire le signe de la croix et par trois fois sa beneisson dire. Et puis sur la cuisse prist sa lance ; puis, en brochant son destrier des esperons, la coucha ; et le semblable messire Enguerrant fist : en laquelle première course fut comme faulte. Et à la deuxième course, messire Enguerrant, sa pointe clinssa soubz la venue de Saintré, et Saintré atoucha au bas du grant gardebras, et en brisant sa lance ung peu ploya. Et, à ce rompre de lance, trompettes à desroy commencerent à sonner.

La troiziesme cource, messire Enguerrant baissa trop sa lance qu'il rompy à l'arçon, et Saintré le cerf sur son demy heaulme emport

Lors trompettes commencerent à sonner ; mais pour cause que la lance n'estoit pas bien rompue, le roy commanda cesser.

A la quatriesme course, ledit messire Enguerrant print au milieu de la piece et rompit très bien sa lance ; et Saintré le fiert au bas du demy heaulme, et sa lance clinssa entre la piece de la rondelle et la lance, si entra le fer entre la main et le gantelet, lequel luy emporta sans prendre à la chair, dont la main fut endormie tellement que, jusques au quatriesme jour après, ne peurent leurs armes parfaire. Et au trespasser qu'il fit, sa lance rompit auprès de la douelle, qui ne fust point comptée.

Alors le roy fist lire les lectres qui portoient l'ung actendre l'autre jusques à l'espace de huyt jours ; et, par ce, ordonna que chascun s'en voulsist par sa porte descendre en son hostel ; et ainsi chascun s'en retourna tout armé, fors que de leurs chiefs. Mais, tant voulut le roy honnorer Saintré, qu'il feist messire Enguerrant yssir le premier, disant que la place estoit demourée à Saintré.

CHAPITRE XXXVII

Comment le roy envoya querir les deux champions pour soupper avecques luy. Et puis comment le lendemain retournerent aux lices, faisant merveilles l'ung à l'autre.

L'ACTEUR. — Et quand ilz furent tous desarmés et aucunement reposés, et messire Enguerrant appareillé de sa main, le roy les manda querir pour soupper avecques luy; et fit Saintré seoir à sa dextre, comme estranger, et messire Enguerrant à senestre, comme subiect de l'hostel, lequel portoit sa main lyée et en escharpe. Et quant les tables furent ostées, le roy fit venir la royne et les dames; lors commencerent les dances, et la royne print Saintré, et les aultres dames et damoyelles prindrent aussi chevaliers et escuyers qui estoient venus avecques luy. Là fut Saintré de tous et de toutes moult loué. Messire Enguerrant, de l'aultre lez, de tout son povoir, honnoroit et festoyoit Saintré, qui fut ainsi festoyé jusques à ce que messire Enguerrant fust bien guary.

Et au quatriesme jour, pour parfaire leurs armes, le roy ordonna qu'ils fussent sur les rencz tous armez; et tout ainsi que l'autre fois venuz estoient, ilz y vindrent, fors que du chief n'estoient point armez, eulx et leurs destriers de nouveaulx paremens tous houssez. Et quant ilz furent tous en point ès lices, le roy commanda qu'ilz feissent leurs devoirs. Alors l'ung contre l'autre, leurs lances arrestées, brocherent leurs destriers.

A ceste cinquiesme cource, messire Enguerant print joignant la broche au double du grant gardebras, et Saintré au pié du demy heaulme; et tous deux rompirent bien leurs lances, et tellement que les esclas vollerent en l'air, dont leurs destriers furent en grant branle de cheoir. Et alors les trompettes de sonner, et les criz du peuple, tellement que à paine se peurent rappaiser, et par ainsi chascun très bien rompist sa lance.

A la sixiesme course, messire Enguerrant print encores au meillieu du gardebras, et Saintré au bas de la baniere, et tous deux rompirent leurs lances. Et, par ainsi, chascun a bien rompu ses trois lances.

A la septiesme course, au joindre des lances, le destrier de messire Enguerrant se voistra, et par ainsi ne firent riens.

A la huitiesme course, quant ce destrier vit

Saintré approcher, tout à coup se tourna, et se Saintré n'eust au coup levé sa lance, il eust par derriere feru messire Enguerrant; dont le roy, la royne, les seigneurs et aussi tout le peuple l'en louerent grandement. Et lors messire Enguerrant se partit, et s'en alla en sa loge pour changer destrier. Et quant ilz furent venus, lors coucherent leurs lances et brocherent leurs destriers, tellement que l'ung ne l'autre ne toucha.

A la neuviesme course, messire Enguerrant, pour la fureur de son destrier fraiz, haulsa ung peu trop sa lance, et Saintré l'actaint au bas de la rondelle, et clinssa sur la piece, puis sur l'arrest qui du tout se descloua; et au desclouer, messire Enguerrant très fort bransla. Et par ainsi Saintré eust bien ses quatre lances rompues. Et messire Enguerrant courut soy retraire pour sa pièce changer; et quant il fut sur les rencez retourné, et que chascun eust sa lance sur sa cuyse, lors brocherent tant qu'ilz peurent leurs destriers, et ne rencontrèrent point.

A ceste dixiesme course, fortune voulut que tous deux croiserent leurs lances, et de la grant aleure des destriers, l'ung hurta à l'autre; si qu'il n'y eut haye, qui de drap vermeil estoit pendant alarde, tellement que le destrier de messire Enguerrant tomba, et celui de Saintré fut espaulé. Alors Saintré descendit à terre et

monta sur ung roussin, et en son logis, pour •
changer destrier, s'en alla ; mais oncques pour
conseil d'homme ne se vout desheaulmer. Et
quant messire Enguerrant fut relevé et re-
tourné à son costé de la lice, il actendit Saintré
qui brièvement vint.

A la unziesme course, messire Enguerrant
baissa un peu sa lance et arresta au bas des
lames, et Saintré à la rondelle qu'il faulsa bien
avant. Alors messire Enguerrant, à cause du
ferir bas, ploya, et tous deux rompirent bien
leurs lances ; et par ainsi messire Enguerrant
n'en rompit que quatre, et Saintré les siennes
cinq, dont les esclas vollerent en plusieurs parts
du champ. Alors trompettes de sonner, et voix
du peuple de crier, tellement que bien grant
temps fut passé avant de cesser. Et à ce coup
que les cinq lances de Saintré furent rompues,
ainsi qu'en l'emprinse estoit déclaré, messire
Enguerrant, qui jà bien veoit et scet que les
cinq lances de Saintré sont rompues, et qu'il en
a l'onneur, requiert à Saintré la lance des
dames, dont il fut content. Et quant le roy en-
tend qu'ilz veullent courir la lance aux dames,
lors envoya deffendre la jouxte, pour le peril
des armes à pié ; et lors commanda que tous
deux, ainsi qu'ilz estoient, vensissent devant
lui. Et quant tous deux y furent, commanda les
desarmer, puis par son roy d'armes, qu'il avoit

- fait sur son hourt monter, fist lire les parolles qui s'ensuyvent :
-

CHAPITRE XXXVIII

Comment le herault d'armes prononca le dicton de la victoire que gaingna Saintré; des pris et offertes faictes de l'ung à l'autre, et de l'ysue des lices.

LE JUGEMENT DE CES ARMES. — « Mes deux seigneurs qui estes cy presens, sans nommer l'ung ne l'autre, nostre seigneur roy a bien veu voz chevalereuses armes, si très bien faictes et acomplies par chascun, que nul au monde porroit mieulx faire, ainsi que elles s'ensuyvent cy après. » Et toutes les courses, de point en point escriptes, les leut et puis dist : « Et pour ce que à la dernière course par le noble escuyer Jehan de Saintré, vous avez tant de lances bien rompues per à per, par la cinquième que vous, très noble escuyer Jehan de Saintré, avez très bien rompue, et fin de voz armes à cheval, le seigneur roy vous en

adjuge le pris. » Alors messire Enguerrant s'approcha de Saintré, pour soy acquiter du ruby; mais quant Saintré le vit à luy venir, lors brocha son destrier, et, tant comme il peut, s'advança à luy. Lors en soy fort inclinant lui toucha la main, et, au mieulx qu'il peut, l'accola, puis luy dist : « Monseigneur et mon frere, tant et de si bon cueur comme je puis, vous remercie du grant honneur que vous m'avez fait. » Alors messire Enguerrant, comme saige et gracieulx chevalier, luy dist : « Et que dictes vous, mon frere, c'est vous que je doy mercier de ce que m'avez très bien batu ; si prie à Dieu et à monseigneur saint George, qu'il vous doint faire de bien en mieulx perseverer ; et aussi à vostre très belle dame qu'elle le vous vueille meriter, à laquelle humblement je me recommande, que, en tesmoing de toutes ces parolles, vers elle je m'acquite de ce ruby, qu'elle vous a fait loyaulment gagner, luy priant qu'elle le vueille prendre en gré. » Alors Saintré soy inclinant, le très bel ruby il print, et humblement l'en mercia, et puis luy dit : « Or, monseigneur mon frere, c'est par vous que je l'ay gagné, qui vous estes faint ; mais affin que vostre très désirée dame ne perde son droit, vous prie, en moy humblement recommandant à elle, ce petit dyamant vous plaise luy porter et donner. » Et quant messire Enguerrant vit ce très bel et gros

dyamant, et la franche, libérale et haulte courtoisie de Saintré, se tourna aux aultres seigneurs prochains, et en son langaige castellan leur dist : « Et vrayment cestuy est bien la fleur de tous les jeunes gentilz hommes. » Puis dist à Saintré : « Certes, sire, je vous en remercye, de par ma seigneurie et de par moy ; et autant de gré vous en sçavons que se je le prenoye, ou se elle l'avoit receu ; mais vous me pardonnerez à ceste fois, car je ne le prendray point ; ainsi le donneray à celle qui l'a bien desservy et gaigné. » Saintré moult l'en prie, et messire Enguerrant s'en deffent, en le refusant, tant que le roy demanda que c'estoit. Et quant il le sceut, et la royne aussi, n'est pas à demander se Saintré fut du roy et de la royne, des seigneurs et des dames, des chevaliers et des damoyelles, des escuyers et de tout le commun, très grandement loué. Toutesfois le roy, voyant les grandes prieres de Saintré, manda à messire Enguerrant que le diamant print, puis que de sa courtoisie il l'en requeroit tant qu'il ne le devoit point refuser. Alors messire Enguerrant le print ; et ce fait, trompettes et menestriers commencerent à sonner. Et le roy ordonna qu'ilz s'en allassent desarmer. Messire Enguerrant et Saintré par leurs grandes courtoisies vouldrent l'ung l'autre convoyer, illecques firent moult de prieres ; mais en la fin, messire Enguerrant gaingna, et

pour plus amplement monstrier sa courtoisie, le print par sa main dextre, per à per. Et quant ilz furent au logis de Saintré, Saintré fist tout son povoir et devoir de le reconvoyer, et l'eust bien fait, se les seigneurs de la court, tant d'un costé que d'autre, n'eussent Saintré, oultre son gré, retenu. Saintré pria moult les seigneurs, ses conseillers, et aultres, de soupper celle nuyt avec luy, mais pour priere nulle, aucun n'y voulut demourer; ains le laisserent tous celle nuyt reposer. Et ainsi fut de messire Enguerrant, pensant lendemain aux armes à pié besongner; mais le roy, comme doulx, saige, gracieulx seigneur et prince, celle nuyt considera la peine que celuy jour ilz avoient prinse, fit leurs armes pour ce jour delaier, pour chascun bien à son aise reposer.

•

CHAPITRE XXXIX

Comment Saintré, après qu'il eut ouye la messe, envoya par deux heraulx d'armes deux haches à messire Enguerrant, selon le contenu de son entreprise. Puis comment le roy envoya son herault signifier à Saintré l'heure pour aller aux lices.

L'ACTEUR. — Au deuxiesme jour après, jour des armes assigné, Saintré, avant que nulle chose ne fit, ouyt sa messe de saint Esperit, où il se fist donner la beneysson. Puis par deux heraulx et ung varlet fist à messire Enguerrant porter ses deux haches couvertes, pour en prendre le choisis, ainsi que en son emprinse estoit contenu. Et lesquelles haches, l'une choisie et prinse, les heraulx trouverent le roy d'armes d'Aragon, qui à Saintré tout premier venoit donner, de par le roy, l'heure à deux heures après midy, pour venir es lices parfaire ses armes à pié; auquel roy d'armes, Saintré remercia le roy très humblement, puis luy donna ung très bel mantel de damas cramoisy, broché d'argent et fourré de

fines martres sebelines, pour la très bonne et joyeuse nouvelle qu'il apportoit, lequel puis fist son rapport au roy.

L'ACTEUR. — Et quant une heure après midy fut sonnée, le roy et la royne, ainsi que dist est, furent montez en leurs hours, lors il envoya dire aux parties qu'ilz vinsent. Alors Saintré, comme le commenceur et entrepreneur, et non mye appellant, fut à cheval le premier, saisi de sa banerolle et faisant le vray signe de la croix, en disant sa dicte beneysson ; et le surplus par la façon qui s'ensuyt.

CHAPITRE XL

Comment les deux champions entrerent la tierce fois dedans les lices solennellement.

L'ACTEUR ENCORES. — Et premier les tabourins, et après les sommiers, et son harnois couvert, comme dit est, et mené par varletz ; et après ses sommiers, ses deux armuriers à pié, et après eux ses quatre menes-

triers, deux à deux. Après venoient les poursuyvans, et puis les heraulx des seigneurs du pays ; tous heraulx et poursuyvans portans les coctes d'armes en la façon qu'ilz les devoient porter. Et après les heraulx, venoient les chevaliers et escuyers françois de sa compaignie, tous vestuz pareilz, et après eulx venoient les rois d'armes et heraulx du roy, per à per à ceulx de France et à leur basse main. Et après les heraulx, venoient ses trompettes et clarons, et puis ceulx du roy. Et après les trompettes du roy, venoit le conte de Prades qui, sur un très puissant coursier, portoit sa hache devant. Et, aux deux costez du conte, alloient don Bernard de Cardonne et don Federich de Lune. Et après eulx venoit Saintré, tout desarmé, excepté de ses avans bras, de son harnois de jambes et de ses solleretz, sur son très bel et puissant destrier qui, sur son chief, portoit ung très bel chappel, où estoient trois belles plumes, en façon d'ostrusse, faictes de très riches broderies, vernées de petis dyamans, rubis ballais et aultres piereries, naissans d'ung très bel et riche afficquet, où estoit ung très gros dyamant environné de trois gros ballais et de trois très grosses perles. Luy et son destrier housés d'ung satin cramoyssi, tous couverts de branlans d'argent, esmaillez de blanc à trois lambeaulx de fin or, qui estoient ses armes ; et en sa dextre main

portoit sa banerolle, où nostre Dame et son enfant estoient, de laquelle de pas en pas il se seignoit. Et après luy, venoient ses paiges montés sur beaulx destriers couvers de riches paremens. Et après eulx, venoient, per à per, ledit messire Arnault de Pareilles et messire François de Moncade; et après, tous les chevaliers et escuyers que le roy y avoit envoyez pour le convoyer. Et en cest estat il vint en sa tente descendre, qui assez près des portes des lices estoit vers son cousté. Et illecques fut armé de toutes ses armes, excepté du chief. Et quant messire Enguerrant fut semblablement venu, en sa tente descendit. Lors le roy commanda à son roy d'armes faire appel; alors Saintré, accompagné de ses seigneurs et aultres, ses conseillers, vint à la porte des lices, tout à pié; et illecques estoit le mareschal du roy, qui lui demanda qui il estoit, et qu'il venoit là faire? Auquel humblement en soubzriant il respondit : « Monseigneur le mareschal, je suis Jehan de Saintré, venu au jour et heure que le très excellent prince, le roy cy present, comme vray juge competant de monseigneur mon frere, messire Enguerrant de Servillon, et de moy, nous a ordonné pour à pié parfaire les armes de mon emprise, ainsi que mes lectres le contiennent. » Alors, ouyes ces parolles, le mareschal va au roy faire son raport; lors le

roy commanda luy faire ouvrir la porte des lices, pour soy retraire en son pavillon. Et quant les portes furent ouvertes, Saintré desmarcha pour entrer dedans; et de sa banneroille fist ung très grant signe de la croix, puis la baissa, et en son pavillon entra. Et messire Enguerrant, pour abregier, en ceste propre façon entra; mais quant tous deux furent en leurs pavillons, ne tarda gueres que le mareschal, accompagné des quatre gardes, l'ung après l'autre, vint; et premier à Saintré commença; et, armé de toutes ses armes, après luy ses ordonnés conseillers, le mena et presenta au roy, qui en son hourt estoit. Dont en allant, passa devant le hourt où la royne et les aultres dames estoient, lors faisant sa reverence, Saintré sur son genouil s'enclina; lors veissez dames à jointes mains prier Dieu qu'il le gardast de meschief. Et devant le roy s'en va, auquel semblablement fist reverence à genoulx; et illecques tant fut que incontinent vint messire Enguerrant. Lors Saintré envers luy fort s'enclina, ce qui n'estoit point de coustume, puis luy dist : « Monseigneur mon frere, sans prejudice de nully, je prie à Dieu qu'il vous doint bien et honneur. — Et à vous aussi, mon frere, » dist messire Enguerrant. Lors tous deux devant le roy se misrent à genoulx; alors le roy commanda à son mareschal prendre les sermens

telz que en ce cas appartient. Lors le mareschal les fist jurer sur les saintes Evangilles, que sur la foy qu'ilz tenoient de Dieu, sur leurs vies et sur leurs honneurs, ilz ne portoient, ne savoient porter chose sur eulx, ne entendoient porter, comme briefves parolles, charmes, herbes, conjuracions, ne aultres diabolicques operations de mal engin ; pour quoy l'ung contre l'autre ne puissent offendre ne deffendre, et sans nulles haynes, ne envyes, ou mal tallent, fort seulement pour acquerir honneur et bonne renommée, et les très desirées graces de leurs dames Lesquelz sermens faicts, chascun se leva, puis va en son pavillon ; mais au lever que Saintré fist, sur son desmarcher, il se tourna, et au roi de rechief fist sa reverence, et semblablement à la royne et aux dames, comme il avoit jà fait. Et lors se retrahit en son pavillon, et aussi messire Enguerrant, pour leurs bassinetz faire cramponner.

CHAPITRE XLI

*Comment ilz yssirent de leurs pavillons
pour faire leurs armes.*

QUANT ilz furent tous deux en point, et, pour abregier, tous les criz et defences faictes que en tel cas appartient, le roy commanda les faire yssir hors de leurs pavillons. Mais à l'yssir que Saintré fist sa visiere levée, il baisa sa bannerolle, en disant sa beneysson que ma dame luy avoit monstrée, en faisant ung très grant signe de la croix ; puis la rebaisa, et la bailla à ung de ses conseillers. Et ce fait, baissa sa visiere et commença en son harnois à haulcer ses bras et ses espaulles, puis sur un genoil, puis sur l'aultre, aussi proprement que s'il feust en pourpoint sans armes tenant sa hache en ses poings. Et quant tous deux furent hors de leurs pavillons, et leurs pavillons mis hors des lices, lors par le commandement du roy, le mareschal, au meillier des lices, commença à haulte voix crier : « Laiss les aller. »

CHAPITRE XLII

*Comment l'ung contre l'autre desmarcherent, et
combatirent très vaillamment.*

ET quant le mareschal eut fait son cry, l'ung contre l'autre desmarcherent si que ce sembloit deux lyons deschainez ; mais au desmarchier que fist Saintré, il s'escria à haulte voix : « A ma très douce dame, à qui je suis ! » Et lors commencerent l'ung sur l'autre à ferir. Messire Enguerrant, qui très vaillant chevalier estoit, fort et puissant, et plus grande personne que Saintré n'estoit, haussa sa haiche, et le ferit tel coup au dessus de la charnière, que tout le fit chancier ; et Saintré l'actaint de l'estoc de sa hache au pertuis de la visiere, qui le fist ung grant pas en arriere desmarcher. Lors messire Enguerrant rehaulsa sa hache, et de toute sa force descend son coup, ainsi que premier avoit fait ; mais Saintré, qui le premier coup avoit jà bien senti, se couvrit de sa hache, tellement qu'il ne fut point touché. Alors messire Enguerrant rehaussa sa

hache pour ferir ; mais Saintré, au desmarcher qu'il fist, descharge et l'actaint du tranchant de sa hache sur les dois de sa main droicte, tellement que riens n'y vault la rondelle, que tous les dois ne luy froissast et endormist. Messire Enguerrant estant chault, non sentant le meschief qu'il avoit, cuyda hausser sa hache, mais, alors qu'il sentit sa dolleur, ne peut sa hache soubtenir, et, comme chevalier hardy et preux, tint fort sa hache en sa main senestre, ouvrant ses bras pour soy lyer avecques Saintré. Mais quant Saintré apperceut sa volenté, combien qu'il ne sçavoit pas le meschief, pour paour d'estoc de sa hache, ferit souvent, et ne laissoit approucher de luy. Et quant il se fut advisé, tout à coup luy donna tel coup sur la main senestre qui la hache tenoit, que du poing la lui fist cheoir à terre. Et quant messire Enguerrant se vit sans hache, comme desesperé, tout à coup s'advança et vint Saintré par le corps lyer ; et Saintré se deffent luy d'ung bras, car de l'autre tenoit sa hache. Et quant le roy vit la hache de messire Enguerrant à terre, et leurs deux corps lyez, comme prince et juge droicturier, prestement gecta sa verge et dist : « Ho ! Ho ! » Alors par les gardes furent les champions despartis. Et à ces parolles le roy par le seneschal les fist devant luy venir, et puis leur fist dire : « Vous, messire Enguerrant, et vous,

Jehan de Saintré, le roy vous mande que tous deux avez si haultement et si vaillamment fait voz armes, voz devoirs et voz honneurs, que on ne pourroit mieulx. Selon le contenu de la lectre de voz armes, Jehan de Saintré, le seigneur roy qui cy est, dit qu'elles concluent combattre de voz haches, tant que l'ung soit porté par terre, ou sa hache perdue de ses deux mains, dont le comprins d'icelles, Jehan de Saintré, le seigneur roy vous adjuge le pris. » Alors tous deux, qui à genoulx estoient, le roy commanda lever, et les faire de leurs bassinetz desarmer. Et quant Saintré entend le jugement et sentence du roy, tant humblement qu'il peut, l'en remercia, disant : « Très excellent et puissant prince, de l'honneur que il vous plaist moy faire, et de la sentence de noz armes, que pour moy vous adjugez, si très humblement que scay et puis, vous en remercie ; mais au regard du pris que m'adjugez, si très humblement vous supplie que sur ce vous plaise trop mieulx penser et bien adviser comment monseigneur mon frere, qui cy est, m'a de sa hache bien festoyé ; et ce que j'en ay fait, sire, n'a été que d'aventure, dont y devez penser. » Desquelles parolles dictes par Saintré furent tous les cueurs des escoutans esmerveillés, dont par ce les langues furent à tous et à toutes desliées pour le louer ; et quelque amour qu'ilz eussent à

messire Enguerrant, tenir ne se pouvoient qu'ilz ne dissent de Saintré que vrayement il estoit bien la montjoye et l'adresse de tout honneur et d'humilité. Le roy en son hourt, et tous les seigneurs qui avecques luy estoient, en furent tous très esmerveillez; la royne, ma dame Alienor de Cardonne, femme dudit messire Enguerrant, et toutes les aultres princesses, contesses, baronnesses, dames et damoiselles qui au hourt de la royne estoient, se prindrent toutes à le très grandement louer. Et messire Enguerrant, aux aultres qui entour luy estoient, ne se pouvait tenir de dire : « Or escoutez le très noble parler de cestuy; où est celluy, ne où fut oncques, qui d'ung tel honneur se voulust desarmer en ceste maniere, pour le donner à sa partie contraire? » Le roy, qui tant prenoit plaisir à oyr les louanges qu'on disoit de Saintré qui ne prenoit garde à luy et encores estoit à genoulx, subitement luy commanda à lever, et puis luy dist : « Jehan de Saintré, à ce que vous me requerez que je me advise, je vous respons que j'en suis tout advisé; et affin que chascun congnoisse la grace et honneur que Dieu vous a aujourd'hui donnée, je la vous vueil garder. » Alors le roy ordonna que messire Enguerrant courtoisement luy rendist sa hache, et du surplus fist son devoir, quant seroit désarmé. Et lors messire Enguer-

rant se fist bailler sa hache, et de sa main blecée, au myeux qu'il peut, à l'ayde de sa senestre, sa hache courtoisement luy rendit, disant : « Mon frere, je vous rens vostre hache, et du surplus m'acquiteray, ainsi que en voz lectres d'armes est contenu, priant à Dieu et à monseigneur saint George, que de bien en mieulx vous accroissent voz honneurs. » Et quant Saintré entent l'ordonnance du roy et le gracieulx parler de messire Enguerrant, se fist bailler son bracelet, que l'ung de ses gens tenoit. Lors, ayant receu sa hache, à messire Enguerrant s'enclina, et dist : « Monseigneur mon frere, puis que le bon plaisir du roy est tel, je luy vueil obeyr ; mais vous, comme celluy qui l'avez bien desservi, je m'acquitte et vous donne mon bracelet, en vous priant de très bon cueur que le preniez en gré. » Messire Enguerrant et tous les aultres furent plus emerveillez que oncques n'avoient esté ; messire Enguerrant luy dist : « Ha ! mon frere Jehan de Saintré, voz honneurs cesseront ilz jamais ? De vostre bracelet et de l'honneur que vous me faictes, je vous remercie, tant comme je puis ; mais à vostre très belle dame vous le retournerez en verité. » Et à ces parolles le roy demanda quelz prieres ilz faisoient ? le mareschal luy dist : « Sire, c'est Jehan de Saintré qui, à toute force, veult donner à messire Enguerrant son

bracelet, ainsi que s'il l'avoit gagné, ou eust le pris. — Le bracelet? » dist le roy. Lors se tourna vers les princes et aultres seigneurs qui avecques luy estoient, et leur dist : « Et que dictes vous de l'honneur et vaillance d'ung si jeune escuyer? Oncques tel ne veis. — Et vrayement, dirent les aultres, sire, aussi ne veismes nous ; et, à la verité, bien semble qu'il est de noble lieu party; et qu'il a bien veu et aprins en la très noble court où il a esté nourry; et aussi le sont tous ceulx de sa compaignie. » Et ces parolles finées, incontinent le roy ordonna que son bracelet vouldist garder ; et quant Saintré entend le roy, à genoulx luy dist : « Ah! sire, pour Dieu mercy, au moins soyez content que en aultre part je l'employe. — En aultre part, dist le roy, nous l'accordons ; le bracelet est vostre, employez le là où il vous plaist; mais nous ne vouldrions que on dist que ce fust par nous, ne par nostre jugement, que l'eussiez donné. — Sire, dist Saintré, vostre bonne mercy. » Lors appella le roy d'armes d'Arragon, Thouraine et Lesignen, les heraulx qui estoient avecques luy venuz, et au roy d'armes bailla le bracelet, puis tous trois les envoya à ma dame Alienor de Cardonne, femme de messire Enguerrant, qui ou hourt de la royne estoit, en disant : « Recommandez moy très humblement à elle, et comme à celle

que par raison je doy penser et croire que sur toutes c'est celle qui myeulx a desservy le bracelet ; laquelle je requiers et prie que, de par ma très redoubtée dame qui le me donna, luy plaise le prendre en gré très plaisant, que pour l'honneur et amour d'elle il n'est pas riche et tel comme à elle appartient. » La royne, ma dame Alienor et les autres princesses et dames, qui avecques elles estoient, aussi le roy, qui en son hourt à dextre estoit, et tous les aultres seigneurs de sa compaignie, n'est point à escrire se tous furent esmerveillez. Lors ma dame Alienor au roy d'armes et heraulx respondit : « Roy d'armes, et vous aultres heraulx, mes amys, ce très gracieulx et vaillant escuyer de Saintré je remercie ; mais, sauve sa grace, je ne suis pas celle qui ay ce bracelet gaigné, ne desservy envers luy, comme il dict, mais c'est bien à celle par qui il a ce jour tant de grace et honneur acquis, et pour ce luy reporterez, et luy direz qu'il me soit pardonné. » La royne, comme très saige et advisée dame, quant elle entendit celle parolle, luy dist : « Et vrayement, Belle Cousine, vous ne devez pas cest honneur refuser, et d'ung si très accompli gentil homme comme cestui est ; si vous prie et requiers que le preniez. » Lors ma dame Alienor fist le vouloir de la royne ; et en son bras senestre la royne vout

estre celle qui au bras lui mist. Et quant ledit bracelet fut ou bras de ma dame Alienor mis, lors elle, du pendant de son collier ung très bel et riche affiquet print, d'une très fine et grosse perle de quatre à cinq caratz, environnée de trois très gros dyamans et de trois très beaulx rubis, que au roy d'armes elle bailla, puis luy dist : « Vous, et vous heraulx qui estes cy, donnez vous cette petite bague à ce très gracieulx escuyer Jehan de Saintré, en moy recommandant à luy de très bon cueur ; et luy direz que jaçoit ce que son bracelet appartenoit trop plus et mayeux à sa très belle et très bonne dame qu'à moy, toutes fois à sa requeste je l'ay prins ; et qu'il me semble que sa très belle dame aucunement se doit sentir de l'honneur qu'il a ce jour acquis ; et pour ce vous prie que de par moy ce petit afficquet vous luy bailliez, luy priant que, en moy bien recommandant à elle, le luy vueille presenter. » Lesquelles parolles dictes, et bagues prises et données, quant le roy le sceust, il en fut très content ; lors commanda que tous deux fussent desarmez. Lors chascun de son costé s'en retourna pour monter à cheval ; et quant Saintré fut à cheval monté, incontinent se trahit vers messire Enguerrant, qui pour la dolleur de sa main se faisoit aucun peu habiller ; et quant il aperceut Saintré, lui dist : « Ha !

frere, vostre dame vous a elle commandé que de telz picaudes festoyez ceulx qui se jouent avecques vous? » Et quant ilz furent montez à cheval, lors fut la grant priere entr'eulx, qui pour l'honneur l'ung de l'autre sauldroit le derrenier. Le roy, qui entendoit que l'honneur fust à Saintré, incontinent manda que tous deux saillissent per à per; mais pour ce que Saintré avoit le pris, vout qu'il allast à la dextre main. Et puis chascun, comme il estoit venu, alla en son logeis; mais au departir furent les grans prieres, car chascun veut accompagner son compaignon. Et quant le roy vit leurs prieres, de rechief leur envoya dire que ces grans honneurs laissassent, c'est assavoir que chascun print son chemin. Lors prindrent congié l'ung de l'autre, et s'en allerent en leur logis desarmer et reposer tout le jour jusques à l'heure du soupper, que la royne les envoya querir. Dont, pour abreger, là furent de bons vins et viandes, de metz et d'entremetz, très largement serviz; puis de chançons, de danses et de morisques de plusieurs façons, moult joyeusement festoyez. Et à tant laisseray cy à parler des grans honneurs, des disners et des souppers que le roy, la royne, les aultres seigneurs et dames, donnerent à Saintré, et Saintré à eulx, et diray du

congié qu'il print, et des dons qui des ungs aux aultres furent faictz.

CHAPITRE XLIII

Comment Saintré print congié du roy, de la royne et de tous ceulx de la court, et des dons qui se firent.

A PRÈS que Saintré eust ses armes faites, par la façon que avez oy, il demoura deux jours à Barselonne, festoiant et faisant bonne chere. Et au quatriesme jour il print congié du roy et de la royne, des seigneurs, des dames et damoyelles de la court, aussy des aultres princes, princesses et aultres dames du pays, là venues pour ces armes veoir, dont l'en tenoit assez plus de compte que l'en ne fait aujourd'hui; et voudrent le roy et la royne que, à ce congié, la coustume du pays fust rompue, en tant que touchoit les personnes de Saintré, des chevaliers et escuyers de sa compaignie; c'est assavoir que tous fussent des dames baisiés. Et premier la royne vult

commencer, qui baisa Saintré et puis les chevaliers et escuyers de sa compagnie; et ainsi firent toutes les dames et damoiselles, ce que par la coustume du pays oncques n'avoient faict, ne depuis ne firent, sinon par grant especialité d'amys. Auquel congié prendre, hélas! amours, qui jà avoit, d'ung costé et de l'autre, aucunes de ces très douces ardans estincelles leurs piteux cueurs alumez, qui à ce très dur departir, tenir ne se peurent que l'eau de leurs très dolans cueurs ne saillit par les yeux aval leur face, quelques faintifs semblant de ris que ils feissent. Et après son congié prins et son bagaige party, fist au roy presenter le plus bel et le plus puissant de ses quatre destriers, couvert du plus riche parement qu'il eust, et ung très bel et gent paige, son nepveu, moult gentement habillé, dessus. Et d'aulture part à la royne fist presenter cent aulnes de la plus belle toile d'atour, et aultres cent aulnes de la plus fine toile de Reins qu'il avoit peu finer à Paris, et unes très belles heures garnies de fines pierres et de fin or; et semblablement à toutes les dames et damoiselles de la court fist presenter aultres deux cents aulnes desdictes toilles que à la royne avoit faict presenter; à la chambre du roy et de la royne, et aux aultres officiers par moitié cent escuz; aux roys d'armes et heraulx d'Arragon et estrangers, excepté

les siens, aultres cent escuz ; aux trompettes et tous menestriers, cinquante escuz ; à ma dame Alienor, une très belle et blanche hacquenée, sellée et couverte d'ung très riche drap de veloux velouté, cramoisy, broché à grans ouvraiges de fin or, tous frangez d'or et camponnez de soye à ses couleurs ; à messire Enguerant envoya un aultre de ses meilleurs destriers, sellé et couvert de l'ung de ses aultres plus riches paremens, avecques une très belle espée garnye de fin or ; et à chascun des aultres seigneurs, ses conseillers, envoya un aultre coursier très bel. Le roy luy envoya un très bel et puissant coursier puillois et deux beaulx genetz de l'Andelosie, une très belle coupe et son aiguiere d'or, trente mars de tasses bien dorées et cinquante mars de vaisselle de cuisine bien belle ; et à ses trois chevaliers, chascun une piece de veloux cramoisy, et aux neuf escuyers trois pieces de damas cramoisy ; à ses heraulx, trompettes et menestriers deux cents florins d'Arragon, et au surplus cent florins. La royne luy envoya un très riche drap de veloux en pourpre cramoisy et broché d'argent, comme à l'escuyer, deux pieces de fin damas, l'une cramoysi et l'autre noir, et aux trois chevaliers de sa compaignie à chascun sa piece de satin plain et bleu. Ma dame Alienor luy envoya une très belle chaisne

de quatre mars d'or. Messire Enguerrant luy envoya ung très bel coursier d'Espagne et ung très bel genet de l'Andelocie, et sur chascun un paige more très bien habillez à la morisque, et une piece de damas cramoyssi, broché d'argent. Le conte de Cardonne luy envoya cinquante mars de vaisselle d'argent. Don Federich de Lune luy envoya douze très belles et grosses arbalestres d'acier et douze brigandines, dont les quatre estoient couvertes de veloux plain, brochées et garnies d'or, les aultres quatre de veloux bleu, et les aultres de diverses couleurs de damas, garnies d'argent doré. Messire Arnault de Pareilles lui envoya ung more noir, très richement habillé, sur ung très bel et puissant genet, armé et habillé tout à la morisque; et messire François de Moncade deux très biaux harnoys tous completz, l'ung d'armes et l'aultre de joustes, très richement garnis, et une très belle espée garnie d'or, toute esmaillée de blanc, et encores ung turcq, sa femme et ses enfants, très grands, en forme d'ymage, ouvrez très richement de fil d'or et de soye, que Saintré depuis donna à la royne, qui très grant joye en fist. Des aultres dames et damoysselles de la court, n'y eut celle qui ne luy donnast chemises brodées d'or et de soye, arcandolles, bourses et gants brodés tout à la façon du pays, mistes oyselletz de Chippre

et tant d'autres odorifiques odeurs que très longue chose seroit à voloir tout reciter; tant estoit le regard d'elles à luy et aux siens que à paine poroit on plus. Que vous dirois je? Ce fut le gentil homme et aussi ses compaignons que, par avant ne après, je aye leu, ne veu, ne ouy dire qui à si grant grace et louange de tous en soi jamais parti.

CHAPITRE XLIV

Comment Saintré, acompaigné de tous les seigneurs, se part de Barselone pour retourner en France.

ET quant Saintré fut prest pour monter à cheval, print congié de son hoste et de plusieurs aultres. Là furent les contes de Prade, de Cardonne, d'Orgel et les aultres seigneurs que j'ay dit, et moult d'aultres chevaliers et escuyers jusqu'au nombre de mille à douze cens chevaulx, pour le convoyer. Et en outre, le roy le fist tout deffrayer tant que son royaume dura, par ung maistre d'hostel et

clerc de chambre aux deniers. Et à tant laisserai cy à parler des grans honneurs qui furent faicts à Saintré, et des offres et des congiez prins, et parleray de sa venue devers le roy, des veuz et des voyages pour luy que ma dame fist.

CHAPITRE XLV

Comment Saintré et ses compagnons viennent, et de la bonne chere que le roy, la royne et aultres leur firent.

QUANT Saintré fut en son logis, le soir qu'il fut party de Barselonne, pour plus honnestement faire sçavoir à ma dame le contenu de ses lectres et de ses armes, son retour et son faict, se advisa que se il envoyoit au roy aucuns de ses heraulx, que on poroit penser que ce seroit en soy glorifiant de sa bonne nouvelle, dont aucunes foiz des gens en poroit estre reprins; et, pour ce, se pensa qu'il le diroit à messire Pierre de Preuilly, auquel moult se fioit. Lequel luy dist

que vraiment plus honneste seroit de le faire par ung aultre, et non par nulz de ses heraulx, jaçoit ce que ce feust leur office ; et encores que à roy, ne à royne, ne à quelconques aultres, il ne escripvit ; « mais se vous voulez que j'envoye Guillaume, mon nepveu, au nom de moy, ce sera le meilleur ; et escripray au roy, à la royne et aux dames, l'honneur qu'avez eu ; et aussi Guillaume, qui est assez bien entendant, contera bien tout, et je l'en informeray à la verité. » Et ainsi fut fait. Et quand le roy, la royne, especiallement ma dame et les aultres de la court le sceurent, la joye fut tout par tout, que il fut plusieurs jours qu'à paine parloit on d'aultre chose. Très desirans de son retour, ma dame qui depuis son partement à paine cessoit elle que nuyct et jour ne fust en prieres et oraisons, faisant tous les vendredis et sabmedis son promis veu de non porter sur sa chair nue aucun linge jusques à sa venue, comme dist est ; mais quant elle sceut puis la nouvelle que, à la court du roy d'Arragon, il seroit délivré par ung chevalier qui avait l'octroy du roy, acreat son veu que tous les mercredis feroit dire messes, et aulmosnes donner jusques à la despense de dix escuz, en oultre plus, de faire pellerinages secrettement par la ville. Adonc elle se penoit moult souvent, et en especial aux termes qu'elle savoit des armes ; dont ende-

mentiers qu'elle estoit en prieres, Guillaume de Preuilly, par messire Pierre, son oncle, envoyé à la court, apporta la nouvelle telle que j'ay dit. Et quant ma dame sceut celle très désirée nouvelle que Ysabel tout en courant luy apporta, lors ma dame, de ce bien acertainée, incontinent, en son cueur, levant les yeux au ciel, nostre Seigneur remercya ; puis s'en alla en sa chambre, et là à nudz genoulx et mains jointes, à part soy, nostre Seigneur remercya. Que vous dirois je ? Tant estoit sa grant joye d'un costé, que à peine tenoit sa contenance ; et, de l'autre costé, le desir de le veoir si grant, que, jour et nuict, reposer ne pouvoit, et tel que à peu n'effaçoit le plaisir que de son bien y avoit. Et à tant laisseray cy à parler de la grant joye qu'elle avoit convertie en très dures douleurs, par l'ardent desir de le veoir ; et diray de sa venue devers le roy, et du grant honneur et bonnes cheres qui luy furent faictes.

CHAPITRE XLVI

Comment Saintré par ses journées est venu devers le roy; l'honneur et les bonnes cheres qui luy furent faictes, et le cueur de ma dame query.

ET quant Saintré et sa compaignie eurent tant chevauchié, par leurs journées, qu'ilz furent à deux lieues de Paris, ilz trouverent maintz barons, chevaliers, escuyers, bourgeois et aultres de la ville de Paris, tous venus à l'encontre pour l'honourer et aconvoyer, tant estoit amé et bien volu de tous. Lors fut la joye des ungs aux aultres telle que c'estoit ung plaisir de les veoir. Et quant il eut au roy et à la royne faictes ses reverences, qui très grant joye luy firent, lors va à ma dame, qui de joye avoit tant que à paine savoit soy maintenir; et combien que, comme saige dame qu'elle estoit, sa très entiere joye elle celloit. Puis va aux aultres, qui très grant joye luy firent, lesquelles aiant toutes baisiées, lors pour sa venue la royne commanda à dancer. Et endementiers que les dances estoient, ma dame, qui

avecques la royne estoit, luy dist : « Hé! ma dame, vous avez oy que Saintré en Arragon a assez dancé, aussi est il las, pour ce faictes le appeler, et le faictes seoir cy en bas avecques nous, et lui demandez des estatz et des façons des dames d'Arragon. — Et en verité, dist la royne, ma Belle Cousine, vous dictes bien. » Lors la royne fist Saintré appeller, et encores trois aultres dames, lors dist à Saintré : « Saintré, mon amy, nous voulons que vous reposez. » Puis dist aux aultres trois dames : « Seez vous toutes, et la plus courtoyse le servira de la queue de sa robe. » Ma dame, pour le veoir plus clerement vis à vis, ne vout pas estre la plus courtoise, ainsi fist le sourt. Lors la royne premier arraisonna Saintré de sa venue à la court d'Arragon, de la chiere que le roy et la royne, les seigneurs, et especiallement les dames luy firent ; puis demande de ses armes, tant à cheval comme à pié, des beaultez, des maintiens et des habillements des dames. Desquelles choses premier Saintré touchant ses armes en passa bien legierement, comme il devoit, et de ce qu'il en dist, fut plus à l'honneur de messire Enguerrant que au sien ; mais du surplus, loua les dames en toutes façons grandement, et aussi fist le roy et tous les seigneurs, dont trop louer ne s'en povoit. Et à tant laisseray cy à parler des louenges et hon-

nours dont il fut interrogué par la royne et les dames, et diray de la très parfaicte joye et bonne chiere que ma dame luy fit, et comment elle repaissoit ses yeux, de fois à aultre, quant elle osoit.

L'ACTEUR. — Ma dame, endementiers que ainsy devoient, comme se rien n'y pensast, regardoit à dextre et à senestre, puis çà, puis là, et puis tout à coup son très doulx regard flechissoit sur luy ; et en ce faisant elle print de son atour une espingle, puis commença à purger ses dens, ainsi que son signal estoit. Et quant Saintré apperceust de ma dame son signal, incontinent luy respondi en frotant ung peu son ueil droit ; et ainsi, à très joyeuse destresse de leurs cueurs, passerent ce très long et ennuyeulx jour, et jusques à la nuyt et heure entr'eulx ordonnée, qu'ilz se trouverent au jardin ; et lors commencerent l'ung à l'autre festoyer, où furent mains baisiers donnez, et mains rendus. Là furent leurs joyes, là furent leurs desirs conjoints, et leurs cueurs et mauix gueriz ; auxquels delitz ilz furent depuis unze heures jusques à deux heures après minuit, que force leur fut l'ung de l'autre departir. Et à tant laisseray cy à parler de leurs parfaictes joyes, et diray de l'avancement de Saintré, et de la compagnie du premier dit Bouciquault.

CHAPITRE XLVII

Cy parle comment Saintré fut chambellant du roy, et des aliances de luy et de l'escuyer dit Bouciquault.

LE roy, qui jà tant aymoît Saintré, ainsi que avez ouy, l'honneur de luy peu à peu creut tant en peu de temps qu'il l'ordonna à dormir dans sa chambre, et puis son premier chambellant. Saintré, qui bien avoit retenu les doctrines de ma dame, quant elle, en son enfance, l'adreçoit à estre vertueux et bien moriginé, recordant le dit de Albertus, qui disoit :

Non tua claudatur ad vocem pauperis auris.

Et encores du très bel vers que Aristote dit ainsi :

Vir bone, quam curas res viles et perituras;
Nil profituras, dampno quandoque futuras.
Nemo diu mansit in crimine, sed cito transit,
Et brevis, atque levis in mundo gloria queris.

Et plusieurs aultres enseignemens touchant ceulx qui sont eslevez ès haulx estas. Et, pour ce, oncques pour estat qu'il eust du roy, oncques son cueur ne s'en orgueillit, ne ses maintiens n'en furent plus grans ; ains à ung chacun plus doux et aymable et plus courtois se monstroit tous les jours. Et en celuy temps estoit en la court ung très jeune escuyer, très gracieulx, de la duchié de Thouraine, qui par esbatement fut nommé Bouciquault, grant pere des Bouciquaulx qui sont aujourd'hui ; très saige, subtil, et estoit celluy très advenant escuyer, qui assez avant en la grace du roy estoit. Celuy Bouciquault voyant Saintré qui si tant en la grace du roy estoit, et plus que les aultres, s'en acointa. Saintré qui jeune estoit, le voyant si homme de bien, aussy pour l'amour du pais très voulentiers s'en acointa ; et tellement se accompaignerent et aymerent, que deux freres ne sceussent mieulx se plus entre aymer. Pour laquelle amour d'eulx, le roy, qui jà bien aymoît Bouciquault, fut content et ordonna qu'il couchast avec Saintré en la couchette, c'est assavoir quant il ne couchoit avecques la royne. Que vous dirois je ? Ces deux escuyers se aymerent tant que oncques deux freres ne se aymerent plus, et furent, l'ung et l'autre, sy loyaulx et sy certains que oncques une seule faulte ne fut faicte entr'eulx.

Et quant l'ung d'eulx alloit hors pour ses affaires, ou pour emprises, ou voyages d'armes, comme ilz faisoient souvent, l'ung à l'autre gardoit la place, tellement que nul n'y peust entrer. Et jaçoit ce que Bouciquault fust puis très vaillant chevalier, oultre plus estoit il subtil et attempé plus que Saintré n'estoit ; mais au fait des armes, Saintré estoit tenu le plus vaillant. Et, pour ce, les heraulx et roys d'armes en firent un commun proverbe en disant :

Quant vient à ung assault,
Mieux vault Saintré que Bouciquault ;
Mais quant vient à un traité,
Mieux vault Bouciquault que Saintré.

C'est assavoir : l'ung pour les armes, l'autre pour le conseil. Dont pour ainsy tant qu'ilz vesquirent ensemble, leur amour et estat dura. Et à tant laisseray cy à parler d'eulx, et diray des aultres nouvelles armes que ledit Saintré fist à l'encontre du seigneur de Loisselench, baron de Poullaine, qui porte d'argent à ung beuf rampant de gueulles, cornes et ongles de sable ; lesquelles armes furent à Paris devant le roy et la royne, ma dame et aultres seigneurs et dames sans nombre.

CHAPITRE XLVIII

*Comment ma dame ordonna à Saintré d'oster
l'emprise que le seigneur de Loisselench por-
toit.*

EN après que les armes de Saintré, à l'encontre de messire Enguerrant, furent accomplies, le seigneur de Loisselench, baron de Poullaine, grant, fort et puissant chevalier, qui, pour acquerir honneur et la très désirée grace de sa dame, très bien accompagné de quatre barons, aussi de Poullaine, c'est assavoir : le sire d'Andach qui porte de gueulles à ung faulcon persé de sinople, le seigneur de Nulz qui porte d'or à une teste de beuf de sable, le seigneur de Morge qui porte d'argent à trois testes de sable, et le seigneur de Terg qui porte d'or à une croix de gueulles vuydée, qui tous quatre, faictes ces armes, alloient de compagnie à Saint-Jacques. Lequel seigneur de Loisselench portoit, pour emprise d'armes à cheval et à pié, deux cercles d'or : l'ung au dessus du coulde du bras senestre, et l'aulture au dessus du coup du pié, tous deux

enchainez d'une assez longue chayne d'or, et ce par l'espace de cinq ans, se, entre deux, il ne trouvoit chevalier ou escuyer de nom et d'armes, sans reprocue, qui le delivrast des armes qui s'ensuyvent. Et lesquelles, pour plus tost et plus honnourablement accomplir, s'apansa venir en la très belle court de France, où tous nobles et chevaleureux hommes estoient très honnourablement receuz, et aussi pour avoir cognoissance et accointance d'eulx. Lors, par Brunsvich, le herault qui avecques luy estoit, fist lire sa lectre d'armes, et declairer du langaige poullain en françoys, qui, pour abregier, disoit ainsi : « Que celui qui le delivrera et luy, seront tenuz de courre à cheval, l'ung contre l'autre, dix courses de lances d'armes que le prince ordonneroit et de la mesure, et en harnois et selle de guerre, sans aultre avantage nul ; sy vrayement que entre lesdictes courses ne fussent, premier trois lances bien et raisonnablement rompues, au dict du prince. Et se, à la fin desdictes dix courses, ou trois lances bien rompues, Dieu garde le corps de malle exoine, le deuxiesme jour après, ilz combattront à pié dix poulx de lance sans reprise ; puis seront repris pour changer baston, c'est assavoir haches pareilles, desquelles ilz combattront d'estoc, de mail ou de taille, ainsy que mieulx leur plaira, sans reprise et

aultres coups ; et après l'emprinse, recombateront de leurs espées dix aultres coups, et semblablement feront des dagues d'armes. Desquelles lances, à pié et à cheval, toutes garnies, aussi des aultres bastons dessusdits, il sera tenu, et vout que en la lice il en donnera le choys. Et s'il advenoit que, en faisant lesdictes armes, l'ung d'eulx fust d'aucune piece de son harnois desarmé, il sera tenu en tel estat les accomplir ou quicter, pour soy acquiter d'iceluy pris. Et celui à qui, des cinq armes accomplies, Dieu aura donné le meilleur pour les armes à cheval, son compaignon sera tenu luy donner un dyamant, sur la place, du pris de trois cens escuz ou au dessus ; et pour les poulx des lances à pié, un ruby de mesme pris ; et pour les haches, une fine perle de quatre caras ou au dessus ; et des espées, un balay dudit pris ; et des dagues, un saphir dudit pris aussy. Et s'il advenoit, dont Dieu les deffende ! que, en faisant lesdictes armes à cheval ou à pié, l'ung d'eulx fust tellement exoiné, que, pour ce jour, parfaire ne les peust, ou qu'il fust hors de ses arsons, ou de ses piés porté à terre, ou fust de teste, de corps ou de bras, tellement desarmé, qu'il refusast en tel estat parfaire lesdictes armes, celles et cestes qui seroient faictes, seroyent tenues pour parfaites. Et sera tenu celui de payer tous les pris

des armes à faire, comme s'il les avoit, l'ung après l'autre, tous perdus. Chascun de nous sera tenu, avant le commencer des armes, les mettre es mains du prince pour les ordonner à son bon plaisir. »

L'ACTEUR. — Lesquelles armes ainsi publiées, ma dame, sans plus y penser, fist à soy venir Saintré, et tout coyement, au plus brief qu'elle peut, luy dist : « Mon amy, or est la journée venue que Dieu et fortune vous ont promis pour vous honorer et mettre sus, par la venue de ce chevalier poullain, dont ses armes sont publiées ; si vous prie, tant comme je puis, que vous soyez tout le premier devant monseigneur le roy, faisant la requeste de le delivrer ; et de la despense ne vous souciez, car Dieu et nous pourvoirons à tout. Et jaçoit ce que vous soyez mon seul ami, trestout mon bien, celui que au monde plus je ayme et desire, parquoy sur tous aultres le vous devroye desconseiller, et qui plus est, deffendre de plus vous mettre en telz perilz ; mais tant est l'honneur bonne que je vous porte, que je vous vouldroye, en tous endroitz, le plus vaillant et le meilleur, esperant en Dieu qu'il vous partira de l'honneur. » Et quant Saintré entend ma dame si haultement parler, jaçoit ce que son cueur estoit conclu, lors à ung genoil se met, et très humblement l'en remercia, et dist : « Ma très

redoubtée dame, sur l'amour et foy que je tiens à vous, j'estoye ores en ce pensement, et comment j'en poroye parler à vous. — Allez tost, dist elle, affin que nul soit le premier. » Lors hastivement s'en va au roy, et incontinent à genoulx se mist, et luy fist sa priere ainsy qu'il appartenoit. Le roy, qui moult l'aymoit, le regarde en soubzriant, comme esmerveillé, en pensant que ung si jeune homme, et de assez menue façon, avoit cueur de si fortes armes reprendre à ung si grant et puissant homme, comme ce chevalier poullain estoit, et puis luy dist : « Et Saintré, y avez vous bien pensé? — Sire, dist il, oyl, dès aussi tost que je le vis, je n'eus oncques puis aultre desir. » Et endementiers qu'ilz estoient en ces parolles arriva le viconte de Beaumont, qui au roy fist semblable requeste. En la faisant, y vint encores le seigneur de Craon ; et sur ce, le seigneur de Vergy ; puis le viconte de Quaisnes, le seigneur de Saucourt, le seigneur de Hangest, et tant d'aultres faire tous au roy leur requeste. Et quant le roy entent la priere de tant de seigneurs, alors leur dist : « Mes amys, à telz choses les premiers vont devant ; vous voyez cy Saintré le premier, qui encores est à genoulx ; certes, combien qu'il soit jeune, nostre Seigneur est le Dieu des forts et des foibles des vieulx et des jeunes ; et comme Dieu est

pour les foibles autant que pour les fors, et pour les jeunes comme pour les vieulx, et, pource, nous sembleroit luy faire tort, veu le bon vouloir qu'il a. » Alors chascun se leva, louant son bon vouloir et plaisir, et plus contents de Saintré qu'ilz n'estoient l'ung de l'autre ; lors Saintré, tant humblement qu'il peut, remercia le roy. Le roy pour le lendemain fist prier le seigneur de Loysselench, les aultres quatre barons, chevaliers et escuyers de leur compaignie, ausquelz furent fais très grans honneurs. Et après disner, les dances avecques les dames, le royne presente qui très amyablement tous recueillit, puis aucunement, par gens de deux langues, leur demanda des dames et estas de leurs pays, disans estre très desplaisant qu'elle ne les entendoit. Et quant les dances furent cessées, avant les espices venues et le vin du congié, lors fut Monjoye, roy d'armes des François, qui de par le roy fist relire la lectre d'armes, present la royne, seigneurs et dames à planté. Et quant la lectre fut leue, Montjoye demanda audit chevalier s'il estoit celuy de ses armes, et s'il advouait tout ce qui estoit en la lectre. Et quant en fut donné à entendre audit chevalier, il dist que son scel et sa lectre il advouait. Alors Saintré à genoulx se mist devant le roy, et fist renouveler son congié ; lors se leva, et dist au chevalier :

« Monseigneur, vous soyez le très bien venu ; à l'aide de Dieu, de nostre Dame et de monseigneur saint Michel, je vous desprisonneray de vostre veu, et des cercles et chaines dont vous estes emprisonné. » Et lors s'advança pour les cercles oster. Et quant le chevalier vit Saintré si jeune et si menu, comme de honte se recula, et en son pouldain dist à ses gens : « Et est celui qui me doit delivrer ? n'y a il, en ceste court, si hardy que luy ? » Lors luy fut dit qui il estoit, et comment le roy le ayroit, et que jà il avoit fait armes en Arragon, à cheval et à pié, et que de tous deux en avoit eu l'honneur. Lors le regarda moult fort, puis dist : « Je ne le puis doncques refuser, face doncques son bon plaisir ; bien dis que telz gens sont plus à doubter aucunes fois que les plus puissans. » Alors fut dict à Saintré que jà le vult requérir de plus avant : « Saintré, faictes ce que avez commencé, car il vous remercie de très bon cuer. » Alors Saintré osta les cercles ; et, ce fait, le roy donna de celui jour au trentiesme jour ensuivant, pour le jour des armes à cheval, puis en sa chambre se retrahit. Et lors Saintré portant les deux cercles d'or, l'ung devant l'autre derriere, pendant à la chaine environnée entour son col, fut accompagner, et plusieurs aultres, ledit chevalier en son hostel. Et cy laisseray à parler des grans hon-

neurs et bonnes chieres que, tant qu'ilz furent là, leur furent faictes; et diray des grans douleurs que ma dame eut en son cueur, et des belles parolles qu'elle dist à Saintré.

CHAPITRE XLIX

Comment ma dame se complaint à Saintré, et les douces parolles qu'elle luy dit.

MA dame, qui encores n'avoit veu le chevalier que au lever les cercles, quant elle le vit si hault et corpulant, fut moult esbahye, et se repentit des parolles qu'elle avoit dictes à Saintré, que oncques puis ne fut joyeuse; mais puis que la chose estoit si avant, aultre conseil ne se pouvoit prendre; dont, jour et nuyct, ne cessoit de plaindre et de souspirer, et en ses plains disoit : « Helas ! moy dolante, et que as tu fait ? Et que pensoyes tu quant tu conseillas et mis en voye de telz perilz celluy que en ce monde plus aymoye, et que sur tous et toutes l'en devoye

desmouvoir? Helas! il aura à faire à ung si grant homme, si fort et si puissant, qu'il n'est nul qui doubter ne le doye; dont s'aucun meschief du corps ou de son honneur luy en advenoit, ce que Dieu ne vueille! lasse! dolante, maleureuse, jamais mon cueur ne auroit joye. Et qui pis est, luy par aventure jamais ne te ayeroit; et vrayement il auroit droit; combien que à ce je l'aye conforté, seullement pour estre entre les bons et les preux chevaliers renommez. Et, de ce, mon vray Dieu, je t'en appelle à tesmoing, et aussi ta benoiste mere, à laquelle je le voue de cire armé de son barnois, de son destrier, et housé de ses armes, tout pesant trois mille livres; à genoux et à mains jointes, Vierge, toy suppliant que en honneur et en corps le me vueillez rendre et sauver; et du surplus adviengne ce que pora! » Et quant ma dame eut finées ces parolles, elle vint où la royne estoit, si ne tarda gueres qu'elle apperceut Saintré; lors print son espingle, et son signal luy fist. Saintré qui, de l'autre part, moult desiroit parler à elle, incontinent luy respondit. Et quant la nuyct fut venue, et l'heure aussi, et qu'ilz furent ensemble, ma dame, qui le vit sy très joyeux, lors son cueur changea pourpos, et se mist de très grant dueil en très grant joye, et lors luy dist : « Or, mon amy, pensez de

bien faire, et vertueusement perdez ou gagnez honorablement ; car quoy que de vous adviengne à ung tel et sy puissant homme, vous n'y povez avoir que honneur ; et ne doubtez la grandeur, ne la force de ce geant, au regard de vous ; car Dieu est par dessus tous, et ayde à ses amys qui en ont besoing ; et luy requerent devotement ; et la raison est ceste : car les plus forts mesprisent les plus foibles et combattent en orgueil, et les foibles requierent l'ayde de Dieu, qui les conforte et est pour eulx ; dont d'omme à femme, de pover à pover, nul que Dieu n'en est certain. Et ceulx qui sont de pover et de nombre esgal, et qui tous de bon cueur requierent l'ayde de Dieu, l'ung contre l'aultre, se garde bien qui aura tort ; car Dieu est le vray juge, et rend à chascun son droit. Doncques, mon amy, adviengne de vous ce que à Dieu plaira ; se il en donne aucun peu d'honneur d'ung aultre, et s'il vous surmonte, comme ung geant qu'il est au regard de vous, il ne peult tant vous fouller que le monde ne vous en prise trop mieulx, que se n'aviez eu affaire à luy ; car j'ay aux preux des armes ouy conter, que le gentil homme sans querelle, foullé en armes, est plus prisié qu'il n'estoit devant ; car les gens combattent, et Dieu donne les victoires à ceulx qu'il luy plaist ; dont, mon amy, ne vous souciez que de bien faire. Et,

quant au regard de vostre despence, et de vous habiller honorablement, veez cy en ce saichet six mille escuz, et les despendez honorablement, et à Dieu soyez! »

L'ACTEUR. — Saintré, qui voit l'amour de ma dame envers luy fleurir tous les jours, tant humblement qu'il peut et sent, l'en remercia; dont, pour abregier, print d'elle congié, et toute nuyst eut tant de joye que, de ce nouvel pensesment, il ne dormit. Et quant le jour fut venu, ouye la messe et dictes ses heures, de besongnier il ne cessa, et tant que, à l'ayde de Dieu, du roy, de ma dame, il fut d'armes, de destriers, de très riches paremens et d'autres habillemens sy bien en point; que vous dirois je? ce qu'il eut, bien eust suffi à ung baron royal. Et à tant laisseray cy à parler de toutes ces choses, et du grant bruit qui partout estoit de ses armes, et de la priere que chascun faisoit pour luy, qui tant estoit jeune et menu homme au regard de ce chevalier poullain, que il sembloit à chascun que, tous les coups, il le foulleroit: or diray je des armes faictes au terme et jour ordonné.

CHAPITRE L

Comment le seigneur de Loisselench et Saintré vindrent ès lices faire leurs armes à cheval, present le roy, la royne et plusieurs princes, seigneurs et dames.

QUANT le xxx^e jour fut venu après ce que Saintré eust osté l'emprise au seigneur de Loyselench, et jour ordonné de commencer leurs armes, le seigneur de Loyselench fist le matin, soubz le hourt du roy, porter vingt grosses lances, toutes armées, fors de fers, sans avantage, ainsi que en tel cas appartient. Et quant le roy, la royne, et tous les aultres seigneurs et dames furent sur les hours et par les fenestres de la grant rue Saint Anthoine à Paris, le seigneur de Loyselench par ung heraulx envoya ung coffret de cuir, tout plain de très biaux fers de lances, dont ilz devoient joster, et donner la mesure telle qui luy plairoit. Et endementiers que les lances se ferroient à très belle et grande compaignie de seigneurs, chevaliers et escuyers françoys que le roy avoit ordonnez, arriva le seigneur de

Loisselench, aussi les chevaliers et escuyers de sa compagnie, qui estoient plus de cent cinquante chevaux, tous vestus de robes neufves, apareillées, et devant luy cinq très biaux destriers ; dont les quatre estoient houssez de paremens de veloux de diverses couleurs et de diverses façons d'orphaverie, et le cinquiesme estoit de veloux figuré au blazon de ses armes, chargé d'orphaverie, c'est assavoir : d'argent, à un beuf rampant de gueules, cornes et ongles de sable ; et sur chascun ung très bel et gent paige richement habillé. Et après ce destrier, venoit le conte d'Estampes, qui sur ung coupon de lance portoit son heulme, sur lequel estoit ung demy beuf de gueules, entre deux penars d'argent, naissans d'ung carcoys de mesme et de gueules. Et après luy, ledit seigneur de Loysselench, sur un très puissant destrier, armé de toutes ses armes, fors du chief, sur lequel il portoit ung très bel chappel de diverses violettes ; luy et son destrier, housé d'ung très riche veloux cramoisy, velousté et broché d'or sur or, tout fourré de fines martres sebelines ; et, à sa dextre, venoit le duc de Berry qui, pour l'onneur et ordonnance du roy, comme estranger, l'accompaignoit. Et quant ilz furent arrivés à l'entrée des lices, le roy sans nulles serimonyes le fist entrer, et aller soubz l'ombre d'un bien grant ciel de tapisserie, couvert

d'une bien grande couverture d'ung bout à aultre à annelets courans, où estoit le lieu et dressouer pour l'arriver, vin, fruiz et espices à planté, pour tous rafreschir. Et endementiers qu'il estoit en l'ombre de son ciel, arriva Saintré, semblablement armé de toutes ses armes, excepté du chief qui couvert estoit d'ung très bel chappel de bievre, environné d'une très belle touaille de plaisance vollant, toute brodée et frangée de fin or; et au front estoit ung très riche afficquet d'ung très gros dyamant, environné de trois gros ballais et de trois grosses perles de quatre carats, que ma dame luy avoit tout ainsy donné; luy et son destrier, tout housé de très fines harmines fourrées de martes sebelines, qu'il faisoit très bel à veoir. De ses six aultres destriers et de ses paiges très bien habillez, qui devant luy alloient, je m'en passe, car chascun le doit penser. Après ces six destriers, venoit le duc d'Alançon, qui tant l'aymoit que, sur ung tronçon de lance, son harnois de teste vout porter. Et après luy, venoit Saintré, et à dextre le duc d'Anjou et de Thouraine, qui tant le voulut honnorer. Et après eulx, sans nombre, chevaliers et escuyers qui le voudrent accompagner. Et quant il fut à l'entrée des lices, il fist, comme bon chrestien, de sa banelle où nostre Dame estoit, un très grant signe de la croix, en disant la beneysson que ma dame

luy avoit apprinse ; et quant ma dame le veit, si lui sembla trop plus bel que oncques n'avoit fait ; dont, tant pour la grant amour qu'elle avoit à luy, comme pour le peril qu'il lui sembloit où elle l'avoit mis, tant se repentoit que peu à peu en celle grant douleur, estant au hourt avecques la royne, le cueur luy faillit. Et quant la royne et ses aultres dames la veirent pasmée, comme morte, car pas ne sçavoient son mal, pour non troubler le roi et sa compaignie, sans faire bruyt, arrouserent son viz et ses mains de vin aigre, et luy firent tous les remedes qui se peurent trouver. Et tant bien fut frotée et secourue, que peu à peu elle revint à soy. Lors se print à ouvrir les yeulx, et regarder, puis çà, puis là, puis l'ung, puis l'aultre ; puis se print à parler, et dist : « Ha ! très benoiste Dame, veuillez moy reconforter. » Lors fut reconfortée. Mais pour priere que la royne luy fist, oncques pour lors, à veoir les armes ne se vout tourner.

L'ACTEUR. — Saintré entrant dedens les lices, en soubzriant regarda les hourt du roy, et puis des dames, et en passant osta son chapellet tant humblement, et si bas qu'il peut, s'enclina ; mais de ce qu'il ne vit ma dame, en fut aulcunement esprins. Toutesfois il se appensa bien que c'estoit, doubtant que ma dame n'eust cueur souffisant à veoir ses armes, ainsi

que jà elle luy avoit dit. Lors, tout à cheval, entra dedens son grant ciel, ainsy courtiné, paré et garny, comme l'autre estoit; et avecques luy, messeigneurs le duc d'Anjou et le duc d'Alençon, et ceulx qui ordonnés y estoient pour le servir, sans plus.

L'ACTEUR ENCORES. — Et quant ilz furent tous deux venuz, et par la maniere que j'ay dit, le roy, qui jà avoit ordonné la mesure des lances et fait toutes ferrer, ordonna qu'ilz fussent dû tout armez, et que le seigneur de Loys-selench, comme entrepreneur, fust sur les rencs le premier; et ainsi fut fait. Et après ordonna que Saintré venist, et que sur son harnois de teste portast son chapel de bievres et ainsi garny, comme sur son chief il le portoit. Et quant tous deux furent venus, le roy manda au seigneur de Loisselench, et luy envoya dix lances esgalles, par dix chevaliers, et qu'il en choisist les cinq. Le seigneur de Loys-selench, comme saige et gracieulx chevalier qu'il estoit, remercia le roy très grandement, et puis les envoya à Saintré, qui choisist ainsi que en son emprinse estoit contenu. Saintré, pour abregier, l'en mercya, et dist que les cinq plus grosses l'on retint. Lors ledit seigneur duc d'Anjou, qui le vult servir, en print l'une que sur sa cuysse luy mist jusques au departir. Et quant les dix lances furent baillées, le roy de par

Dieu les ordonna partir. Lors à ces paroles chascun brocha son destrier l'ung contre l'aultre, si qu'il sembloit que jamais à temps n'y peussent venir. Et à ceste course, le seigneur de Loysselech actaint Saintré sur la double du coude senestre, qui esclissa, et Saintré actaint au faulx du plastron; et le coup fut ung peu bas, dont, en rompant sa lance par maints esclats, il ploya. Alors le cry des gens et des trompettes fut si grant que longue piece dura. A la deuxiesme course, le seigneur de Loysselech ataint Saintré à la buffe, tellement que à bien peu ne l'endormit. Et Saintré l'ataint au fronc de son heaulme, et perça son beuf d'argent, tellement que au passer que les chevaulx firent, le sien tourna ce devant derriere; et à ceste course Saintré ung peu se reposa. A la troisieme course, tout ainsi que Saintré l'avoit actaint, il actaint Saintré, et lui emporta son chapel dessus la pointe de sa lance, tout ainsi garny comme il estoit; et Saintré l'actaint ou hault de son grant gardebras, qu'il luy faulsa, avecques son double, et rompit les tresses, et le gardebras vola par terre. Et alors recommença le cry et bruyt des gens et trompettes, tellement qu'à peine les pouvoit on faire cesser. Et quant le seigneur de Loysselech fut ainsi desarmé, le roy voulut reveoir la lectre des armes, pour bien veoir comment elle contenoit; si

trouva sur ce trois clauses, dont la première estoit que s'il advenoit, qu'en faisant lesdictes armes à cheval ou à pié, l'un d'eulx fust tellement exoinié que pour ce jour parfaire ne les peust, ou qu'il fust hors de ses arsons, ou de ses pieds porté par terre, ou qu'il fust de teste, de bras ou de corps, tellement desarmé qu'il refusast à parfaire lesdictes armes en tel estat, cestes et celles qui seroient à faire seroient tenues pour faictes; et sera tenu celluy de payer tous les pris, ainsi que se l'ung après l'autre il les avoit tous perdus. Et pour celle cause le roy fit cesser la jouxte, et au seigneur de Loysselench fist remonstrer le contenu de sa lectre par les quatre seigneurs d'Andach, de Nulz, de Morg et de Terg, barons poullains, venuz en sa compagnie, ainsi que dit est, qui present eulx fut leue; les priant que de sa part les recordassent, et qu'il ne vouldist pas mectre son ame, son honneur, son corps et par adventure sa vie, en peril de mort. Le seigneur de Loysselench, qui ouyt les choses dessusdictes, remercia très humblement le roy; mais, comme très desplaisant de son meschief, dist que advenist de luy ce que à Dieu plairoit, car vraiment il parferoit ses armes. Les seigneurs françois, que le roy luy avoit baillez pour le servir, ne l'en peurent destourner. Lors lesdits seigneurs poullains luy dirent tout court, qu'ilz

vostre gardebras, monseigneur de Loysselench, du coup de lance desarmé, à vous, Jehan de Saintré, le roy, par le contenu de la lectre, vous adjuge de ces armes le pris, et à vous, monseigneur de Loysselench, que vous acquitiez, et veez cy de quoy. » Lors luy bailla le bel et riche dyamant du pris, que le roy avoit eu en garde. Lesquelles parolles dictes, par Brunsvich, le herault venu avecques luy, furent de môt en mot données à entendre. Alors le seigneur de Loysselench s'enclina devers le roy, et en son poullain le remercia très humblement de l'honneur qu'il luy avoit fait, et dist que vraiment Saintré avoit loyaulment gagné le pris. Et à ces paroles il print le dyamant, et vers Saintré s'advança, et en son langaige très doucement le remercya, et mist en sa main le dyamant. Et lors le roy ordonna que chascun s'en alla desarmer. Mais au departir l'ung de l'autre, en toutes façons, Saintré, per à per et à sa dextre, le convoya ; alors trompettes, clarons et menestriers commencerent à corner. Dont la joie fut tant grande par la ville qu'elle ne se poroit compter. Et à tant laisseray cy à parler d'eulx qui s'en vont desarmer, et puis soupper avecques le roy, qui grandement honnora ledict chevalier et sa compaignie ; et de Saintré, que la royne vould retenir avec elle à soupper, je parleray.

L'ACTEUR. — Quant le souper fust prest, le roy envoya querir le seigneur de Loysselech et tous les aultres quatre barons, chevaliers et escuyers poullains; alors Saintré s'en va les querir très bien accompagné. Et quant ilz furent devers le roy, on leur fist très bonne chiere et grant honneur; lors les tables furent dressées, et le souper prest. Et le roy fist le seigneur de Loysselech seoir à sa dextre, et à sa senestre les aultres quatre barons; et les aultres, à l'aultre premiere table après celle du roy; de vins, de viandes de diverses façons urent très bien servis, et ne les fault ja deviser, car chascun peult penser et sçavoir que ce fut haulte chose. Saintré, après ce qu'ilz furent tous servis, s'en va soupper avec la royne, ainsi qu'elle luy avoit dit. Des bonnes chieres que ma dame et les aultres dames et damoiselles luy firent, ne fault point demander; car il n'y avoit celle qui s'en peust cesser. Ma dame, qui sur toutes les aultres estoit celle qui plus legierement s'en passoit, toutesfois ne se peut tenir de regarder ce bel dyamant du pris, qu'il portoit à son col à une chaîne d'or; alors la royne aussi le voulut veoir, et plusieurs aultres dames et damoiselles. Lors ma dame luy dist : « Certes, Saintré, la dame est bien heureuse qui l'a gagné. » Lors la royne qui oy ces parolles, luy dist : « Je prie à Dieu, Sain-

tré, que, de bien en mieulx, puissez vous tous les aultres pris gaigner. » Lors à genoulx leur dist : « Ha ! mes dames, vostre bonne mercy ; mais je ne l'ay pas à Dieu desservy, et ce qui en est me vient de luy par voz bonnes prieres. » A ces parolles, le maistre d'hostel vint, qui fist laver la royne, et quant elle fust assise, malgré que Saintré en eust, elle le fist seoir à sa dextre. Que vous dirois-je ? La joye y fut telle, d'ung costé et d'aultre, qu'elle ne se poroit conter. Mais quant les tables furent levées, le roy d'ung costé, et la royne de l'aultre, s'en vont en la grant salle, pour veoir les dances et morisques de diverses façons ; mais pour les affaires que le seigneur de Loys-selench avoit eu ce jour, et aussi Saintré de son cousté, le roy hasta les espices et le vin de congié ; puis se retrahit en sa chambre, et chascun print congié. Saintré et tous les aultres, chascun prend son escuier ou chevalier soubz le bras, et aultre belle compaignie, menerent Loysselench et les aultres, en son hostel. Et cy laisseray à parler des honneurs, vins et viandes que tous les jours leur envoyoit, et du jour des affaires pour les armes à pié ; et diray de ma dame et de Saintré, et de la parfaicte joye que, celle nuyct, ils firent au preau.

L'ACTEUR. — Celle nuyct, ainsi que ma

dame avoit à Saintré son signal donné, ilz se trouverent au preau ensemble ; alors furent les baisiers à grant largesse donnez, et les baisiers renduz. Que vous dirois-je ? Telz que oncques ne penserent estre à si parfaictz plaisirs. Et lors ma dame luy dist : « Helas ! mon cuer, hélas ! ma joye, hélas ! mon seul et souverain desir, je veiz huy l'heure que jamais ne vous cuydoie veoir vif ; et quand je vous veiz entrer es lices, de la grant paour que de vous j'euz, le cuer me amortist tellement que je, comme morte, cheuz ; et se je n'eusse esté tost secourue, vrayement je rendoye mon esprit ; mais quant je ouys de vous les vertueuses nouvelles, incontinent mon cuer se revesquit ; et ma dame, avec les aultres dames, me vindrent sourdre, et à la veue du hourt avecques elles me firent venir. — Helas ! très haulte et excellente dame, que me dictes vous ? Las ! se je l'eusse sceu, qu'eust fait mon très doloireux cuer ? Pour lors, trop mieulx m'eust valu la mort que la vie ; je feusse demouré, de mes armes à faire, à grant deshonneur ; mais loué soit Dieu et gracié que je n'en ay riens sceu ! Lors que j'entray ès lices, je vous vy de lez la royne ; mais quant je vins tout armé sur les rences, je vy la royne et toutes les aultres dames, fors que vous ; si me pensay que n'aviez cuer^{de} veoir l'esbatement de la jousté, ainsy que j'à m'aviez

dit, et ne pensay en vostre mal plus
 Ores, ma très redoubtée dame, loué
 et nostre Dame, de l'honneur que j'ay
 d'huy eu par vous, en esperant, ma
 bien en mieulx. Si vous supplie qu
 bonne chiere, et du surplus ne vous
 car Dieu, qui a esté à noz armes,
 aultres. » Et à ces parolles prindrent,
 l'autre, son très gracieulx congié, et
 ray à parler de leurs affaires, et d
 armes à pié, et comment elles furent

CHAPITRE LI

*Comment le seigneur de Loysselench e
 viendrent ès lices, et firent leurs
 pié.*

LE jour que les armes devoient
 à l'eure qui leur fut ordonnée,
 la royne, les seigneurs et le
 furent sur leurs hours. Le sire de Loy
 par les sires d'Andach et de Morg, et

roy deux lances à poulcez, pareilles, ferrées et armées chascune de sa rondelle pour couvrir la main devant, et painctes en vermeil, et aussi deux haches, deux espées et deux dagues, toutes pareilles, sans nulle difference. Lors le roy, pour abregier, print de ces pointes quatre, qu'il envoya à Saintré, et les aultres quatre rendit ausdits seigneurs d'Andach et de Morg, pour les reporter au seigneur de Loys-selench. Et ce fait, le seigneur de Loys-selench, armé de toutes armes, fors que du chief, se partit de son logeis, à telle ordonnance que, aux aultres armes à cheval, avoit fait. Et tant plus que les contes de Nevers, de Boullongne, et de Tancarville, et de Restel, devant luy portoient les quatre pointes, à cheval; et après eulx, le duc de Berry, qui portoit son harnois de chief; et puis luy, armé de toutes ses armes, houssé de son destrier de fin veloux, aux couleurs de ses propres armes, et après luy, mains barons et aultres nobles hommes; et en tel estat vint entrer ès lices, et descendre en son nouvel pavillon que le roy lui avoit fait dresser, et avecques luy, ceulx qui ordonnez y estoient. Et quant il fut descendu, ne tarda guieres que Saintré vint à très belle et noble compaignie; et devant luy, venoient les contes du Perche, de Clermont, de Saint Pol et de la Marche, qui portoient ses quatre pointes

devant luy ; et après eulx, le duc d'Anjou, qui semblablement portoit le harnoys de son chief ; et en celle très belle compagnie, vint pareillement descendre en son aultre pavillon que le roy aussi luy avoit faict dresser pour luy. Des rois d'armes, des heraulx, poursuyvans, trompettes, clarons et menestriers de divers instrumens, qui devant eulx alloient, je delaisse, pour abreger. Et quant ilz furent tous deux en point, le roy ordonna les faire yssir ; alors chascun des deux seigneurs ducz leur baillerent leurs lances à poulcez ; et au prendre par Saintré, il baisa sa banerolle, en faisant le signe de la croix. Lors à très grant pas demarcha tout le premier, et vint trouver le seigneur de Loysselench assez près de son partir. Et au premier coup qu'il fist, à haulte voix s'escria : « A notre Dame, et à ma très douce dame ! » A cest assembler qu'il fist, le seigneur de Loysselench ne cuydoit pas moins que bientost le porter par terre ou le fouller ; et croy que par sa force, trop plus puissante que celle de Saintré, il luy fust bien advenu ; mais à qui Dieu veult aidier, nulz ne luy peut nuyre. Lors le seigneur de Loysselench, de toute sa force, actaint Saintré sur le hault costé du faulx du corps, et, sans attacher, sa lance clinssa une toise outre ; et Saintré de ce premier coup aussi clinssa sa lance. Et, au

clinsant qu'elle fist, le vint actaindre entre la lance et la main droicte que par le meilleu, à tout le gantel et trois bons dois, la lui faulsa. Et quant ilz cuyderent le deuxiesme coup repousser, le seigneur de Loysselench sa main droicte ne peut à soy retraire, ne aussi Saintré sa lance, qui tant prinse estoit. Lors le seigneur de Loysselench habandonna sa lance pour soy joindre à Saintré, mais ne pouvoit ; car Saintré, voyant sa lance atachée, boutoit tant qu'il pouvoit avant ; et quant le roy apperceut la lance de Loysselench à terre, lors dist que de ses armes n'y avoit plus, et que Dieu estoit pour cest enfant. Lors les fist prendre tous deux, et en leurs pavillons aller pour leurs chiefs desarmer, et appareiller Loysselench, et puis devant luy venir. Ne vous poroye à demy dire le très grant dueil que le seigneur de Loysselench fist tant de sa male fortune, comme de ce qu'ung si jeune homme l'avoit à cheval et à pié foulé ; dont tout ainsi, la main persée, que ne se pouvoit, de chault ne de courroux, le sang estancher, vouloit parfaire ses aultres armes ; mais tant estoit de sang yssu, que force luy fust de s'en desister. Et quant il fut mediciné, sa main lyée et son bras desarmé, à l'issue de sa tente Saintré le vint reconforter, et le seigneur de Loysselench doucement l'acolla, et puis en son poullain

luy dist : « Mon frere Saintré, se vous continuez ès armes ainsi qu'avez commencé, il ne sera celluy qui resister puisse à vous. » Lors Saintré, estant informé de ce qu'il avoit dit, en soubzriant luy respondit : « Ha! monseigneur mon frere, tout ce que vous dictes est du bien de vous, et se en aucune maniere je m'y employe, ce n'est que de porter la piece d'armes, c'est le baston ; car ma très redoubtée dame faict le surplus. » Et à ces parolles, messeigneurs les ducz les menerent devant le roy. Et cy laisseray ung peu à parler comment les priurent donnés, et diray de la grant joye que la royne, ma dame et les aultres dames et damoyelles en font toutes, et comment ma dame se mist en contemplacion.

La royne et ma dame, avecques les aultres dames et damoyelles, ne cessoient de rire et de faire joye pour l'amour de Saintré, qui avoit du meilleur. Et quant ma dame, qui l'ueil dessus Saintré ne bougeoit, s'apensa que vrayement, actendu l'évidente grace que nostre Seigneur luy avoit fait à la requeste de nostre Dame, qu'elle les en remerciroit ; et lors fist semblant d'avoir mal en sa teste, puis dist à la royne : « Ma dame, il me soit pardonné, car il me fault ung peu coucher. — Belle cousine, dict la royne, faictes tout à vostre plaisir. » Et quant ma dame fut couchiée, en la chambre du

hourt elle renvoya toutes ses femmes. Lors se leva, à genoulx se mist, les mains jointes, les yeulx levés au ciel, devotement rend à Dieu et à nostre Dame mercy de la grace qu'à Saintré avoient faicte, et à ce fut longuement. Et quant sa devocion fut faicte, ainsi que toute guerrie, à la royne vint joyeusement. Saintré qui, de fois à aultre et souvent les dames regardoit, et ne veoit point ma dame, pensa que ce fust ainsi que l'aultre fois. Mais quant il apperceust ma dame revenue, son cueur en fut cent mille fois plus joyeulx. Et cy laisseray à parler de ces choses, et diray comment les pris furent donnés.

CHAPITRE LII

Comment le roy ordonna que les pris fussent donnés.

LE roy, qui garny estoit de huit joyaulx suffisans, qui estoient le prix, quatre des ungs, quatre des aultres, pour les donner à celluy à qui il appartendroit, ordonna

/

audict Monjoie, roy d'armes des François, qui sur le hourt estoit, qu'il portast les paroles toutes telles qui s'ensuivent. Lors par un ung herault fut à haulte voix crié : « Silence de par le roy, » affin que chacun le puist ouyr. Lors dit Montjoye : « Messeigneurs de Loysselench, et vous, Jehan de Saintré, le roy nostre souverain seigneur, qui cy est, m'a commandé et ordonné de vous dire que de ces voz dernieres armes, tous deux, avez bien et vaillamment fait ; mais puis que vous, monseigneur de Loysselench, ne vous sentez aisé pour les accomplir, selon le contenu de voz lectres d'armes, luy, comme vostre juge, seul et competent, vous ordonne que vous acquitez de voz quatre pris ; lesquelz, de son commandement, congié et licence, je vous rens. » Et quant le seigneur de Loysselench vit Montjoye qui eut finées ses parolles, demanda qu'il avoit dit, lesquelles à luy declairées furent ; et bien ouye la sentence du roy, de laquelle il ne pensoit pas moins, à genoulx dist très humblement qu'il remercioit le roy, et bien se douloit de sa male aventure, qui, tant à pié comme à cheval, n'avoit laissé ses armes parfaire, pour le plaisir des dames plus longuement durer ; mais puisque ainsy fortune le vouloit, il estoit prest de soy acquiter, ainsi qu'il ordonneroit et que raison le vouloit. Et ces parolles dictes,

Montjoye descendit, qui, pour soy acquitter, luy bailla ses quatre joyaulx; et quant il les eut prins, à Saintré s'avança pour les bailler. Lors son cueur fut tellement estrainct, qu'il ne peut ung seul mot parler. Les aultres quatre barons poullains congneurent bien son grant dueil; et à ce, chascun, qui mieulx le sceut dire, s'efforcèrent de l'excuser. Alors Saintré, que monseigneur d'Anjou conduysoit, s'avança en soy inclinant, pour les quatre joyaulx prendre, puis en soubzriant luy dist : « Monseigneur mon frere, de l'honneur qu'il vous a pleu me faire, je vous remercie, tant comme je puis et sçay. » Alors trompettes et clairons commencerent à sonner, et par telle façon que à paine les pouvoit on faire cesser. Et ces choses faictes, le roy ordonna en leurs pavillons eulx retraire, et puis à cheval monter pour aller en leur logeis desarmer. Et quant Saintré fut sur son cheval monté, mon dit seigneur d'Anjou luy dist : « Nous voulons, Saintré, que vous soyez honorable et gracieulx. » Lors le mena au seigneur de Loysselench, qui jà sur son destrier estoit monté. Lors les assembla tous deux, puis luy et monseigneur de Berry se misrent devant, et ainsi jusques à son logis, le conduyrent. Des honneurs, des prieres l'ung de l'aultre, je me veux passer, et des choses que depuis firent

jusques à l'heure du soupper; et diray des grans joyes et devises que la royne, ma dame et les autres dames et damoysselles firent, et aussi du roy et de toute la court, et aussi par toute la ville, tout ce jour et celle nuyct, qu'il n'estoit celluy ne celle qui taire se peust de louer Saintré.

CHAPITRE LIII

*Comment le seigneur de Loysseleinch soupa
avecques la royne.*

LE roy et la royne, quant ilz furent descenduz en leur hostel de Saint Pol, lors le roy ordonna que la royne fist, par ses maistres d'hostel, prier le seigneur de Loysseleinch et sa compaignie venir au soupper, et vult que Saintré y fust aussi. Et quant l'heure de soupper fut venue, lors Saintré, bien accompagné, les alla querir; et quant ilz furent venuz à la royne, en devisant avecques les dames, le maistre d'hostel vint pour les faire

soupper. Lors la royne print en sa main dextre le seigneur de Loysselench et le fist seoir, et puis dist à Saintré : « Saintré, puisqu'il est aujourd'huy l'ung des jours de voz festes, je vueil estre entre vous deux. » Et à très grans excuses, honneurs et reverences, force luy fut d'obeyr. Ma dame, qui tant estoit joieuse du grant honneur de son amy, luy dist : « Saintré, beau sire, Dieu vous accroisse voz honneurs. — Ma dame, dit il, vous voyez que c'est du monde, et que c'est du commandement de la royne, et non point que je l'aye desservy ; et se aucune chose y a esté par moy faicte, c'est par celle que Dieu me doint bien servir. » Alors la royne demanda le seigneur de Morg, pour ce que il parloit françois, et le fist seoir vis à vis du seigneur de Loysselench, affin de mieulx deviser à luy. Les autres barons, chevaliers et escuyers poullains fist elle seoir entre les aultres dames et damoiselles, qui très grans honneurs et festes leur firent. De vins et de viandes de diverses façons, ne fault point escripre, ne demander ; et quant les tables, pour abreger, furent levées, les menestriers sonnerent pour dancier. Le roy, avecques messeigneurs ses freres et aultres du sang royal, ne tarda gueres qu'ilz vindrent. Adonc après les dances et maintes chansons dictes pour le traveil et blessure du seigneur de Loys-

selench, le roy manda le vin et les espices ; et, après ce, tous prindrent congié. Lors Saintré, avecques très belle et grande compaignie, fut ledict seigneur de Loysseleuch convoier ; et au departir qu'il fist, le pria et toute sa compaignie pour le lendemain au disner. Que vous dirois je ? A ce disner furent seigneurs, dames, damoiselles, chevaliers et gens d'estat, que de si long temps ung tel disner n'avoit esté faict ; dont, pour abreger, les tables ostées, les menestriers commencerent pour dancier. Lors firent basses dances, chansons, morisques très riches, et aultres joyeusetés ; car c'estoit le jour qu'il n'estoit mie memoire que si belle et joyeuse feste eust esté faicte, ne sy bien ordonnée. Mais pour la paine que le seigneur de Loysseleuch portoit de sa main, convint la feste assez plus tost abreger ; et lors tous et toutes, l'ung de l'aultre, prindrent congié.

L'ACTEUR. — Le cinquiésme jour après, le seigneur de Loysseleuch, qui fut aucunement plus amandé, pria Saintré, et aucuns seigneurs et dames, pour le lendemain disner, à la façon de Poullaine, avecques luy. De vins, de viandes de merveilleuses façons, selon leurs coutumes, furent très grandement servis ; dont au lever des tables furent les dances et maintes chansons dictes ; et puis, après le très remply bancquet où fut faicte bonne chiere, et au

departir des tables, le seigneur de Loys-selench, portant un grand bassin d'argent où avoit mains rubys et dyamans lyez en or, tous meslez ensemble, que au long des tables n'y avoit dame ne damoiselle qui ne print le sien : et ce fait, tous prindrent congié les ungs des autres, et à Dieu pour celle nuyct.

CHAPITRE LIV

Comment le seigneur de Loys-selench print congié.

LE jour ensuyvant, le seigneur de Loys-selench et tous les aultres de sa compagnie furent prendre congié du roy, de la royne, et de tous messeigneurs les freres du roy et aultres seigneurs du sang royal et des dames, les principalles, pour eulx partir le lendemain pour faire leur voiage à Saint Jacques. Et ce soir, le roy envoya payer leur hoste de tout ce qu'ilz avoient despendu ; et au seigneur de Loys-selench, le matin, envoya une piece de veloux velouté, cramoysy, en

pourpre et très richement broché d'or sur or, vingt marcz de vaisselle d'or et deux marcz de vaisselle d'argent doré, et ung très bel coursier puillois ; à chascun des aultres quatre barons, une piece de veloux cramoy sy et ung autre bel coursier ; et à chascun des aultres chevaliers, une piece de veloux plain cramoy sy ; et aussi aux escuyers, une piece de satin cramoy sy ; à Brunswich, le herault, une de ses très riches robes et cent francz, avecques ung cheval. Et la royne, audict seigneur de Loysse lench, donna une aultre piece d'ung beau veloux velouté d'azur, broché d'or, et ung très riche affiquet d'une table de dyamant environnée de trois grosses perles et trois bons rubis ; et aultres quatre barons, à chascun une piece de satin azuré, figuré et broché d'or ; et aux aultres escuyers, à chascun sa piece de satin plain, azuré. Ma dame luy envoya un très riche dyamant de cinq cens francs. Et n'y eut celluy des freres du roy, que chascun ne leur donnast, les ungs coursiers, les aultres draps de soye brochés d'or, les aultres vaisselle dorée, et de blanche à planté. Et quant ilz virent les grans honneurs du roy, de la royne et de mesdicts seigneurs, aussi de ma dame, jaçoit ce que ilz eussent prins congié, si ilz voudrent arriere retourner, pour les très humblement remercier. Et au partement de leur hostel,

Jehan de Saintré, qui par tout les convoioit, luy presenta ung très puissant destrier, sellé et armé de toutes pieces, et de champfrain bien emplumé, et d'unes très cleres et reluysantes bardes de fin argent, bien dorées, avecques frappes de veloux veloutés, brochés et frangés d'or et de soye, à ses couleurs, qu'il faisoit très bel veoir. Et d'autre part, le seigneur de Loysselench luy presenta son bel destrier aussi couvert de drap d'or et de soye, à ses coulleurs, et fourré de martres sebelines, sur lequel il avoit faictes ses armes avecques luy, qui jà pour luy donner estoit en point. Lors chascun d'eulx monta sur son destrier, et à celle très belle compaignie, Saintré les convoya plus d'une lieue. Et à tant laisseray cy à parler de Loysselench et de sa compaignie, qui s'en vont à Saint Jacques, très grandement louant du roy, de la royne, des seigneurs, de ma dame et de toute la court de France, pour les dons et grans honneurs qu'on leur a faictz, disant partout que vrayement la court de France est la fleur de toute largesse et l'estoille de tout honneur.

L'ACTEUR. — Après le partement de ces seigneurs de Poullaine, Saintré fut bien à loysir festoyé du roy, de la royne, des dames et de toute la court. Des très douces et amyables cheres, aussy que ma dame, à loisir, luy

fist, ne fault plus escripre ne demander, car chascun le peut et doit bien penser. Et ainsi fut l'espace d'environ ung an, que ma dame s'appensa que vrayement il estoit temps qu'il renouvellast aucune chose, pour faire encore parler de luy; et que comme François aussi avant au service du roy, comme il estoit, seroit bon qu'il emprint de faire contre les Anglois aulcunes armes. Et quant ilz furent ensemble, elle luy dist : « Mon seul desir et toute ma pensée, jour et nuict je ne cesse de penser à l'accroissement de vostre honneur; si me suis appensée que à tant d'armes que vous avez faictes, ne vous estes encores point fait connoistre aux Anglois. Pour ce, vous prie qu'entendez que Dieu, nostre Dame et bonne fortune sont avecques vous: que, après le congié de monseigneur le roy, trois jours de la sepmaine de ce premier jour de may, ayant loyal sauf conduit du roy d'Angleterre, vous tenez ung pas entre Gravelines et Callais, où n'a que trois lieues et tout plain chemin, pour recepvoir à la joustes de guerre ung chevalier ou escuyer seulement, le premier qui, à l'ung des trois jours de la sepmaine, se vendra sur les rencz presenter à cheval, armé en selle de guerre pour courre contre vous, et vous contre luy, dix courses de lances, toutes d'une mesure; si vrayement que l'ung de vous deux eust

bien rompues trois lances, où fust exoiné de corps ; et celluy, à qui Dieu aura donné du meilleur, gaignera un dyamant ou ruby de cent nobles ou au dessubz. Et par ainsi que l'adventurier ait lectres de son roy ou de prince royal, à scel pendant, qu'il est gentil homme de nom et d'armes, sans reprouche ; et pour avoir juges competans, et aussi que plus voulentiers ilz y viennent, monseigneur le roy et le roy d'Angleterre, chascun pour son party, y commectra ung de ses roys d'armes, qui sont publiques personnes, l'ung François et l'autre Anglois. Et quant vostre pas sera faict, se Dieu vous gard le corps de exoine, comme je l'en requiers devotement, et il soit aucun noble homme, comme dit est, qui vous vueille requerir de faire aulcunes autres armes à cheval ou à pié, mon ami, je vueil que, à l'ayde de Dieu, de nostre Dame et de monseigneur saint Michel, à Paris, devant monseigneur le roy, ou là où il voudra, vous luy accomplissez ; affin que vostre bonne renommée florisse de bien en mieulx. » Et à ces parolles ma dame cessa.

L'ACTEUR. — Lesquelles si haultes et si nobles parolles luy pleurent moult, pour lesquelles incontinent à genoulx se mist, et, tant humblement qu'il peut et seut, l'en remercia. Et quant ilz furent l'ung de l'autre departis, nuict et jour ne cessa que secretement il eust

son bon congié du roy, qui à grant difficulté fut. Lors luy accorda, et ordonna, pour son juge, François, roy d'armes d'Anjou, de Thou-raine et du Maine; et ce jour ne cessa de querir bons destriers, de soy armer et housser de douze paremens pour les douze jours, riches, frisques et apparans. Et endementiers qu'ainsi se mectoit en point, il manda le herault des Normans, et l'envoya au roy d'Angleterre luy signifier son pas, luy supplyant qu'il ne vaulsist reffuser les treves des deux moys : c'est assavoir du quinziésme jour d'avril jusques au quinziésme de juing, par le pays de Guynes et de Boullaine, françois et anglois, et ès frontieres de Callais, affin que chascun y peust venir. Lesquelles à très grant joye consentyes des deux partyes, fut la nouvelle par tout espan-due; parquoy y furent plusieurs gens.

L'ACTEUR ENCORES. — Quant le quinziésme jour d'avril fut passé, et les treves commen-cées, lors Saintré envoya maistres de Paris pour dresser bois, et planchoyer deux maisons semblables, l'une pour luy, et l'autre pour les seigneurs anglois et ceulx de leur compaignie qui viendroient faire armes en son pas. Esquelles maisons avoit gentes salles, chambres, garde-robes, chalis, dressouers, bancs, tables, estables et aultres necessitez. Et l'une et l'autre des maisons par dedans bien tendue de tapisserie,

à demy trait d'arc loing l'une de l'autre, toutes closes de fortes hayes, et dedens estables pour trois cens chevaux. Et au bout des rens, à l'endroit de ferir, avoit faict ung bel eschafault bien tapissé, où les deux juges et heraulx devoient estre. Et quant le terme du pas s'approcha, et que Saintré eust prins congïé du roy, de la royne, de ma dame et de tous les seigneurs, à très belle compaignie de trois cens chevaux arriva à Gravellines, où il logea celle nuyct. Des dons, des confortz que ma dame luy fist, et aussi des beaulx parlers, je m'en passe, pour abreger. Et quant il veit les deux logis sy bien appareillés, fut très joyeux. Lors la nouvelle fut à Guynes et à Calais, que Saintré estoit venu, et par toutes les frontières; dont le conte de Boucaingham, qui jà estoit à Calais pour commencer les armes, sachant la venue de Saintré, fut bien content. Lors luy envoya le roy d'armes de la Jaretière, commis à juge pour leur party, et avec luy quatre heraulx pour le veoir, et soy offrir à luy, et certiffier, de par leur roi, que tous les douze qui venoient faire armes à son pas, estoient seigneurs du sang, et aultres barons denommés et ordonnés de par le roi, pour oster la volenté de tant qui y voudrent venir. Ausquels roy d'armes et heraulx, Saintré fist très grant chere, et après disner les mena

veoir leurs logis, en leur priant qu'ilz le pre-
nissent en gré. Et quant le roy d'armes fut
retourné, dist au conte tout le bien qu'il avoit
trouvé, et la grant noblesse et grant estat qu'il
avoit illecques amené, et puis du logis si bien
tappissé et orné, fors que de linge et de lictz
qui encores n'y estoient. Lors commencerent
tous à tant le louer, que à peine on ne poroit
mieulx. Et ainsi furent jusques au troyziesme
jour ensuyvant, qui fut le premier jour du
moys et ouverture du pas.

LE COMMENCEMENT DU PAS

Le dimenche premier jour du moys et ouver-
ture du pas, arriva ledit seigneur et conte de
Boucaingham, le matin après la messe, en très
grande et belle compaignie, qui fist sur le
hault pignon de son logis mettre sa banière
qui portoit d'Angleterre à une bordure d'ar-
gent, et crioit : Angleterre, Saint George.

L'ACTEUR. — Et quant l'heure fut venue de
commencer le pas, leurs deux juges, roys
d'armes de Champaigne et Jartierre, accompa-
gnés de tous leurs heraulx, furent montés sur
leur hourt, pour mieulx juger, lors commença
la jouxte, qui fut forte, fiere et très honnou-
rable pour tous deux : mais non pourtant que
ledit conte, à la derniere cource, fut aucun

peu blessé en sa main droicte. Pour avoir sa lance mieulx rompu, il gaingna le dyamant.

Le deuxiesme jour vint le conte Mareschal, qui aussi fist mettre sa bannierre sur le pignon, en très grant estat, qui portoit d'Angleterre, à trois lambeaulx d'argent, et crioit : Angleterre, Saint George. Lequel fist très honnestement ; mais pour les lances bien rompre, Saintré gaigna le dyamant.

Le troysiesme jour vint le seigneur de Gobehen, en moult bel estat, qui portoit de gueulles à ung chevron d'or, à trois lyons de sable sur le chevron, et cryoit : Saint George, Gobehen. Et fist mettre sa banniere sur le pignon ; mais de la septiesme course, luy et son destrier furent portés par terre ; dont par ainsi il paya le rubis.

Le premier jour de la seconde sepmaine, vint le seigneur Dangorde, en très bel estat, qui fist mettre sa banniere, comme les aultres, qui estoit d'ermes à chevrons de gueulles, et dessus trois besans d'or, et cryoit : Saint George, Dangorde. Lequel gaigna le dyamant.

Le deuxiesme jour de la seconde sepmaine, vint, en très bel estat, le conte de Warvich, qui ainsi fist mettre sa banniere, qui estoit de gueulles à une faisse d'or à croisettes de

mesmes, et cryoit : Saint George, Warvich.
Qui perdit le dyamant.

Le troisesme jour d'icelle sepmaine, vint en moult bel estat, le seigneur de Clisfort, qui aussi fist mettre sa banniere, qui estoit chiquetée d'or et d'azur à une bordure d'armes, et crioit : Saint George, Clisfort. Et perdit le dyamant.

Le premier jour de la troisesme sepmaine, vint le conte de Hostindon, en très bel estat, qui ainsi fist mettre sa banniere, qui estoit d'azur, semée de croisettes d'or recroisetées aux longs piés, au chief d'or, et cryoit : Saint George, Hostindon. Et perdit le ruby.

Le deuxiesme jour d'icelle sepmaine, vint, en bel estat, le conte d'Arondel, qui fist aussi mettre sa banniere, qui estoit de gueules au lyon langué et armé d'argent, et cryoit : Saint George, Arondel. Et perdit le ruby.

Le troysesme jour ensuyvant, vint, en très bel arroy, le seigneur de Beauchamp, qui ainsi fist mettre sa banniere qui estoit de gueules à une faisse d'or, et cryoit : Saint George, Beauchamp. Et perdit le dyamant.

Le premier jour de la dernière sepmaine, vint, en très bel et grant estat, le conte de Norfort, qui semblablement fist mettre sa banniere qui estoit party en pal d'or et de sinople, à ung lyon de gueules, à une fasse d'or sur le

tout, armé d'argent, et cryoit : Saint George, Norfort. Et gaigna le dyamant.

Le deuxiesme jour de la dernière sepmaine, vint, en très bel et moult grant estat, le seigneur de Brues, qui ainsi fist mectre sa banniere qui estoit de gueulles au lyon d'or à queue forchée, et cryoit : Saint George à Brues. Qui perdit le ruby.

Le troysiesme et dernier jour du pas, vint, en très grant estat, le comte de Cambruges, qui fist sa très riche banniere, qui estoit d'Angleterre à trois lambeaux couponnez d'argent et de gueulles, mectre comme les aultres, et cryoit : Angleterre, Saint George. Et gaigna le ruby.

L'ACTEUR. — De laquelle joustre entre les juges fut grant difficulté, car les lances furent si bien rompues, qu'ilz ne sçavoient du meilleur. Si furent une fois deliberés que chascun se partist sans prix ; toutesfois ilz conclurent à la fin que nul ne perdist son droit ne sa peine, et ordonnerent que, se perte y avoit, l'ung le payast à l'autre, et que le conte commençast, car Saintré avoit rompu le premier. Et par ainsy Saintré perdit trois dyamans et en gaigna huit, qui sont unze, et le douziesme perdu et gaigné.

L'ACTEUR ENCORES. — Desquelles armes et coups qui y furent faitz, je me passe, car trop

longue chose seroit à escrire, fors que tous firent très bien et mieulx les ungs que les aultres, et, Dieu mercy ! sans aucune mort et grant effusion de sang ; dont, au departir les ungs des aultres, firent tant d'honneurs et de reverences que s'ilz estoient freres ; et n'y eut celluy qui ne donnast à l'autre, oultre le pris gaigné, dons, bagues, draps d'ot et de soie, chambres de tapisserie, coursiers, hacquenées, vaisselle d'or et d'argent, et maintes aultres choses ; dont par ainsi les uns des aultres très contens se departirent. Et donna Saintré à soupper à eulx tous, après que les armes furent faictes, et au departir donna à Jartière la première housseure de son destrier, qui estoit de cramoisny chargé d'orphaverie à grans bors de martres sebelines, et deux cens frans à cheval ; et aux aultres heraulx donna leurs dicts logis, leur hourt, et cent frans aux trompettes, clarons et menestriers angloys ; donna à tous ensemble deux cens frans ; et au roy d'armes de Champagne, l'ung de ses juges, donna sa dernière housseure de son destrier, qui estoit d'ung très riche cramoisny de satin figuré en drap d'argent, tout fourré de martres sebelines, et trois cens frans ; et aux aultres heraulx et poursuyvans françois, donna son logis et deux cens frans ; aux trompettes et menestriers de sa compagnie, qui grant nombre estoient, donna

trois cens frans. Et n'y eut chevalier, escuyer, herault, ne aultre de sa compagnie, qui n'eust robe de livrée, sans les aultres dons qu'il donna à part à certains chevaliers et escuyers qui accompaigné l'avoient ; qui eut bien souffiz à ung des haulx princes de la couronne. Et ainsi, les ungs des aultres, très haultement contents de luy, se partirent.

L'ACTEUR. — Et quant Saintré fut retourné devers le roy, Dieu scet l'onneur et la haulte chiere qu'il lui fist; aussi la royne, et tous et toutes, pour abreger. Ma dame, comme dit est, ne fault point escripre ne parler, car chascun en soy le doit penser, tant à cause de l'amour que à luy avoit que pour le grant bien que chascun en disoit. Et à tant laisseray cy à parler de ces honneurs et des amours de ma dame et de Saintré, qui par ung aultre assault d'armes fut assailly.

CHAPITRE LV

*Comment messire Nicolle de Maltestes chevalier,
et Galias de Mantua escuyer, vindrent faire
arme à la court.*

LE quinziesme jour après ce que Saintré fut revenu, arriverent à Paris deux jeunes hommes nobles et vaillans des Italies, que nous disons Lombards; l'ung chevalier et l'autre escuyer, en très belle compagnie, qui venoient de faire armes devant l'empereur au seigneur de Wallambergue, qui portoit d'ermes à ung escusson de gueulles, et au seigneur d'Estaindenbourg, qui portoit à trois tourteaulx de gueulles. A cause de l'emprise que lesdictz Lombars portoitent, l'empereur voyant leur bataille si fiere et si bien combatue, à l'honneur des deux parties, commanda qu'ilz fussent prins. Et par ainsi leur partie, qui contenoit l'ung party ou l'autre estre remis, demoura sur piés et en leur emprinse premiere.

L'ACTEUR. — Et quant ilz furent arrivés à Paris et logiés à l'hostel de l'Ours, à la porte Baudoier, ung des heraulx du roy congneut

l'ung des deux, et sceut qui ilz estoient, et pourquoy ilz venoient ; incontinent le vint dire au roy, present la royne et ma dame. Lors ma dame fait querir hastivement Saintré, et au herault deffendre que à nulz plus ne public ceste nouvelle. Et quant Saintré fut à elle, elle luy dist hastivement le venue de ces Lombars, venuz en grant estat pour faire armes, luy demanda se son cueur estoit assez souffisant pour estre l'ung des deux à accomplir leurs armes. « Souffisant, dist il, hélas ! Ma dame, et qu'avez vous plus veu en moy que mon cueur vous samble estre moins souffisant que les aultres fois ? — Or sus, dist elle, pour abreger, avant que nulz aultres expedient, me semble de bien tost requerir Bouciquault, vostre frere, et avant tous, s'il voudroit estre le deuxiesme. » Et quant Saintré ouyt de ma dame ceste très plaisante nouvelle, sans faire semblant, très humblement l'en remercia ; puis à Bouciquault s'en va, et luy dist : « Frere, Dieu et nostre Dame avant, bonnes nouvelles vous apporte ; ilz sont à present descenduz en l'hostel de l'Ours, à la porte Baudoier, les deux gentilz hommes lombars, en très bel estat, portant emprinse d'armes, et sont venuz icy pour estre delivrés. Qu'en dictes vous ? les delivrerons nous ? — Delivrer, dist Bouciquault, frere, vous et voz bonnes nouvelles, soyez le

très bien venu ; mais tant comme je puis vous en requiers et prie, et pour estre les premiers, allons au roy hastivement requerir la grace, » que le roy, à grant difficulté et priere, leur voulut consentir ; mais que premier ilz sceussent qui ilz estoient et quelle emprise ilz portoient. Alors ilz manderent le roy d'armes de Guyenne, saige et souffisant herault ; pour soy informer bien du tout. Lequel rapporta qu'ilz estoient ung chevalier nommé messire Nicolle de Maltestes, moult noble et puissant baron de la marche d'Enchonne ; et l'autre estoit ung escuyer lombart, moult noble homme, nommé Galias de Mantua, qui tous deux portoient aux coudes de leurs bras senestres une grant garde de bracetlet d'or et avironnés de fines perles ; lesquelz portoient par les cours des six roiaulmes chrestiens, car des Sarrazins fier ne s'y osoient, se premier ne trouvoient deux chevaliers ou escuyers de nom et d'armes, et sans reproche, comme ilz estoient, qui à pié les eussent combatuz de haches et d'espées de corps seulement, tant que l'ung partist ou l'autre fust porté à terre, ou faict perdre leurs bastons.

De Galias de Mantua, je croy qu'il fut puis celluy, moult renommé chevalier, qui combatit à oultrance messire Jehan le Maingre, mareschal de France, devant le seigneur de Padua dernier, peu de tems avant que les Venissiens,

par durée de très long siege, l'eussent conquis, que puis en prison le firent mourir et estrangler; dont fut très grant dommaige, et fut moult plaint par toutes les Ytalies, comme le pere et l'ospital de tous les aultres desvoies.

CHAPITRE LVI

Comment Saintré et Bouciquault furent querir les deux champions, pour venir parler au roy de France, et jouterent contre eux.

L'ACTEUR. — Doncques, pour revenir à mon propos, quant Saintré et Boussiquault sceurent la très joyeuse nouvelle, comme cueurs très amoureux et vaillans, au roy s'en vont hastivement luy dire au long la nouvelle, reconfortant leur très désiré congié. Laquelle nouvelle et venue des Lombars, et le consentement du roy, fut incontinent par toute la court espandue; dont chascun de vouloir plus requerir cessa. Alors les deux freres, très bien accompagnés, par semblant de les veoir et festoyer, d'eulx mesmes sceurent franchement

leur emprinse, telle que dit est. Et quant l'heure fut venue, que le roy les vout veoir, Saintré et Boussiquault; à très belle compaignie, les allerent querir; ausquels le roy, la royne et tous les seigneurs firent très bonne chiere. Que vous dirois je? Là devant, Saintré leva l'emprinse de messire Nicolle, et Bouciquault de Gallias. Et lors le roy donna le jour. Et quant le jour fut venu, et que le roy, la royne, les seigneurs, ma dame, et que tous furent sur les hours, et eulx venuz en leurs pavillons, des honneurs et triumphes je me passe pour abreger; le roy, qui, ès aultres batailles, l'avait sommé et requis de le faire chevalier, encores à ceste le requist; mais à toutes s'excusa, disant que jamais ne le seroit, se ce n'estoit soubz la baniere des Sarrazins, ou encontre eulx. Et quant ilz furent en leurs pavillons, et qu'ilz eurent fais leurs sermens, et puis leurs pavillons boutés hors, et que le mareschal eut fait son esdit, tous quatre, qui assis estoient sur les escabelles viz à viz, alors se despartirent comme lyons deschaynés, et lors fut la bataille dure et fiere, qui dura moult longuement sans sçavoir qui eust du meilleur. Dont en combatant, Saintré encontre messire Nicolle, par meschief à Saintré sa hache luy volla à terre, et n'est point à doubter se ma dame et tout le party furent espouvantez. Lors,

comme escuyer pourveu d'advis et de hardement, sans perdre un pié de terre, incontinent tira son espée, de laquelle à deux mains se va couvrant, et à chascune haulcée de la hache que messire Nicolle faisoit, Saintré s'approchoit; tant qu'il le desmarcha de son espée, et qu'il le gecta bien loing; mais à la parfin messire Nicolle, à cause du grant advantaige qu'il avoit de sa hache, s'avança, et vint enferrer d'un coup d'estoc la pointe de sa hache en un des pertuys de la visiere à Saintré, si que un peu l'esbranla. Lors, voiant que sa pointe tenoit fort, par ardent desir de le desmarchier, habandonna cueur et corps, et avecques la force de ses bras boute Saintré qui ferme et sur sa garde se tenoit, tellement que, au demarcher, à costé du pié droit, qu'il fist, avecques le bouter de son espée tenue courte à ses deux mains, contre sa hache, le coup et desmarcher fut tout un. Lors par la grant force de bouter, messire Nicolle tomba des deux mains à terre. Alors tout à coup Saintré haulsa son pié pour le ferir au costé et le faire renverser à terre; mais, pour son honneur garder, s'en tint. Lors s'en va à l'ayde de son frere, qui jà avoit gaigné sur Gallias plus d'une grant lance de terre; et endementiers que Saintré alloit, messire Nicolle fut levé, qui encores tenoit sa hache en l'une de

ses mains, et part pour courre sus à Saintré ; mais le roy, qui là estoit, en son desmarcher le fist prendre. Alors Gallias, qui à tous deux se combattoit, estant porté par terre, très volentiers se rendit. Et lors par ainsy leur entprinse d'armes, très vaillamment des deux costez, fut mise à fin. Des honneurs, des dons et des bonnes chieres qui leur furent faictes, autant ou plus qu'à nulz autres, pour abreger, je me passe d'en parler ; fors que tant par tout ilz s'en louerent, eulx merveillans de tant d'honneurs, de tant de noblesses, de richesses, et de gens de bien qui tant estoient en celle court, que escripre ne dire ne se poroit. Et ainsi prindrent congié du roy, de la royne, et de tous les aultres seigneurs et aussi des dames, et s'en partirent, de Saintré, de Bouciquault et de plusieurs aultres très bien accompagnés. Et cy laisseray à parler d'eulx et d'aultres choses qui à la court survindrent, pour deviser d'aultres matieres.

CHAPITRE LVII

*Comment Saintré josta contre le baron de Tresto,
et furent jugiez estre pareilz.*

L'ACTEUR. — La nouvelle de ceste bataille fut en brief temps par tout sceue, et especialement à la court du roy d'Angleterre, par laquelle fut renouvellee la condition du pas de Saintré; et tellement que le baron de Tresto, ayant ouy dire que la lecture contenoit qu'après le pas tenu, s'il estoit chevalier ou escuyer de nom et d'armes, sans reproche, qui le vaulsist requerir de faire aucunes armes, à cheval ou à pié, que devant le roy de France, son souverain seigneur, ou son commis, en gardant Dieu son corps de peril et loyal exoine, il accompliroit sa requeste. Lors il s'appensa que vrayement il le requerroit de quatre poinctes à combatre, corps à corps, jusques à oultrance, ou les quatre bastons perdus. Et ainsi fust donc, pour abreger, la bataille devant le roy, la royne, les seigneurs et ma dame, très forte et fiere; et tellement qu'en combatant, Saintré perdit sa hache,

qui luy revint à ung grant bien ; mais il print sa grant espée d'armes qui, à son costé dextre, pendoit à ung crochet, et de celle se combattoit et se couvroit très vaillamment. Et, en combatant l'ung contre l'autre, fortune vout que le baron de Tresto rencontrast la hache de Saintré gisant à terre, tellement que la pointe luy entra bien avant au pié ; et lors, en reculant, pensant faire tomber la hache, Saintré le poursuyvoit très fierement ; quant le roy, pour garder l'honneur de l'ung et de l'autre, gecta sa fleiche, et furent prins, et per à per fist yssir hors des lices à cheval. Puis audict baron fist de grans donz et très bonnes chieres. Lors print congé, et s'en retourna en Angleterre. Et à tant laisseray cy à parler de toutes ces armes et des aultres que puis il fist, car très longue chose seroit à dire, et parleray du surplus.

L'ACTEUR. — Estant Saintré en la grace du roy, de la royne, des seigneurs, de ma dame et de tous les aultres, pour abreger, le plus aymé et honnoré escuyer de France, à cause de sa grant douceur et humilité, et aussi de sa largesse, qui ayde bien ; car oncques pour gloire d'armes, d'amour de roy ne d'aultres, ne d'honneur qu'il eust, ung seul semblant d'orgueil ne fut oncques en luy. Et en ce temps ne tarda guieres que la nouvelle du trespas de son pere

luy vint. Dont, par ainsy, il fut seigneur de Saintré.

CHAPITRE LVIII

Comment la dame requist à Saintré d'aller en Prusse contre les Sarrazins; et comment il luy promist d'y aller, et le fist le roy chief de cinq cens lances.

L'ACTEUR ENCORES. — Advint que celle mesme année le voyage de Prusse se tint. Alors madame luy dist : « Mon seul desir et toute ma pensée, tant est l'amour saine et entiere que j'ay en vous, pour vous faire le meilleur et le plus vaillant du monde que vrayement elle estaint de mon cueur la douteuse crainte que j'ay et doibz avoir de vous, mais pour ceste fois seulement et non plus, vous y vueil avanturer ; par armes que vous ayez faictes à la requeste de monseigneur le roy et aultres n'avez voulu estre chevalier, vous excusant que jamais ne le seriez, se ce n'estoit contre les Sarrazins, et soubz la baniere de mondict seigneur, dont vouldroye bien que luy eussiez

faict ce plaisir; dont par ainsi, voz biens en armes vous y seroient comptez. Mais d'une chose me resconforte, que nul bien fait ne fut oncques perdu; et pour ce, me suis appensée que vrayement il vous fault estre comme voz predecesseurs ont esté; et pour ce faire, il me semble que plus saintement et honorablement ne le povez estre que à ce très puissant voyage de Prusse, à celle très sainte bataille qui doit estre à l'encontre des Sarrazins; nous voulons que vous y aillez, en grant estat, à l'honneur de monseigneur qui vous aydera, et aussi ferons nous. » Quant Saintré entend ce très noble et hault vouloir de ma dame, incontinent à genoux se mist et luy dist: « Ha! ma très noble et souveraine deesse, celle qui me peut et doit plus commander, et celle à qui je vueil et doyr plus obeyr que à tout le demourant du monde, tant et si humblement que je puis, de vostre bon vouloir, conseil et commandement, à jointes mains vous remercy; auquel vostre vouloir, à l'ayde de Dieu, de nostre Dame et de la sainte vraye croix, je obeyray et accompliray de très bon cueur, esperant, en leur sainte mercy, que vous en aurez nouvelles telles que vous desirez. » Et ces parolles finées, quoyque fust du surplus, il print congié d'elle. Alors s'en va au roy, auquel, jour et nuyct, ne cessa de faire ses prieres, tant qu'il eut congié. Le

roy, qui, comme vous ay dict, plus que nul aultre, hormis les seigneurs de son sang, le aymoit, luy donna de ses finances largement ; et oultre ce, tant le vout honorer que, pour le service de Dieu et de sainte religion et foy chrestienne, à ce très saint passage de Prusse qui hastivement contre les Sarrazins se faisoit, le vault faire chief de cinq cens lances, tous nobles hommes, et trois mille hommes de traict, sans les seigneurs qui alloient à leurs despens, qui furent plus de deux cens lances avecques le traict ; et pour accompagner sa baniere, ordonna que des douze marches de son royaume en yroient cinquante ; dont la nouvelle par tout respandit, tant par son royaume que dehors, et les seigneurs et les nobles vindrent qui se presenterent ; desquels le roy, contrainct à grans prieres, en accorda tant qu'ilz furent cent et soixante banieres, desquelles il donna, comme dit est, la charge à Saintré. Et quant Saintré, qui excuser ne se peut, en eut très humblement remercyé le roy, il assembla à part tous les seigneurs, et puis en riant leur dist : « Messieurs, vous avez veu comment le roy de sa grace, pour quelconque excusation que j'aye faicte, a voulu moy tant honorer que de moy donner ceste si grant charge, qui souffiroit bien à ung des seigneurs royaux, et a faict de moy, ainsi que dit ung petit moyne, dont l'histoire

dit ainsi : Il fut jadis un seigneur, qui, tout housé et esperonné, à toute sa gent va en une abbaye pour ouyr messe, qui près de son logeis estoit. Et quant la messe fut dicte, illec furent cinq ou six des plus petits enfans de celle eglise, moyneaulx qui desboucloient ses esperons. Lors qu'il se vit de telz gens assailly par les deux piés, il demanda que c'estoit ? Ses gens, en riant, luy dirent : « La coustume de toutes celles eglises est de rachapter des novisses les esperons que l'on porte aux cueurs. » Lors leur fist bailler un escu ; puis appella le plus jeune et innocent de tous, et luy dist : « Je vueil sçavoir lequel est le plus saige de vous tous ? » Adonc l'enfant, sans plus penser, luy dist : « Monseigneur, celui que damp Abbez veult. » Laquelle responce moult fut notée. Dont par ainsi se peut dire de moy, car combien que je soye le plus simple de vous, toutes fois par celle raison il faut que je soye le plus saige, puisque le roy le veult. » De laquelle plaisant nouvelle, tous se prindrent à rire, et dirent que le roy sçavoit bien qu'il faisoit. Dont pour obeyr, et pour amour de luy qui le vouloit, tous furent lyez et contens. Et à tant laysseray cy à parler de ces choses, et diray des seigneurs, barons et banieres qui y furent, dont les blasons s'ensuyvent.

*S'ensuyvent les noms des princes et seigneurs
qui furent contre les Sarrazins en Prusse.
Et premierement ceux de la marche de l'Isle
de France.*

Le seigneur de Montmorency, qui porte d'or à une croix de gueulles, à cinq aygletes d'azur, et crye : Dieu ayde au premier chrestien. Le seigneur de Trie, qui porte d'or à une bande d'azur, et crye : Boulongne. Le seigneur de Rosny, d'or à deux faisses de gueulles, et crye : Rosny. Le seigneur de Forest, de gueulles à six merlectes d'argent. Le seigneur de Viez Pont, qui porte d'argent à dix anneaux de gueulles. Le vidame de Chartres, d'or à trois faisses de sable, à ung orle de six merlectes de mesmes, et crye : Merlo. Le seigneur de Beaumont; geronné de douze pieces d'argent et de gueulles. Le seigneur de Saint Brison, d'azur à fleurs de lis d'argent. Le Boutellier, escartellé d'or et de gueulles, et crye : Les Granges. Le seigneur de Marolles, bandé de sept pièces d'argent et de gueulles.

CEUX DE BEAULXVOYSIN, DE LADICTE MARCHÉ
DE FRANCE

Le conte de Clarmont, de gueulles à deux barres d'or endoussées, à croisettes recroisse-

tées de mesmes aux longs piés, et crye : Clarmont. Le seigneur d'Offemont, semblable à trois lambeaux d'or, et crye : Offemont. Le seigneur de Gaucourt, d'ermine à deux barres endoussées de gueules, et crye : Gaucourt. Le seigneur d'Espineuse, d'ermine à ung escusson de gueules. Et plusieurs aultres chevaliers et escuyers de ladicte marche de Beaulvoysin.

CEUX DE LA MARCHE DE CHAMPAIGNE

Monseigneur Jehan de Champagne, d'azur à une bande d'argent, à deux croisettes d'or potencées, contre potencées, à trois lambeaux de gueules, et crye : Passe avant. Le comte de Retel, de gueules à trois rateaux d'or desmanchés, et chacun de six dens de mesmes, et crye : Retel. Le conte de Brienne, d'azur au lyon d'or billecté de mesmes. Le vicomte de Rosel, barré d'or et d'azur, à deux faisses de gueules. Le seigneur de Castillon, de gueules à trois paulx de vair, au chief d'or, et crye : Castillon. Le seigneur de Conflans, d'azur au lion d'or, à billectes, à ung baston de mesmes. Le seigneur de Roussy, de Castillon à une aigle de sable sur le chief, et crye : Castillon. Le seigneur de Janville. Le seigneur de Marneil en Brie, de gueules à trois tourteaux

d'or, et crye : Marneil. Et maints aultres chevaliers et aussi escuyers d'icelle marche de Champagne.

CEULX DE LA MARCHE DE FLANDRES

Le seigneur du Gaure, qui portoit de Flandres à trois lambeaulx de gueulles, et crie : Flandres au lion. Messire Henry de Flandres, qui portoit de Flandres, au baston coupponné d'argent et de 'gueulles, et crye : Flandres au couplet. Messire Jehan du Gaure, qui portoit les pleines armes de Gaure, qui estoient de gueulles à trois lions d'argent, couronnés et armés d'or, et cryoit : Gaure. Le seigneur de Roddez, qui portoit d'azur au lyon d'or, langué de gueulles et armé d'argent, et cryoit : Roddez. Le seigneur de Ghistelle, de gueulles au chevron d'ermes, et cryoit : Ghistelle. Le seigneur de Commines, d'or à l'escusson de sable, diapré, à ung orle de roses de gueulles, et cryoit : Commines. Le seigneur de Hallung, d'argent à trois lyons de sable couronnés, langués et armés d'or, et cryoit : Hallung. Et maints aultres chevaliers et escuyers de Flandres.

CEULX DE LA MARCHE D'ACQUITAINE

Le conte de Perigort, qui portoit d'argent au fer de molin de sinople, à une bande de gueulles, et cryoit : Perigort. Le conte de Bigorre, qui portoit d'or à deux lyons passans de gueulles, couronnés d'argent, et cryoit : Bigorre. Le conte de Vantadour, qui portoit eschaquecté d'or et de gueulles, et cryoit : Vantadour. Le viconte de Caours, qui portoit de sable à trois lyons d'argent, et cryoit : Caours. Le viconte de Limoges, qui portoit d'ermes bordé de gueulles, et cryoit : Limoges. Le seigneur d'Albert, qui portoit d'argent à un lyon de gueulles, couronné d'azur, langué et armé de sable. Le viconte de Combronne. Le seigneur de Lesparre, losengé d'or et de gueulles, et cryoit : Lesparre. Le seigneur de Villars, escartellé d'or et de gueulles, et cryoit : Villars. Le seigneur de Herpadame, de gueulles à une harpe d'or, et cryoit : Herpadame. Le seigneur de Cardillac, de gueulles au lyon d'argent, à ung orle de besans de mesmes. Le seigneur de Barbesan, d'azur à la croix d'or, et cryoit : Barbesan. Le seigneur de Montmiral, qui portoit burellé d'argent et de sable, à ung lyon de gueulles, et cryoit : Montmiral. Le seigneur de la Trimoille, d'or à trois aigles d'azur, à ung

chevron de gueulles. Le seigneur de la Salle, ondoyé d'argent et de gueulles, de huyt pieces, et cryoit : Mars. Et mains aultres chevaliers et escuyers de Guyenne françois.

CEULX QUI Y FURENT DE LA DICTE MARCHE TENANT LE PARTY DES ANGLOIS, ET QUL, POUR ESTRE A CELLE TRÈS SAINCTE JOURNÉE, VOULDRENT PASSER SOUBZ LA BANIERE DU ROY, ET PREMIERS :

Le conte de Bearn, qui portoit d'or à deux vaches de gueulles, couronnées d'azur, collées et couponnées d'argent, et cryoit : Bearn. Le Captau de Bueil, d'or à une croix de sable, à cinq coquilles d'argent. Le Loup de Fouiz, qui portoit de gueulle à ung loup d'or, langué, onglé et denté d'argent. Le seigneur de Montferrant, d'or à quatre paulx de gueulles, à la bordure de sable, et cryoit : Montferrand. Le seigneur d'Auras, qui portoit à ung lyon d'azur à la bande d'argent, et cryoit : Auras. Et plusieurs aultres chevaliers et escuyers dudict party et marche d'Acquitaine.

CEULX DE LA MARCHE D'ANJOU, OU SONT THOURAINE ET LE MAYNE

Et premiers d'Anjou : le viconte de Beaumont, qui portoit de France à lyon langué et

armé de gueulles, et cryoit : Beaumont. Messire Hue de Craon, losengé d'or et de gueulles à une bordure d'argent, et cryoit : Craon. Le seigneur de Maulevrier, d'or au chief de gueulles, et cryoit : Maulevrier. Le seigneur de Mateselon, qui portoit de gueulles à six escussons d'or, et cryoit : Mateselon. Le seigneur d'Avoir, qui portoit d'argent au lyon d'azur, à trois lambeaux de mesmes, et cryoit : Avoir : Le seigneur de Chastel Fromont, qui porta la bannière, et portoit de gueulles à une croix d'or ancrée, et cryoit : Chastel Fromont. Le seigneur de Bueil, d'azur à sept crozettes d'argent, les pointes contre mont, à six croisettes d'or recroisettées aux longs piés, et cryoit : Bueil. Le seigneur de Montejehan, qui portoit d'or freté de gueulles, et cryoit : Montejehan. Le seigneur de Beauveau, d'argent à quatre lionceaux de gueulles et couronnés d'azur, langués et armés d'or, et cryoit Beauveau. Et mains aultres chevaliers et escuyers d'Anjou.

CEULX DE LA THOURAINE, DE LA DICTE MARCHE,
QUI Y FURENT

Le seigneur d'Amboise, qui portoit pallé de six piéces d'or et de gueulles, et cryoit : Amboise. Le seigneur de Mally, ondoyé d'or et de gueulles, et cryoit : Mally. Le seigneur de

Pressigny, qui portoit pallé, contre pallé, à quatre quartiers, gironné et faissé, contre faissé d'or et d'azur, à ung escusson d'argent ou meilleu, et cryoit : Pressigny. Le seigneur de Lisle Bouchart, de gueulles à deux liepars d'argent, langués et armés d'azur, et cryoit : Lisle Bouchart. Le seigneur de Montbason, qui portoit de gueulles au lyon d'or, et cryoit : Montbason. Le seigneur de Sainte More, que portoit d'argent à la faisse de gueulles, et cryoit : Sainte More. Le seigneur de Mermande, qui portoit d'or à deux fasses de sable, et cryoit : Mermande. Le dict seigneur de Saintré, qui portoit de gueulles à la bande d'or, à trois lambeaux de mesmes, et cryoit : Saintré. Et mains aultres chevaliers et escuyers de ladicte duchié de Thouraine et marche d'Anjou.

CEULX QUI Y FURENT DE LA CONTÉ DU MAINE,
ET PREMIERS

Le seigneur de Laval, qui se fist faire chevalier, qui portoit d'or à une croix de gueulles, à cinq coquilles d'azur et quatre aiglettes de mesmes sur chascun quartier, et cryoit : Laval. Le seigneur de Tucé, qui portoit de sable à quatre faisses d'argent jumelles, et cryoit : Tucé. Le seigneur de Sarcel, de sinople au

lyon d'argent. Le seigneur de Cormes, d'argent à trois faisses jumelles de sable. Le seigneur des Eschelles, qui portoit de gueulles à trois fasses d'argent. Le seigneur de la Forest, qui portoit d'argent, au chief endenté de sable. Le seigneur de Beauchamp, qui portoit à une faisse de gueulles en chief, à une orle de six merlectes de mesmes. Le seigneur de Montfort, de gueulles à deux liepars d'or, armés d'argent. Et mains aultres chevaliers et escuyers de ladite conté du Maine et marche d'Anjou.

· CEULX DE LA MARCHÉ DE PONTHEIU

Le viconte de Quesnes, qui portoit d'argent à une croix de gueulles, fretée d'or. Le seigneur de Rambures, d'or à trois faisses de gueulles. Le seigneur de Bruneu, d'argent à trois aigles de gueulles, membrées d'azur. Le seigneur de Prequigny, qui portoit fassé d'argent et d'azur, à la bordeure de gueulles, et cryoit : Prequigny. Le seigneur de Cambronne, fassé de huit pieces d'or et de gueulles. Le seigneur de Cresqui, d'or à ung crequier de gueulles, et cryoit : Cresqui. Le seigneur de Baconne, de gueulles à deux bras d'or, endousés et croisettés, recroisettés de mesmes. Le seigneur de Linieres, d'argent à la bande de

gueulles, et crye : Linieres. Et mains aultres chevaliers et escuyers d'icelle marche.

DE LA MARCHE DE VERMANDOIS

Le seigneur de Angest, qui portoit d'or à la croix de gueulles, et cryoit : Angest. Le seigneur de Jeuly, d'argent à une croix de gueulles, à cinq coquilles d'or. Le seigneur de Moy, de gueulles freté d'or, et cryoit : Cercelles. Le seigneur de Flavy, d'ermine à la croix de gueulles, à cinq coquilles d'or, et cryoit : Angest. Le seigneur de Roye, de gueulles à la bande d'argent, et cryoit : Roye. Et mains aultres chevaliers et escuyers de ladicte marche.

CEULX DE LA MARCHE DE CORBIE QUI Y FURENT

Le seigneur de Saucourt, qui portoit d'argent freté de gueulles, et cryoit : Saucourt. Le seigneur d'Herilly, qui portoit de gueulles à la bande d'or, et cryoit : Herilly. Le seigneur de Mailly, d'or à trois mailles de sinople, et cryoit : Mailly. Le seigneur de Rubenpré, d'argent à trois faisses jumelles de gueulles: et cryoit : Rubenpré. Le seigneur de Miraumont, d'argent à six tourteaux de gueulles, et cryoit : Miraumont. Le seigneur d'Aubigny, d'argent

à une fasse de gueulles, et cryoit : Aubigny. Et mains aultres chevaliers et escuyers de la dicte marche.

CEULX DE LA MARCHE DE NORMANDIE

Le seigneur de Chastel Gontier, filz au conte du Perche, qui portoit d'argent à deux chevrons de gueulles, et cryoit : Le Perche. Le seigneur d'Yvry, qui portoit d'or à trois chevrons de gueulles, et cryoit : Yvry. Le seigneur de Manny. de sable à une croix d'argent esselée, et cryoit : Manny. Le seigneur de Gravelle, qui portoit d'azur à une faisse d'argent croisetée d'or, et cryoit : Gravelle. Le seigneur de Forges, d'azur à six tourteaulx d'or, et cryoit : Forges. Le seigneur de la Haye, d'argent à trois escussons de gueulles, et cryoit : La Haye. Le seigneur de Braquemont, de sable à ung chevron d'argent. Le seigneur de Tronville, qui portoit d'argent à deux bandes de gueulles, à ung orle de cocquilles de memes. Le seigneur de Ferrieres, de gueulles à ung escusson d'ermes, à une faisse de gueulles, l'escu ourlé de fers à cheval d'or, et cryoit : Ferrieres. Le seigneur de Gamaches, d'argent au chief d'azur, à ung baston de gueulles, et cryoit : Gamaches. Et plusieurs aultres chevaliers et escuyers de Normandie.

**CEULX DES MARCHES DE BERRY, DE BOURBONNOIS
ET D'AUVERGNE**

Le conte de Sansserre, qui portoit d'azur à une bande d'argent, à deux costisses d'or potencées, à la bordure de gueulles, et crye : Passe avant. Le viconte de Villemin, qui portoit d'argent au lyon d'azur, et cryoit : A la Belle. Monseigneur Philippe de Bourbon, qui portoit d'or au lyon de gueulles, à ung orle de coquilles, et cryoit : Bourbon. Le seigneur de Chastel Morant, de gueulles à trois lyons d'argent, couronnés et armés d'or, et cryoit : Chastel Morant. Le seigneur des Barres, d'or à la croix de sinople, et cryoit : Les Barres. Le seigneur de la Tour d'Auvergne, qui portoit de France à une tour de gueulles, et cryoit : La Tour. Le seigneur de Montagu, qui portoit de gueulles à ung lyon d'ermes, et cryoit : Montagu. Monseigneur de Chalença, qui portoit de gueulles à trois testes de lyon d'or arrachées, et cryoit : Chalença. Et mains aultres chevaliers et escuyers de ladicta marche.

CEULX DE LA MARCHE DE BRETAGNE QUI Y FURENT

Le conte de Lisle, qui portoit de gueulles à la croix d'or voidée, eslessée et pommelée, et

croyoit : Lisle. Le viconte de Lesbesliere, qui portoit escartelé d'argent et de gueulles, et croyoit : Lesbesliere. Le seigneur de Chastel Briant, de gueulles semé à fleurs de lys d'or, et croyoit : Chastel Briant. Le seigneur de Raiz, qui portoit d'or à une croix de sable, et croyoit : Raiz. Le seigneur de Malestroit, de gueulles à tourteaulx d'or, et croyoit : Malestroit. Et mains aultres chevaliers et escuyers d'icelle marche.

CEUX DE LA MARGE D'ARTOYS

Messire Loys d'Artoys, qui portoit d'Artoys, c'est de gueulles à ung lyon d'or armé d'azur, et croyoit : Artoys. Le conte de Saint Pol, qui se fist chevalier, d'argent au lyon de gueulles à la queue fourchée et croisée, couronné et armé d'or. Le seigneur de Frennes, qui portoit d'argent au lyon de sable, et croyoit : Frennes. Le seigneur de Bethune, qui portoit d'argent à une fasse de gueulles, et croyoit : Bethune. Le seigneur de Renty, d'argent à trois dolloueres de gueulles, et croyoit : Renty. Le seigneur de Creseques, d'azur à trois faisses jumelles d'or, et croyoit : Bourboing. Le seigneur de Bailleul, d'azur freté d'or et de sable, et croyoit : Bailleul. Le seigneur d'Inchy, faissé de six pieces d'or et de sable, et croyoit : D'Inchy. Le sei-

gneur des Humieres, d'argent freté de sable à trois lambeaulx de gueulles. Et mains aultres chevaliers et escuyers d'icelle marche.

DE LA MARCHÉ DU DUCHIÉ ET CONTÉ DE
BOURGOIGNE

Le conte de Bourgoigne, qui, pour servir le roy, a'offrit à aller soubz sa banniere, combien qu'il ne fust point son subject, qui portoit d'azur à ung lyon d'or, et cryoit : Chastillon. Le conte d'Ausserre, qui portoit de gueulles à la bande d'or, et cryoit : Ausserre. Le seigneur de Montagu, d'azur au lyon d'argent, et cryoit : Montagu. Le seigneur de Vergy, de gueulles à trois quintes feuilles d'or, et cryoit : Vergy. Le seigneur de Saint George, de gueulles à une croix d'or. Le seigneur de Chargny, de gueulles à trois escussons d'argent, et cryoit : Chargny. Le seigneur de Chassennay, de gueulles à la faisse d'or. Le seigneur d'Auchigny, de sable à deux braz endossez d'or, à croisectes recroisectées de mesmes, et cryoit : Auchigny. Et mains aultres chevaliers et escuyers desdits pais de Bourgongne.

CEUX DE BARROYS ET DE LORRAINE QUI, POUR HONORER LA BANNIÈRE DU ROY, S'Y FIRENT MESTRE.

Le seigneur du Pont à Mousson, qui portoit de Bar à trois lambeaux d'argent, et cryoit : Le Pont. Le seigneur de Pierrefort, de Bar bordé de gueules, et cryoit : Pierrefort. Le seigneur de Duni, qui portoit d'or à la bordure d'ermes, et cryoit : Duni. Messire Jeffroy de Vaudemons, qui portoit burellé d'argent et de sable, et cryoit : Vaudemons. Le seigneur de Beffromont, voire d'or et de gueules et cryoit : Beffromont. Le seigneur d'Aprémont, de gueules à la croix d'argent, et cryoit : Aprémont. Le seigneur de Tolon, qui portoit de Vaudemons au baston de gueules. Le seigneur de Ruppes, qui portoit de Beffromont au baston d'azur. Le seigneur des Armoyses, qui portoit geronné de douze pieces d'or et d'azur. Le seigneur de Ludres, bandé de six pieces d'or et d'azur. Et mains aultres chevaliers et escuyers et gentilz hommes.

CEUX DE LORRAINE ET DE BARROYS TOUS ENSEMBLE,
ET PREMIERS

Monseigneur Nicolle de Lorraine, qui portoit de Lorraine à une bordure endentée d'azur,

et cryoit : Pregny. Le conte de Chiny, burellé d'or et de gueulles au lyon de sable, et cryoit : Chiny. Le conte de Clarmont en Bassigny, qui portoit de gueulles à un cerf d'argent. Le conte de Grant Pré, burellé d'or et de gueulles. Le seigneur de Grancy, qui portoit d'argent au chief de gueulles. Le seigneur de Brey, eschaqueté d'or et de sable. Le seigneur d'Archimont, qui portoit à la bande d'argent, à deux costisses de mesmes. Et mains aultres chevaliers et escuyers des marches d'Almaigne, que on dit les ruyers.

CEULX DU DAULPHINÉ QUI SE OFFRIRENT AU ROY,
ET Y FURENT

Le seigneur de Clermont, qui portoit de gueulles à deux cerfs d'argent en sautoirs, et cryoit : Clermont. Le seigneur de Vaubonnoys, de gueulles semé de fleurs de liz, et cryoit : Vaubonnoys. Le seigneur de Sassenayge, burellé d'argent et d'azur au lyon de gueulles couronné d'or, et cryoit : Sassenayge. Le seigneur de Maubec, qui portoit de gueulles à trois liepars d'or armez d'argent, et cryoit : Maubec. Le seigneur de Montchenu, de gueulles à la bande engreslée d'argent, et cryoit : Montchenu. Le seigneur de Chasteau Neuf, d'argent au chief de gueulles, et cryoit : Chasteau Neuf. Le sei-

gneur de Belle Combe, d'or à la bande de sable, et cryoit : Belle Combe. Le seigneur de Mollor, d'or au lyon de vair. Le seigneur de Chastel Vilain, geronné d'argent et de sable de huit pieces. Le seigneur de Grere, de vair au chief de guculles, à ung demy lyon d'or. Et mains aultres chevaliers et escuyers pour servir le roy, soubz sadicte banniere, en la bataille, où furent plus de cent soixante bannieres. Or laisseray cy à parler de ceste très puissante noblesse, des seigneurs, barons et bannieres ; et diray du très piteux et regretteux partement de Saintré, et de tous les seigneurs françoys, quant se partirent du roy et de la court.

CHAPITRE LIX

Comment, après que le terme fut venu pour aller en Prusse, le roy bailla sa baniere à Saintré, le commettant son commissaire. Puis comment ledict Saintré et les aultres seigneurs prindrent congé du roy, de la royne et des dames, qui menerent grant dueil au departir, especiallement la dame.

ET quant le terme de partir fut venu, et que Saintré et toute la compaignie furent en bon point, et eurent mandé leurs harnoyz et leurs bagaiges, par chariolz et autrement, et aussi leurs gens de traict, qui tous portoient jacquettes vermeilles où la croix blanche dessus estoit, alors Saintré et tous les nobles qui vestus estoient aussi de semblables robes comme leurs gens, qui estoient très belles choses à veoir, après la solempnelle messe ouye, que l'evesque chanta à Nostre Dame de Paris, eulx tous confessez, leur donna la benediction et la papale de paine et de coulpe absolucion; et illec present le roy, fut benoiste sa baniere et toutes les aultres. Lors

accompagnerent le roy, puis allèrent dîner. Et quant vint aux deux heures, que tous furent absoubs, allèrent au roy, qui en la grant salle estoit ; la royne, messeigneurs et dames, là tous presens, vindrent prendre congé. Et quant tous furent à genoux, le roy dist à Saintré : « Saintré, je vous baille de ce voyage la conduite, et la charge de ma bannière qui représente ma personne, aussi des seigneurs et aultres nobles qui cy sont, et seront en la compagnie. » Et puis aux aultres seigneurs dist : « Mes amys, vous tous estes nobles et de nobles maisons partiz, esquelles il a eu de très vaillans hommes assez, auxquels vous avez par voz vaillances maintes fois tombé ; ores vous allez au service de nostre vray Dieu Jesus Christ, où vous pourez acquerir le vray sauvement de voz ames ; et vous recommande à tous nostre bannière, la très sainte foy et voz honneurs. Les gens combatent, et Dieu à ses gens donne les victoires ; dont n'est point à doubter, que se vous et les aultres princes et seigneurs chretiens, et tous ceulx qui combatre doivent, que se vous estes bien avec Dieu, qu'il ne soit assez mieulx avecques vous, pour quelconque grant puissance que les Sarrazins soient, qui sera telle que le nombre ne s'en pourra extimer ; et, quant à moy, je vous jure ma foy que, se ne fussent les grans affaires que

j'ay, nous serions tous d'une compaignie. Et de ce je me cesse, mais d'une chose à tous je vous prie, du plus grant au plus petit, que soyez amys et freres, sans envyes, sans desbas et sans noyses ; car, par ce, sont maintes fois compaignies rompues et mises à deshonneur et perdicion. » Et alors prent sa baniere et la baille au baron de Chastel Fromont à porter, et puis leur dist : « Ores, mes amys, comme vostre roy et vostre chief à tous, je vous vueil donner ma benedicion. » Lors fist le signe de la croix, et dist : « Au nom du Père, nostre Dieu createur, au nom du Filz, nostre redempteur, et au nom du saint Esprit, nostre Dieu illumineur, ung vray seul Dieu en trois noms et en trois personnes, puissez vous tous aller et retourner au saulvement de voz ames et de voz honneurs ; vous priant tous, que chascun, perte ou gaingne, que soyez honnorablement, vous recordant que nul ne retourne s'il fait autrement. » Et à ces parolles, en lermoyant des yeulx, et à grant peine disant : « A Dieu, mes amys, » il toucha la main à tous. Lors ouyssiez de tous coustez cueurs tendrement souspirer, et veissiez yeulx de toutes gens plourer, qu'il n'estoit celluy ne celle qui peust ung seul mot parler. Lors vont à la royne, qui pour ses pleurs estoit avecques ses dames traicte arriere et de cousté ; adonc Saintré

plus tous, en mieulx qu'il peust, commença à parler et dist : « Notre souveraine dame, est il nulle chose qu'il vous plaise amy commander ? » Les roynes envers eulx se tourna, et, sans dire mot, à tous toucha les mains. Puis vint à mes trois seigneurs les freres, et dirent semblablement ; lors dist monseigneur d'Anjou : « Saintré, et vous autres beaux cousins et nos très bons amys, vous avez ouy ce que monseigneur le roy a dict, allez joyusement, et le faictes ; et ne pourrez que bien finir. » Puis vint à madame ; de celle ne fault point à parler, car combien qu'elle efferçoit sa nature et la très grievve passion qu'elle avoit en regardant Saintré, que à bien peu s'en fallit qu'elle ne se pasma, et fust à l'envers tombée, se elle ne se feust bien tost levée. Puis s'en vont aux autres dames et damoyelles, qui toutes ensemble tel dueil faisoient plus que se tous leurs parens et amys fussent mors, disant entre elles : « Hélas ! dolentes, jamais ensemble telle et si joyeuse compaignie ne verrons. Les officiers de la court tous plouroient, en regrettant Saintré, l'ung à l'autre disans : « Hélas ! or s'en va celui qui en noz adversitez nous confortoit, et qui en noz affaires nous conseilloit, et qui en noz nécessités nous secouroit ; et si ne sçavons se jamais le verrons. » Lors de tous coustés le prenoient, faisans prieres et veuz en leurs cueurs, que à

très grant peine le peurent laisser. Et ainsi s'en vont tous pour ce jour reposer.

L'ACTEUR. — Et quant lendemain fut venu, au matin les trompettes, pour mectre selles, commencerent à sonner. Lors trestous vont au moustier, et quant les messes furent dictes, chascun monta à cheval, et commencerent à partir; là furent mes trois seigneurs d'Anjou, de Berry, de Bourgoigne et tous leurs gens, qui, pour honorer la banniere du roy, hors de Paris les voudrent accompagner; et des autres chevaliers et escuyers, bourgeois et marchands de la ville, tant que à peine y en demoura ung seul.

LE PARTEMENT DES BANNIERES

Premierement partirent les poursuyvans à cheval, portant coctes d'armes vestues, le devant et le derriere sur les bras, deux à deux.

Après eulx, venoient les heraulx, portans les coctes d'armes de leurs seigneurs vestues à l'endroit deux à deux.

Après venoient les trompettes grant nombre, deux à deux.

Après venoient les roys d'armes des marches, portant les coctes d'armes du roy vestues à l'endroit, deux à deux.

Après venoit Montjoye, le roy d'armes des François, la cocte d'armes royalle vestue, tout seul.

Après venoit le seigneur de Chastel Fromont, qui portoit la banniere du roy, entre messeigneurs d'Anjou et de Berry.

Après venoit monseigneur de Bourgoigne à dextre main, et Saintré à senestre.

Après Saintré, venoient les trois premieres banieres, et plus anciennement levées par l'ordonnance du roy, aux relations des plus anciens livres des Montjoyes, roys d'armes des François, qui anciennement en souloient avoir la connoissance par les visitacions des marches du royaume, accompaignez des aultres roys d'armes des susdictes marches, pour garder les honneurs où il appartenoit, et eschever les dames et seigneurs d'envies et de noyses. Et après lesdictes trois banieres, venoient les trois seigneurs à qui elles estoient ; et ainsi de trois en trois, sans nulle desordonnance, ilz allerent par Paris. Lequel partement et ordonnance fut à tous une très somptueuse chose, tant fut belle à veoir ; du tout ce jour, à cause de ce partement, n'y eut homme qui ouvrast neant plus que le jour de Pasques. Mais, quant ainsi ilz alloient par la ville, maintes dames et damoyelles, bourgeois, bourgeoyses et gens de tous mestiers, estoient sur les estaulx et par

leurs fenestres, pour veoir celle très belle et très noble compaignie passer. Lors veissiez de regret et de pitié tous souspirer, plaindre et plorer, et n'y avoit celluy ne celle qui tenir se peust à mains jointes et haulte voix crier : « Ah ! gentil escuyer Saintré, Dieu te doint grace, et à ta compaignie, à très grant joye et honneur retourner ! » Et, en ce, promectant à Dieu messes, pellerinages, veux et aulmosnes. Et quant ilz furent aucun peu esloignez de Paris, ilz prierent à messeigneurs de retourner, et illecques d'eulx et des aultres ilz prindrent congié. Et à tant de leur congié et de leurs regrets laisseray cy à parler, et des grants regrets que le roy et la royne, messeigneurs, dames et damoyelles, et chascun fait d'eulx, et principalement ma dame, qui oncques puis ne cessa de faire veux, faire aulmosnes, faire dire messes, et à part de plaindre et plorer ; et diray de Saintré et de sa compaignie, qui sont tous à très grant joye en Prusse et en la ville de Torrin arrivez.

L'ACTEUR. — Saintré, atout sa compaignie de gens d'armes et de trait, par leurs journées errerent tant qu'ilz sont venuz en Prusse, et arrivez en ladicte ville de Torrin, où l'assemblée se faisoit. Et là trouverent les prelatz, princes et seigneurs qui s'ensuyvent, dont la plus grant partie furent au devant, pour hon-

nourer la banniere du roy, qui très joyeux furent, quant ilz virent tant de noblesse, de bannieres et de gens si bien en point que, pour cinq ou six mille bons combatans, on ne pourroit mieulx.

L'ACTEUR. — Au regard du roy d'Angleterre, pour les affaires qu'il avoit emprins, n'y voulut aller ne envoyer, mais à bien grant peine donna aux seigneurs, qui sont cy après nommez, congé de y aller, et lesquels y furent. C'est à savoir :

Au conte de La Marche, qui portoit d'azur à trois faisses d'or, à l'écusson d'argent sur le chief, et cryoit : La Marche.

Au conte de Northestonne, qui portoit d'azur à une bande d'argent, à trois molectes de gueulles sur la bande, et cryoit : Northestonne.

Au conte de Suffolc, qui portoit de sable à la croix d'or, et cryoit : Suffolc.

Au seigneur de Gobeheur, qui portoit de gueulles au chevron d'or, à trois lyons de sable et cryoit : Haston.

Au seigneur de Clifort, qui portoit eschacqueté d'or et d'azur, à la bande d'ermine, et cryoit : Clifort.

Au seigneur de Lisle, qui portoit d'or à deux chevrons de sable, et cryoit : Lisle.

Au seigneur des Moulins, qui portoit de

sable au chief d'argent, à trois losenges de gueulles sur le chief, et cryoit : Moulins.

Au seigneur de Rocqueby, qui portoit d'argent au chevron de sable, et cryoit : Rocqueby.

Lesqueulx huit seigneurs allerent ensemble, accompagnez de cent lances et de trois cens archers.

Et pour oster et affoiblir la très grant puissance et assemblée des Sarrazins, les quatre roys d'Espagne, c'est à sçavoir : de Castille, d'Aragon, de Portingal et de Navarre, s'estoient aliez pour guerroyer, par mer et par terre, les roys de Grenade, de Maroch et de Bellemarine, Sarrazins les plus prochains ; mais jà pourtant ne demoura que leur assemblée ne fust si grande que merveilleuse chose estoit, ainsi que cy après s'ensuyt :

LES PRELATZ, PRINCES ET LES AULTRES SEIGNEURS
QUI LA FURENT ET PREMIEREMENT

Le duc de Brunswich pour l'empereur qui pour sa maladie n'y peult estre, et avoit la charge de sa banniere, qui estoit d'or à ung aigle de sable, à deux testes couronnées d'or, et membré de sable ; et de tous les princes et seigneurs commandés pour l'accompagner, c'est à sçavoir : le duc d'Osterich, le duc de Baviere,

le duc de Brabant, le duc de Statin, le duc de Lenbourg, le duc de Luxanbourg, le duc de Mons, le marquis de Maisse, le marquis de Brandebourg, le conte de Haynau, le conte d'Estambourg, le conte de Lemont, le conte de Nasso, le conte de Espehem, le conte de Montgellin, le conte de Vrackenberghes, le conte de Sone, le conte de Berembourg, le conte de Maigne, le conte de Vindo, le conte de Nivert, le conte de Vallestein, le conte de Guerlles, le conte de Hollandes, le conte de Zellandes, le conte de Sene, le conte de Oste, le conte de Cille, le conte de Puilly, le conte d'Aussebourg, le conte de Lost, le conte marquis de Blencquebourg, le conte de Lindo, le conte de Witembourg, le conte de Saulne, le conte de Viermenbourg, le conte de Limoges, le conte de Salebrune, le conte de Richecourt, le conte de Wardance, le seigneur d'Anghien, le seigneur d'Aurech, le seigneur d'Entourg, le seigneur de Lingue, le seigneur de Fontaines, le seigneur de Boussut, le seigneur de Barbenson, le seigneur de Lehamede, le seigneur de Lalain, le seigneur de Coudde, le seigneur de Marquettes, le seigneur de Quesnoy, le seigneur de Saint Wast, le seigneur de Fontenay, le seigneur de Jumont, le seigneur de Trasigues, le seigneur de Hornes, le seigneur de Roberssart, le seigneur d'Oysy, le seigneur

de Clermont, le seigneur de Crepy, le seigneur de Meries, tous hannoyers qui y furent.

LES ASSÉBÉNOYS DE LA CONTE D'ALOST QUI Y
FURENT

Le seigneur d'Argemont, le seigneur de Moirraumes, le seigneur Descouvenost, le seigneur Deslemalle, le seigneur du Serf, le seigneur de Gaulles, le seigneur de Semalle, messire Robert de Namur, le seigneur de Rochefort, le seigneur de Chaudemont, le seigneur de Gentel, le seigneur de Don, le seigneur de Haepam, le seigneur de Baressies, le seigneur de Rummès, le seigneur de Landry, le seigneur de Duras, le seigneur de Bangines, le seigneur de Montgardin, le seigneur de Salles, le conte de Namur, le seigneur de Opel, messire Anthoine de Namur, le seigneur Huffalaise, le seigneur de Wassebech, le seigneur de Ville, le seigneur de Sulx ; tous ruyers assebenoix.

LES RUYERS DES DUGHIEZ DE LEMBOURG, DE
LUXEMBOURG ET DE BLANCQUEBOURG, QUI Y
FURENT.

Le conte des Mons, le seigneur de Fauquemont, le seigneur de Lesselle, le seigneur de

LES SEIGNEURS DE BAVIERE

Haulsedenge, le seigneur de Rameberg, le seigneur de Collebellans, le seigneur de Winbourg, le seigneur d'Estelles, le seigneur de Rodemarch, le seigneur de Trumenge, le seigneur de Humbeghe, le seigneur de Lempast, le seigneur de Blasemarre, le seigneur de Riche Espée, le seigneur de Zarmalle.

LES ALEMANS DE BAVIERE QUI Y FURENT

Le seigneur de Sesmalhe, le seigneur de Naudes, le seigneur de Houdines, le seigneur d'Estenbourg, le seigneur de Rodon, le seigneur de Boncourt, le seigneur de Palengest, le seigneur de Lesigny, le seigneur de Walemberghe, le seigneur de Hellens, le seigneur de Maudresset.

LES RUYERS ALEMANS DE BRABANT

Le seigneur de Malines, le seigneur de Wasemale, le seigneur de Waselar, le seigneur de Brauch, le seigneur de Warbays, le seigneur de Hulhe, le seigneur de Pirressein, le seigneur de Bellare, le seigneur de Her, le seigneur de Briqueval, le seigneur de Grauberghe, le seigneur de Roselar, le seigneur de Rolye, le seigneur de Souberf, le seigneur

d'Hornes, le seigneur de Walein, le seigneur de Gousseberghe, le seigneur de Diestre, le seigneur de Durs, le seigneur de Houdeberghe, le seigneur de Handeberghe, le seigneur de Grietz, le seigneur d'Anvers, le seigneur du Roy, le seigneur de Braindres.

LES RUYERS HOLLANDOIS ET ZELLANDOIS
QUI Y FURENT

Le marquis de Julles, le seigneur de Bredderode, le seigneur de Waltrelie, le seigneur de Houdrués, le seigneur de Pullane, le seigneur de Harbar, le seigneur de Lisestain, le seigneur de Raderoude, le seigneur de Trannebor, le seigneur de la Leque, le seigneur de Castendrich, le seigneur de Hamestede, le seigneur Dierbie, le seigneur de Hornes, le seigneur de Licque, le seigneur d'Argemonde, le seigneur d'Abecot, le seigneur de Lavore, le seigneur de Wuoste, le seigneur de Bandebourg, le seigneur de Houdeberghe, le seigneur de Thomas; tous venuz très bien en point ou service de Dieu et au mandement de l'empereur, qui furent trente mille chevaux, et de gens de traict douze mille, et aultres vingt mille combatans à pié.

LES PRELATS DES ALLMAGNES QUI Y FURENT

L'archevesque de Coulongne, à trois mille chevaux, deux mille hommes de traict, et trois mille combatans à pié.

L'archevesque de Treves, à trois mille chevaux, deux mille hommes de traict, et cinq mille combatans à pié.

L'evesque de Mayance, à deux mille chevaux, mille hommes de traict, et quinze cens combatans à pié.

L'evesque de Passo, à deux mille chevaux, mille hommes de traict, et quinze cens combatans à pié.

L'evesque de Liege, deux mille chevaux, mille hommes de traict, et quinze cens combatans à pié.

Le maistre de Prusse et tout l'ospital, quatre mille chevaux, deux mille hommes de traict, et cinq mille combatans à pié.

Et y furent le dispost de Romenie, pour son frere l'empereur de Constantinople, avecques sa baniere, accompagné de trois mille chevaux et quatre mille hommes à pié.

Le conte de Sil, pour l'empereur de Trape-sonde, avecques sa banniere, accompagné de deux mille chevaux et deux mille hommes à pié.

Le duc de Lestot, pour l'empereur de Boulguerie, avecques sa banniere, accompaigné de mille cinq cens chevaux et deux mille hommes à pié; tous trois venuz ensemble.

Et si y fut le roy de Behaigne en personne, qui portoit de gueulles à ung lyon d'argent, la queue nouée, fourchée et croisée, couronné et armé d'or; et en sa compaignie, le duc de Sazoungue, le marquis de Blandebourg, le conte Palatin, le conte de Grave, le conte de Marque, le conte de Wautebourg, le seigneur de Usembourg, le seigneur d'Estremembourg, le seigneur de Plomineau, le seigneur de Doury, le seigneur de Brunech, le seigneur de Flamenqueton, le seigneur de Bousseielt, le seigneur de Misque, le seigneur de Stone, le seigneur de Wertemberghe, et plusieurs autres chevaliers et escuyers ou nombre de dix mille chevaux, six mille hommes de traict, et huit mille hommes combatans à pié.

Et si y fut le duc de Lectonem, pour le roy de Poullaine, qui portoit de guéulles au cheval d'argent, chevalché d'un hom armé, tenant une espée d'argent ou poing, croisée et pommée d'or; et avecques luy le duc de Crasponne, le duc d'Orighe, le duc de Surduich, le marquis de Nasse, le conte de Velendech, le conte de Surtainberghe, le conte de Craine, le seigneur de Loysselench, le seigneur de Cliselich,

le seigneur d'Andach, le seigneur de Briquebourg, le seigneur de Lisemberge, le seigneur de Nulz, le seigneur d'Enterg, le seigneur de Salleberg, le seigneur de Don, le seigneur de Morg, le seigneur de Pargehe, le seigneur de Sauserg, le seigneur de Sablong, le seigneur de Vuarsnich, le seigneur Dunasmes, le seigneur de Ploin ; et plusieurs aultres chevaliers et escuyers, ou nombre de unze mille chevaulx, huit mille hommes de traict, et dix mille combatans à pié.

L'ACTEUR. — Et si fut le seigneur de Migrane, avecques la baniere du roy de Honguerie, qui estoit faissé de huyt pieces de gueulles et d'argent, avecques grant compaignie de ducs, de princes, de marquis, de contes, de vicontes, de barons, de cinq banieres, de bacheliers, et d'aultres chevaliers et escuyers, desquelz pour abreger je me passe, jusques au nombre de douze mille combatans à cheval, et deux mille combatans à pié. En laquelle assemblée furent de cent à six vingt mille combatans à cheval, où estoient de trente à quarante mille chevaliers et escuyers bien en point ; et de gens de traict et aultres, de cent à quarante ou cinquante mille bons combatans.

CHAPITRE LX

Comment les Sarraxins estoient en grant nombre de Turcx et infidelles, plus qu'on n'avoit veu depuis le temps de Mahomet.

L'ACTEUR. — De la partie des Sarraxins estoit la plus grande armée que depuis la loy de Mahomet ilz eussent faicte : car tous le souldans, les roys, les seigneurs des trois regions y estoient, c'est assavoir : d'Asie la Majour, où sont six provinces, c'est assavoir : Judie, Persie, Sirie, Égypte, Surie et Asie. Ceste partie de Judie est enclouse de la mer qui est devers le midy, que aucunz dient la mer Noire, et aultres l'appellent la mer batue, pour le grant desbatement en quoy elle est jour et nuyt, à cause de sept mille cinq cens quarante et huyt isles qui y sont, desquelles en y a une bien grande, où sont dix cités; la principale s'appelle Gelbona, et en ceste cité a grant quantité d'or et de pierreries precieuses, et y multiplient plus les olifans que en aultre partie du monde; laquelle fut jadis convertie par saint

Thomas, l'apostre, jaçoit ce que la plus grant partie du pays soient mescreans.

Et ceulx de la seconde region des Sarrazins qui y furent, estoient de Perse, c'est de Turquie qui a de diverses provinces, c'est assavoir : Auffricque, Medie, Persie, Mesopotamie, où est la grant cité de Ninive qui a trois journées de long, et ores est dicte Babilonne; et illec est le commencement de la merveilleuse tour de Babel, qui a quatre mille pas de large; et illec sont les provinces de Caldée, d'Arrabie, de Sabba et de Tarsie. Et en ceste, est le mont de Sinay, où les anges porterent le corps de ma dame sainte Katherine, qui ores gist en l'eglise sainte Marie de Ruer, assez près dudit mont.

L'ACTEUR. — Ceulx de la tierce region qui y furent, estoient de la region de Surie, en laquelle sont les provinces de Damas, d'Antioche, et la terre de Finicie; dont furent Thir et Sidon, et là est le mont de Liban, dont sault le fleuve de Jourdain; et là sont les cités de Palestine, de Judée, de Hierusalem, de Samarie, de Gabeste, de Gallilée et de Nazareth, et en ceste terre furent les deux cités de Sodome et de Gomorre, qui par leur très abhominable pechié fondirent en abisme. Et de ces trois regions à celle grant bataille furent tant de roys, de seigneurs et de peuple, que toute

la terre en estoit couverte, cuydans conquerir le surplus, ainsi que j'ay dit. Desquelz seigneurs sarrazins j'en nommeray aucuns cy après.

L'ACTEUR. — Et quant le jour prefix de la bataille fut venu ; et que tous les seigneurs chrestiens furent sur les champs, ouye leur haulte et solempnelle messe bien matin, que l'archevesque de Couloigne dist, et tous estans en estat de grace, comme il appartenoit à tous bons chrestiens, et après l'absolucion donnée par le cardinal d'Ostie qui legat du pape estoit, et les ungs aux aultres requerans pardon ; lors, qui se vult desjeuner, desjeuna. Puis tous monterent à cheval, chascun en ses batailles ordonnées. Saintré monte sur son destrier, et s'en va au roy de Behaigne ; lors devant luy tira son espée, et de par Dieu, et nostre Dame et monseigneur saint Denys, luy requist l'ordre de chevalerie. Le bon roy, qui ayroit ledit Jehan et tous les François, à très grant joye l'acollée et ordre luy donna, priant à Dieu qu'il luy donnast honneur et joye, telle qu'il desiroit ; et dès lors par tout fut appelé le seigneur de Saintré. Lors, qui vult estre chevalier, s'avança ; là furent maintes banieres levées, et coupées les queues de maints penons. Et quant tout ce fut fait, et retournez en leurs lieux, lors, chascun faisant le signe de la croix, commencerent à chevalcher.

L'ORDONNANCE DES BATAILLES

Dieu avant et nostre Dame, fut ordonné que la banniere de France, celle de l'ordre de Prusse, celles des cinq prelatz, avecques celles de certains ducs, contes, princes et barons allemands, avecques celles des Anglois, jusques au nombre de treize mille chevaulx, où estoient quatre mille chevaliers et escuyers esleus, feroient l'avant garde qui estoit d'argent à une croix de sable.

Le roy de Behaingue et sa compagnie, qui estoit dix mille chevaulx, feroient une des esles à dextre cousté.

Le duc de Lectonem, avecques la baniere du roy de Poullaine, dont il avoit la charge, et sa compagnie qui estoient unze mille chevaulx, feroient l'autre esle au senestre cousté.

La baniere de nostre Dame, que portait messire Gadiffer de la Salle, qui une aultre fois l'avoit portée, et celles des quatre empereurs, c'est assavoir : d'Almaigne, de Constantinople, de Trapesonde et de Boulguerie, avecques celles des aultres ducs, princes, barons et nobles hommes, qui estoient à cheval de vingt cinq à trente mille bons combatans, feroient la grant bataille ; et que le duc de Migrane qui avoit la charge de la baniere du roy de

Honguerie, et sa chevalerie qui estoient douze mille chevaulx, feroient l'arriere garde ; et des soixante mille hommes à pié seroient faictes deux batailles, parties de moytié, l'une à dextre et l'autre à senestre, tout per à per, aucun peu devant ; et aux deux letz de l'avant garde, poursuyvroient une enseigne sans passer homme devant ; et ceulx qui n'estoient point de traict, porteroient chascun ung grant pavays qui se appuyroient, tous pains à grans croix blanches, et ceulx s'arresteroient quant l'enseigne s'arrestroit, pour couvrir les gens de traict. Et quant tous furent ainsi ordonnez, et que tous furent dejeunez, et tous très liement reconfortez par leurs conducteurs et princes, en telle maniere que oncques gens ne furent mieulx asseurez, à celle belle ordonnance par le grant plain de Bellehoch, pas à pas, chevalcherent. Si ne tarda gueres qu'ilz virent leurs chevaulcheurs revenir, qui leur apporterent la très joyeuse nouvelle de leurs ennemys ; et quant ilz en furent à une lieue près, lors s'arrestèrent, pour les gens à pié, et manderent chevaucheurs pour les garder, qu'ilz dirent qu'ilz n'avoient que trois batailles près à près, et sans nulles esles, où avoit du menu peuple assez.

L'ORDONNANCE ET FAÇON DES BATAILLES AUX
SARRAZINS

Les Sarrazins avoient fait six batailles, c'est assavoir : trois à cheval et trois à pié ; lesquelles à pié devoient suyr et ferir tantost en après, pour tuer tous ceulx qu'ilz abatroient, et tailler jambes et piés des Chrestiens et de leurs chevaulx ; dont à la premiere voullut estre Abazin, le grand Turcq de Perse, qui pour lors estoit, et qui en sa baniere portoit de gueulles à une grande espée turquoyse d'argent, et bande amanchée d'azur, croisée et pommellée d'or, qui, pour le grant orgueil de sa puissance, qui estoit bien accompagné de trente à quarante mille chevaulx et plus de cent mille hommes à pié, ne prisoit riens les Chrestiens.

Et en la seconde bataille venoit Zizach, qui se disoit empereur de Cartaige, et qui en sa baniere portoit de sable aux deux testes de chevaulx d'or, endossées ; et Alemoch, Soubdam de Babillonne, qui en sa banniere portoit tout d'or, sans plus ; et Arachul, Soubdam de Mabaloth, accompagné de soixante mille chevaulx ; et après eulx, cent et soixante mille hommes à pié.

Et à la tierce bataille furent les roys de la grant Hermenie, de Sep, de Allapie, et Baz-

gazul, seigneur de Valaquie, qui avoient soixante mille chevaulx, et de trois à quatre cens mille hommes à pié, d'Hermenie, de Barbarie, de Russie, de Samare et de Tartarie, que toute la terre couverte en estoit.

CHAPITRE LXI

Comment en la bataille des Sarraxins Saintré tua le Turcq de prime face, et faisoit si bien son debvoir, que tous les ennemis luy faisoient place. Et puis comment l'empereur de Cartaigne, les deux Soudans de Babillonne et Mabaloth, le grand Turcq, furent mis à mort, et aultres plusieurs tant d'ung party que d'aultre.

CY COMMENCE LA BATAILLE

ET quant les ungs des aultres furent approchés, ainsi comme le trait d'ung arc, le Turcq fist sa bataille arrester, pour veoir l'ordonnance des Chrestiens, et pour tenir eulx tous et leurs chevaulx en alaine; mais quant il vit

que l'avant garde ne bougeoit ou mouvoit, et que le grant traict des canons et coulevrines, des arcs et arbalestres des deux esles, grandement les dommageoient, lors se pensa de rompre son repos, et manda faire deux pars de ses gens à pié, qui derriere luy estoient, et que chascune part courust sus aux batailles des gens de traict; mais quant ilz se sentirent et furent du traict si merveilleusement touches, n'y eut celluy qui osast approcher, et qui ne recullast. Alors le Turcq, comme desesperé, fist avancer ses bannieres, et tant que chevaux peurent aller, les ungs parmy les aultres, eulx escriant, viennent vers l'avant garde; lors les nobles François cryerent à haulte voix : « Jhesus, nostre Dame, Montjoye, saint Denys! » La banniere du roy et toutes les aultres là furent, et tant que destriers peurent aller, les ungs parmy les aultres s'entrefierent, tellement que le seigneur de Saintré, qui, sur son très puissant destrier, armé estoit, tous deux très richement housés d'orfaverie esmaillée de ses armes, et sur son bacinet une très riche houppe, par sus tous moult apparant, comme à Dieu pleut, actaint de sa lance le Turcq par l'estroict de sa visiere, si que il luy mist tout le fer dedans; et, à l'empraindre que il fist, le renversa tout mort à terre. Lors commença la bataille très dure et forte, car gueres d'eulx

encores ne sçavoient la mort' de leur seigneur ; lors veissiez gens et chevaux cheoir et tresbuscher les ungs sur les aultres, et de toutes pars cryer, que c'estoit merueilleuse chose. Mais quant le seigneur de Saintré se vit desgarny de sa lance, incontinent met la main à l'espée, et fiert à dextre et à senestre, qu'il n'y avoit Turcq qui place ne luy fist ; et quant il volt joindre à la banniere, lors fut de toutes pars assailly, que, se ne fut l'ayde de Dieu, et qu'il fut bien tost secouru, sans nul remede il estoit mort ; mais la banniere du roy, qui par tout le suyvoit, à l'ayde des bons et vaillans François et des aultres qui la conduysoient et faisoient de merveilleuses armes, donnerent de fors affaires aux ennemys. Et de les nommer seroit trop longue chose, et de declairer leurs proesses ; et aussi qui ne feroit declaracion des armes des ungs comme des aultres, en pourroit estre en malle grace ; pourquoy, je prie à tous que à tant leur vueille seuffire, et soye tenu pour excusé ; mais du seigneur de Saintré, duquel l'histoire parle par exprès, me convient plus avant proceder. Quand le seigneur de Saintré fut ainsi delivré, alors brocha son destrier des esperons, et vint au Turcq qui tenoit la banniere, et luy donna si grant coup sur le bras de son espée, si qu'il en fist la banniere cheoir à terre ; les aultres Turcs qui actendoient, en

combatant, leurs secours, se deffendoient comme les plus vaillans d'eulx tous. Et endementiers que ceste si fiere bataille se faisoit, les deux Souldans s'approcherent ; mais quant ilz virent la banniere du grant Turc à terre, se arrestèrent pour prendre conseil quel party ilz prendroient, et quelle chose ils feroient. Les Turcs, qui ne se peurent plus porter, ne la charge soustenir, tant à cheval comme à pié, se rompirent. Alors, tant que chevaux peurent aller, les deux Souldans à grant haste envoyerent faire haster la tierce bataille pour les venir secourir ; et à ce coup fut heur que pour conforter, ayder et secourir l'avant garde de nos gens qui lassez et travaillez estoient, le roy de Behaigne et sa bataille qui faisoit une des esles, et le duc de Lectonem qui faisoit l'autre esle d'autre part, les vindrent tellement hurter, que tous passerent jusques aux bannieres, dont l'une fut portée et gectée par terre ; et quant leur bataille de pié, qui après eulx venoit, apperceut la banniere de leur seigneur à terre, n'y eut celluy qui osast passer plus avant. Et quant la troysiesme bataille, que conduysoient les roys de la grant Armenie, de Sep, de Maroch et de Allapie, et le seigneur de Vallaquie, virent les aultres deux batailles desconfites, et que encores n'avoient assemblé à la grant bataille l'arriere garde, ne les deux

esles des gens de pié, furent tous esbahis ; toutesfois pour ce que venus estoient pour combattre, et estoient de gens à cheval et à pié si très puissans, conclurent que le plus tost qu'ilz pourroient fussent assemblez. Et quant la grant bataille des Chrestiens virent la derniere bataille des Turcs approcher, lors les princes qui la gouvernoient, et qui n'avoient encores veu qu'il leur fust, ou eust esté besoing d'assembler, manderent à l'arriere garde que quant ilz les verroient assemblez, que hastivement s'approchassent pour ferir du cousté ; car, en ce grant plain, n'avoient boys ne vallées où gens se peussent embuscher ; laquelle chose et ordonnance fut bien tenue, et sur ces parolles furent tous assemblez. Là fut la très fiere, cruelle et mortelle bataille qui eust fait du mal assez ; mais l'arriere garde, au cry de nostre Dame et du roy de Honguerie, c'est assavoir Lancelot, tant qu'ilz peurent courre les lances couchées sur les arrests, frapperent au travers ; et les deux esles du traict ferirent sur eulx d'autre part. Et incontinent qu'ilz sentirent le traict, se rompirent et mirent en fuyte ; alors fut la mortalité si grande, sans plus de deffence, comme se fust de brebis. Mais la bataille des gens à cheval dura très longuement, et eust eu assez plus de durée pour le grant nombre qu'ilz estoient, se l'arriere garde ne se fust

avencés, qui fut cause de leur desconfiture plus briefve; et à ce coup furent leurs banderolles portées par terre et desconfites, et le surplus de ceulx qui s'en peurent eschapper par la grace de Dieu, mis à la fuytte. Là fut d'eulx l'occision si grande que, paravant ne eueques puis la bataille de Pharsale, où Pompée fut desconfit, ne fut faicte la semblable. Et là furent morts l'empereur de Cartage, les deux Souldans de Babilonne et de Mabaloch, le grant Turcq Bazul, le seigneur de Valachie, les roys de Maroch et de Alapie prins, et tant d'autres grans seigneurs prins et morts, que, pour abreger, je n'en passe; dont dura la bataille plus de six heures, et pour la nuyct qui survint, fut besoing à noz gens de retraire, et d'eulx loger sur les marays d'ung estang et à l'entrée d'un boys; et là se raffrechirent et reposerent eulx et leurs chevaulx, qui moult laz et travaillez estoient, et medecinerent les personnes et chevaulx blessez, jusques au lendemain bien matin qu'on alla visiter et recongnoistre les trespassez. Et quant furent sur la place, trouverent entre les morz maints Sarrazins, navrez et feruz, qui tendoient les mains pour eulx rendre, mais tous furent mis et rendus à mort. Et lors tirerent tous les Chrestiens qui furent cogneus aux croix qu'ilz portoient de diverses couleurs; et

ceux qui n'estoient morz, furent prins et menés en l'ost, et puis es bonnes villes pour les guerir; et les morz à très grans honneurs et solempnels services de Dieu furent enterrez; et, par sur tous, les François furent exemple des aultres, car tous se vestirent de noir, et par celle amour qu'ilz monstrent porter l'ung à l'autre, furent de tous très grandement louez.

CHAPITRE LXII

Comment les nouvelles coururent par tout, spécialement en France, que le petit Saintré avoit faict merveilles; spécialement entre les autres choses, avoit tué le grand Turcq et abatu sa banniere: dont le roy fut grandement joyeux, et en remercyâ Dieu et les saincts en grant sollempnité.

L'ACTEUR. — De laquelle très sainte victoire les nouvelles allerent par tout, ainsi que fist de Perseus pour Pegasus, le cheval volant; de laquelle chascun escript en ses marches, et comment avoit esté, dont entre les

vaillances que chacun avoit faictes, celles d'unq jeune et nouvel chevalier de France, que on nommoit le seigneur de Saintré, furent par tout portées et dictes ; et comment à l'assembler des premieres batailles, du coup de sa lance il porta le grant Turcq mort à terre, et puis par sa très grant proesse et valeur, tant fist d'armes qu'il vint à la banniere d'icelluy Turcq, qu'il porta à terre, et tant d'autres armes merveilleuses, que l'escripture seroit longue chose.

L'ACTEUR.— Et quant celle très sainte nouvelle fut ainsi par tout publiée, lors tous vrayz chrestiens, de quelque part qu'ilz fussent, incontinent coururent aux eglises, à grans sons de campanes, nostre Seigneur remercyer ; dont entre les aultres princes chrestiens, le roy de France incontinent monta à cheval, et s'en alla en la grant eglise remercyer Dieu et nostre Dame, et puis saint Denys. Mais ne tarda gueres que le roy d'armes d'Anjou, qui à la bataille avoit esté, vint au roy, et de bouche luy dist la chose ainsi qu'elle avoit esté faicte, et les vaillances des nobles de son royaume, vifz et morz, que on ne pourroit compter, et en especial celles du seigneur de Saintré, ainsi que toutes les lectres le contenoient. Et quant le roy eut entendu la verité de ceste chose, lors dist : « Ha ! beau sire Dieu, soyes tu loué ! Veuilles avoir mercy de ceulx qui en ton ser-

vice sont trespasés! » Et pour ycelle bonne nouvelle audict roy d'armes donna sa robe et trois cens escuz. Alors fut la joie, par la court et par la ville, telle que on doit et peut bien penser; fors que des dames et damoyzelles et de ceulx qui avoient perdu leurs amys. Et à tant laisseray cy à parler d'eulx et de ces choses, et reviendray audict seigneur de Saintré.

CHAPITRE LXIII

Comment Saintré et toute la noble compaignie des chrestiens françois, après la desconfiture des infidelles, retournerent à Paris, où ils furent joyeusement receuz du roy, de la royne et de tout le peuple.

QUANT le seigneur de Saintré et celle noble et chevalereuse compaignie furent venuz à Saint Denys, et faites en l'eglise leurs devocions pour entrer à Paris, furent au devant d'eulx les trois seigneurs duca dessusdicts et tant d'aultres, qu'à

peine en demoura ung seul ; et en celle mesme ordonnance revindrent, comme partis en estoient, descendre en la grant court de Saint Pol, fors que des bannieres des morz et du seigneur du Chastel Fromont et aultres qui estoient demourez navrez ; et en son lieu porta le seigneur de Maulevrier la banniere du roy, par election de tous. Lors furent faictes à eulx très grans honneurs et bonnes chieres, aussi des aultres à eulx. Et quant ilz furent devers le roy et la royne, ma dame et leurs compaignies qui en la grant salle estoient, et eurent au roy à l'entrée faictes leurs reverences premieres, le roy, qui assis estoit, pour les honorer et pour la grant joye qu'il avoit, se dressa sur piés, et fist ung ou deux pas au devant, puis à celle très grant joye toucha les mains à tous ; et endementiers que tous le touchoient, le seigneur de Saintré et les aultres allerent faire la reverence à la royne, à ma dame et à toutes les dames qui là estoient, et de leur venue très grant joye faisoient, fors aucunes à qui leurs parens, amys estoient demourez. Et quant tous eurent fait leurs reverences, et les dames et damoyelles baisées et accollées, le roy reffut en sa chaire assis, qui leur dist : « Mes amys, nostre Seigneur soit loué et sa très benoïste mere, quant à tel honneur et joye estes retournez, et vueille Dieu pardonner aux

ames de ceulx qui y sont demourez, ainsi que, selon nostre sainte foy, le devons croire, et qu'ilz sont sauvez; mais affin que nostre Seigneur vueille delivrer leurs ames des paines de purgatoire et les mectre en repoz et en son très glorieux royaulme de paradis, nous voulons et ordonnons que aux vespres nous soyons tous à Nostre Dame, et ferons dire les vespres et vigilles des morz, et demain les recommandacions et solempnelles messes que l'evesque dira; et par toutes les aultres Eglises seront dictes messes de *Requiem*, par tant qu'il y viendra des prebstres; si vous prie que tous y soyons, lequel service voulons et ordonnons estre ainsi par trente jours continué; et, en outre ce, ordonnons une messe perpetuelle, à tous les jours, au service de Dieu. » Et ainsi fut. Et à tant laisseray cy à parler de ces choses, et diray comment ma dame, très desirant de parler audict seigneur de Saintré, luy fist son signal, et comment par le sien il luy respondit.

L'ACTEUR. — Après ce que toutes ces choses furent ainsi faictes, ce soir que le roy et la royne, messeigneurs, les dames et damoiselles et ung chascun, au mieulx que pouvoient, festoyoient les seigneurs nouvellement revenuz, et especiallement le seigneur de Saintré, ma dame qui pas si grant semblant que les aultres n'en

faisoit, toutesfois pour la grant-joye de son cueur tenir ne se peut que devers luy devant tous ne s'approuchast, et luy dist : « Sire Saintré, au moins quant les aultres dames vous auront bien festoyé, que nous vous voyons à nostre tour ; nous avons veu le temps qu'on vous tenoit ung gracieux escuyer, estes vous, à cause de voz vaillances et que l'on vous dit monseigneur et de nouvel chevalier, point changié. » Et en disant ces parolles, elle print son espingle et en fist son signal, auquel incontinent le seigneur de Saintré respondit, et en soubzriant luy dist : « Ma dame, quoyque soit en moy, ne quel que je soye depuis que ne me veistes, je suis tout tel et celuy que j'estoye par avant. » Puis illec, present tous, entrerent en aultres parolles jusques à l'heure du soupper ; dont furent aucuns qui, après que les tables furent ostées, parlerent de dancier, laquelle chose ouye, le roy et la royne dirent que, pour l'amour des trespasés dont l'on ne devoit mye estre joyeux, jà n'y seroit chanté, ne dances faictes ; mais, pour le matin estre tous à l'Eglise, demanderent les espices et le vin de congié.

CHAPITRE LXIV

Comment Saintré requist au roy que pour sa bien venue couchast avecques la royne, ce qu'il luy promit; et comment la royne en fist grande risée, luy demandant pourquoy il avoit faict celle requeste. Puis enfin comment, sus la minuÿt, il alla parler à la dame en secret, qui luy fit la plus grant chiere du monde, non pas sans plusieurs baisers et accollemens.

L'ACTEUR ENCORES. — Et quant le roy fut en sa chambre, le seigneur de Saintré en riant luy dist : « Sire, pour nostre bien venue, je vous prie que ce soir avecques la royne dormiez. » Le roy, qui très gracieulx prince estoit, et qui tant l'aymoit, en riant luy dist : « Tousjours fustes et serez gracieulx, et du party aux dames; et, pour l'amour de vous, je le vueil. » Alors tout en riant vint à la royne, et luy dist : « Au moins, ma dame, donnez moy ung grant mercy. » Et quant la royne le vit ainsi rire, luy dist : « Et de quoy, Saintré, vous donneray je ung grand mercy? — Ma dame, donnez le moy et puis je le diray. — Non feray, dist elle, car vous vous

farceriez de moy. — Ma dame, c'est chose où le roy, vous et moy prendrons plaisir ; ne vous fiez vous pas en moy ? — Si fais, dist elle, et puis qu'ainsi est, je vous dis grant mercy. » Alors le seigneur de Saintré luy dist : « Ma dame, faictes bonne chere, car j'ay espouoir que ceste nuyt, s'il n'est faict, vous ferez ung très beau filz ; car, pour notre bien venue, le roy m'a accordé de dormir avec vous. — Hé ! dist la royne, que vous estiez bon ! il n'a que yer entre deux que je dormys avecques luy. Mais je vous prie que me dictes la chose qui ores vous a esmeu de faire ceste requeste à monseigneur ? — Ma dame, dist il, je le vous diray ; vous sçavez que quant aucun seigneur ou dame viennent là où les enfans sont à l'escolle, par coustume à leur requeste les escolliers sont delivrez et allent jouer. — Ha ! dist elle, Saintré, Saintré, ce n'est mye la droicte porte par où vous cuydez entrer ; je vous adjure, sur armes et sur amours, que me dictes verité. » Lors le prent par la manche et dit : « Tant que je le sçaiche, vous ne me eschapperez. » Alors le seigneur de Saintré appella ma dame, et luy dist : « Ma dame, veuillez moy ayder, car veez cy la royne qui me veult efforcer ; » et luy compta la requeste faicte au roy, et ce qu'il avoit dit à la royne, tout au long. Lors dist ma dame à la royne : « Hé ! ma dame,

laissez le aller, car il vous a dit la vérité. — Non a, dit elle; aultre chose y a soubz le mortier; car monseigneur me dist yer qu'il desiroit moult sa bien venue, pour bien avecques luy deviser, et il a trouvée ceste façon pour aultre part aller. » Ma dame, qui se doubtoit, ainsi que chose vraye faict adoubter, que leurs riz et signeaulx ne la feissent souppeçonner, pour bien couvrir leur emprise, dist ainsi au seigneur de Saintré : « Hé! sire, sire, se ma dame me croit, avant que luy eschappez, vous luy direz la verité. » Alors il leur dist : « Et par voz foiz, mes dames, se je le vous dis, me laisserez vous aller? — Ouy vrayment, dist la royne. — Et vous, ma dame, avec la royne le me promectez. » Lors il dist : « Ma dame, il y a ung moys ou six sepmaines, que ne cessames de chevaulcher, et pource que le roy me voudroit arraisonner, et je me voudroye dormir et reposer; pource, ma dame, suis je ainsi eschappé. — Ha! dist la royne, à ceste fois, je vous croy. » Lors dist ma dame, en renouvelant son signal : « Vrayement, ma dame, c'est bien faict, vous le povez bien laisser aler. »

L'ACTEUR. — Et quant la très desirée heure fut venue, que bien à loisir ma dame et son amy peurent parler ensemble, que vous dirois je? Là furent les baisiers donnés et baisiers

rendus, tant qu'ilz ne s'en povoient saouler, et demandes et responses telles qu'amours vouloient et commandoient. Et en celle très plaisant joye furent jusques à ce que force leur fut de partir ; en laquelle retourner ne povoient, se la royne ne dormist avecques le roy, où ilz s'employèrent toutes fois que au roy plaisoit. Que vous dirois je plus ? Ilz furent ainsi par quinze mois. Et à tant laisseray cy à parler de leurs amours qui furent si loyalles et secrettes que oncques plus loyalles, ne mieulx conduytes, en ce monde ne furent.

CHAPITRE LXV

Comment le petit Saintré delibera de porter une visiere de bassinet d'or par l'espace de trois ans : et comment le roy luy conceda, nonobstant que ce fut contre sa volonté.

L'ACTEUR. — Advint que au quinziésme mois qu'il fut retourné de Prusse, par maintes fois se mist en ung nouvel pensement, et en soy mesmes disoit : « Helas !

povre de sens, povre d'avis et de tous biens, que tu es ! oncques par toy aucun fait d'armes ne fut empris que ta très noble et douce deesse ne t'y ayt mys ; ores vrayement je me concluz et delibere que, pour l'amour d'elle, je vueil faire aucun bien. » Lors s'appensa de trouver cinq chevaliers des plus puissants, dont il en seroit l'ung, et cinq des escuyers les plus suffisans et des meilleurs en armes qu'il pourroit trouver en France ; lesquels il requerroit estre tous ensemble compaignons et freres, à porter, par l'espace de trois ans, une visiere de bassinet d'or pour les chevaliers, et d'argent pour les escuyers, ausquelles y auroit ung riche dyamant à l'entrer d'une des deux lumieres des yeulx. Si vrayement que s'ilz ne trouvoient semblable nombre de chevaliers et d'escuyers qui les combattissent jusques à oultrance, pour estre quictez chascun desditz dyamans, et les aultres de semblable, et que nulle personne ne le sauroit jusques au dernier jour d'avril, qu'il feroit sa requeste aux chevaliers et escuyers qu'il esliroit. Et quant il fut du tout delibeté à ce, il envoya à Florence ung patron de toille paint, en forme d'un saptin figuré tout blanc, où seroient visieres d'or et brochées très richement, qui seroient pour leurs robbes et paremens des chevaulx, et semblablement seroient parés de fin damas,

tout blanc, broché à semblables visieres d'argent, pour les robes et paremens des chevaux des escuyers; et d'autre part fait querir chevaux tous blancs, les plus beaulx et les plus fringans qu'on pourroit finer, qu'ilz fussent menez et tenuz en certain lieu secret. Et encores fist faire dix les plus beaulx et nouveaux chappeaulx de broderies semblables, en façon de plumes d'ostrusse, chargé d'orfaveries d'or pour les chevaliers, et d'argent pour les escuyers. Et quant les draps de soye furent apportez de Florance, et lesdits chevaux trouvez, lors fist tailler lesdictes robes sur personnes semblables de corps de ceulx qu'il vouloit requerir, et aussi des draps mesmes fist faire dix très beaulx paremens, à grans franges blanches de soye, couponnées de fil d'or et d'argent, qui tous furent faitz secrettement. Et quant lendemain jour d'avril fut venu, il semont à soupper le seigneur de Presigny, le seigneur de Bueil, le seigneur de Mailly, messire Hues de Craon, et luy cinquiesme des chevaliers, le seigneur de Genly, le seigneur de Moy, le seigneur d'Herby, le seigneur des Barres et le seigneur de Clermont, escuyers, ausquelz il fist très bonne chiere en son logis. Et quant les nappes furent levées, sans oster la table, tous rendirent graces à Dieu; il appella le varlet qui gardoit sa

chambre, et se fist bailler un petit coffret ; lors fist vuyder chascun de la salle pour aller soupper, et alors en riant dist : « Messieurs et mes freres, se je estoie presomptueux des choses que vous vueil dire, chascun me pardonne, car, sur ma foy, je vueil estre de tous qui cy sommes le maindre, et ce que j'ay en pensée et que vous vueil dire n'est que pour accroistre, noz honneurs, ainsi que tous nobles cueurs doyvent desirer de faire ; et pour ce que sur tous ceulx du royaume, je vous ay choisis pour estre tous ensemble freres et compaignons, pour faire quelque bien en armes, pour l'amour de noz dames et honneurs ; or ça, messeigneurs et mes freres, qu'en dictes vous ? » Alors chascun de joye regarde l'ung l'autre pour respondre et luy faire honneur, en disant : « Respondez. — Mais vous ? » Alors le seigneur de Genly qui premier parla, dist : « Monseigneur de Saintré, die chascun sa volenté, mais à si très noble compaignie, et aussi requeste, me semble qu'il ne fault point grant delay ; quant à moy, je suis celuy qui de ma part, à l'ayde de Dieu et de nostre Dame, le vous accorde, remerciant quant vous m'avez en tel nombre et compaignie prins et esleu. » Et en ensuivant ung chascun d'eulx très libéralement se offrirent. Mais tant estoient les vaillances, comme avez oy, les largesses, doul-

ceurs et courtoisies, qui passoient les bornes et mettez de tous, dont n'y avoit celluy qui n'eust mis son corps pour luy, et tant plus que le roy l'amoit par dessus tous, dont chascun avoit joye de lui faire plaisir. Alors tous les remercia en la meilleure façon qu'il peut, et ouvrit son coffret, et à chascun donna sa visiere, toutes pareilles de façon et de diamans, puis leur dist : « Or, messeigneurs et mes freres, au nom de Dieu le Pere, le Fils et le saint Esprit, aussi de la benoiste vierge Marie sa fille et mere, je les vous baille, et vous les prenez par telle condicion que chascun de nous les portera sur son espaule senestre, et par l'espace de trois ans, se dedans ledit terme nous ne trouvons semblable nombre de chevaliers et d'escuyers de nom et d'armes, sans reprouche, qui de lances de giet, de haiches d'armes, d'espées de corps et de dagues, nous ayent combattuz, et nous eulx, jusques à prendre chascune partie ses quatre poinctes, ou estre portés par terre ; et la partie à qui Dieu donnera du pire, chascun de nous sera quicte pour donner son dyamant en sa visiere, et ilz seront quictes pour donner ung semblable dyamant, que sont les nostres. Et du poursuyr noz delivrances d'envoyer à la court du roy des Romains, puis en Angleterre, et là où mieulx nous semblera, actendez vous en à moy ; aussi je m'employe-

ray devers le roy, qui nous aydera à supporter nostre despence. » Alors chascun de bien en mieulx l'en remercia. « Et pour mieulx nous acquiter, et faire noz devoirs, je loue que chascun voyse à sa dame, et pour la premiere fois supplier que la visiere luy vueille sans plus à la main asseoir sur l'espaulle senestre, sans la lier autrement jusques au matin que, tous ensemble, les porteront ; mais pour faire nostre chose plus nouvelle, je vous prie que soyez cy à quatre heures au plus matin, si yrons esveiller le roy et la royne, qui coucheront ensemble, et, s'il leur plaist, nous les merrons au may. » Si furent tous si très contens que plus ne pouvoient. Lors fut le seigneur de Moy, qui dist : « Helas ! et comment fera celluy qui n'a point l'octroy de dame ? » Alors le seigneur de Saintré luy dist : « Ha ! mon frere de Moy, tant aura il plus de cause de franchement requerir sa grace et mercy ; car se elle n'est pas la plus fiere des aultres, pour ung tel bien jamais elle ne le refusera. » Et alors les ungs des aultres prindrent congié, et allerent chascun où dit estoit. Et à tant laisseray cy à parler de ces seigneurs et de leurs dames, et diray comment il en print au seigneur de Saintré envers sa dame.

CHAPITRE LXVI

Comment Saintré fut au preau parler à la dame, et luy compta son entreprise, dont elle fut moult dolente et marrie; toutes fois tant la supplya le petit Saintré que à sa requeste ladicte dame luy attacha son entreprise sur l'espaule.

LE soir qui fut la veille du premier jour de may, après ce que le roy eut prins les especes et le vin de congié, le seigneur de Saintré s'approcha de la royne, puis appela ma dame, et en riant à la royne dist : « Que me donrez vous, ma dame, se ceste nuyt je fais que vous dormez avecques le roy? — Hé! sire, dist la royne en riant, de ce je ne vous sçauray jà nul gré. » Et en riant de ces parolles il fait à ma dame son signal; ma dame, qui bien congneut son parler que ce fut pour l'adviser du coucher du roy avec la royne, ne fat mye sourde, ne muette; car incontinent par son signal luy respondit. Et quant le roy fut en son lict, et le seigneur de Saintré, ainsi que de coustume estoit aux princes et princes-

ses, seigneurs et dames d'estat, que les chambellans aux seigneurs et les dames aux grans dames leur donnoient de l'eau benoïste, quant ilz estoient en leurs lits; ce que à plusieurs aujourd'huy est honte et chose mal faicte tant sont asseurez de l'ennemy; et quant il eut donné de l'eau benoïste, et closes les couvertures, et donné la bonne nuyt, il s'en alla en sa chambre, où il demoura tant que la très désirée heure vint que ma dame et luy furent ensemble. Lors de baisier et de rebaisier, de jouer et deviser aux jeux et devises que le dieu d'amours leur avoit commandez; et quant ilz eurent grant pièce devisé, le seigneur de Saintré lors à genoulx se mist, puis à ma dame dist : « A! ma très haulte deesse sans per, tant et si très humblement, comme je sçay et puis, grace, pardon, mercy et misericorde vous requiers. — Et de quoy, dist ma dame, mon amy? — Ma dame, dist il, du temps qu'il a que je suis vostre très humble serf et loyal serviteur, oncques en moy n'eut tant de bien que pour l'amour de vous j'eusse nulz faitz d'armes emprins; mais tous ceulx que j'ay faitz, et où je me suis trouvé, ont esté par voz commandemens, par voz conseils et advis; et pour ce que je me congnois si grandement avoir mespris et failly, et que trop mieulx vault faire bien tart que jamais, pour ce, ma dame, très

humblement vous supplie et requiers que ceste emprise que pour l'amour de vous, moy dixiesme ay mise avant et emprise de porter, vous plaise pour la première fois de vostre main l'asseoir sur mon espaule senestre, ainsi que tous mes compaignons ont fait au bon gré de leurs dames, lesquels sont telz, et telz, et telz ; » et lors les nomma tous. Et, en ce disant, tira son emprise de sa manche, enveloppée d'ung delié coeuvrechief, et, en luy presentant, la cuyda baisier. Ma dame, quant eust oy ces parolles, très grandement se coursa, et ne le voutl approcher, puis luy dist : « Avez vous levée emprise et departie, ça et là, sans mon sceu et congié? Jamais, tant que je vive, de bon cueur ne vous aymeray. » Qui fut esbahy de ces parolles? certes ce fut il; car il ne sçavoit pas se c'estoit par joieuseté, ou par yre. Lors se print à la regarder, et quant il veit qu'elle tenoit son yre, alors luy dist : « Helas! ma dame, veez cy povre nouvelle, quant pour bien faire je doy estre pugny, moy qui vous ay tant et si loyaulment servie, et ay mis mon cueur, corps et vie, pour vous obeyr; et ores que je cuydoye en vostre service faire mon honneur, fault que je perde celle à qui je suis tant atenu; ha! ma très redoubtée dame sans per, ayez de vostre povre serviteur mercy, et ceste fois plaise vous moy pardonner; car se

jamais j'y retombe, que je soye bien pugny. » Alors ma dame luy dist : « Allez bien tost rompre votre emprise à voz compaignons. — Helas ! ma dame, et comment ? car elle est jà si avant que, se c'estoit ma mort ou ma vie, je ne puis penser qu'il me fust possible de la rompre. Vous estes celle que sur toutes je doy obeir le plus ; et pour ce, ma dame, à genoulx et à mains jointes, très humblement vous supplie que liement et de bon cueur me pardonnez, et que mon emprise mettez icy ; et du surplus ne vous soucyez, car j'ay espoir en Dieu et en nostre Dame, qu'ilz nous en feront contents. » Et à ces parolles ma dame tout morvement la print, et sur l'espaule senestre l'assist ; et puis moytié ouy, moytié non, souffrit qu'il la baisast. Puis pour l'heure tarde, d'elle print congié très humblement, et s'en partit. Et à tant laisseray cy à parler de ma dame, et diray de la venue des neuf compaignons au seigneur de Saintré, et de leur très belle assemblée en son logeiz.

CHAPITRE LXVII.

*Comment les neuf compaignons vindrent le matin
devers le roy.*

L'ACTEUR. — Lendemain, qui fut le premier jour de may, et que les neuf compaignons, bien matin, au logeis de Saintré furent, pour abreges, après que leur messe fut leane oye, le seigneur de Saintré en sa chambre les fist tous venir. Lors à chascun donna sa robe de drap de soye, avecques les visieres d'or et d'argent brochées, ainsi qu'avez oy; puis fist venir les dix chappeaulx, si beaulx et si apparens comme ilz estoient, et puis à chascun son cercle d'or et d'argent, pour saindre sur leurs robes, dont tous furent esmerveillez. Alors demanda les visieres; puis, de sa main, à chascun pour ceste fois, sur leurs espaules senestres les attacha, et en riant leur demanda comment chascun estoit content de sa dame. Helas! mais il ne dit mye de la sienne, ne de la sainte douleur que son triste cueur portoit. Et quant ilz furent pour yssir tous hors de l'hostel, là furent les dix fringans

et tous blancs coursiers qu'il avoit secretement fait achapter, tous enharnachez richement, et de mesmes draps dont leurs robes estoient, qui, au bout des pendans, ou meillieu et par les carrefours, estoient semez de visieres d'argent dorées pour les chevaliers, et blanches pour les escuyers. Et lors fut garny de trois dez, et dist : « A la fortune de chascun ! celui qui plus aura de pointz à la veue de l'œil choisira. » Lors chascun, qui mieulx peut et sceut, l'en remercya, disant l'ung à l'autre : « Ne fut oncques tel ! » Et au monster chascun fut pourveu de nouveaulx et semblables esperons, qui dorez estoient pour les chevaliers, et argentez pour les escuyers, dont les courrois estoient de tissus de soye, comme l'on souloit au bon temps porter. Lors à l'ysir de l'ostel, veissiez chevaulx saillir, bondir en l'air, crier, huer, où chascun acouroit ; pour tant que oncques chose plus joyeuse à veoir ne fut. Et ainsi s'en allerent en la grant court de l'hostel Saint Pol ; lors chascun sa joye eonforta, car bien sçavoient que le roy estoit esveillé. Et quant le roy ouyt le bruyt des gens, fist lever les damoyelles qui en la chambre gisoient, pour sçavoir que c'estoit. Lors allerent aux fenestres treilliées, et incontinent au roy dirent : « Ha ! sire, sire, venez veoir la grant merveille, que oncques si belle chose ne veismes. » La

royne, qui pas ne dormoit, desirant veoir que c'estoit, dist au roy : « Eh ! monseigneur, allons veoir que c'est. » Alors revindrent les damoyelles, de joye si très prises, que à peine sçavoient elles parler ; lors le roy et la royne se firent abiller ; puis le roy, atout son abillement de nuyt sur sa teste, vint à la grant fenestre, et la royne aux treilliz. Et quant les dix compaignons, qui fringioient et chantoient, apperceurent le roy, lors tous vers luy accoururent, et puis quant ilz apperceurent la royne, à haulte voix s'escrierent : « Sire, sire, et vous, ma dame, le très bon jour et le très bon may vous soit huy donné ! » Et le roy leur dist : « Bon jour, bon jour, compaignons ! » Alors le roy et la royne se retrahirent pour eulx abiller, **et les dix compaignons descendirent et vindrent en la chambre du roy, qu'ilz trouverent accompagné de ses varlets de chambre qui l'abilloient. Alors, tous à genoulx, le seigneur de Saintré commença à parler, et dist : « Nostre souverain prince, messeigneurs mes freres, qui cy sont, et moy en leur compaignie, avons tous aujourd'huy voué que, à vostre bon congié et licence, nous porterons ceste emprise d'armes sur noz espaulles senestres, que cy veez, par l'espace de trois ans, et le surplus ainsi qu'en ceste lectre de noz armes pourrez plus à plain veoir ; vous très humblement suppliant**

que vostre bon plaisir soit la nous laisser poursuivre. » Et quant le roy entend ceste nouvelle, et vit sur leurs espaulles leurs emprises, ne fut mye bien content, pourquoi il leur dist : « Mes amis, vous faictes comme celuy qui espouse sa cousine, puis en demande dispensacion ; c'est à vous chose mal faicte d'entreprendre, et puis d'executer, sans licence de son seigneur, ou de celuy qui a son povoir et sa charge ; et qui voudroit regarder à la rigueur, quelque bien qu'il en vouldist, il en devroit très grievement estre pugny qui le fait autrement. » En disant icelles parolles, print leur lectre d'emprise, puis leur dist : « Je verray qu'il y a ; et quant à vous, Saintré, vostre cueur et vous ne cesserez jamais d'entreprendre armes et voyages, il me semble que c'est assez. — Ah ! sire, dist Saintré, ce n'est mye mon cueur, ne moy, maiz c'est honneur qui à ce tous nous esmeut, et en laquelle vous partez. » Et à tant le roy fut prest, et s'en alla à la messe. A ces parolles, arriverent messeigneurs les freres du roy, qui virent les dix compaignons ainsi abillez et leurs nouvelles emprises, ausquelz firent leurs reverences, puis leur recommanderent leur fait ; maiz ilz dirent : « Quant au fait de voz emprises, monseigneur a très bon droit, et vous avez mespris, jaçoit ce que avez retenu son congié,

plaisir et ordonnance ; car es aultrement estoit, ce seroit très simplement besoigné ; nous avoies avecques luy et l'en prisona. » Après le roy et les seigneurs, ne tarda guieres que la reine vint, qui a très grant joye les receipt ; après venoit ma dame qui guieres de chiens ne leur fist. Lors furent tous au service de la grant messe ; là veissiez dames et damoyelles, chevaliers et escuyers regarder à maravilles ces compaignons. Et quant le roy fut en sa chambre, appella mes trois seigneurs ses freres, et leur monstra les lectres d'armes, et puis leur demanda conseil. Et pour abruger, la conclusion fut telle que pour ceste fois le roy leur en donna congé ; et que, sur paine de son indignacion et d'en estre pugniz, eulx, ne aultre de son royaume, ne portassent emprises avant son bon plaisir. Alors tous vindrent très humblement le remercier. Quant les festes furent passées, ilz ne cesserent d'eulx mettre en point, et pour tous les jours de la sepmaine firent robes pareilles pour leurs corps et tous leurs gens d'une livrée, et les harnois de leurs chevaux, qui estoit moult belle chose à veoir. Que vous dirois je ? tout le royaume en bruyoit ; et endementiers qu'ilz s'habilloient, Saintré et ses compaignons ordonnerent une très belle lectre d'armes, adressans à la court de l'empereur, comme la principale des aultres, et incon-

tiennent par le roy d'armes de Normandie les firent porter. Et icy laisseray à parler ung peu de ces choses pour revenir au surplus de la matiere.

CHAPITRE LXVIII

Comment le roi parle à Saintré, et des dons qu'il luy fist et à sa compaignie.

L'ACTEUR. — Endementiers qu'ilz s'abilloient, tout ainsi qu'avez ouy, le roy, qui ay moit tant Saintré, luy dist : « Saintré, qui vous a esmeu de ceste emprise faire sans mon congié? où sont les scellez des promesses de fortune qui tant a esté pour vous, qu'elle ne vous puisse revocquer? et d'autre part, la yre de nostre Seigneur, ne la craignez vous pas, qui nous deffend telles vaines choses; et s'il vous en a par tant de fois enrichy, de tant luy en estes vous plus tenu, et vous vous devez garder de plus le offendre, se vous estes bon chrestien; ores que ceste chose est si publiée que ne se peult retourner, pour ceste fois je

m'en contente, et vous deffends que n'y retournez plus. — Ah ! sire, dist il, me soit pardonné, s'il vous plaist. — Ores, dist le roy, je le vous pardonne de très bon cueur ; où entendez vous faire voz armes ? — Sire, nous entendons les signifier à la court de l'empereur, et se là ne trouvons qui nous vueille delivrer, nous les signifierons à la court du roy d'Engleterre, esperant que en l'ung de ces deux ne faillerons mye. — Or bien, dist le roy, quelz habillemens ? quel nombre de gens ? ferez vous tous une bourse, ou comment ? » Et quant le roy eut sceu la responce de tout, il luy dist : « Je vous donray quatre mille escuz, et à chascun de voz compaignons mille et cinq cens. » Et la royne luy en donna mille et cinq cens, **une piece de veloux cramoyssy, taint en pourpre, et cent mars de vaisselle d'argent ; et à chascun des aultres, six cens escuz ; aux chevaliers à chascun, une piece de veloux gris ; et aux escuyers, une piece de damas aussi gris. Messeigneurs les ducz, chascun mille et cinq cens escuz et quarante mars de vaisselle, et aux aultres six cens escuz. Et ne tarda guieres que leur partement fut ; et quant le jour fut venu, ilz vindrent tous ensemble prendre congé du roy, de la royne, de messeigneurs et de mes dames, dont les beaulx parlers qu'ilz leur dirent, et de leurs biens remercier, je me passe,**

pour venir aux secrets pleurs et plains, et très angoisseux soupirs que le très douloureux cueur de ma dame faisoit du partement de son amy, dont plus que oncques mais, son partement lui déplaisoit, et toutesfois se failloit il departir. Et à tant laisseray à parler du congié qu'ilz ont prins, et de leur voyage, où ilz vont en la court de l'empereur; et diray du dueil que ma dame maine, et d'un aultre nouvel party.

DU TRÈS GRANT DUEIL DE MA DAME, ET DE
SON PARTEMENT DE LA COURT

L'ACTEUR. — Ma dame, qui est ainsi demourée seulle d'amy, ne voit bahours, ne joustes, dances, chasses, ne aultres deduits où son cueur peust prendre plaisir; et quant elle voit les dames per à per deviser ensemble, lors renouvellent toutes douleurs en son cueur. Et, en ceste langoureuse vie, fust ahurtée tellement qu'elle en laissoit le boire et le manger pour jeusner, et le dormir pour le veiller; et tellement que peu à peu sa très vive face colorée s'est changiée en très palle couleur, dont chascun s'esmerveilloit. La royne, qui la veoit mal disposée, pale et pensive, plusieurs fois luy demande qu'elle a. « Ma dame, dist elle, ce n'est riens; vous sçavez qu'entre nous

femmes, sommes malades quant il nous plaist. — Mais à bon escient dictes nous, Belle Cousine, que vous avez et où ce mal vous tient, et se nous vous y pourrions ayder, car vous devez estre certaine que de très bon cueur nous y emploierons. — A! ma très douce dame, humblement je vous remercie. » Et sur ce, finerent leurs parolles; mais la royne, qui bien l'aymoit, n'oublia pas mander à son medicin, maistre Hues de Fisol, très suffisant medicin et philosophe, qui, de par la royne, se informa de son mal, et luy ordonna qu'elle gardast son estat, et que le matin la viendroit veoir; et ainsi fut. Le matin que maistre Hues eut tout bien veu son faict, trouva son corps sain et nect de douleur de teste, de fiebvres et de

tous aultres maux, fors que en son cueur avoit douleur enclouse; que, se briefvement n'y estoit pourveu, sans remede en dangier de mort estoit; car, par celle estroicte douleur, en elle se mouraient tous les esperits naturelz, respondans à son cueur, et que jà presque tous estoient oppillez; toutesfois, au mieulx qu'il peut, il la reconforta, puis luy dist: « Madame, au regart de vostre corps, je le treuve très bien disposé; mais vostre cueur ne l'est mye, qui a en soy aulcune grant douleur secreete, que, se pourveu n'y est briefvement, vous tomberez en grant langueur très forte à

guerir; et pour ce, ma dame, ostez de vous ceste douleur, et je penseray du surplus. »

CE QUE DIT MA DAME A MAISTRE HUES, ET
COMMENT IL LA RECONFORTA

Quant ma dame eut ouy maistre Hues ainsi de son mal parler, luy dist : « Maistre Hues, lesez moy, je n'ay douleur en mon cueur que une, en laquelle de vostre parolle seulement me povez bien ayder; et par ma foy, se ainsi vous plaisoit, je vous en seroie à tousjours bien atenuë; et, en oultre, je vous donroye ung bon mantel de la plus fine escarlate que l'en pourra finer. » Quant maistre Hues oyt parler du mantel, à très chiere lie luy dist : « Ma dame, commandez moy, car il n'est chose que pour vous, à mon pouvoir, ne face. — Voire, dist ma dame, maistre Hues, et nous vous en remercions; medessins sont confesseurs; et ce que vous vueil dire ne touche à vostre deshonneur, ne dommage, si vous prie que le tengniez secret. — Ma dame, dictes hardiment, car, par ma foy, jamais parolle n'en sera dicte. — Or, maistre Hues, nous vous disons que la desplaisance et maladie de nostre cueur n'est fors que du desir que nous avons d'aller, deux moys ou trois, veoir noz terres, dont il est grant besoing; car sont plus de seize ans que nous n'y

fusmes, dont noz affaires n'en vallent que pis ; et nous sçavons que se ma dame sçavoit que de nous venist, suis acertainée qu'elle n'en seroit mye contente. — Ho ! ma dame, dist maistre Hues, j'en prens la charge, et faictes bonne chiere, car vous yrez, et sçay bien la façon comment ; mais il faut que trois ou quatre jours vous tenez en chambre, et du surplus laissez faire à moy. » Maistre Hues vint à la royne, et luy dist : « Ma dame, je viens de veoir ma dame vostre cousine. — Helas ! dist la royne, maistre Hues, comment le fait elle ? — Ma dame, pour le vous dire, très petite-ment, et n'y voy qu'un seul remede. — Las ! que dictes vous, et quel remede ? — Pour Dieu, ma Dame, qu'elle s'en voyse esbattre en son air naturel deux moys ou trois. — Helas ! se elle y estoit, seroit elle guarie ? — J'espere en Dieu que ouy, et je voys penser de ses viandes et d'aucuns lectuaires confortatifz. » La royne s'en va incontinent veoir ma dame, qu'elle trouva couchée en son lict ; lors la reconforta au mieulx qu'elle peut, especialement qu'elle seroit tantost guerie, se elle estoit en son air naturel, comme luy avoit dit maistre Hues, et que pour Dieu fist bonne chiere, et se disposast d'aller où elle vouldroit pour sa santé et guarison trouver. Ma dame, qui autre medicine ne queroit avoir que de fuyr les desplaisirs

que son cueur sentoit, quant elle veoit les aultres amans dancer, chanter, jouer, et les ungs avecques les aultres deviser, et elle ne pouvoit ainsi faire jusques à la venue de son très parfait amy, si print en elle resconfort de s'en partir; et, pour abreger, le plus tost qu'elle peut, print congié du roy et de la royne. La royne ne luy donna que pour deux moys, se elle estoit lors en bon point, luy promectant de revenir. Et lors prent congié, et s'en va.

CHAPITRE LXIX

*Comment ma dame est en son hostel venue ;
et comment on la va festoyer.*

L'ACTEUR. — Or nous fault icy lesser le nom du pais, et de la terre, et de son hostel où elle alloit, car l'histoire s'en et taist pour aucunes causes et chōses qui après viendront; mais faindray que son principal et hostel fust à une lieue d'une bonne cité; et à une lieue de son dit hostel fust une abbaye que ses predecresseurs fonderent, et de celle abbaye

estoit que une autre lieue jusques à ledictes
 cité. Dont par ainsi l'hostel de ma dame,
 l'abbaye et la cité, estoient ainsi collez en un
 trapier.

DE LA VENUE DE MA DAME, ET DE LA JOIE ET
 BONNE CHIÈRE DES GENS DU PAIS.

Quant la nouvelle fut par le pais come de la
 venue de ma dame en son hostel, seigneurs et
 dames, escuyers et damoyelles, bourgeois et
 bourgeoyses, la vont veoir; dont par leur ve-
 nue, peu à peu, son grant duel commença à
 passer. Et à tant laisseray à parler aucun peu
 du sejour de ma dame, et diray de l'abbaye
 et de damp Abbez.

L'ACTEUR CY PARLE DE DAMP ABBEZ ET
 DE SON ABBAYE. — Comme j'ay dit, ceste
 abbaye, qui cy n'a point de nom, les predeces-
 seurs de ma dame la fonderent; et tant y firent
 de biens que aujourd'huy elle est une des dix
 meilleures abbayes de France. Damp Abbez,
 qui pour lors estoit, fut filz d'ung très riche
 bourgeois de la ville, qui, pour dons et pour
 prieres de seigneurs, aussi des amys de la court
 de Romme, donna tant que son filz en fut
 Abbez, qui de l'aage de vingt cinq ans estoit;
 grant de corps, fort et abille pour luicter, sail-
 lir, gecter barres, pierres, à la paulme jouer,

né trouvoit moyne, chevalier, ne escuyer, ne bourgeois, quant il estoit à son privé, qui son maistre en feust. Que vous diroy je ? En toutes joyeusetés s'employoit, affin qu'il ne fust trop oyseulx ; et d'aultre part, large et liberal de tous ses biens, dont estoit moult amé et prisé de tous bons compaignons. Quant damp Abbez sceut la venue de ma dame, il fut très joyeulx ; lors fist ung de ses chars charger de cymiers de cerfs, de hures, de costes de sangliers, de lievres, de connins, de faisans, de perdriz, de gras chappons, de poullailles et de pigeons, et une queue de vin de Beaulne ; et tout envoya presenter à madicte dame, luy suppliant qu'elle print en gré. Ma dame, qui vit ce beau present, ne demandez mye se elle fut joyeuse, et commanda festoyer le presenteur, et à damp Abbez remercyer. En celuy temps on estoit près de karesme, et en l'abbaye estoient de grans pardons le lundy, le mercredi et le vendredy de la sepmaine. Ma dame, esprinse de grant devocions, delibera d'y aller, mais que la presse et foison du peuple fut passée, et les quinze premiers jours. Lors manda à damp Abbez qu'elle seroit demain à la messe, en son abbaye, pour gagner les pardons. Damp Abbez, qui oncques ne l'avoit veue, en fut très bien joyeulx ; lors ordonna à parer le grant autel de reliques, l'oratoire ou la chapelle où gisoient

des professeurs; et d'autre part l'abbé, à la même ville, fut recevoir les prêtres, chanoines, et d'autres meilleurs personnes de leur et d'une science que l'on pourroit trouver. Puis commanda les étables à chevaliers appartenir de telles charrues, et fut véritablement appareiller vignes de divers façons, et faire tout en plusieurs chambres, car encor en estoit de saison. Et quant ma dame fut venue, et descendue à la porte du monastère, la furent les abbés, les plus nobles religieux de l'abbaye, qui, de par damp Abbez, à genoulz, offrirent tous les biens joyeux de leurs diversques biens servies, ce que ma dame remercia grandement. Et quant elle eut au grand tout ses obligations faites, fut en sa chapelle conduite pour sa messe oyr. Lors au partir, à la fin des heures, fut damp Abbez, accompagné des prieurs et du couvent, qui à genoulz luy dist: « Ma très redoutée dame, vous soiez la très bien venue en nostre maison, bien sommes très lyez et joyeux, quant Dieu nous a donné la grace de vous y veoir; comme nostre patronne et fonderesse, nous vous offrons l'abbaye, les corps et les biens. » Alors ma dame luy dist: « Abbez, à très bon cueur vous remercions; aussi s'il estoit chose que pour vous nous puissions faire, et pour tout le couvent, nous l'accomplirons de très bon cueur. » Alors ma dame demanda

à veoir les reliques ; damp Abbez se leva, qui à genoulz estoit, lors prent les chiefs, les bras et les ossemens de corps saints à grant planté qui là estoient, disant : « Ma dame, cy gist le très vaillant prince, nostre premier fondeur, qui des premieres conquestes de la Terre Sainte apporta cest chief, ceste main et ces os de messire saint tel et tel ; monseigneur son frere donna ceans en don ces machoueres et ces os de bras de monseigneur saint tel et tel, et sainte telle. Et, pour abreger, ont tous voz predecesseurs donné toutes ces reliques, et faicte ceste eglise et grant parti du surplus tel que voyez ; et le surplus ont faict mes predecesseurs Abbez, et les seigneurs et dames, mes voysins, qui gisent ceans. » Quant ma dame eut les reliques baisiées, et donné une chappe et deux tunicques, avec le parement du grant autel, tout de fin veloux velouté cramoy et très richement brodé d'or, et ce fait, elle s'en cuyda retourner. Et tandiz que les chevaulx des charriotz, et aultres, mengeoient, qu'on hastoit pour brider, damp Abbez mena ma dame en sa chambre chauffer, qui estoit très bien tendue et necte, tapissée, verrée. Comme celuy qui bien aise et joyeusement s'en tenoit, et comme très bon compaignon, dist à chascun : « Saillons tous hors, et laissons ma dame chauffer, et soy un peu aiser en son

privé; » et ainsi fit. Et quant ma dame et toutes les dames et damoyelles de sa compaignie se furent très bien chauffées et eschaufées, ma dame fist demander se les charriots estoient prêts. Alors damp Abbez, qui ja avoit dit au maistre d'hostel que ma dame disneroit leans, dit que tout le manger estoit appareillé, luy priant qu'il luy voulüst tenir la main, à ces paroles entra devers ma dame; puis la mena en sa très gentille sallotte, telle comme une chambre de parement très bien tenuë, tapissée et tapée, et les fenestres verrées, et très beau feu; et illec estoient trois tables couvertes de très beau linge merveilleusement, et le dressoir garni de très belle vaisselle à grant largesse. Et quant ma dame vit les tables ainsi mises, dist à damp Abbez: « Abbez, voulez vous ja disner? — Disner, dit il, ma dame, n'est il pas temps? veez cy l'hourloge, » qu'il avoit fait avancer d'une heure et demye, et qui sur l'heure de midy frappée estoit. Ma dame, qui oyt sonner mydy, se vout haster de partir; et damp Abbez luy dist: « Ma dame, par la foy que je vous doy, ne partirez jusques ayez disné. — Disné, dist ma dame, certes je ne pouroye demourer, car j'ay moult à besogner. — Hé! maistre d'ostel, et vous, mes dames, souffrez vous que je soye de ma requeste reffusé? » Alors les dames et damoyelles, et

aucunement le maistre d'ostel, qui jeusnoient et avoient bon appetit, pensant que trop mieulx disneroyent que de l'ordinaire de l'ostel, l'une guignant, l'autre boutant, tant prièrent pour la premiere requeste de damp Abbez, que ma dame se consentit. Alors damp Abbez, comme joyeux, gracieux et amyable, à genoux prestement se mist, et ma dame remercy, et aussi les autres dames et damoyelles. Lors furent les chevaulx ès estables retournez, dont toute la compaignie, jaçoit ce qu'ilz fussent bien desjeunez, si en furent ilz très joyeux. Alors dist damp Abbez : « Ma dame, vous estes au saint temps de penitence, et pour ce ne vous esmerveillez point se vous estes petitement servie ; et pour aultre raison que jusques au soir bien tart, de vostre venue n'en sçavoye riens. — Abbez, dist ma dame, nous ne povons que bien estre. » Alors damp Abbez demanda l'eaue pour laver les mains, qui estoit toute eaue rose tiede, dont ma dame et les aultres firent grant joye. Ma dame vult que damp Abbez, comme prelat, lavast le premier, mais il ne le vult oncques faire ; mais pour donner aux prieres de ma dame, il s'en alla laver au dressouer. Lors fut la table levée, et ma dame dist à damp Abbez qu'il se seist, et il respondit : « Ma dame, vous estes dame et abbesse de ceans, seez vous, et laissez faire à

moy. » Quant ma dame fut assise, et au bas bout de sa table ma dame Jehanne, ma dame Katherine et le seigneur de Gency, qui avecques elle estoit, y furent assis, à la deuziesme table, le prieur du couvent, Ysabel et aultres damoyselles et deux ou trois escuyers, et messire Geoffroy de Saint Amant viz à viz de ladicte Ysabel ; alors damp Abbez, une serviette sur son col, s'en va au dressouer au vin, et fait servir ma dame de toustées à l'ypocras blanc, et aussi toutes les tables, puis les figues de karesme, avecques le succe rosties ; à ma dame, qui moult le prie de seoir et ne le puist faire seoir, disant : « Ma dame, ne vous soit à desplaisir, je tiendray compaignie au maistre d'ostel, et pour ceste fois luy monstreray le chemin. » Et quant damp Abbez et le maistre d'ostel furent venuz, et le premier mets assis, ma dame dist à damp Abbez : « Vrayement, Abbez, se vous ne vous seoyez, nous nous leverons. — Or bien, ma dame, je vous vueil et doy obeyr. » Ma dame vult faire retirer la table, mais damp Abbez dist : « A Dieu ne plaise que la table en bouge jà pour moy. » Lors fist apporter une escabelle, et viz à viz de ma dame, ung petit plus bas, se assist ; lors fait servir de vin blanc de Beaulne, puis du vermeil de trois ou de quatre façons, dont tous en furent serviz. Que vous diroye je ? Les

prieres de faire bonnes chieres, et de boire les ungs aux aultres y furent bien faictes ; et tellement que grant temps avoit que ma dame n'avoit faict si bonne chiere. Dont en beuvant, ma dame à damp Abbez, et damp Abbez à ma dame, les yeulx, archiers de cueur, peu à peu commencerent l'ung des cueurs à l'aultre traire ; et tellement que les piés, couverts de la très large touaille jusques à terre, commencerent de peu à peu l'ung à l'aultre toucher, et puis l'ung sur l'aultre marcher. Alors ce très enflammé dart d'amours fiert le cueur de l'ung, et puis de l'aultre, tellement qu'ilz en perdirent le menger ; mais damp Abbez, qui de ceste queste nouvelle estoit sur tous le plus joyeux, boyt à l'une, puis à l'aultre. Que voulez vous que je vous dye ? Oncques abbez ne fut si joyeux ; une fois se lieve, et fait porter son escabelle devant les dames, et là aucun peu s'assiet, et puis va devant les damoyelles, et les prie de mangier et faire bonne chiere joyeuse ; puis va aux femmes de la chambre, et boyt à elles, et revient à ma dame, et de joye, viz à viz d'elle, se siet. Alors recommencerent leurs archiers d'amours plus fort à traire, et leurs piés l'ung sur l'aultre marcher plus qu'encores n'avoient faict. Des aultres bonnes chieres, de vins, de viandes, de lemproies, de saulmonz, de mains aultres poissons de mer et

d'eau douce, pour abreger, dont ilz furent serviz, je laisse tant qu'à présent à en parler plus avant, pour venir au surplus de l'histoire qui est gracieuse.

CHAPITRE LXX

*Comment ma dame et damp Abbez deviserent
de comment elle le remercia.*

L'ACTEUR. — Quant les tables furent levées, et le maistre d'ostel et tous les autres furent allez disner, ma dame remercia damp Abbez de la bonne chiere qu'il luy avoit faicte ; et de parolles en parolles, de pas en pas furent à l'autre bout de la salle, où deviserent de joyusetez jusques à ce temps que tous furent disner. Et endementiers que les derniers disnoient, pour reposer ma dame, damp Abbez fist de très beau linge son lict appareiller. Et quant le maistre d'ostel eut disné, ma dame commanda les chariotz traire. « Comment, ma dame, dist damp Abbez, voulez vous rompre les bonnes coustumes de

ceans ? — Et quelles sont elles ? — Ma dame, elles sont telles que s'aucunes dames d'honneur ou damoyelles y ont disné, il fault qu'elles et leur compaignie se couchent, dormant ou veillant, soit en yver ou en esté, et celles y ont souppé ; pour celle nuyt je leur laisse ma chambre, et m'en voys ailleurs logier ; et pour ce, ma dame, l'usaige de ceste vostre abbaye ne devez mye refuser. » Tant furent les prieres de damp Abbez et des dames que ma dame fut gracieuse, et vout entretenir celle coutume. Lors ma dame entra en sa chambre, et là fut le vin et les espices appareillés ; la porte fut fermée, et ma dame jusques au vespre s'en va reposer.

CHAPITRE LXXI

Comment damp Abbez fut loué.

QUANT les dames et damoyelles furent appareillées, lors Ysabel se print à parler, et dist : « Vous ne dictes riens, ma dame, ne vous aultres sotes, de la bonne

chère de damp Abbez, et comment il nous a festoyés, et tenu aises de bons vins, de bonnes viandes et de bons poissons, à grant largesse. — Certes, dist ma dame, il me semble estre homme de bien. — Comment de bien, dist ma dame Jehanne, oncques si gracieulx moynne se vya. — Et vous, ma dame, dist Katherine, vous vous faisiez prier de demourer? — Ha! dist Yacobel, je congneuz bien à ses prieres que la chose alloit bien, et le faisoit de cueur. » Alors les dames toutes ensemble, ainsi que femmes ont accoustumé, louerent les largesses, les joyusetes et la belle personne de damp Abbez, tant qu'elles ne se sçavoient taire. Ma dame, qui jà en estoit ferue, et qui ses dueilz avoit oubliez, dist à briesves parolles : « Il est très homme de bien. » Et endementiers que de damp Abbez parloient, vespres commencerent à sonner; et pour y estre, sans dormir les convint lever. Et quant vespres furent dictes, et que ma dame cuyda monter, damp Abbez la print par la main, et elle luy dist : « Abbez, hél où nous menez vous? — Je vous prie, ma dame, dist damp Abbez, que je vous maine à ung peu de collacion, car il est temps de la faire. » Et en ce disant, damp Abbez la vous print par dessoubs le bras, et en estraingnant la main, la maine en la salle basse bien tappissée et à bon feu, où estoit le dressouer et les

tables mises, les sallades dessus, cresson, vin aigre, plats de lemproyes rousties et en pastez, et en leurs saulces grantz solles bolies, frictes et rousties au verguz d'oranges rouges, barbeaux, saulmons roustis, boulliz et en pastez, grans carreaux et grosses carpes, plats d'escrevices, grans et grosses anguilles renversées à la gallentine, plats de divers grains couvers de gellée blanche, vermeille et dorée, tartres bourbonnoises, talemouses et flans de crespes d'amendes très grandement sucérées, pommes et poires cuites et crues, amandes sucérées et pelées, cerneaux pelez à l'eaue rose, aussi figues de Melicque, d'Allegarbe et de Marseille, et raisins de Corinthe et de Orte, et maints autres choses, dont, pour abreger, je me passe; tout mis par ordonnance en façon de banquet.

CHAPITRE LXXII

Comment ma dame fist sa collacion fourris.

MA dame, qui jeunoit et ne pensoit prendre que des espices et du vin trouva ses tables ainsi garnies; car le traictre dieu d'amours l'avoit à son disner si fierement assaillie, que de ses amoureux dars l'eut de mangier toute remplie; neantmoins nature se volt acquiter, qui luy donna tel appetit qu'elle ne se fist guieres prier. Et quant les aultres de sa compaignie virent ma dame assise, et damp Abbez ou meillieu de la table viz à viz, chascun ou la plus grant partie se laisserent aux prieres de damp Abbez couler et consoler, aussi pour obeyr à ma dame et l'accompaigner; aux deux boutz de la table et des deux coustez tous s'assierent, et pour plus estre joieusement, quatre ou cinq moynnes des plus gracieulx entre deux. Lors veissiez boire d'autant, et menger à l'avenant. Que vous dirois je? La joye et la lyesse y fut tant que à tel nombre de gens oncques n'avoit esté faicte; mais il fault, pour celle fois, à grant regret et soupirs de ma

dame et de damp Abbez, departir. Mais au monter au chariot, illec fut damp Abbez et les prieurs remercier ma dame très humblement, en recommandant l'église et le couvent. Lors ma dame dist : « Nous nous verrons assez souvent, car nous entendons acquerir nostre part de voz pardons plus grandement ores que tous, » dont en furent très contens ; « mais quant à vous, Abbez, nous vous prions que de voz grans appareils de viandes vous despartez, car sans faulte vous en avez esté trop oultrageux, et n'en voulons plus. — Et bien, ma dame, de la tostée à la pouldre de duc, au vin blanc, et ypocras au muscadet, à la Granaiche, à la Malleveisie ou au vin grec, tout ainsi qu'il vous plaira, après la messe, pour le dangier du temps, ce ne defendez vous mye ? — Si faiz, dist ma dame, car à ces jours nous entendons jeusner. — Jeusner, ma dame, jà pour ce ne laisserez vous à jeusner, et je vous en donray l'absolucion. » Et, à ces parolles, damp Abbez monte à cheval, et une piece convoya ma dame, et puis print congié d'elle.

CHAPITRE LXIII

*Comment nos dames et nos jouteurs se louerent
l'une à l'autre de damp Abbez.*

L'ACTEUR. — Quant damp Abbez fut party et retourné en son abbaye, commencèrent les louanges à qui mieulx le pouvoit ; Ysabel, qui estoit la plus joieuse, commença la premiere à parler, et dist en riant : « Ha ! ma dame, tant je vous loueroye quant vous refusez le bien quant il vous vient. » Alors dist dame Jehanne : « Eh ! vrayment, Ysabel, vous avez tort ; ma dame entend de y venir souvent, dont à chascune fois y doit elle disner ? — L'une et l'autre vous avez tort, dist dame Katherine, il n'y auroit point de raison que à chascune fois ma dame y deust disner ; ne aussi ne blasmerois je point que de fois à aultre elle print en gré l'offre, car sur ma foy il fait de très bon cuer, se je ne suis deceue, et volentiers, et qui ne nuit mye à jeu, j'entends qu'il a bien de quoy ; et qu'en dictes vous, ma dame, ne dis je pas bien ? » Ma dame,

qui les avoit toutes oyes, respondi : « Il souffist de prendre soubz brebis la laine, et pour ce je m'arreste aux tostées et à la pouldre de duc, à l'ipocras et aultres vins estranges et delicieux, qui nous doyyent bien souffire ; mais vrayement nous entendons à gagner tous ces pardons ou la plus grant partie, car ne savons se y pourrons retourner en aultre temps. » Et à tant sont à l'ostel venuz. Ma dame, qui de ce nouvel feu d'amours avoit son cueur enflammé, toute nuyt ne cessa de soy plaindre, gemir et souspirer, tant desirant estoit de revoir damp Abbez, et à lui povoir bien deviser. Et damp Abbez assailly de celles mesmes amours par les doux et amoureux semblans et regards qu'ilz avoient l'ung à l'aultre faictz, ne fut mye toute celle nuyt à sejour, car soupirs et desirs de ses très enflammans amours le garderent bien de dormir. Et quant le très désiré jour fut venu, ma dame dist à ses femmes que, pour mieulx et dignement gagner les pardons, que vrayement à damp Abbez, qui prelat estoit de grant devocion, se vouloit confesser. Lors dist dame Jehanne à ma dame : « Ce seroit bien fait ; quant à moy, je y fuz hier. » Lors ma dame fist monter à cheval le petit Perrin de sa chambre, et manda à damp Abbez qu'il venist incontinent à elle. Damp Abbez fut diligent, et à ma dame hastivement

obeyt. Lors ma dame, faict la reverence par toutes ses femmes, publicquement luy dist : « Abbez, pour mieulx dignement gaigner vos pardons, nous sommes disposées de nous confesser. — Ha ! ma dame, dist damp Abbez, or estes vous avecques Dieu ; et, ma dame, qui est vostre confesseur, pour luy donner quelque puissance, se besoing est ? » Lors dist ma dame : « Il n'en y a cy nul plus digne, ne plus souffisant que vous. — Ha ! ma dame, c'est donc à cause de la crosse, car du vltplus je suis le plus ygnorant de tous. » A ces parolles ma dame, en sa chambre d'estour bien tendue et tapissée, à très bon feu, entra, et damp Abbez dévotement la suyt ; puis fat la porte close jusques à deux heures, elle de ses bienfaits et amours loyaulx très repentant et contricte ; en tout bien et en tout honneur, à jeu sans villennie, damp Abbez la confessa très doucement, et au departir qu'ilz firent, ma dame alla à son coffret, et print ung très bel et gros rubyz balloyz en or lié, que en son moyen doigt luy mist, disant : « Mon cueur, ma seule pensée et mon vray desir, pour mon tout seul amy je vous retiens et espouse de cest annel. » Alors damp Abbez, si très humblement que il peut, l'en mercia ; puis se pensa d'un commun proverbe qui dit : celui qui sert et ne persert, son loyer pert. Lors à ma dame

donna l'absolucion, et par charité la baisa très doucement, et print congié ; et au passer que il faict par la chambre, tout saigement dist aux dames et damoysselles : « Jusques à ce qu'elle appelle, nulle n'entre leans ; mes seurs et mes amyes, jusques au retour, à Dieu vous commende. » Ma dame, pour reprendre sa couleur, que des penitences avoit perdue, demoura seulle aucunement. Ses dames et damoysselles et tous ses gens, pour oyr messe, actendoient tant que l'orloge sonnast unze heures ; lors ma dame appella Jehanne, et de son plus simple atour s'atourna ; et, pour mieulx couvrir sa face, fist mectre son grant coeuvrechief, et, en cest estat, simple et coye de sa chambre yssit ; les yeulx et la chiere basse, va à la messe en devocion, et puis disner ; et ainsi passa ce jour. Lendemain mercredy, que recommença le pardon, ma dame y retourna pour les acquerir. Damp Abbez, tout plain de joye, fist à grant foyson tostées appareiller, et apprester ypocras, vins estranges de diverses façons, harencs blancs et soretz, et aultres viandes pour les compaignons, et au surplus fist très bien penser les chevaux. Quant ma dame eut messe oye, damp Abbez la vous prent par des-soubz le bras, et en sa chambre à bon feu la maine, où tout le desjeuner estoit appareillé. Et quant ma dame fut bien desjeunée, damp

Abbez la prent, et luy dist : « Ma dame, entendis que vostre compaignie fait bonne chiere, je vous vueil monstrier mon edifice nouvel. » Lors de chambre en chambre tous deux allerent, tant que les dames ne les sceurent trouver. Et au departir de la chambre secrette, damp Abbez donna à ma dame une piece de fin veloux noir et plain, que depuis secretement elle envoya querir. Et lors ma dame en la grant chambre de parement, où tous estoient, revint; et quant ses femmes furent venues, ma dame, comme courroucée, les tensa, disant : « Hé! d'où venez vous? avoye dit et cuydoye que vous me suyvisiez; mais vous aymez mieulx garder le bon feu et les tostées que moy accompagner. — Ma dame, nous ne peumes si tost aller après vous que trouver vous puissions. — Ah! ma dame, dist damp Abbez, pour ceste fois il leur soit pardonné. » Alors ma dame commença les edifices de damp Abbez qu'elle avoit veuz très grandement à louer; puis s'en va en son chariot monter; illec print damp Abbez d'elle congié. Que vous diroye je? Ne passa sepmaine de karesme que, comme devote, n'allast les pardons gaigner; et maintes fois, sans grant compaignie, premierement disner, banqueter et soupper; et, après son dormyr, aux regnars, taisons, et aultres déduitz, par les bois sou-

ventesfois chasser. Et par ainsi toute celle karesme passa le temps joyeusement.

CHAPITRE LXXIV

Comment la royne escript à ma dame la premiere fois.

L'ACTEUR. — Advint que les deux moys qu'elle avoit promis de retourner à la royne furent passés, sans faire savoir nouvelles d'elle par lectre, ne aultrement ; dont la royne, de ce très esmerveillée, luy rescripvit une lectre en la maniere qui s'ensuyt :

« A nostre très chière et très amée Cousine.

« Très chiere et très amée Cousine, actendu
« la promesse de vous à nous, dont les deux
« moys et demy sont jà passés, et oncques
« puis vostre partement une seulle parolle de
« par vous ne sceusmes, dont sommes très
« esmerveillez, vous requerant de vostre foy
« que pour tout ce present moys vous vueillez

« acquiter, tant avons desir de vous veoir ; et
 « se chose voulez, que nous peussions, de très
 « bon cueur l'accomplirons, ainsi que vous dira
 « nostre vaillant secretaire Julien de Broy,
 « auquel sur ce vueillez adjouster foy comme
 « à nous mesmes. Très chiere et amée Cousine,
 « nostre Seigneur soit garde de vous. Escript
 « en nostre ville de Paris, le huitiesme jour
 « d'apvril.

« BONNE. »

CHAPITRE LXXV

*Comment ma dame, sans oyr la creance, fait
 à la royne sa responce.*

L'ACTEUR. — Endementiers que ma dame estoit à l'abbaye pour acquerir les pardons, arriva ledict maistre Julien de Broy, secretaire de la royne, qui la trouva à table assise, où elle disnoit ; à laquelle franchement et lyement, comme l'ung de ses especiaux amys de court, pensant avoir très bonne chiere, luy presenta les lectres de la royne. Ma dame, qui de sa venue n'eut que desplaisir, à très peu de parolles print les lectres de la

royne et les leut ; dont, pour plus tost estre delivrée de luy, se hasta de disner et lever les tables ; puis incontinent s'en va en son hostel pour rescrire la responce, puis dist : « Ah ! maistre Julien, disnez et incontinent venez à moy. » Damp Abbez, qui gracieulx estoit, fist à maistre Julien très bonne chiere, et s'assist, pour deviser, viz à viz de luy ; et entendis qu'il disnoit, vint à damp Abbez ung de ses braconniers, qui dist avoir destourné ung très grant cerf, accompagné de dix ou douze biches. Pour veoir ung si bel deduyt, lors dist damp Abbez : « Je plains que ma dame n'est cy ; mais, à tout prendre, nous actendrons à demain. — Et comment, dist maistre Julien à damp Abbez, ma dame va elle chasser voulentiers ? — Voulentiers, dist damp Abbez sans y penser, ouy, deux ou trois jours la sepmaine, tant à pié qu'à cheval, puis à une chasse, puis à l'autre. — Et monseigneur l'Abbez, dist maistre Julien, estes vous garny de bons chiens et levriers ? — Se j'en suis garny ? oy, et de très bons oyseaulx aussi bien que prelat de France quel qu'il soit. — Sainte Marie ! dist maistre Julien, ce vous est un grant honneur. » Et, en devisant avecques damp Abbez, il vit en son doy le bel et gros ruby ballay qu'il avoit autresfois veu à ma dame, si n'en dist mot, mais pourtant jà n'en pensa moins ; et quant il eut disné et retenu

des parolles de damp Abbez ce qu'il veult, lors prent congié, le remerciant très humblement et très grandement; puis monta à cheval, et alla à ma dame, comme elle luy avoit dit, à laquelle il dist sa creance ainsi que sa lectre contenoit. Ma dame, qui de soy en delivrer fut deligente, luy bailla sa lectre de responce à la royne, qui fut telle qui s'ensuyt :

« A ma très redoubté et souveraine Dame,
« la Royne.

« Ma très redoubté dame et souveraine, à
« vostre très bonne grace humblement, tant
« que je puis, me recommande par maistre
« Julien de Broy, vostre secretaire. J'ai receu
« voz lectres et bien veu le contenu d'icelles,
« dont tant humblement, comme je puis, vous
« supplie que de ma promesse faillie vous
« plaise moy pardonner, à la necessité qui m'a
« tenue jusques à cy; combien que, Dieu
« mercy, je commance fort à amander. Et ung
« peu après que j'auray besogné avec mes
« gens, incontinent seray devers vous, pour
« acquiter ma foy; et au surplus vous plaise
« moy mander et commander pour très liement
« à mon pouvoir obeir. Au plaisir du saint
« Esperit, ma très redoubté et souveraine
« dame, que vous esjouissez comme desirez.

« Escript de ma main, le seiziesme jour
« d'apvril.

« Vostre très humble et obeissante. »

CHAPITRE LXXVI

*Comment ma dame bailla ses lectres à maistre
Julien, et luy dist sa creance.*

ET quant ma dame, par sa grant deli-
gence pour soy au plus tost delivrer de
maistre Julien, incontinent luy bailla sa
responce, et luy fist assez bonne chiere, et fait
boyre de son vin sans plus, et luy dist sa
creance telle qu'il luy pleut : comme quoi en la
court il estoit l'ung de ses plus obeissans
amys et privé d'elle, et pour ce la royne luy
avoit envoyé ; mais du grant desir que ma
dame avoit de son expedicion, et qu'il s'en fust
allé, oncques ne luy demanda du roy, ne de
seigneurs, ne de dames de la court, mais luy
dist tost adieu. Maistre Julien, qui avoit oyt
de ma dame et de damp Abbez les deduiz des

chasses qu'ilz faisoient, n'en pensa guieres moins de la verité ; il print congïé d'elle, et tira son chemin là où il peut aller le soir au giste ; et erra tant par ses journées qu'il vint à la royne qui luy dist, de tant loing qu'elle le vit : « Belle Cousine vient elle, maistre Julien ? — Ma dame, dist il froidement, elle se recommande très humblement à vostre bonne grace, et dit que l'avez bien brièvement. » Lors luy presenta sa lectre, et puis sa creance dist ; et, comme saige, pour lors ne luy dist plus avant. La royne, qui de la responce ne de la creance ne fut gueres contente, à maistre Julien dist : « Elle est en bon point ? — En bon point, dist maistre Julien, oncques en meilleur point ne la vyz. — Et que fait elle ? en quoy est elle occupée ? — Et par ma foy, dist maistre Julien, je ne sçay, car je n'ay mye arresté une heure avecques elle que je ne fuz despeschié, ne oncques peus parler à ma dame Jehanne, à ma dame Katherine, Ysabel, à homme, ne à femme de ses gens, fors à dire : « Vous soyez le très bien venu » ; et au retour : « A Dieu soyez. » — Et que peut ce estre, vous qui estiez des principaulx amys qu'elle ait ? » Lors luy compta comment, quant il avoit esté vers elle, en une abbaye, pour gaigner les pardons, il la trouva avecques damp Abbez viz à à viz table, à bien peu de gens ; et comment il

luy presenta les lectres, et que, après lectres receues, elle fist très mathe chere, tantost fist oster les tables et brider pour soy en aller en son hostel ; comment damp Abbez le fit seoir à table et disner, et comment le braconnier apporta la nouvelle d'avoir destourné un grant cerf et plusieurs biches, où ma dame devoit aller à la chasse, et plusieurs aultres choses luy dist ; mais du ruby balay qu'il vit au doy de damp Abbez, comme saige, n'en parla il oncques. La royne, qui entend ces parolles, pour ceste fois se teust, et luy deffend que à quelconques personne n'en dye riens, pour garder l'onneur de ma dame, en disant qu'il se falloit aulcunes fois, puis ès ungs puis ès autres, esbanoyer. Et à ces parolles, la royne toute pensive se departit, non cuydant que ma dame ainsi mesprint, ou voulüst mesprendre et faire faulte ; et pensa que, tout ce mois et demy l'aultre, actendroit pour luy renvoyer messaige, ne escripre. Ce moys et l'aultre furent passez que ma dame devers la royne ne vint, ne escripvit aulcunement ; lors la royne, de ce esmerveillée, fist faire une aultre lectre sur la substance des precedans. Le chevaucheur de son escurie qui porta les lectres, hasté de bien tost revenir, fist deligence telle que sur les champs avec damp Abbez la trouva, et presenta ses lectres ; ma dame, qui avecques damp Abbez estoit et devoit soupper là sur les

champs, fist sa responce par escript, qui conte-
noit que briefvement seroit à elle. Lors le che-
vaucheur print congié sans boire, sans mangier
et sans guieres aultre chose dire, et fist grant
deligence de retourner. La royne, receues et
bien leues les lectres, ainsi qu'il luy dist qu'il
l'avoit sur les champs avec damp Abbez trouvée,
fut dolente, et en soy pensa que plus ne luy
escriproit, et que elle venist, ou demourast tant
que elle voudroit. Ma dame, qui de laisser son
beau père, luy estoit une mortelle douleur, luy
dist : « Mon seul amy, tant que je pourray fuyr
et retarder, votre désirée compaignie, soyez
certain, n'abandonneray. » Que vous diroye je ?
En chasses et en voullers, en gibiers et maints
aultres deduytz, une partie de l'esté passerent.

**Et à tant laisseray cy à parler des grans plaisirs
que l'ung et l'aultre prenoient, et retourneray
au seigneur de Saintre et à ses compaignons.**

CHAPITRE LXXVII

Comment le seigneur de Saintré et ses compagnons vindrent à la court de l'empereur; et comment à leur grant honneur furent, par les seigneurs ci après nommez, delivrez de leurs armes, tous hommes nobles de nom et d'armes.

C'EST assavoir : le conte d'Estainbourg, qui portoit de gueulles au chief d'argent.

Le conte d'Espenchen, qui portoit eschaqueté d'or et de gueulles.

Le seigneur d'Escruvenosse, qui portoit à tourteaulx de gueulles et d'argent.

Le seigneur de Floraille, qui portoit d'argent à ung saultouer de gueulles.

Le seigneur d'Esmalle, qui portoit d'or à une croix de sinople.

Le seigneur de Hufallaise, qui portoit d'or à une croix d'asur.

Le seigneur de Wassebech, qui portoit d'or à ung escusson de sinople.

Le seigneur de Huppain, qui portoit de gueulles à trois lousenges d'argent.

Le seigneur de Congié, qui portoit d'or à une faisce de gueulles.

Le seigneur de Feulx, qui portoit de gueulles à une croix d'argent.

Quant la nouvelle fut à la court de l'empereur que dix barons de France venoient et portoient emprises d'armes, le bruyt qui les delivreroient en fut grant. Lors furent les seigneurs et barons cy devant nommez, qui ensemble furent à l'empereur supplier qu'il lui pleust consentir qu'ilz les delivrassent; et l'empereur voulentiers leur octroya. Alors chascun se mist en point de toutes choses necessaires, tous dix ensemble firent aux François leur gracieuse responce; et n'y eut celuy qui ne donnast au roy d'armes robbes, bagues et vaisselle d'argent. Si ne tarda mie long temps que leurs fourriers, pour prendre leur logis, vindrent, puis eulx dedans huyt jours. L'empereur, comme très saige prince, fist à luy venir lesdits seigneurs, et vult savoir s'ilz estoient d'acord lesquels choysiroient; si fist mettre en escript le nom des François, ainsi que en la lectre nommez estoient, pour les oster du desbat, lors fist jouer au sort celuy qu'ilz choysiroient, dont chascun fut très content.

CHAPITRE LXXVIII

Comment les François vindrent, et le grant honneur qu'on leur fist.

QUANT le seigneur de Saintré et sa très belle compagnie furent de la cité de Coulongnes à demye journée près, place ordonnée où l'empereur et l'empereire furent venuz pour veoir les armes, firent à leurs gens savoir que là estoient, et qu'ilz seroient à eulx au soupper. Laquelle venue sceue, l'empereur au devant eulx envoya son cousin le duc de Brunsvich, pour conduire le seigneur de Saintré, et neuf contes viz à viz chascun des aultres, et avecques eulx plusieurs barons, banneretz, chevaliers et escuiers, tous nobles hommes grandement accompaignez ; et ainsi fut. Et quant ilz furent assez près de la ville, l'empereur ordonna que les deux contes et huit barons, qui delivrer les devoient, feussent tous vestuz pareilz, ainsi que les François estoient, et au devant d'eulx bien et grandement accompaignez ; et ainsi fut que très grans joyes et honneurs se firent. Lors, ainsi comme

L'empereur eut ordonné, chacun d'eux à la senestre de son compaignon se mist, quelconques prieres que les François faisoient, et à la dextre les premiers costés. Et en celle belle ordonnance et compaignie, par la cité et devant le palais où l'empereur et l'empriere estoient, furent conduyts en leurs hostels. Des autres serimonies et ordonnances des heraulx, des trompetes et des menestriers, pour abreger, je ne passe; aussi des honneurs et des bonnes choses que les ungs aux autres firent, par de quinze jours que illec sejournerent.

CHAPITRE LXXIX

Comment la bataille fut, et l'ordonnance de l'empereur.

L'ACTEUR. — Le huitiesme jour après leur venue, fut jour ordonné que la bataille seroit. Les lices faictes, l'empereur en son hourt, accompagné des princes de sa court, et d'autres princes et barons venuz

pour veoir les armes, et l'emperiere en son hourt à la senestre, accompagnée de maints princes et d'autres dames de grant façon, l'empeur demanda premier le cry du seigneur de Saintré nommement, et de ses neuf compaignons, lesquels au second appel furent venuz. Et ainsi fut il des Allmans, dont, pour abreger, à très belles et grandes compaignies vindrent. Et quant les ungs et les aultres en leurs pavillons furent, et eurent faits leurs sermens acoustumés, l'empeur les fist yssir d'une part et d'autre, leurs coctes d'armes vestues, que très belle chose estoit, et Saintré ou meillieu des siens. Les deffenses furent criées; chascun François, qui tenoit sa bannerolle en sa main, en fist un grant signe de la croix, puis la baisa et la bailla. Lors chascun, armé de ce qu'il devoit, prent sa peusiné en sa main senestre, lors baissa sa visiere, et sa lance de gect en sa dextre main, et en très belle et joieuse contenance, les ungs devant les aultres, jusques au commander de l'empeur qu'ilz feissent leurs devoirs, et que on les laissast aller. Alors, tant d'ung cousté comme d'autre, desmarchans comme lions, à l'assembler et gect de lance, deux François furent blessiez, mais non de chose de quoy ilz laissassent à besongner, et trois des Allmans, dont l'ung eut le pié percé. Lors commença la bataille si fiere et si dure

que c'estoit merveille, et toujours fut combattue sur la partie des Allemans, que pour tel nombre de gens oncques semblable ne fut, qui dura moult longuement; en laquelle le seigneur de Saintré avoit ja son compaignon demarché fort arriens. Quant l'empereur veit la vaillance de ces gens, ou que l'ung party ou l'autre falloit que rompiet, alors s'escriya, et dist : « Hélas ! où estoit mon cuer de souffrir ung tel inconvenient ! » Lors hastivement jecta sa fleche, en disant : « Ho ! » Lors furent tous prins et tirés chacun party à son pavillon. Adonc l'empereur les fist tous devant luy venir, et de leurs chiefs et gentils decarner, et ordonna faire appareiller les blessez; puis fist demander à tous les vingt compaignons leurs prix qu'ilz devoient payer l'ung à l'autre, s'ilz eussent perdu, lesquels luy furent apportez. Lors les bailla au roy d'armes de l'empire, et ordonna rendre à chascun le sien, et de sa part leur dire les parolles qui s'ensuyvent.

CHAPITRE LXXX

Comment le roy d'armes de l'empire rendit les prix, et parla aux champions.

L'ACTEUR. — Les parolles de l'empereur finées, le roy d'armes descendit, et quant vint aux champions, leur dist : « Messieurs les contes et aultres seigneurs Allmans et François, tous qui estes cy ; le très chrestien et vertueux prince et nostre souverain seigneur, le roy des Romains et empereur, qui est cy, m'a commandé vous dire que vous tous, tant d'un cousté que d'autre, Allmans et François, avez aujourd'hui si haultement combatu et si honnourablement faictes voz armes et voz devoirs, que ne sont aucuns qui l'eussent peu mieulx faire ; et tant que, à paine, quant fustes prins, porroit on juger lequel de vous tous, ne lequel party avoit du meilleur ; et pour ce, vult et ordonne que les ungs aux aultres, chascun à son compaignon, donne courtoisement et amiablement son pris, comme s'il avoit gagné ; mais pour ce que, vous, messei-

gneurs les François, par vos veillances avec sans demarcher tenue la bataille sur le party et terrain de messeigneurs les Allemans, l'empereur vouty jage et ordonna que, pour ce, ils s'acquiescent et vous paient les premiers, et puis vous à eulx, afin que vos très belles dames ne perdent nia leurs droitz; et accorda que au saillir des lances, soient deux à deux, par à par; et, vous, messeigneurs les François, pour l'honneur de voz armes, ystrez à la main dextre. » Alors tous à genoulz à l'empereur remercièrent, puis s'acquiescent à grans honneurs, les ungs aux aultres de leurs pris; et puis, comme ordonné estoit, ilz yssirent hors. Lors les ungs des aultres prindrent congïé, et s'en vont desarmer en leur logeis jusques au soir, qu'ilz soupperent avec l'empereur, et le lendemain disnerent avec l'emperiere qui leur fist très grant chiere et honneurs; et les ungs avec les aultres disnerent et soupperent tous les jours jusques au quinzième jour de leur venue, qu'ilz disnerent de rechief avec l'empereur. Et lors de luy, de l'emperiere et des aultres seigneurs et dames prindrent congïé, qui leur donnerent drap d'or et de soye, vaiselle d'argent et de beaulx destriers, et maints aultres beaulx dons, et aussi leurs compaignons à eulx, et eulx à leurs compaignons. Lors, après leurs congïés prins, à cheval monterent, très grande-

ment accompaignez de plusieurs seigneurs une bonne lieue; alors à très grans honneurs et courtoisies, les ungs des aultres prindrent congié. Et par maints jours après louerent tous et toutes, leurs grans honneurs et vaillances, et aussi du bel estat et compaignie qu'ilz menoiert, disant les ungs aux aultres publicquement, que se l'empereur eust tant soit peu tardé de les faire prendre et departir, que vrayement ilz estoient au dessous; car l'ung estoit fort blecié au pié tout oultre tant qu'il n'en pouoit plus, et les aultres deux avoient jà perdu de leur sang tant qu'ilz estoient presque pasmez, et oultre avoient perdue place grandement; si que la journée estoit pour eulx. Et à tant laisseray cy à parler de leurs armes et de leur très joyeux retour, et diray de leur venue devers le roy.

CHAPITRE LXXXI

*Comment le seigneur de Saintré et ses compaignons
sont venus devers le roy.*

L'ACTEUR. — Quant le seigneur de Saintré et les autres seigneurs ses compaignons vindrent, par Lunarches, à Saint Cosme et Saint Damien pelerins, puis le soir à Saint Denys, la nouvelle fut par tout de leur très joieuse et désirée venue ; dont le roy, la royne, les seigneurs et dames, et ung chascun furent très joyeux. Au devant leur furent, par ordonnance du roy, messeigneurs les ducs de Berry et de Bourgogne, freres, qui ou meillieu d'eulx menerent le seigneur de Saintré. Et y furent les contes de la Marche, de Flandres, de Clermont, de Rethel, de Brienne, du Perche, de Beaumont, d'Armignac et le conte Dauphin d'Auvergne, ordonné chascun de accompagner le sien. Et quant ilz furent devers le roy, il leur fist très bonne chere, aussi la royne et les autres seigneurs, dames et damoyelles, et tous ceulx de la court ; dont,

pour abreger, quant tous eurent faictes leurs reverences et bonnes chieres, et que de leur retour furent aucun peu repousés, le seigneur de Saintré, tout esbay et esmerveillé de ce qu'il ne veit ma dame, comme celle que plus ou monde il desiroit, doubtta qu'elle fut malade ; lors se traict devers ma dame de Sainte More, sa cosine, et d'une parolle après les aultres, comme se riens n'y pensast, luy dist : « Hé ! vraiment, ma cosine, quant je me advise, est ma dame malade, car elle n'est mye ycy ? — Ma dame, dist elle, est bien malade ; quant au cueur de la royne, elle a bien pyssé en son jacques de soye ; car environ trois sepmaines après que fustes party, une maladie la print telle que à veue d'oeil elle seichoit, tellement que, selon le dit du phisicien de la royne, elle estoit bien brief ethicque ou morte, se son ayr naturel ne l'eust retournée. Et lors pour deux moys la royne luy donna congié, et au bout de deux moys et demy, actendu qu'elle ne venoit, la royne l'envoya requerir de sa foy, et luy escripvit par maistre Julien de Broy, et depuis au chief d'aultres deux moys encores luy escripvit, et elle tousjours dist : « Je viens, je viens ; » et encores est à venir. » Quant monseigneur de Saintré entend qu'elle fut ainsi malade, si pensa aux choses qu'elle luy avoit dictes, c'est que jamais son cueur n'auroit joye jusques

il feust revenu ; si s'apensa, ainsi que vray estoit, que pour oblir ses amoureuses douleurs s'en estoit allée. Lors fut assez plus joieulx qu'il n'avoit esté ; si s'apensa que vrayement, avant qu'elle sceust sa venue, par laquelle aussi tost que elle le sçauroit, tantost elle retourneroit, mais vraiment il convenoit que avant son retour il l'allast veoir, pour plus à loisir avec elle deviser. Si fut en ce pensement dix ou douze jours, lors dist au roy : « Sire, se c'estoit vostre plaisir pour aucuns jours moy donner congïé pour aller veoir huit ou dix jours ma dame ma mere qui le m'a mandé, très humblement vous en voudroye supplier. » Le roy luy dist : « Et comment, Saintré, vous ne povez arrester ? mais pour ce que vostre mere le vous a mandé, pour ung moys nous vous donnons congïé. » Et quant le seigneur de Saintré l'eut remercyé, lors jour et nuyct ne cessa de faire habiller ses gens, et luy aussi, et ses chevaux, pour plus amoureusement complaire à celle qui tout son cueur avoit. Puis prent congïé du roy, de la royne et de messeigneurs, et ne cessa oncques tant qu'il vint à la bonne ville, à une lieue de l'hostel où ma dame estoit, et là disnast. Puis se mist en point d'un pourpoint de cramoisi broché de fin or, de chausses d'escarlata brodées de très fines perles, aux couleurs et devises de ma

dame, une barecte d'une très fine escarlate, que en ce temps on portoit, où estoit ung très bel et riche aficquet ; accompagné de deux chevaliers et douze escuiers de son hostel, bien en point, et tous vestus de semblables robes à la devise de ma dame, la vint veoir en son hostel. Et quant il fut à la porte, le portier vint, qui leur demanda qu'ilz vouloient ; et il luy dist que il fist assavoir à ma dame que là estoit monseigneur de Saintré. « Vraiment, dist le portier, elle est allée ce matin à l'abbaye oir messe, et puis disner là. » Lors s'en alla en celle abbaye, et trouva que ma dame et damp Abbez estoient allez, après disner et dormir, en gibier des espreviers. Lors se fist monstrer quelle part il les trouveroit, et quant il fut ung peu eslongné, il appela quatre ou cinq de ses gens, et leur dist : « Picquez des esperons, et allez là, et vous là, et vous là ; et se voyez dames à cheval, venez à moy. » Lors chascun alla sur les champs, et ne tarda guieres que l'ung tout courant retourna, et dist : « Monseigneur, j'ay veu environ vingt chevaulx, où sont sept ou huit dames, ou damoyelles attournées. » Alors le bon chevalier, qui encores les faulces amours de ma dame n'avoit sceues ne pensées, chevaucha tant que cheval peut galloper, ne cuydant jamais veoir l'eure que sa très belle et désirée dame il peust veoir. Et

quant il l'apperceut, il eut tout le cœur ravy de joye, ainsi joly qu'il et tous ses gens estoient, brocha son bel et fringant destrier droit à elle. Là estoit ung des moynnes de damp Abbez, qui les vit et s'approcha de damp Abbez et luy dit. Quant damp Abbez, qui per à per de ma dame estoit, vit chevaulx courir, qui fut seur ne fut il mye ; car il pensa que ce fussent aulcuns parens de ma dame, qui se fussent advisez de leurs amours, et luy vouldissent son habit fourrer. Lors vira et tallonna sa mulle bien tost à cousté ; et, son espievier sur le poing, lui, atout ses moynnes qui portoient grans bouteilles et le gardemenger pour refrechir, tant qu'il peut se tira à l'equart, comme se il n'osoit de ma dame approcher ; et de fait l'abandonna. Ma dame, pour veoir quelz gens c'estoient, son espievier sur le poing, et sur sa grosse hacquenée, toute coye, avec ses gens les actendit. Et quant ses gens recogneurent que c'estoit le seigneur de Saintré : « Dieu, dist elle, vous mecte tous et toutes en malle estrance ! Faut il que pour ung homme ainsi desvoyez ? » Et, en disant ces parolles, le seigneur de Saintré, le cueur ravy de joye, prestement descendit, et quant ma dame le vit à terre, commença à crier si hault que plusieurs l'entendirent, et luy dist : « Ha ! sire, le très mal venu soyez vous. »

Le seigneur de Saintré, qui mye n'entendoit ces parolles, à très grant joye, un genoil bas, luy toucha la main, et dist : « Ha ! ma très redoubtée dame, comment vous est ? — Comment, dist elle, faut-il demander ce qu'on voit ? Ne voyez vous pas bien que je suis sur ma hacquenée et tiens mon esprevier. » Alors vira sa hacquenée et appella ses chiens pour giboyer, comme celle qui de luy ne tint compte, et qui le mesprise. Saintré, qui oyt de ma dame sa très cruelle responce, ne sceut que penser, fors que au passer que les dames et damoysselles firent, à toutes toucha la main, accolla et baisa, puis monta à cheval et va après ma dame ; et lors chascun luy vint faire la reverence et saluer. Et quant il fut approché de ma dame, tout pensif luy dist : « Hé ! ma dame, esse à bon escient, ou pour moy essayer, que si foible responce m'avez faicte, moy qui suis celuy qui tant vous ay aymée, et suis celuy qui oncques ne vous desobeys ? Hé ! ma dame, est il nully qui vous ay dit le contraire ? s'il est aucun, vous en verrez la vérité. » Ma dame, qui desplaisir prenoit de sa compaignie et en toutes ces parolles, luy dist : « Savez vous aultre chanson que ceste ? se n'en sçavez, que vous taisez. » Et endementiers que ces parolles estoient, damp Abbez fust assureé, et fist demander au maistre d'hostel, par ung de ses

moynnes, qui ce seigneur estoit. Et quant damp Abbez sceut que c'estoit le seigneur de Saintré, lors le vint saluer, et dist : « Mon très honoré seigneur, vous et vostre compaignie, soyez vous les très bien venuz, car, sur ma foy, j'avoie plus grant desir de vous veoir, que seigneur de ce monde. » Le seigneur de Saintré, qui à ces parolles comprint que c'estoit l'Abbez, et aux moynnes qui derriere luy venoient, luy dist : « Damp Abbez, vous soyez le très bien trouvé, et aussi vostre compaignie. — Monseigneur, dist damp Abbez, qui du tout fut asseuré, et que dictes vous de ma très redouptée dame, qui tant s'est voulu incliner que de prendre la patience avec son povre moynne, pour venir giboier. — Ma dame, dist le seigneur de Saintré, **faict comme dame de tout bien et de tout honneur, et est honorable occupation pour plus joieusement passer le temps, et si « toujours amé sainte Eglise. » Et à ces parolles, pas à pas damp Abbez se esloigna, et lessa ma dame et le seigneur de Saintré ensemble, car ja estoient vespres sonnées. Damp Abbez s'approcha de l'ostel, et manda par ung de ses moynnes au maistre d'ostel qu'il sceut à ma dame se on retendroit le seigneur de Saintré au soupper. Le maistre d'ostel s'approcha de ma dame, et luy dist ce que damp Abbez luy mandoit ; ma dame, qui pas bien ne l'entendit**

de prime face, luy demandoit qu'il disoit ; lors redist si hault que le seigneur de Saintré l'entendit. Et quant ma dame l'eut entendu, si pensa ung peu, et puis luy dist : « Mandez luy que ce qu'il voudra en face, mais ne luy déchirez mye sa robbe de trop prier. » Le seigneur de Saintré, qui tout ce eut oy, et qui congneut bien la chose, se pensa et en soy dist qu'on ne luy rompist mie sa robbe, que pour bien veoir la farce au premier prier se consentiroit. Ma dame, qui de ses premieres amours ennuyée estoit, dist qu'elle estoit traveillée, et qu'on tirast à l'ostel. Damp Abbez, qui estoit gracieulx sire, estoit jà devant, qui avoit fait jà tout apprester. Le seigneur de Saintré descendit de dessus son cheval, et vout à ma dame aider à descendre, mais elle demanda ung de ses gens ; et quant elle fut à pié, le seigneur de Saintré vout prendre de ma dame congié ; et ainsi qu'elle luy tendoit la main, damp Abbez, pour monstrier sa courtoisie, dist à ma dame : « L'en laisserez vous aller ? — Je m'en attens à vous et à luy, dist elle. » Lors damp Abbez luy dist : « Hé ! monseigneur de Saintré, ne prendrez vous mye avec ma dame la patience ? et je vous en prie, demourez. » Alors le seigneur de Saintré dist à damp Abbez : « Monseigneur, à vostre premiere requeste ne vueil mye desobeyr, ne reffuser. »

Lors le seigneur de Saintré retint deux escuyers, ung varlet et un page sans plus, et le surplus renvoya à la bonne ville soupper, et au maistre d'ostel dist que bien tost à l'hostel de ma dame revensissent devers luy. Lors furent les tables mises, et le soupper tout prest. Ma dame lava ses mains seulle, damp Abbez et le seigneur de Saintré après. Lors, pour cause d'estât et de la dignité, damp Abbez fut assis au hault bout de la table, le viz tourné au bas bout devers ma dame, et le doz au bout du banc appuyé; ma dame après, et puis le seigneur de Saintré, dame Jehanne et dame Katherine après. Lors tout premier furent serviz de sallade que ma dame et damp Abbez mangeoient volentiers; puis les grans platz tous combles de lapereaulx, de perdriaulx et de gros pigeons d'ostel, et de très bons vins de Beaulne, de Tournon et de Saint Boursain. Et quant les pances furent comme remplies, à l'eure que les langues commencerent à deslier, alors damp Abbez se commença à reveiller, et dist : « Ho ! monseigneur de Saintré, reveillez vous, reveillez ! je boy à votre pensée, et qu'est ce cy ? vous ne faictes que penser. » Lors le seigneur de Saintré luy dist : « Monseigneur l'Abbez, je me combas à tant de bonnes viandes et de bons vins que je voy devant moy, que je n'ay loysir d'aulture chose faire. — Monseigneur de Sain-

tré, dis damp Abbez, vous ne savez, j'ay plusieurs fois pensé si peut estre que entre vous aultres nobles hommes, chevaliers et escuiers, qui faictes si souvent armes, et quant ilz reviennent, ilz dient qu'ilz ont gagné. » Lors tourna son parler à ma dame, et luy dist : « Ma dame, n'est il mye ainsi ? — Vrayement, Abbez, dist ma dame, vous dictes verité, et que puisse ce estre ? beau sire, dictes nous vostre cuyder. — Ma dame, dist damp Abbez, voulez vous doncques que je vous dye, ce sera de vostre congié et commandement, je ne sçay se monseigneur de Saintré m'en saura aucun mauvais gré ; mais puisque le voulez, ma dame, mon penser est tel : Ilz sont plusieurs chevaliers et escuyers en la court du roy et de la royne, et d'aultres seigneurs et dames, et aussi d'aucuns aultres, qui dient estre des dames si loyaulx amoureux ; et pour acquerir voz graces, s'ilz ne les ont, pleurent devant vous, souspirent et gemissent, et font si les douloureux que par force de pitié, entre vous, povres dames qui avez les cueurs tendres et piteux, fault que en soyez deceues, et que tombez en leurs desirs et leurs lacs ; et puis s'en vont de l'une à l'aultre, et prennent une emprise d'une jartiere, d'ung bracelet, d'une rondelle ou d'ung navet, que sçay je ? ma dame, et puis vous dient ung tout seul à dix ou douze : « Hé ! ma dame, je

porte ceste emprise pour l'amour de vous. » Hé ! povres dames, comment estes vous abusées de voz amoureux en plusieurs faitz, desquelz n'est mie en ce cas toute loyauté envers sa dame. Alors le roy, la royne et tous les seigneurs, les louent et present, et donnent de leurs biens largement, dont ilz se mectent bien en point. Et n'est il mie vray ? ma dame, qu'en dictes vous ? » Ma dame, qui de ce oyr fut bien aise, en soubzriant luy dist : « Et qui le vous a dit, Abbez ? quant à moy, je croy qu'il soit ainsi. » Et en disant ces parolles, elle marchoit sur les piés de damp Abbez. « Encores, ma dame, vous dis je plus, quant ces chevaliers ou escuiers vont faire leurs armes, et ont prins congié du roy, s'il faict froit, ilz s'en vont à ces poiles d'Allemagne, se rigollent avecques ces filletes tout l'yver ; et s'il fait chault, ilz s'en vont en ces delicieux royaumes de Cecille et d'Arragon, à ces bons vins et viandes, à ces fontaines et bons fruitz, et à ces très beaulx jardins, et tout l'esté repaistre leurs yeulx de ces très belles dames et gentilzhommes, qui leur font très bonne chiere et honneur assez ; puis ont ung vieil menestrier ou trompette qui porte un vieil esmail, et luy donnent une de leurs vieilles robbes, et crye à la court : « Monseigneur a gaigné ! Monseigneur a gaigné, comme vaillant, le pris

des armes ! » Et, povres dames, n'y estes vous pas abusées ? et par ma foy je vous plains. » Ma dame, qui de ces parolles estoit si ayse que plus ne pouvoit, tourna ung peu sa teste, et dist au seigneur de Saintré : « Qu'en dictes vous, seigneur de Saintré ? » Le seigneur de Saintré, très desplaisant de la charge et injure que donnoit aux gentilzhommes damp Abbez, dist à ma dame : « S'il vous plaisoit tenir la part des gentilzhommes, vous sçavez bien le contraire, ma dame. » Lors dist ma dame : « Nous avons bien veu d'aucuns qui n'ont mye fait ainsi ; mais que savons nous des aultres ? Quant à nous, nous sommes de l'oppinion de l'Abbez. » En disant ces parolles, elle luy marchoit sur le pié, en soubzriant, et guignoit à damp Abbez. « Ha ! ma dame, dist le seigneur de Saintré, vous parlez ores bien à vostre voulenté ; si prie à Dieu que congnoissance parfaite vous en doint. » Lors dist damp Abbez : « Et quelle congnoissance voulez vous plus que ma dame ayt de la verité de la chose ? — De la verité, dist le seigneur de Saintré, monseigneur l'Abbez, au parler de ma dame je ne dyz riens, elle peut dire que luy plaist ; mais je repons à voz parolles, dont avez chargé les chevaliers et escuiers, que se vous feussiez homme à qui je deusse respondre, que trouveriez à qui parler ; mais, actendu la dignité et

celuy à qui vous estes, je ne dy plus riens, et par aventure quelque fois vous sera recordé. » Damp Abbez, qui estoit du feu d'amours tout alumé, comme par moquerie à ma dame dit : « Ma dame, c'est par vous que je suis en vostre ostel menassé. » Et en ce disant, la guerre des piés de l'ung à l'aultre estoit sans cesser. Et quant il vit ma dame soubzrire et guigner, sceut bien que le jeu à ma dame plaisoit, si dist : « Ho ! monseigneur de Saintré, je ne suis batailleur, ne homme d'armes, je suis ung povre et simple moyne, qui vis de ce que avons, pour l'amour de Dieu ; mais s'il estoit homme, quel qu'il soit, qui vouldist dire le contraire sur ceste querelle, je lucteray à luy. — Feriez, dist tantost ma dame, seriez vous bien si hardi ? — Ma dame, je ne puis que **tomber, mais j'espere en Dieu et en ma bcnne et saine querelle que je viendray au dessus ; avant, a il icy homme qui responde de trestous ces batailleurs ? »** Le seigneur de Saintré, qui veoit les oultraygeuses parolles de damp Abbez, qu'il luy sembloit de part en part avoir le cueur percé, et tant plus de la faveur que ma dame luy faisoit, vouldist estre mort. Ma dame, qui ce veoit sans dire mot, luy dist : « **Hé ! seigneur de Saintré, vous qui estes si vaillant et avez fait, comme on dit, tant de belles armes, n'oseriez vous lucter à l'Abbez ?**

certes, se vous ne le faictes, je diray comme luy. — Hé! ma dame, vous savez, dist il, que oncques je ne fuz lucteur, et ces seigneurs moynnes en sont les maistres, aussi de jouer à la paulme, gecter barres, pierres et paulx de fer, et se essayent en tout quant ilz sont à leur privé; et pour ce, je sçay bien, ma dame, que contre luy riens je ne pourroye. — Et je vous en prie, dist ma dame, or verray se vous m'escondyrez; et par ma foy, se ne le faictes, en toutes places je vous repprouveray, et tien-dray pour un très lasche cueur de chevalier. — Hé! que dictes vous? ma dame, j'ay assez plus fait pour aulcune dame; mais puisque ainsi est, j'accompliray vostre plaisir. — Qu'est ce qu'il dit, dist damp Abbez? — Il dist, dist ma dame, qu'il ne vous faudra mye à cest besoing, et qu'il a fait plus forte chose. — Le dit il, ma dame, or le verrons. » Alors, sans plus actendre, ne lever aulcune chose dessus les tables, damp Abbez, tout plain de joye, saillit le premier de là, puis ma dame et le seigneur de Saintré, et de ce furent tous les aultres esmerveillez. Lors damp Abbez print ma dame premierement, et en ung très beau preau la maine, ou quel le soleil estoit passé, et luy dist: « Ma dame, seez vous cy soubz ce bel aubespain couronné, et serez nostre juge. » Et ma dame s'assit si très joyeuse que plus ne pouvoit, et

fist ses femmes asseoir emprés elle ; des choses qu'elles appercevoient, combien qu'elles dissimuloient, peu y en avoit à qui la chose pleust. Lors fist damp Abbez ce que saint Benoit, saint Robert, saint Augustin, ne saint Bernard, qui furent prelatz de sainte Eglise, n'eussent mie faicte en leur vivant, car illec publicquement se mist en pourpoint, destacha ses chausses, qui en ce temps ne s'entretenoient mie, et les avalla soubz les genoux ; après vint devant ma dame tout le premier, et après sa reverence faicte, riseement fist ung tour, en saillant en l'air, monstrant ses grosses cuysse pellues et vellues comme ung ours. Après vint le seigneur de Saintré, qui à ung bout du preau s'estoit deshabillié, ses chausses estant richement brodées à grosses perles ; et vint à ma dame faire sa reverence, en feignant la très amere douleur qu'il avoit au cueur. Lors l'ung devant l'aultre furent ; mais, avant que la lutte fust commencée, damp Abbez se vira à ma dame, et par mocquerie, à ung genoul à terre, luy dist : « Ma dame, à mains jointes, je vous prie que à monseigneur de Saintré me recommandez. » Ma dame, qui congnoissoit bien la force de l'Abbez, en soubzriant dist au seigneur de Saintré : « Hé ! seigneur de Saintré, je vous recommande nostre Abbez, et vous prie que l'espargnez un peu. » Le seigneur de Saintré,

qui congneut bien la mocquerie, dist : « Ha ! ma dame, j'auroye plus grant besoing d'estre à luy recommandé. » Ces parolles finées, damp Abbez et le seigneur de Saintré s'entreprendrent, et tournoyèrent ung ou deux tours. Lors damp Abbez estent sa jambe, et par dedans la lye à celle de Saintré, puis, tout à coup, se deslie, et par dehors tellement le trousse que les piés du seigneur de Saintré furent assez plus haults que la teste et sur l'erbe l'abatit ; et en le tenant souz luy, damp Abbez à ma dame dist : « Ma dame, recommandez moy au seigneur de Saintré ! » Lors ma dame, en très fort riant, luy dist : « Hé ! seigneur de Saintré, ayez pour recommandé nostre Abbez. » Mais de joye qu'elle avoit, et de rire, à peine pouvoit elle parler. Lors damp Abbez se leva et se remist sur ses piés, et en riant ma dame luy dist : « Encores une aultre fois, » si hault que tous l'entendoient. Alors damp Abbez dist : « Ma dame, ce que j'ay faict, c'est pour l'amour de la querelle dont Dieu et amours m'ont esté tesmoins ; mais se le seigneur de Saintré vouloit soubztenir qu'il aymast plus loyaument sa dame que je ne fais la myenne, veez cy ung foible et simple moynne qui à ceste bataille le combatra. — Feriez, dist ma dame ? — Se je le feroye ? par Dieu, ouy, contre tous ceulx qui voudront venir à moy. » Alors ma dame

au seigneur de Saintré dist tout en riant : « Qu'en dictes vous, beau sire, est il cueur de gentilhomme qui n'y respondist? — Ma dame, dist le seigneur de Saintré, il n'est cueur de gentilhomme qui à son pareil ne respondist, et en la façon que en tel cas appartient. » Ce sont excusacions, dist ma dame, aussi vouliez excuser de l'autre querelle; bien fait à reproucher le cueur d'ung gentilhomme qui, pour une lucte, n'ose soubztenir sa loyauté; et en verité je croy que qui bien y querroit, en vous peu s'en trouveroit. « Helas! ma dame, dist le seigneur de Saintré, et pourquoy dictes vous cecy? — Je vous le dy, car vous vous sentez avoir tort, et il est ainsi. » Alors le seigneur de Saintré dist : « Or voy je bien, ma dame, qu'il faut recommencer, et qu'il n'est excuse, tant soit raisonnable, qui en peust desmouvoir, et puis qu'il vous plaist, j'en suis content. » Damp Abbez, qui oyoit toutes ces choses, par maniere de farce, dist : « Ha! ma dame, je n'oseroye, car se ne fust le bon droit que j'avoye, il m'eust foulé et mis au bas, tant ay treuvé de force en luy, qu'il n'est mie de merveilles s'il a tant de gens desconfit; mais puisque j'en ay emprís la querelle, je la vueil soustenir. » Et lors crie : « Arriere! arriere! » et chascun en arriere se retraict. Damp Abbez, qui estoit esmouvé et hors de toute contenance ou sens arresté, se

print à escriyer : « Ha ! loyaulté, garde ton droit ! » Et à ces parolles, au seigneur de Saintré se traict, et par le tour d'une estrappe à bien peu qu'il ne l'emporta ; mais tant virent et tournerent que d'une aultre trousse, assez plus forte que la premiere, le seigneur de Saintré abatit, et puis dist à ma dame « Et nostre juge, ay je bien fait mon devoir ? qui est le plus loyal ? — Qui l'est, dist ma dame, vous qui l'avez gaigné. » Le povre seigneur de Saintré, qui de la lucte et du grant plaisir que ma dame y avoit prins, et mesmement à le veoir le plus foible sachant, au moins de lucter, ne sçavoit ung seul mot dire ; lors chascun s'en alla revestir. Les deux escuyers qui, pour le servir, demourez estoient, cuyderent bien de dueil mourir, quant ilz virent que ma dame et damp Abbez farçoient et derizoient le seigneur de Saintré qui tant estoit honorable et vaillant chevallier, que de son pareil ne peust on mye finer ou royaulme de France, et luy dirent : « Vous ne seriez mye homme, se vous ne vous vengez de cette derision. » Et il leur dist : « Ne vous en souciez, aiez en pacience comme moy, et me laissez faire. » Le seigneur de Saintré, qui de tous poins avoit si hautement perdu l'amour de sa dame, par la desloyauté d'elle, que tant et si loyaulment servie l'avoit, comme bien attrempé, print en soy

maniere telle comme se du tout ne feust riens esté. Lors à grant façon de lie chiere vint redoubler la liesse de ma dame avecques celle de damp Abbez, et dist : « Helas ! ma dame, et que ce fut un grant dommage quant ung si bel et puissant corps d'omme, comme monseigneur l'Abbez est, n'a esté mis aux armes pour tenir en une frontiere contre les ennemys de ce royaulme ; car je ne congnois ne deux ne trois, tant soyent puissans hommes, qu'il ne les eust bien mys à fin. » Damp Abbez, qui oyt de luy telles nouvelles louanges, se lieve en l'air, et tour en tour saulte un saut devant ma dame et sa compaignie. Et lors il commanda le vin et les serises pour refreschir.

DE L'AMBASSADE DU COUVENT

L'ACTEUR. — Et endementiers que ces parolles estoient, les prieurs et anciens religieux du couvent, ausquels la vie de damp Abbez desplaisoit grandement, et tant plus qu'ilz avoient oy parler de la lutte et des mocqueries de ma dame et de damp Abbez qui aussi ne faisoit mie, ne monstroit les œuvres de bon religieux, mais dissolue et chetive vie, ordonnerent que deux à damp Abbez yroient parler de par le couvent, et luy diroient les parolles qui s'ensuyvent :

« Reverend pere en Dieu et mon très honoré seigneur, les prieurs et administrateurs de vostre couvent, *una voce dicentes*, après leurs humbles et convenables recommandacions, à vous nous envoient ; ilz ont sceu que vous, par plusieurs fois, avez donné à nostre très redoubtée dame mains diners, soupers et aultres deduitz, dont en tant qu'elle est nostre patronne et fonderesse, tout le couvent en est content ; et de tant mieulx quant avez à ce soir amené ung tel seigneur, comme le seigneur de Saintré, duquel sont par tout les belles nouvelles, et qui est si prochain familier de nostre sire, le roy. Mais de tant que vous estes avancé et ingeré de l'avoir requiz à lucter, et plusieurs fois abatu et vous en estre mocqué, ce qui n'appartient pas à estat de prelat, ne à aultre religieux, de faire en la façon que avez faict, ainsi publicquement, qui est chose à vous et à nous deffendue par noz reigles et statuts, dont tout le couvent en est très desplaisant et courcé, vous priant et suppliant que vous en deportez, et que, avant son partement, faictes tant qu'il n'ayt cause de soy blasmer de vous, ne du couvent ; ou aultrement, le couvent par nous vous fait assavoir que s'aucune malle vueillance ou nouvelle en adviengne, qui au couvent porte prejudice ne inconvenient, quel qu'il soit, il s'en

excusera et deschargera du tout sur vous, et de ce vous plaise à chascun pardonner. »

LA RESPONCE DE DAMP ABBEZ, ET LE REMEDE
QU'IL Y PRINT

L'ACTEUR. — Damp Abbez, ayant oy les nouvelles et parolles de son couvent, leur respondit : « Prieurs, allez au couvent, et leur dictes que ce que j'ay faict n'a esté que par joyeuseté, et qu'ilz ne s'en soucient mie, car avant qu'il parte je mectray bonne fin en tout. »

CHAPITRE LXXXII

*Comment damp Abbez rapaisa le seigneur
de Saintré.*

L'ACTEUR. — Endementiers que l'ambassade du couvent se faisoit, le vin et les serises furent apportées; lors burent les ungs aux aultres, par aussi bonne chere que gens puissent faire. Et quant tous

eurent beu, damp Abbez print le seigneur de Saintré par la main, et à part luy dist : « Monseigneur de Saintré, il a pleu à Dieu, moy faire tant de grace, que une foiz je vous voy en mon hostel qui est bien vostre, s'il vous plaist, laquelle chose je desiroye dès pieça, pour le bien qui en vous est ; vous suppliant que demain encores, avec ma dame, me faciez tant d'onneur que de prendre le disner en patience, et que de ce ne me reffusez, et en verité me ferez très singulier plaisir. »

RESPONCE DU SEIGNEUR DE SAINTRÉ, ET LES
PRIERES DE DAMP ABBEZ

SAINTRÉ.— « Monseigneur l'Abbez, de vostre souper et de la très grande et bonne chiere que pour la premiere fois m'avez faicte, tant comme je puis, vous en remercyé, aussi de l'offre de vostre disner à demain, lequel en verité, pour les affaires que j'ay à la bonne ville, ne vous en puis ores accorder.

— Helas ! non, dist damp Abbez, monseigneur, se par joyeuseté j'ay fait chose qui à vostre deplaisance soit, vueillez le moy pardonner ; monseigneur, j'ay une des belles et bonnes mulles de ce royaulme, et la meilleure, ce sçay je bien ; et ay ung des bons faulcons aux herons et à la riviere que on peust trou-

ver, et aussi ay trois mille escuz, aussi bien que le pape ou que le roy, et non plus ; si vous requiers, prie et supplie, tant comme je puis, que l'une des trois de mes offres vous vueillez prendre en gré, et que je demeure en vostre grace, et me pardonnez. »

Le seigneur de Saintré, qui n'a besoing de ses escuz, d'oyseaulx, ne de mulle, très gracieusement le mercye, et, pour le contenter, luy dist : « Monseigneur l'Abbez, je ne monte mye sur mulle, et de voz trois mille escuz je m'en serviroye, s'il en estoit besoing, et de vostre très bon faulcon, pour l'amour de vous, je le retiens, par ainsi que le me garderez, affin que s'aulcun le vous demande, que puissiez dire qu'il est mien ; mais d'une chose vous prie, que pour ma premiere requeste ne m'escondusiez. — Et quelle ? dist damp Abbez, monseigneur, commandez moy, car sur ma foy, s'il m'est possible, je l'accompliray volentiers. — Ferez ? dist monseigneur de Saintré. — Ouy, par ma religion. » Lors luy dist : « Que demain, vous et ma dame, viendrez disner avecques moy, — Cela, dist damp Abbez, et je le vous prometz pour elle et pour moy, que vostre plaisir en sera faict par telle façon que ce sera disner de compaignon. »

L'ACTEUR. — Lors à très grande et lye chiere sont venuz tous deux à ma dame, et

lors le seigneur de Saintré la prie. Et quant ma dame l'a entendu, prestement luy reffuse, disant qu'elle avoit moult à besongner ; et n'y vault le prier du seigneur de Saintré. Lors damp Abbez à part la tyre, et luy dist : « Ma dame, vous y viendrez, car je l'ay pour tous deux promis et juré, et me feriez grant honte et desplaisir de moy faire ainsi mentir ; aussi, ma dame, il pouroit penser de noz amours ce qui en est ; et savez que c'est de ces fringans et rotiers de court, comme de feu s'en convient garder. Et pour ce, ma dame, puisque j'ay promis, vous y viendrez, car par ce je seray son amy, ou je cuyde qu'il soit mal de moy, à cause de la lutte. » Ma dame, qui ne peut damp Abbez reffuser, ne esconduire, luy dist : « Puis que vous le voulez, je le vueil. » Alors damp Abbez appella joyeusement le seigneur de Saintré, et luy dist : « Monseigneur, ma très redoubtée dame, que veez cy, vous a refusé, doubtant que volsissiez faire ung trop grant et excessif appareil, et une grant feste et solemnité oultrageuse ; mais je l'ay asseurée que non ferez. » Lors le seigneur de Saintré dist : « Ma dame, et vous, monseigneur l'Abbez, entre nous gens de court, laissons à vous, seigneurs prelatz, faire ces grans festes, et nous en passons legierement ; bien voulons aucun peu de bonnes viandes et de bons vins,

se en povons finer ; et de ce que trouver se pourra, ma dame et vous prendrez en gré. » Et, ces parolles dictes, les hacquenées et les chevaulx furent tous prests ; lors ma dame et le seigneur de Saintré à damp Abbez remercierent, et jusques à demain prindrent congié. Et quand ma dame fut sur les champs, tant que hacquenée povoit aller, s'en ala battant ; le seigneur de Saintré, en galoppant son destrier, de fois à aultres s'approcha d'elle, et luy dist : « Ha ! ma très redoubtée dame, et que vous ay je meffait ? et est il ou monde qui osast dire et soubstenir que je ne vous aye loyaument servie, et aymée de tout mon cuer ? — Ha ! sire, dist ma dame, que vous l'avez bien à vostre lucte monstré ! Or ne parlons plus de ces choses, et me laissez en paix. » Le seigneur de Saintré, qui tout cler veoit la chose telle qu'elle estoit, ne desiroit mie en sa grace retourner, ne à la requeste d'elle ne l'eust daignée jamais plus aymer, ne servir ; mais bien luy vouloit monstrier le villain tort qu'elle luy tenoit et avoit fait, sans rien dire qu'il se fust apperceu de ses nouvelles amours. Et quant ilz furent à l'ostel de ma dame venuz, avant que de descendre, elle luy dist : « Allez vous en, seigneur de Saintré, car j'ay aucun peu à besongner, et aussi avez vous. » Ainsi eut congié et adieu jusques à demain. Le sei-

gneur de Saintré, qui de toutes ces nouvelles choses fut en pensement, se mist à la voye, avecques ce peu de gens qu'il avoit, droit à la cité, et s'en alla où ses gens estoient ; si ne erra guieres que toute sa compaignie trouva, comme il avoit ordonné. Lors appella son maistre d'ostel, et luy dist que ma dame et damp Abbez venoient demain en son logeiz disner, et qu'il fist toute deligence d'avoir bonnes viandes et de bons vins pour en estre bien servis, et pour leur compaignie de mesmes vins et viandes dont ilz seroient serviz largement ; d'autre par luy ordonna qu'il eust du tout compté et bien payé à son oste ce qu'ilz avoient despendu, tant de bouche que les chevaux, et que, quant seroit bien payé, luy donnast encores dix escuz pour le faire bien content, et deux escuz pour le service des varlets et meschines de l'ostel. Et si ordonna que le bien matin ses coursiers, ses bahus et la plus grant partie de ses gens s'en voysent, et ne demourassent que douze de ses gens, et ainsi fut fait. Et quant il fut en son logeiz descendu, il fist appeler l'oste, et à part luy dist : « Bel hoste, en ceste ville a il nul gentil homme ou bourgeois de la forme de ce grant escuyer cy ? » Et luy monstra ung de ses gens. « Monseigneur, dit l'oste, ouy, assez. — Mais fault qu'ilz ayent harnois completz, et qu'ilz soyent

beaulx. — Ilz ont harnois complets et beaulx.» L'oye demanda le nom de celuy qui estoit le mieulx armé, et il luy pria qu'il le fist venir; et ainsi fist. Et quant le bourgeois fut venu, et faicte sa reverence au seigneur de Saintré, auquel gracieusement s'accointa, il luy dist : « Jacques, qui est le bourgeois de ceste ville qui est le mieulx armé. — Monseigneur, dist Jacques, mains en y a ; mais j'avoit ce que ne les vaille, si suis je aussi bien armé, pour cinq ou six paires de harnois complets, que bourgeois de ceste ville, ne gentilhomme de ce pays. — Voire, dist monseigneur de Saintré, par monseigneur saint Jacques, de tant plus en estes vous à priser et à louer; vous avez les harnois pour vostre corps, n'en finerez vous pas bien encore d'ung aultre qui servist à ce chevalier que veez là ? » Et luy monstra ung chevalier semblable à sa personne. « Monseigneur, dist il, je vous fourniray du tout, aussi beaulx et aussi bons que vous en serez content; mais voulez vous bacinets, sallades à banieres, ou heaulmes? — Jacques, mon frere, je vueil bacinetz, et aussi deux haches appareilleez; et ne vous souciez, car vous n'y perdrez riens. — Par Dieu, dist Jacques, qui très joieux estoit d'avoir la congnoissance du seigneur de Saintré, tout tant que j'ay, monseigneur, est vostre et à voz commandemens;

quant vous plaira de les avoir? — Je les voudroye avoir tout maintenant; mais que en coffres ou en sacz les me faictes apporter, que nul ne s'en puisse appercevoir. » Jacques incontinent s'en va en son hostel, et les deux harnois beaulx et clers avecques les haches secretement fait apporter, dont ledit seigneur de Saintré fut très content. Et quant la nuyt fut passée et le jour fut venu, que le seigneur de Saintré eut sa messe oye, tout son bagaige et ses gens partiz, fors les douze qu'il avoit retenuz, la viande du disner fut comme preste et les tables mises, monta à cheval avecques sa compaignie; lors au devant de ma dame va. Et quant eust erré environ la moytié de la voye, trouva ma dame et damp Abbez sur les champs; lors gracieusement s'entresaluerent, et damp Abbez commença et dist: « Haro! qui parle du loup, il en voit la queue; les oreilles, monseigneur de Saintré, vous cornoient elles point? — Je ne sçay, dist le seigneur de Saintré, car je pensoye à la grant pascience que prendrez. Avez vous point desjeuné, ma dame? et vous, monseigneur l'Abbez? — Ouy, dist ma dame, pour la doubte de ces bruines avons desjeuné des tostées à l'ypocras et à la pouldre de duc. — Bon preu vous puist il faire, dit il à ma dame, et à monseigneur l'Abbez aussi! » Dont en devisant tous trois

ensemble, le parler de ma dame toujours s'adressoit à l'Abbez. Le seigneur de Saintré, voyant perdre ses parolles, tint sa bride, et à ma dame Jehanne vult parler, mais elle luy dist que arriere d'elle se mist; puis va à ma dame Katherine et à Ysabel, toutes luy dirent ainsi, car à toutes estoit deffendu de parler à luy; lors retourna à ma dame et à damp Abbez, et ne tarda plus guieres que au logeis sont venuz. Lors le seigneur de Saintré print soubz le bras ma dame et en sa chambre elle et ses femmes mena; damp Abbez tira en un aultre. Et endementiers que en leurs

chambres ilz se aisoient, dist à son maistre d'ostel que incontinent qu'ilz seroient à table, que les chevaux fussent sellez et bridez en l'estable, et tous prests à monter. Lors, pour abreger, le disner fut tout prest; et quant ma dame et damp Abbez eurent leurs mains lavées, au hault du banc au bout de la table, comme prelat, damp Abbez fut assis, et un peu après ma dame qui ne le vult mye de loing abandonner, et puis les aultres deux dames au bas bout; et luy, pour prieres, ne volt oncques estre assis, mais mist sur l'espaule la serviette, et va ça, puis là, trestous bien servir de bons vins et viandes, largement et de bonne maniere, et aussi de plusieurs façons. Que vous diroye je? Là fut la joye de damp Abbez au

seigneur de Saintré telle qu'à peine se pourroit deviser. Et quand les pances furent bien plaines et farcies, et les estomatz bien arrousez et bien abruvez, le seigneur de Saintré demanda à damp Abbez s'il fut oncques armé. « Armé, dist damp Abbez, non, vrayement. — Hé! dist monseigneur de Saintré, que ce seroit belle chose de vous veoir armé! Et qu'en dictez vous, ma dame? n'est ce mye vérité? — Vrayement, dist ma dame, je cuyde bien, et suis certaine que s'il estoit armé, tel y a, qui de luy se mocque, qui guieres n'y gaigneroit. — Ma dame, je ne sçay nul qui s'en mocque, mais je dis que oncques ne veis homme qu'il fist plus beau veoir armé. » Et lors dist à Perrinnet de sa chambre qu'il feist ce qu'il luy avoit dit. Lors Perrinnet dressa au bout de la salle une table, puis il mist dessus le plus bel et le plus grant harnois, sans hache ne espée. Et quant damp Abbez veit ce très bel et luy-sant harnois, auquel il print grant plaisir, et s'estoit ouy si grandement louer, pensa que, pour la largesse du seigneur de Saintré, il luy donneroit cest harnois, et que pour ceste cause l'avoit il fait apporter. Si s'appensa que s'il le requeroit d'armer, qu'il n'en seroit mye reffusant; lors, pour monstrier que très bien il ay-moit ce harnois, le commença très fort à louer. « Et puis qu'il est à vostre gré, dist le sei-

seigneur de Saintré, s'il vous est bien en point, venez l'aidez. — L'aurez, messeigneur? — Ouy, damp Abbez, et meilleure chose, se le veulz acquiescir. — Et par ma foy, pour l'honneur de ma dame, je ne mangerez, ne boverez jusques à tant que je seray armé. » Alors s'ecria : « Otez, otez ces tables, pour n'aveuz pas trop mangié. » Damp Abbez, tout plein de joye, se mist en pourpoint, et tout le seigneur de Saintré prist ung paincot, et mist les esguillettes, et arma de corps et de jambes entièrement damp Abbez, et le baissist sur la teste luy mist bien compenné, et puis en ses mains les gantelets. Et quant damp Abbez fut ainsi du tout armé, si se tourna devant et derriere, en soy coutoyant, et en disant à ma dame et à ses femmes : « Qu'en dictes vous de veoir ung moynne armé? le fait il bon veoir? — Moynne, dist ma dame, telz moynnes sont bien clers semez. — Hé! Dieux, que n'ay je une haiche et ung qui me vouldist combattre et oultraiger! » Puis en farsant dist à ma dame : « Vrayement cest harnois poise plus que le mien, mais il me souffit, puisque je l'ay gainné. » Et en disant ces paroles, le seigneur de Saintré luy dist : « Vous ne l'avez mie encores gainné, mais tantost le gainnerez. » Lors fist aporter l'autre harnoiz, duquel il fut tantost armé. Quant ma dame oyt ces parolles, et veit

le seigneur de Saintré hastivement armer, se doubta de ce qui en advint, et luy dist : « Sire de Saintré, que entendez vous à faire ? » — Ma dame, dist il, quant il fut prest, tantost le verrez. — Je le verray, dist ma dame, sire couart, voulez vous combattre à ung Abbez ? » Le seigneur de Saintré estant tout armé, ordonna à ses gens de bien garder l'huyz que aucun n'entrast, ne yssit hors de la salle, et dist aux dames et damoysselles, aux moynnes et à tous aultres qui leans estoient : « Tenez vous là à cest huyz, et n'y ait homme, ne femme qui se meuve, car qui fera le contraire, je luy fendray la teste jusques aux dens. » Lors veissiez dames et moynnes de trembler, pleurer, et mauldire l'heure que ilz estoient là assemblez. Lors il vint à ma dame, et luy dist : « De vostre grace très voulentiers vouldistes estre juge de la lucte de damp Abbez et de moy ; or vous pryé et supplie, si très humblement que je puis, que le vueillez estre de la lucte à laquelle j'ay apprinz à lucter, et que avec moy soyez à faire la requeste à damp Abbez. — Je ne sçay quelle requeste, dist ma dame ; se vous luy faictes ung seul desplaisir, je l'advoue fait à moy, et le prens en ma garde. » Le seigneur de Saintré vint à damp Abbez, et luy dist : « Damp Abbez, à la requeste de ma dame et de la vostre, je luctay

deux fois à vous, deux saulx de trousse, dont encores me sens, et n'y valut me excuser que, à sa requeste et à la vostre, ne passasse par là; ores je vous requiers et prie, aussi pour l'amour de ma dame que si loyaulment aymez, que nous luctons à la façon que j'ay apprins à lucter. — Ha! monseigneur de Saintré, dist damp Abbez, je ne sçauoye lucter armé. » Alors le seigneur de Saintré dist : « Par cy, ou par la fenestre passerez. » Ma dame, qui de tous poins veoit le seigneur de Saintré à combattre meu et deliberé, felonneusement luy dist : « Sire de Saintré, nous voulons et vous commandons, sur paine d'encourir nostre indignacion, que incontinent tous deux vous desarmez; et se vous ne le faictes, comme fel et couart, nous vous ferons du corps et de la vie courcer et pugnir. » Quant le seigneur de Saintré se voit ainsi villainer et menacer, à la faveur et pour l'amour de damp Abbez, luy dist : « Or, faulce, desloyalle, telle, telle et telle que vous estes, je vous ay si très loyaulment servie longuement que oncques homme puist servir et complaire à femme, et maintenant pour ung ribault moyne, dont vous estes accointée si faulcement et desloyaulment, vous estes des-honorée, et m'avez habandonné; et à celle fin qu'il vous en souviengne, que pour luy neaultre ne me devez villainer ne menasser, je

vous donray tel loyer, non mye tel qu'il y affiert à l'exemple des aultres desloyalles femmes. » Lors la prent par le toupet de son 'atour, et haulsa la paulme pour luy donner une couple de souffietz ; mais à coup se retint, ayant memoire des grans biens qu'elle luy avoit faitz, et qu'il en pouroit estre blasmé. Et tout en plourant, et comme de dueil pasmée, la fist cheoir sur le banc, que oncque ne s'en osa mouvoir. Lors fist apporter deux haiches et deux daigues, qu'il fait saindre et bailler ès mains de damp Abbez, pour en prendre choiz, puis luy dist : « Damp Abbez, souviengne vous des injures qu'avez dictes des chevaliers et escuiers qui vont par le monde faire armes pour leurs honneurs accroistre, car vous le comparerez ; or vous deffendez, damp Abbez ! » Et lors baissa sa visiere, et fist baisser celle de damp Abbez, et desmarcha contre luy. Et quand damp Abbez vit que c'estoit contre luy, forcé de soy combatre et revancher, haulsa sa haiche, et par telle force que s'il eust actaint le seigneur de Saintré, à la puissance qu'il avoit, et aussi à l'avantaige d'estre plus grant, sans nul remede il l'eust à terre porté ou navré ; ce que ma dame eust bien voulu ; mais par la voulonté de Dieu et des avantaiges qu'il sçavoit en tels faicts d'armes, il se couvrit et receut ce coup sur sa haiche ; et ce

fait, le seigneur de Saintré, de la pointe de sa haiche, l'enferra, et le fist à force reculler jusques à ung banc viz à viz de ma dame; et là tomba à la renverse, et au cheoir se donna un tel coup qu'il sembloit que tout fondit en bas, criant : « Mercy ! mercy ! mercy ! ma dame. Ah ! monseigneur de Saintré, pour Dieu, mercy ! » Le seigneur de Saintré, esprins de mal tallent à cause des villainies et mocqueries dont a esté cy devant parlé, deliberé fut de le mectre à fin; et en haulsant sa haiche, en mémoire luy vindrent les vers qui s'ensuivent, ausquelz sont contenues les saintes parolles que nostre Seigneur dist ou vieil Testament, au neufviesme chapitre de Genesis, qui dient : *Quicumque effuderit humanum sanguinem, fundetur sanguis illius.* Encores dist en la Passion : *Qui gladio percusserit, gladio peribit.* Encores dist il à David : *Non edificabis michi domum, quia vir sanguinis es.* Encores dist il par la bouche de David : *Vir sanguineus et dolosus non videbit dies suos.* Encores par la bouche de David dit : *Virum sanguinum et dolosum abominabitur Dominus.* Encores là mesme dist : *Si occideris, Deus, peccatores : viri sanguinum, declinate a me.* Et tant d'autres petiz mercys et misericordes nous a il commandé et en sa propre personne monstré, que, par ce, ledit seigneur de Saintré se tint

de proceder à la mort; toutesfois fut par vengeance et par divine voulenté, que à cause du si très evident et manifeste pechié, eust permis ainsi le faire pugnir, il gecta au loing sa haiche, et print sa dague en sa main; puis luy haulsa sa visiere, et luy dist : « Ores, damp Abbez, congnoissez que Dieu est le vray juge, quant vostre force et vostre mauvais et injurieux parler n'ont eu pover que ne soyez chastié, et present celle de qui vous vous teniez si fier, pour laquelle avez si deshonestement menty et parlé contre les chevaliers et escuiers; et pour ce, celle très faulce langue le comparera. » Lors luy persa de sa dague la langue et les deux joues, et en ce point le laissa, et luy dist : « Damp Abbez, ores, avez vous le harnois bien et loyaulment gaigné. » Si se fist desarmer, et quant il fut tout desabillé, et vit ma dame deschevelée et son atour renversé, luy dist : « Adieu, dame la plus faulce qui oncques fut ! » Et, en ce disant, la veit sainte d'ung tyssu bleu, ferré d'or, lors la desaingnit, disant : « Et comment, ma dame, avez vous, cueur de porter sainture bleue? car couleur bleue signifie loyaulté, et vraiment vous estes la plus desloyalle que je congnoisse; plus ne la porterez. » Lors luy osta, puis la ploya et mist en son seing. Puis vint aux dames et damoyelles, aux moynnes et aux aul-

« Ces gens qui, comme brebis, ont usages de la
« dalle estoient plourans; et leur dist: « Vous
« estes teueings des choses dictes et faictes,
« qui à mon grant desplaisir sont cause d'avoir
« fait ce que j'ay fait; et quant à la desplaisance
« que vous avez, et avez, le me pardonnez, je vous
« en prie, et à Dieu soyez! » Lors fut l'huys
« ouvert, et descendit en bas, et à l'oste dist:
« Se damp Abbez veut le grant harcoys, si
« l'ay laissez; mais le petit et les deux beiches à
« Jacques les rendrez, et luy dictes qu'il vi-
« gne à moy bien brief; bel hôte, estay vous
« bien content? » Et, en ce disant, il monta à
« cheval, et commande à Dieu son hôte. Et à
« tant l'huys se oy à parler de luy qui estoit va-
« à la court; et diray de ma dame, de damp
« Abbez et de leurs gens, qui demourerent bien
« esbahys et en très grant dueil et melencolie,
« n'en fault mye doubter.

CHAPITRE LXXXIII

Comment ma dame et damp Abbez avec leurs gens sont demourez.

QUANT ma dame se fut atournée, et que toutes eurent assez plouré, et que damp Abbez fut desarmé, fut le surgien mandé; là veissiez pleurs et soupirs, et mauldire leurs vies quant oncques s'estoient là arrivez. Damp Abbez, qui ne pouvoit parler, fut devestu et couchié, et puis convint ma dame despartir et laisser son amy. Et qui pour ce ouyst ses pleurs, plains et gemissemens à cause de damp Abbez, il sembloit que tous ses prouchains parens et amys fussent mors. Ses femmes disoient : « Ha ! ma dame, nous n'en pensames oncques moins, quant nous le vismes arriver, et que meschief n'en advenist de tant charger l'onneur des gentilzhommes. — Voyre, dist l'autre, et de l'avoir ainsi traictié et blecié; et à ce est bien fait. — Ne vous chault, dist ma dame, il en sera bien vengié, mais qu'il en soit guery; aussi qu'il m'a voulu batre et m'a villainée,

puis ma sainture emporté, comme meurdrier
 et larron qu'il est. » Et à tant laisseray cy à
 parler de ma dame et de la guérison de damp
 Abbez, qui par l'espace de deux mois s'estoient
 donnez du bon temps ensemble, meilleur que
 jamais n'avoient eu par avant, et ce fut dure
 la departie.

CHAPITRE LXXXII

Comment ma dame revint à la cour.

L'ACTEUR. — Endementiers que ma
 dame et damp Abbez ainsi s'esbatoient,
 le roy d'ung cousté, et messeigneurs les
 ducz s'esmerveilloient de ce que leur Belle
 Cousine demouroit tant, dont une fois, entre
 les aultres, à la royne en parlerent. La royne,
 jà très desplaisante des nouvelles que elle
 pressentoit, pour son honneur s'en teust. Lors
 luy prierent qu'elle luy vouldist escrire par
 maniere qu'elle vensist, La royne leur dist que
 desjà par deux foys l'avoit elle fait, et escript
 par deux messaigiers qu'elle avoit envoyez vers

elle ; et que vraiment vensist quant elle voudroit, mais jamais ne luy en escriproit. Messieurs, qui comprinrent bien les parolles de la royne qui très mal contente d'elle estoit, luy escriprent et luy renvoyerent l'ung de leurs cheualcheurs. Lors fut à ma dame mortel desplaisir de laisser doulx Abbez, et donner jour qu'elle seroit à la royne, sans point faillir ; et par ainsi le beau pere et confesseur print congié d'elle, et elle de luy, et revint à la court.

L'ACTEUR. — Hé ! amours très faulces, mauvaises et traistres, semblerez vous tousjours enfer qui d'engloutir ames jamais ne fut saoul ? ne serez jamais saoulez de travailler cueurs et les meurdrir ? Dieu et nature vous ont ilz donné telle puissance que de prendre, et mectre en vos lacs, cueurs de papes, de cardinaulx, d'evesques, d'archevesques, d'empereurs, d'emperieres, de roys, de roynes, de ducz, de duchesses, de patriarches, de marquis, de marquises, de princes, de princesses, cueurs d'abbez et d'abbesses, de contes, de contesses, et de gens de tous aultres estats, et religieuses espirituellenes et temporelles ? Que d'aucuns en avez prins les cueurs, ainsi qu'en maintes histoires se treuve par escript, dont vous en estes très faulcement et mauvairement serviz, et puis à la fin habandonnez, et meritez d'avoir

peu de jours après, se Dieu n'en a mercy, et
 leurs hommes; tousceux ceux cy, dont
 parir venir à mes propos, je m'en delaisse, qui
 dit ainsi.

L'ACTEUR. — Quant mes dames par telle force
 fut contrainte de laisser d'amp Abbat et ses
 departir, tant estoient grans leurs deuvoirs à
 souffrir que je ne sçayrois reciter, ne escrire.
 Toutefois les promesses de d'amp Abbat furent
 que souventes fois en habit discret le yroit
 veoir; et par celle douce esperance, à tous
 grans destresse de leurs cœurs, prindrent con-
 gité l'ung de Fenlre, et eust esté bonne la
 compaignie, se ne fust le departir.

CHAPITRE LXXXV

*Comment ma dame fut à la court, et la bonne
 chiere que chascun luy fist.*

L'ACTEUR. — Ma dame, toute pasmée et
 dolente de ses amours, vint à la court,
 acompaignée de plusieurs seigneurs,
 contes, barons, chevaliers et escuyers, qui au

devant luy furent ; et quant elle fut arrivée, fist sa reverence au roy qui assez bien la recueillit, puis va à la royne qui luy dist : « Vostre venue a esté bien longue, il me semble que bien aymez l'air du pays. » Puis va à messeigneurs les ducz qui assez gracieusement la receurent, puis luy dirent : « De vostre venue dictes nous grant mercy. » Et puis les aultres dames et damoyelles, chevaliers et escuyers, tous luy vont faire la reverence et festoyer ; et ainsi passa environ ung moys. Advint que ung soir, après soupper, estant le roy et la royne en ung beau preau, en grant nombre de dames et de seigneurs, lors le seigneur de Saintré dist à la royne et aux aultres dames : « Seez vous toutes cy, si vous compteray une vraye nouvelle et merveilleuse histoire qu'on m'a de bien loing escripte. — Avant, dist la royne, et pour Dieu, que nous le saichons, ma dame, seez vous là. » Lors appella ma dame Belle Cousine. « Et entre vous dames, seez vous toutes cy, et escoutons ceste nouvelle que nous veult dire le seigneur de Saintré. » Lors la royne s'assist, et fist seoir ma dame auprès d'elle, et puis les aultres dames ou damoyelles entremeslées d'aucuns seigneurs, chevaliers et escuyers qui là estoient. Lors, en riant, dist la royne : « Monseigneur de Saintré, maistre des nouvelles, commencez à deviser. »

CHAPITRE LXXXVI

Comment le seigneur de Saintré, sans riens nommer, compta l'histoire de ma dame, de damp Abbez et de luy; et rendit la sainture à ma dame devant la royne et plusieurs aultres dames et damoyelles.

L'ACTEUR. — Le seigneur de Saintré lors commença son compte en la meilleure façon et maniere qu'il sceut, et dist : « Ma dame, j'ay naguieres veu unes lectres d'une ystoire vraye et nouvellement advenue en Al-maigne, d'une très noble et puissante dame qui de sa grace print plaisir en ung jovencel bien gentil, et tant de biens, d'amours et d'onneurs luy monstra que, par certain espace de temps, elle le fist ung très renommé chevalier ; et tant loyaulment se entre amerent, comme la lectre dit, que oncques plus loyaulx amours, ne amans plus secretz, ne furent.

L'ACTEUR. — « Mais la fortune, la traitresse comme dit le bon Boece,

A sa dextre plaine d'orgueil,
Voult ses sergens mettre en dueil ;
Plus soudainement les surprent,
Que le flot de mer ne s'esprent.

Et les trestourne en si peu d'eure
 Que le plus bas vient au desseure,
 Et au dessoubz vient le plus hault;
 Ne de leurs pleurs, riens ne leur chault.

Et quant oat plus douleur et yre,
 Alors se prend plus fort à rire.
 Sa joye est que, en peu d'espace,
 Le plus heureux le chetif fasse.

SAINTRÉ. — « Ainsi fut il, ma dame, de ce
 vre maleureux qui tant estoit en grace de
 dame que oncques avant de dames ne fut
 eulx amé. Advint que par la volenté de
 tune, pour l'amour d'elle et pour accroistre
 l'honneur, il vint en France faire armes,
 et il yssit à son honneur. Et endementiers
 de ces choses estoient, sa dame s'accointa
 ung grant, gros et très puissant de corps
 yenne qui estoit damp Abbez d'une abbaye
 ne et riche, et tant se entre amerent qu'elle
 oubliâ son très loyal amy et serviteur du
 ut. — Et lors, respondist la royne, elle fist
 malle joye que pour ung moynne laisser
 uy qui tant l'aymoit. — Ma dame, il fut
 si, car je l'ay ainsi veu par lectre qui mye
 me mentiroit. Or, escoutez, ma dame, et
 ez la raison et la fin. — Or, dictes donques,
 t la royne, et achevez. » Et lors de mot à
 « l'histoire compte : et premier, comment
 tant les trouva au gibier, comment l'Abbez

manda à ma dame se on le retiendroit au soupper, et la responce qu'elle en fist ; comment l'amant, pour veoir l'affaire, ne se fist gueres prier ; comment l'Abbez et ma dame blasonnerent les chevaliers et escuiers qui par le monde alloient faire armes ; comment elle mist sus la lutte, et en fut juge ; comment ilz lucterent et se desvestirent en pourpoint, et les beaulx saulx que l'Abbez faisoit devant ma dame ; le ris, les jeux, les mocqueries qu'ilz faisoient à l'occasion de la lutte, et de ce que l'Abbez en avoit l'onneur ; l'ambassade que le couvant en fist ; et, pour abreger, comment il fut en la cité disner, comment ilz furent armez, et leur bataille ; comment à l'Abbez en print, aussi les parolles que ma dame dist à l'amant, en le villainement menassant pour l'amour de son nouvel amy ; comment il mist la main à son toupet, faisant semblant qu'il la vult frapper ; les parolles que l'amant luy dist, et comment il luy osta sa sainture, que porter ne devoit de la couleur qu'elle estoit, pour sa desloyauté. Et après ce qu'il eut conclu, fut illecques la dame, que on cuydoit estre d'Ailmaigne, très grandement blasmée et mesprisee, et fut l'amant de sa bataille, qu'il avoit emprise, très grandement loué. Et de ceste belle nouvelle fut illecques la joye si grande qu'à peine se pouvoit on departir, ne cesser de rire ; mais

ma dame, là, simple et coye, sans dire mot, à male chiere escoutoit tout. Lors le seigneur de Saintré dist à la royne et à toutes les aultres dames qui là estoient :

« Ma dame, et vous, mes dames, l'histoire demande qu'il doit estre dit de ceste dame, se elle a bien fait ou non ? et à vous, ma dame, j'en demande la premiere. » Quant ma dame la royne ouyt parler des amours de damp Abbez et d'une dame, doubta aucun peu que pour sa Belle Cousine ne fust ; mais, pour ce qu'elle n'avoit sceue l'amour d'elle et du seigneur de Saintré, de certain ne sçavoit que penser ; lors, pour veoir que ma dame diroit, le commencer à parler d'icelle dame remist à elle. Lors elle respondit : « Ma dame, il me soit pardonné, car à ce qu'il a devisé riens n'y pensoye ; mais, s'il vous plaist, faictes dire les aultres, jaçoit ce que l'on s'en devoit taire, et quant vous et toutes en aurez dit, je diray après ce qu'il me semble. » Alors la royne dist : « Mais puisqu'il faut que comme royne nous commençons, vrayment, Saintré, s'il est ainsi que vous avez dit, nous disons que telle dame est faulce et mauvaise, et n'en disons plus. »

SAINTRÉ. — « Or ça, ma dame de Rethel, qu'en voulez vous dire ? — J'en dit ce que la royne en a dit, et oultre plus que on la devoit bannir de toute bonne compaignie, se elle y

estoit. — Or ça, vous, ma dame de Vendosme, qu'en dictes vous ? — J'en dis, beaulx amys, qu'on la devoit lyer sur ung asne, le viz devers la queue, et mener par la ville à grant derision. » — Et vous, ma dame du Perche, quelle est vostre opinion ? — Je dis que la royne et les dames, qui en ont jà dit, ont si bien dit que on ne porroit mieulx, et si dis oultre que telle dame debvroit estre despouillée toute nue dès la sainture en amont, et toute rezée, puis oincte de miel, et menée par la ville, affin que les mouches luy courrussent sus, et la picquassent, la faulce dame qu'elle est, se elle est vive, d'avoir laissé son si parfaict et loyal serviteur, chevalier ou escuyer, pour ung moynne ; et benoist soit l'amant qui ainsi la pugnist. » Lors n'y eut dame ne damoyelle qui toutes n'en rissent, et qui ne s'accordassent esdictes oppinions ; desquelles oppinions furent les dames de Beaumont, de Craon, de Gravelle, de Maulevrier et d'Ivry ; les hommes qui là estoient escouterent à grant deduyct et n'en dirent riens. Et par ainsi devant elle furent données ces oppinions, et oy le jugement de sa desloyaulté.

Et quant le seigneur de Saintré eut à chascune demandé, et en eurent dit ce que dessus est dit et assez pis, il se tourna à ma dame, et le genoil à terre luy demanda son oppinion,



comme aux aultres. Ma dame, qui moult estoit esbahye et ne sçavoit que dire, comme celle à qui l'istoire touchoit de bien près, tant fut par la royne et autres dames contraincte, que force luy fut qu'elle en dist son advis comme les aultres ; lors dist : « Puisque il faut que j'en dye, il me semble que celuy amant, chevalier ou escuyer, quel qu'il soit, fut très mal gracieulx d'avoir dessainte celle dame et emporté sa sainture, comme vous avez dit. — Voire, ma dame, dist le seigneur de Saintré, vous ne dictes et ne respondez riens qui soit à mon propoz, ne à ma demande qui est cy : La dame a faict bien ou non d'avoir ainsi habandonné son loyal amant et serviteur ? et n'y sçavez vous aultre chose, fors que pour avoir dessainte sa très faulce dame de sa sainture bleue, et emportée comme très indigne de telle couleur porter ; et dictes que pour ce il fut très mal gracieulx ? » Lors tira de sa manche la sainture ferrée d'or, en lui disant : « Ma dame, je ne le vueil plus estre si très mal gracieux. » Et devant la royne et sa compaignie de dames, de chevaliers et d'escuyers, très gracieusement un genoil bas, il la luy mist en son giron. Et quant la royne et sa compaignie virent et oyrent ceste merveilleuse chose, par merveilles et grant esbahissement l'ung l'aultre regarda ; et de ma dame furent tous et toutes comme

chacun le peut penser, très esbahy. Et ne fault mye à demander s'elle estoit bien honneste, car illecques elle perdit toute joie et honneurs. Et cy commenceray la fin de ce compte, priant, requerant et suppliant à toutes dames et damoyelles, bourgeoises et autres, de quelque estat qu'ils soient, que toutes prennent exemple à ceste si très noble dame oysouse, qui par sa luxure se perdit, et vacilleroient bien penser audit commun proverbe qui dist : oncques ne fut feu sans fumée, tant fut il en terre profond ; c'est à entendre que oncques ne fut bien ou mal, tant fust il secret, repoussé ou obscur, que à la fin ne soit souz ; car ainsi l'a ordonné le vray et tout puissant juge de toutes choses, auquel ne fault, ne ne peut on riens celler, pour meriter les bons et les justes, et pour pugnir les pecheurs et les mauvais, soit en ame, soit en corps ou en honneur ; ainsi qu'il fist de ceste dame, et de maints autres hommes et femmes qui sont pugniz pour leurs desordonnées volentez. Ilz sont bien des fumées sans feu, c'est à entendre qu'ilz sont maintes faulces langues desliées de flatteurs à gecter les fumées sans feu, c'est à dire, porter et rapporter faulces et mauvaises nouvelles et renommées à hommes et femmes, sans cause et contre raison ; mais elles ne peuvent porter le feu ; c'est la veritable preuve dont ilz

demeurent d'ame, d'honneur et maintes fois du corps, perduz et dampnez, et sont par derriere villainez et mocquez.

Et cy donneray fin au livre de ce très vaillant chevalier, qui, oultre les armes que j'ay dictes, fut en maintes aultres batailles par mer et par terre, et fist corps à corps maintes aultres armes, et en especial fut l'ung des seize chevaliers et escuyers qui combatirent au Carre, devant le souldan, vingt deux chrestiens renoyez, et les desconfirent pour la foy de nostre seigneur Jesus Christ ; et voyagea très longuement, qui seroit trop longue chose à vouloir tout reciter. Et quant le plaisir de Dieu fut à soy vouloir prendre son ame par la mort qui n'espargne nully, le jour qu'elle clost la porte à la clarté de ses yeulx, il estoit le plus vaillant chevalier tenu du royaume de France ; lequel de sa vie naturelle fina ses jours en la ville de Saint Esprit sur le Rosne, ayant prins tous les saints sacremens, ainsi que tous bons et vrays chrestiens doyvent faire ; duquel si très vaillant chevalier, plusieurs nobles preux ont recorderz que ceulx qui faisoient sa sepulture, ont trouvé un petit escrinet d'yvoire, auquel avoit un bresvest qui disoit : Cy reposera le corps du plus vaillant chevalier de France, et plus, qui pour lors sera. Duquel plusieurs dient

qu'il se doit entendre le plus vaillant du monde qui en son temps fust. Doncques, pour amour de ses vaillances, j'ay prins plaisir de veoir où son corps gist ; et, de la lame couchée sur luy, prins en memoire les lectres entaillées qui, en latin, disoient ainsi :

HIC JACET DOMINUS JOHANNES DE SAINTRE, MILES
SENECALUS ANDEGAVENSIS ET CENAMANENSIS, CA-
MERARIUSQUE DOMINI DUCIS ANDEGAVENSIS, QUI
OBIIT ANNO DOMINI MILLESIMO CCC.LX.VIII. DIE XXV.
OCTOBRIS. CUJUS ANIMA IN PACE REQUIESCAT.
AMEN.

EXPLICIT SAINTRE.

La Table de ce present Livre


ET PREMIEREMENT :

CHAPITRE PREMIER. — Comment Jehan de Saintré servoit en la court du roy Jehan de France d'enfant d'honneur et de paige seulement, allant apres le roy. Et premierement de madicte dame des Belles Cousines, et de Saintré	5
CHAPITRE II. — Comment en la court de la royne de France estoit une jeune dame qui point ne se vouloit remarier, nonobstant qu'elle en fut fort sollicitée. Et des responces qu'elle faisoit touchant les dames anciennes	
CHAPITRE III. — Comment ladite jeune dame delibera en soy de faire renommer le petit Saintré, et le fist appeller en sa chambre, l'interrogant qui estoit sa dame par amours; de laquelle chose le petit Saintré fut tout honteulx et ne respondoit parolle du monde, fors qu'en la fin dist qu'il n'en avoit point.	12
CHAPITRE IV. — Comment le petit Saintré respon- dit à la dame, comme contrainct, et celluy qui point n'avoit encor gousté les estincelles d'amours, que Matheline de Coursy estoit sa dame, qui n'a- voit encore que dix ans.	23
CHAPITRE V. — Comment la dame enseigna le petit Saintré de maintes bonnes choses et salutaires doctrines, touchant la maniere comment on doit fuir les sept pechiez mortels.	27
CHAPITRE VI. — Comment la dame donne d'aultres enseignemens au petit Saintré, touchant les ver- tus, l'estat, et moyen de noblesse	43

CHAPITRE VII. — Comment la dame s'efforçoit de sçavoir l'intencion du petit Saintré, touchant le fait d'amours	50
CHAPITRE VIII. — Comment la dame ouvrit son cou- raige au petit Saintré, luy monstrant qu'elle le vouloit aymer.	52
CHAPITRE IX. — Comment la dame admonesta le jeune Saintré, touchant les dix commandemens de la Loy, et l'estat des vertus et bonnes meurs . .	54
CHAPITRE X. — Comment la dame, jà frappée de l'amour du petit Saintré, luy donna XII escuz pour se faire acoustrer et habiller honnestement. . . .	71
CHAPITRE XI. — Comment le petit Saintré s'acou- tra honnestement, comme la dame luy avoit com- mandé : puis comment la dicte le trouva es galeries ; le faisant venir en sa chambre, et l'interrogeant de la devise qu'il portoit, et tout à cause, affin que ses damoiselles ne sceussent de ses amours ; et luy bailla encore LX escuz et une bourse. . . .	74
CHAPITRE XII. — Comment la dame menaça fainte- ment le petit Saintré, luy disant devant ses dames, qu'il ne vouldroit jamais riens. Et apres cela s'en alla ledit Saintré faire tailler aultres habillemens de l'argent que la dame luy avoit baillé ; et puis comment la dame parla à luy, à laquelle il dist que sa mere luy avoit envoyé l'argent duquel il estoit habillé	85
CHAPITRE XIII. — Comment la dame advertit la royne de parler au roy, affin qu'il fist le petit Saintré son escuyer trenchant	91
CHAPITRE XIV. — Comment le petit Saintré remercia le roy, la royne et ma dame, pour ce qu'il avoit esté fait escuyer. Et comment il trancha devant le roy, et fist son office bien saigement.	95
CHAPITRE XV. — Comment le petit Saintré fut par- ler à ma dame en son preau ; lequel elle baisa cordialement, et luy bailla cent soixante escus pour avoir ung cheval et autres choses nécessaires	97
CHAPITRE XVI. — Comment le petit Saintré s'acou- tra de chevaulx, comme ma dame luy avoit dit.	

Puis la vint remercier, lequel elle admonesta de rechief, et apprint à se gouverner en court et en guerre, et en toutes autres sortes	103
CHAPITRE XVII. — Comment la dame conseilla au petit Saintré de lyre livres et romans, affin de congnoistre les gestes des nobles du temps passé.	107
CHAPITRE XVIII. — Comment le petit Saintré se mist à genoux devant ma dame, et la remercy; puis comment le roy et la royne luy donnerent argent pour soy advencer; et puis comment enfin ma dame luy dist qu'elle vouloit qu'il eust un bracelet esmaillé à sa devise le premier jour de may, et le portast ung an entier pour s'esprouver contre quelque chevalier au fait des armes. . .	110
CHAPITRE XIX. — Comment le petit Saintré remercy ma dame, puis fist faire le bracelet comme elle avoit commandé, et puis vint à elle, et luy monstra; dont elle fut bien joyeuse.	116
CHAPITRE XX. — Comment la dame conseilla au petit Saintré qu'il falloit qu'il fist publier son entreprise par ung herault d'armes, contenant comment le miculx dansant, fust escuyer ou dame, auroit pris convenable, et luy mist le bracelet au bras; puis comment Saintré fist ung banquet à tous seigneurs et dames; et puis la nuyct retourna au preau parler à la dame, qui luy dist qu'il falloit publier ses lectres d'armes en la court de quatre roys.	118
CHAPITRE XXI. — Comment le petit Saintré fut devers le roy et la royne presenter sa lectre d'armes et demander congé de le obtenir, ce que le roy fit quasi comme contrainct	121
CHAPITRE XXII. — Comment le petit Saintré entra en joust, triumpant et bien acoustré, et se porta vaillamment, et qu'il fut prisé et honoré de chascun	124
CHAPITRE XXIII. — Comment Saintré fut au preau parler à ma dame, et luy declara de point en point comment il estoit acoustré, quelz gens et officiers il avoit pour parfaire son entreprise; et comment la dame voulut sçavoir de ses couleurs	

et de ses armes. Puis prindrent congïé l'ung de l'autre à tres grans pleurs et regretz.	126
CHAPITRE XXIV. — Comment la dame advertit la royne que Saintré estoit merueilleusement bien acoustré de coursiers et aultres choses; parquoy ladicte royne dist à Saintré qu'il fist admener ses chevaux en la gallerie, pour les voir, ce qu'il fist. Et comment le roy et la royne les virent, qui moult le priserent.	130
CHAPITRE XXV. — Comment Saintré, apres qu'il fut prest pour partir, vint demander congïé au roy pour faire son entreprise, laquelle chose le roy luy conceda, nenobstant qu'il fust marry de son depart.	134
CHAPITRE XXVI. — Comment Saintré fut au preau prendre congïé de la dame, qui l'advertit de rechief de tous ses affaires; et comment en la fin prindrent congïé, non pas sans gecter grosses larmes d'une part et d'autre.	136
CHAPITRE XXVII. — Comment Saintré print congïé du roy, de la royne et des dames, ausquelles il donna à chascune une verge d'or; et comment la royne en demanda une, laquelle il lui bailla en s'excusant, disant que il ne cuydoit pas qu'elle eust daigné prendre si petit present.	140
CHAPITRE XXVIII. — Comment, apres que Saintré eut prins congïé des barons et seigneurs de la court du roy, s'en alla disner avecques ses compaignons, ausquelz comme il disnoit, la royne luy envoya ung tres fin drap d'argent, et plusieurs seigneurs aultres dons et largesses; et comment à sa despartie se fit conduyre par les heraulx, trompettes et joueurs d'instrumens, et leur donna à soupper au Bourg la Royne, où il logea.	142
CHAPITRE XXIX. — Comment Saintré, estant en Avignon, le roy d'armes d'Anjou luy apporta le seelle de la responce de sa lectre d'armes, et luy compta tout comment il avoit parlé à Enguerant, et monstré sa lectre d'armes, qui en fut moult joyeux.	145



CHAPITRE XXX. — Comment le roy d'armes d'Anjou recita à Saintré que le roy d'Arragon avoit donné congé à Enguerrant pour le delivrer de son entreprise, et luy avoit faicte bonne chiere, parquoy Saintré et ses compaignons furent moult joyeux.	149
CHAPITRE XXXI. — Comment Saintré, estant logé à Parpignen, les nouvelles en vindrent au roy d'Arragon qui ordonna son logis à Barselonne. Et puis comment Enguerrant fut au devant de luy, hors la ville, l'espace d'une lieue, et le recut honorablement : et des devises et parolles de l'ung à l'autre.	153
CHAPITRE XXXII. — Comment messire Enguerrant presenta Saintré au roy et à la royne, qui luy firent très bel recueil et festoyerent solennellement	156
CHAPITRE XXXIII. — Comment Saintré entra pompeusement dedans les lices, avecques mainte belle compaignie de princes et chevalliers qui le conduysolent, et de l'ordre qui y fut	159
CHAPITRE XXXIV. — Comment messire Enguerrant entra pareillement dedans les lices en moult triumphant arroy	163
CHAPITRE XXXV. — Comment le roy fist mesurer les lances des deux champions, et comment Saintré se contenoit honnestement quant il passoit par devant le roy et la royne, estans en leurs hours.	166
CHAPITRE XXXVI. — Comment Saintré fist le signe de la croix par trois fois devant que esbranler sa lance, puis coururent les deux champions vaillamment. Et comment à la premiere journée le roy fist saillir Enguerrant le premier des lices, disant que Saintré avoit gagné pour ce jour la victoire.	168
CHAPITRE XXXVII. — Comment le roy envoya querir les deux champions pour soupper avecques luy. Et puis comment le lendemain retournerent aux lices, faisant merveilles l'ung à l'autre	170

prononça le dicton de la victoire que gaingna Saintré; des pris et offertes faictes de l'ung à l'autre, et de l'ysue des lices.	174
CHAPITRE XXXIX. — Comment Saintré, apres qu'il eut ouye la messe, envoya par deux heraulx d'armes deux haches à messire Enguerrant, selon le contenu de son entreprise. Puis comment le roy envoya son herault signifier à Saintré l'heure pour aller aux lices.	178
CHAPITRE XL. — Comment les deux champions entrerent la tierce fois dedans les lices sollennellement.	179
CHAPITRE XLI. — Comment ilz yssirent de leurs pavillons pour faire leurs armes.	184
CHAPITRE XLII. — Comment l'ung contre l'autre desmarcherent, et combattirent très vaillamment.	185
CHAPITRE XLIII. — Comment Saintré print congïé du roy, de la royne, et de tous ceulx de la court, et des dons qui se firent	194
CHAPITRE XLIV. — Comment Saintré, acompaigné de tous les seigneurs, se part de Barselone pour retourner en France	198
CHAPITRE XLV. — Comment Saintré et ses compaignons viennent, et de la bonne chere que le roy, la royne et aultres leur firent	199
CHAPITRE XLVI. — Comment Saintré par ses journées est venu devers le roy; l'honneur et les bonnes cheres qui luy furent faictes, et le cuer de ma dame query.	202
CHAPITRE XLVII. — Cy parle comment Saintré fut le chambellant du roy, et des alliances de luy et de l'escuyer dit Bouciquault.	205
CHAPITRE XLVIII. — Comment ma dame ordonna à Saintré d'oster l'emprise que le seigneur de Loiselench portoit.	208
CHAPITRE XLIX. — Comment ma dame se complaint à Saintré, et les douces parolles qu'elle luy dit.	215
CHAPITRE L. — Comment le seigneur de Loiselench et Saintré vindrent es lices faire leurs	

armes à cheval, present le roy, la royne et plusieurs princes, seigneurs et dames	219
CHAPITRE LI. — Comment le seigneur de Loissenlench et Saintré vindrent es lices, et firent leurs armes à pié	232
CHAPITRE LII. — Comment le roy ordonna que les pris fussent donnés.	237
CHAPITRE LIII. — Comment le seigneur de Loissenlench soupa avecques la royne.	240
CHAPITRE LIV. — Comment le seigneur de Loissenlench print congé.	243
CHAPITRE LV. — Comment messire Nicolle de Maltestes chevalier, et Galias de Mantua escuyer, vindrent faire arme à la court.	256
CHAPITRE LVI. — Comment Saintré et Bouciquault furent querir les deux champions, pour venir parler au roy de France, et jouterent contre eulx.	259
CHAPITRE LVII. — Comment Saintré josta contre le baron de Tresto, et furent jugiez estre pareilz.	263
CHAPITRE LVIII. — Comment la dame requist à Saintré d'aller en Prusse contre les Sarrazins; et comment il luy promist d'y aller, et le fist le roy chief de cinq cens lances.	265
CHAPITRE LIX. — Comment, après que le terme fut venu pour aller en Prusse, le roy bailla sa baniere à Saintré, le commettant son commissaire. Puis comment ledict Saintré et les autres seigneurs prendrent congé du roy, de la royne et des dames, qui menerent grant duel au departir espécialement la dame.	285
CHAPITRE LX. — Comment les Sarrazins estoient en grand nombre de Turcz et infidelles, plus qu'on n'avoit veu depuis le temps de Mahommet	302
CHAPITRE LXI. — Comment en la bataille des Sarrazins Saintré tua le Turcq de prime face, et faisoit si bien son debvoir, que tous les ennemis luy faisoient place. Et puis comment l'empereur de Cartaigne, les deux Souldans de Babillonne et	

Mabaloith, le grant Turcq, furent mis à mort, et autres plusieurs tant d'ung party que d'autre. . .	307
CHAPITRE LXII. — Comment les nouvelles coururent par tout, specialement en France, que le petit Saintré avoit fait merveilles; specialement entre les autres choses, avoit tué le grand Turcq et abatu sa banniere : dont le roy fut grandement joyeulx, et en remercy Dieu et les saints en grant sollempnité	313
CHAPITRE LXIII. — Comment Saintré et toute la noble compaignie des chrestiens françois, apres la desconfiture des infidelles, retournerent à Paris, où ils furent joyeusement receuz du roy, de la royne et de tout le peuple.	315
CHAPITRE LXIV. — Comment Saintré requist au roy que pour sa bien venue couchast avecques la royne, ce qu'il luy promit; et comment la royne en fist grande risée, luy demandant pourquoy il avoit fait celle requeste. Puis enfin comment, sus la minuyt, il alla parler à la dame en secret, qui luy fit la plus grant chiere du monde, non pas sans plusieurs baisers et accollemens.	319
CHAPITRE LXV. — Comment le petit Saintré delibera de porter une visiere de bassinet d'or par l'espace de trois ans : et comment le roy luy conceda, nonobstant que ce fut contre sa volonté.	322
CHAPITRE LXVI. — Comment Saintré fut au preau parler à la dame, et luy compta son entreprise, dont elle fut moult dolente et marrie; toutes fois tant la supplya le petit Saintré que à sa requeste ladicte dame luy attacha son entreprise sur l'espaule.	328
CHAPITRE LXVII. — Comment les neuf compaignons vindrent le matin devers le roi	332
CHAPITRE LXVIII. — Comment le roy parle à Saintré, et des dons qu'il luy fist et à sa compaignie.	337
CHAPITRE LXIX. — Comment ma dame est en son hostel venue; et comment on la va festoyer.	343

CHAPITRE LXX. — Comment ma dame et damp Abbez deviserent, et comment elle le remercya	352
CHAPITRE LXXI. — Comment damp Abbez fut loué.	353
CHAPITRE LXXII. — Comment ma dame fist sa col- lacion fourrée.	356
CHAPITRE LXXIII. — Comment ma dame et ses fem- mes se louerent l'une à l'autre de damp Abbez .	358
CHAPITRE LXXIV. — Comment la royne escript à ma dame la premiere fois	363
CHAPITRE LXXV. — Comment ma dame, sans oyr la creance, fait à la royne sa responce	364
CHAPITRE LXXVI. — Comment ma dame bailla ses lectres à maistre Julien, et luy dist sa creance. .	367
CHAPITRE LXXVII. — Comment le seigneur de Sain- tré et ses compaignons vindrent à la court de l'em- pereur; et comment à leur grant honneur furent, par les seigneurs ci apres nommez, delivrez de leurs armes, tous hommes nobles de nom et d'ar- mes	371
CHAPITRE LXXVIII. — Comment les François vin- drent, et le grant honneur qu'on leur fist	373
CHAPITRE LXXIX. — Comment la bataille fut, et l'ordonnance de l'empereur	374
CHAPITRE LXXX. Comment le roy d'armes de l'em- pire rendit les priz, et parla aux champions . . .	377
CHAPITRE LXXXI. — Comment le seigneur de Saintré et ses compaignons sont venuz à Paris devers le roy	380
CHAPITRE LXXXII. — Comment damp Abbez rapaisa le seigneur de Saintré	400
CHAPITRE LXXXIII. — Comment ma dame et damp Abbez avec leurs gens sont demourez.	417
CHAPITRE LXXXIV. — Comment ma dame revint à la court.	418
CHAPITRE LXXXV. — Comment ma dame fut à la court, et la bonne chiere que chascun luy fist. .	420

CHAPITRE LXXVI. — Comment le seigneur de Saintri, sans riens nommer, conta l'estoire de ma dame, de d'amp Abbez et de luy; et rendit la sainture à ma dame devant la royne et plusieurs autres dames ou damoyelles 4

*Icy finist la table de ce present livre, contenu
la très plaisante bystoire et cronique de messir
Johan de Saintri et de la jeune dame de Belles Co
sines, sans autre non nommer.*



NOTES



NOTES

Page 3, ligne 3. — Jean d'Anjou, fils du roi René et d'Isabelle de Lorraine; descendant direct de Jean le Bon, sous le règne duquel le roman se passe, et qui y joue un rôle assez important.

5, 3. — Jean II, surnommé le Bon, roi de France en 1350, mort à Londres en 1364.

7, 14. — Bonne, fille de Jean de Luxembourg, roi de Bohême, qui fut tué à la bataille de Crécy. Mariée en 1332 à Jean, alors duc de Normandie, elle mourut à l'abbaye de Maubuisson le 11 août 1349, du vivant de Philippe de Valois. Jean se remaria le 9 février 1350 (nouveau style), avec Jeanne de Boulogne, veuve en 1346 de Eudes, duc de Bourgogne. Antoine de La Sale substitue Bonne à Jeanne comme reine de France, en faveur de son « très redouté seigneur » Jean d'Anjou, qui descendait de Bonne.

7, 16. — *Qui des belles cousines de France estoit.* — *Beau cousin, belle cousine*, titres que les souverains donnaient par honneur aux personnes de leur entourage. Les anciens commentateurs, se méprenant sur le sens de ces mots, ont cherché la dame des belles cousines parmi les proches pa-

rentes du roi ; mais toutes leurs découvertes (on en compte quatre différentes) reposent sur des anachronismes.

P. 27, l. 21. — *Talles de Milesie*. — Talès de Milet. La plupart des citations qui suivent sont de pure fantaisie.

40, 2. — *Desquelz aussi font*. — Traduisez : *De ceux qui font*.

49, 11. — *Vegece en son premier livre de l'Art de Chevalerie*. — Végèce (Flavius Vegetius Renatus) vivait au IV^e siècle après Jésus-Christ. Le titre de son ouvrage est : *De re militari*. Jean de Meung, qui le traduisit en 1284, donna pour titre à sa traduction *l'Art de Chevalerie* ; elle est maintenant perdue.

61, 28. — Il s'agit de saint François d'Assise. — *Frère Lion*, frère Léon.

62, 9. — *De Genesis*. — Les manuscrits donnent de *Uteronomie* (Deuteronomie) : erreur de copiste — ou de l'auteur — que M. Marie Guichard a rectifiée. Le passage cité est tiré de la Genèse, chap. IX, vers. 6.

67, 5. — Albertus, c'est sans doute Albert le Grand, né à Lauingen, en Souabe, en 1205, mort à Cologne en 1280. D'abord provincial des Dominicains, puis évêque de Ratisbonne, il se démit de cette dignité pour se livrer à l'enseignement, et acquit par ses leçons publiques une renommée immense.

68, 19. — Les manuscrits portent par erreur *derrain livre* et *XXI chapitre* : correction de M. Marie Guichard.

76, 14. — *Jacques Martel*. — « Martelet Duménil, premier écuyer et maître de l'écurie du roi en 1364, mourut en 1373. Tous les autres ici

nommés étoient officiers du roi. » N. de Guellette.

P. 102, l. 27. — *Rois d'armes et beraulx*. — Le roi d'armes étoit une sorte de maître des cérémonies militaires. Dans tout ce qui concernait la chevalerie, les rois d'armes portaient la parole du roi ou du seigneur auquel ils étoient attachés. « Ils occupaient les premières places dans les solennités publiques, dit M. Marie Guichard, présidaient le chapitre des hérauts, dressaient les généalogies et dégradèrent les gentilshommes convaincus de félonie ; ils réglaient les conditions des tournois, portaient les défis, préparaient les lices selon les lois de la chevalerie, et proclamaient les vainqueurs. Les rois d'armes prenaient leur nom d'un cri de guerre, de quelque ornement héraldique, d'un ordre de chevalerie, ou de la province où ils résidaient. » On sait que le roi d'armes de France s'appelait *Montjoye-Saint-Denis* (voir le Glossaire au mot *Montjoye*). « Les *Hérauts d'armes* participaient aux fonctions des rois d'armes et jouissaient d'une partie de leurs privilèges. Le roi (d'armes) baptisait les hérauts en leur versant une coupe d'or pleine de vin sur la tête, et il fallait avoir exercé pendant sept années la charge de *Poursuivant d'armes* pour parvenir à celle de héraut. » Marie Guichard.

106, 17. — *Alanus*. — Alain de Lille (xii^e siècle), auteur de l'*Anti-Claudianus seu de officio viri boni et perfecti, libri X*, ouvrage auquel Jean de Meung a emprunté une grande partie du discours de Nature dans le *Roman de la Rose*.

107, 18. — *Dares Phrygius*. — Darès le Phrygien, cité par Homère dans l'*Iliade*, au début du V^e chant :

« Parmi les Troyens vivait Darès, riche et irrè-

prochable sacrificateur de Hèphaistos, et il avait deux fils, Phygeus et Idaios, habiles à tous les combats. » (Trad. de M. Lecomte de Lisle)

Puis le poète raconte la mort de l'un des fils et la fuite de l'autre, enlevé par Hèphaistos (Vulcain), « afin que la vieillesse de leur vieux père ne fût point désespérée. » C'est tout; mais un nom suffit à la légende : ce Darès passa pendant tout le moyen âge pour être l'auteur d'un récit de la prise de Troie (*De excidio Trojæ*) qui partageait la confiance publique avec celui — non moins fabuleux — du crétois Dycitis, l'un des assiégeants. L'ouvrage du prétendu Darès a été deux fois traduit en français, en vers et en prose, au XIII^e siècle.

P. 107, l. 20. — Arnobius Afer vivait sous Dioclétien (III^e siècle). Maître de rhétorique, il eut Lactance pour disciple. Il embrassa le christianisme et écrivit contre les Gentils.

108, 2. — Victor, évêque de Vite (V^e siècle), auteur d'une histoire des persécutions exercées contre l'Église d'Afrique par Genséric et Hunneric, rois des Vandales : ouvrage imprimé à Dijon (1665) et à Paris (1694).

108, 2. — *Pompeius Trogus*. — Trogue Pompée, historien latin du siècle d'Auguste, auteur d'une *Histoire philippique* qui ne nous est connue que par l'abrégé qu'en fit Justin.

119, 12. — *Vous ferez porter le paon*, etc. — Le paon était autrefois un mets fort recherché, qui se servait aux dîners d'apparat, et sans doute son plumage contribuait à sa bonne réputation. Le serment prononcé sur le paon est imité de plusieurs romans de chevalerie; l'un de ces romans, du commencement du XIV^e siècle, a pour titre les *Vœux du Paon*.

P. 144, l. 11. — « Les *Poursuivants d'armes* étoient de la dépendance des hérauts et assistoient à leur chapitre. Un seigneur banneret pouvoit avoir des *Poursuivants* sous l'aveu de quelque héraut. On les baptisoit, dans les fêtes solennelles, après le souper, de quelque nom gaillard, comme Jolicœur, Verluisant, Sansmentir, Gaillardet, Beausembiant Haut-le-Pied, etc... Leurs cottes-d'armes étoient différentes de celles des hérauts, et ils avoient des bâtons sans ornement. » (*Dictionnaire de Trévoux.*)

147, 27. — *Façon de corps et bonneste de parler.*
— Redoublez façon : bonneste façon de parler.

172, 27. — *Alarde*, « mot corrompu qui paroît signifier à la corde. Les barrières des lices où combattoient les chevaliers dans les joutes et tournois n'étoient souvent que des toiles tendues de drap ou de quelque autre étoffe; ces toiles devoient être soutenues par une grosse corde tirée d'un bout à l'autre de la barrière. » (Roquefort, *Glossaire de la langue romane*, suppl., p. 14.) L'un des manuscrits porte *a larga*.

197, ligne dernière. — *Oysellets de Chippe*. — « C'étoient de petites balottes de toutes grandeurs, remplies de parfums exquis, et qu'on joignoit ensemble avec de la gomme pour leur faire prendre la forme de certains petits oiseaux de la peau desquels on les composoit, afin de les faire crever à propos. » (*Ducatiana*).

205, 3. — *Bouciquault*. — Jean le Maingre, dit Boucicaut, négociateur du traité de Brétigny (1360), père du fameux maréchal de Boucicaut. Voy. dans le *Livre du chevalier de La Tour Landry*, chap. XXIII, une anecdote dont il est le héros.

208, 18. — Saint Jacques de Compostelle, en


Galice, le plus célèbre lieu de pèlerinage de l'Espagne.

P. 213, l. 19. — *Montjoye*. — « Le roi d'armes Mont-Joie a l'avantage de tenir le premier rang sur les autres rois d'armes des marches ou provinces; lesquels avoient sous eux chacun des hérauts et deux poursuivants, qui composoient un collège, dont le chapitre se tenoit à Paris en l'église du Petit-Saint-Antoine. Il est distingué des autres par sa cotte d'armes de velours violet cramoisi, ornée, devant et derrière, de trois grandes fleurs de lis en broderie d'or, surmontées et couvertes d'une couronne royale, frangée et galonnée d'or; sur la manche droite trois fleurs de lis, et le nom et le titre de Mont-Joie écrit en broderie d'or, et *roi d'armes de France* sur la gauche. Anciennement il portoit sur sa poitrine un camaïeu ou émail de cristal rehaussé d'or, garni et bordé de pierreries fines, où étoient peintes les armes du roi. » (*Dictionnaire de Trévoux*.)

220, 24. — *Le duc de Berry*. — Jean, troisième fils de Jean le Bon, né en 1340, mort en 1416; le moins ambitieux et le moins avide des parents de Charles VI, le grand bibliophile et le grand bâtisseur du XIV^e siècle.

221, 23. — *Le duc d'Anjou et de Bourbonnais*. — Louis I^{er} d'Anjou, deuxième fils de Jean le Bon. Jeanne I^{re}, reine de Naples, lui légua sa couronne; mais, vaincu par Charles de Duras, il ne monta jamais sur le trône. Ses successeurs, jusqu'à René, renouvelèrent vainement sa tentative.

246, 21. — *Vous tenez ung pas*. — *Pas ou pas d'armes*, divertissement chevaleresque. Un chevalier plantait sa bannière sur une route, et le passage ainsi défendu devait être conquis par la lance. On



se réunissait souvent en nombre pour exécuter ces *emprises*.

P. 254, l. 17. — *Franc-à-cheval*, monnaie d'or frappée sous les règnes de Jean II et de Charles V.

256, 28. — *Porte Baudoyer*. — Elle avait été ménagée dans l'enceinte de Philippe-Auguste, et, au temps d'Antoine de la Sale, elle faisait communiquer le Paris ancien avec le quartier neuf appelé alors *faubourg Saint-Antoine*, où s'élevait l'hôtel royal de Saint-Pol. Son emplacement peut être fixé sur le terre-plein situé rue Saint-Antoine, au débouché de la rue François-Miron : cette dernière rue s'appelait alors *Grant rue de la porte Baudoyer*, et y aboutissait ; c'est à cette voie que la place Baudoyer, située plus près du centre, doit son nom. Originellement appelée *Porta Bagaudarum* (*Porte des Bagaudes*, paysans de la Beauce révoltés contre la domination romaine), elle devint par corruption *Porte Baudéer* (Guillot, *Dit des Rues de Paris*, vers 1300), *Baudoyer*, *Baudoyer* ; de ce nom, une nouvelle altération fit *Baudet* (*Bodetz*, *Baudais* dans la *Fleur des Antiquités de Paris* de G. Corrozet, 1532). — Il est question de l'auberge de l'Ours dans une charte de l'an 1377 ; selon Gueulette, elle existait encore au XVIII^e siècle.

258, 10. — *Nicolle de Maltestes*. — Niccolo Malatesta, de la maison de Rimini.

458, 14. — *Galias de Mantua*. — Galéas de Mantoue, général au service de la république de Venise, prit Padoue en 1405, et fut tué peu après d'un coup de flèche, dans un combat. (Andrea Gataro, *Istoria Padovana*). L'opinion d'Antoine de la Sale paraît donc erronée ; les historiens ne font aucune mention de la rencontre de Galéas avec Bou-

P. 265, l. 5. — *D'aller en Prusse contre les Sarrasins.* — Au moyen âge, on donnait le nom de « Sarrasins » à tout peuple ennemi de la foi chrétienne ; ici, ce mot désigne les Lithuaniens idolâtres, qui étaient souvent en guerre avec l'Ordre Teutonique. L'expédition dont parle La Sale n'a rien d'historique. Il y eut bien, en 1343, c'est-à-dire bien avant l'avènement de Jean II, une croisade contre les Lithuaniens ; mais la France n'y envoya aucun contingent : l'Allemagne seule prit les armes, et les croisés ne rencontrèrent pas l'ennemi, qui profita de l'absence des chevaliers teutoniques pour ravager la Livonie et la Prusse.

273, 13. — *Le captau de Bueil.* — Le captal de Busch, titre donné au seigneur du château de Cap de Busch, aujourd'hui La Teste de Busch, près d'Arcachon. Il appartenait à la maison de Foix. Ce nom a été écrit de plusieurs manières différentes : on trouve *Buef* (c'est-à-dire *bœuf*) dans les *Chroniques de Saint-Denis*.

279, 8. — *Monseigneur Philippe de Bourbon.* — La généalogie de la maison de Bourbon ne signale, sous le règne de Jean II, aucun membre de cette famille qui ait porté le prénom de Philippe. Par contre, Antoine de La Sale a pu connaître deux personnages de ce nom. Ce sont : 1° Philippe de Bourbon, seigneur de Beaujeu, deuxième fils de Charles I^{er}, duc de Bourbon et d'Auvergne (Charles mourut en 1456) ; 2° Philippe de Bourbon, seigneur de Duisant, troisième fils de Jean de Bourbon, seigneur de Carency ; il vivait encore en 1492.

281, 7. — *Combien qu'il ne fust point son subject.* — Sous le règne de Jean le Bon, et jusqu'à l'année 1361, le duc de Bourgogne était Philippe de Rou-

vre, fils de Philippe et de Jeanne, devenue reine de France par son second mariage. Philippe de Rouvre mourut à l'âge de treize ans, en cette année 1361, étant encore sous la tutelle de la reine sa mère. Le duché de Bourgogne revint alors au roi de France, qui le garda jusqu'à sa mort. Ce fut Charles V, devenu roi, qui, déférant au vœu de son père, remit ce duché à son frère Philippe, en échange de la Touraine. Le serviteur du petit-fils de Philippe le Hardi ne s'est pas soucié de ces détails historiques; sa phrase naïve n'en a que plus de prix et porte un témoignage d'autant plus curieux des prétentions de cette famille.

P. 295, l. 20. — *Ruyers*. — Ce mot est expliqué par Gollut, auteur des *Mémoires de la République séquanoise*, dans un passage qui, en même temps, nous fait connaître la patrie d'Antoine de La Sale : « Ces rois d'armes et tous ceux des Gaules estoient nommés *rois d'armes Poyers*, à la différence de ceux de l'Empire, qui estoient appelés *Royers* comme Antoine de La Sale, de nostre pays, ha'escript. »

298, 17. — *Le maistre de Prusse et tout l'hospital*. — Le grand-maître de l'Ordre Teutonique et ses chevaliers.

300, 25. — *De cent à quarante ou cinquante mille*. — Lisez : *De cent quarante à cent cinquante mille*.

302, 15. — *En l'église Sainte-Marie de Ruer*. — « La légende rapporte que les anges transportèrent sur le mont Sinaï le corps de sainte Catherine d'Alexandrie. Richard Pokoke (*Voyage en Orient*, Paris, 1772, t. I, p. 439) parle d'une chapelle dédiée à sainte Marie et située entre le mont Horeb et le mont Sinaï. *Ruer* est probablement une altération de copiste. » (Marie Guichard.)

P. 304, l. 9. — *L'avant garde qui estoit d'argent à une croix de sable.* — C'est-à-dire : dont la bannière estoit d'argent, etc.

305, 9. — *Porteroient chascun ung grant pavays qui se appuyoient.* — Il s'agit ici de grands boucliers, défense ordinaire des gens de pied, qui, la pointe étant appuyée à terre, couvraient encore la poitrine : c'étaient de bons remparts, mais des *impedimenta* fort gênants pour l'attaque.

320, 17. — *Les escolliers sont delivrez et allent jouer.* — Lisez : *afin qu' ils aillent jouer.* Cette ellipse n'est point rare dans notre ancienne littérature. On a dû remarquer déjà que l'auteur — ou le copiste — a partout supprimé l'*i* de flexion du subjonctif. — On peut aussi voir dans *allent* une forme fantaisiste de l'indic. présent, imitée de *allons, allez.*

333, 5. — *Par les carrefours.* — C'est-à-dire dans les angles formés par les limites de l'étoffe ou par les broderies dont elle était ornée.

342, 12. — *Comment le fait-elle? — Comment va-t-elle?*

360, 28. — *Celuy qui sert et ne persert, son loyer pert.* — Celui qui sert et ne reçoit rien, perd son salaire. *Persert* pour *perçoit*.

380, 6. — *Sainct Cosme et Sainct Damien pelerins.* — Les restes du prieuré de Saint-Cosme sont encore visibles au sud de Luzarches (Seine-et-Oise); l'église de ce bourg, consacrée à saint Damien, remonte au douzième siècle; mais elle a été reconstruite, en grande partie, au seizième.

381, 13. — *Quant au cueur de la royne, elle a bien pyssé en son jacques de soye :* elle a beaucoup perdu des bons sentiments que la reine avait pour elle.

34, l. 8. — *Qui fut seur ne fut il mye.* —
: Il ne fut point celui qui fut sûr (tranquille).

9. — *Ses chausses, qui en ce temps ne s'en-*
sont mie : C'est-à-dire qu'elles ne tenaient
l'une à l'autre, et n'étaient maintenues que
par lacets.

7. — Voici la traduction de cette épitaphe :
« It monseigneur Jean de Saintré, chevalier,
d'Anjou et du Maine et chambellan de
le duc d'Anjou, qui mourut l'an du
1368, le 25^e jour d'octobre. Que son
ame repose en paix ! Amen. »

titres que l'auteur attribue ici à son héros
ne peuvent pas être pris au sérieux. En effet, il ne
s'agit pas d'oublier à quel personnage le roman est
consacré. Antoine de La Sale nous a tracé le portrait
d'un chevalier accompli ; il couronne l'œuvre en
présentant ce chevalier un serviteur de la maison
du duc. Cela n'est pas pour déplaire à Jean, son
disciple et son « très-redouté sei-





GLOSSAIRE





GLOSSAIRE

- ACCOMTÉ.** — Lié, familier, familiarisé.
ACCOMTER (s'). — Entrer en relations, se lier.
ACERTENÉ. — Certain, assuré, convaincu.
ACHAPTER. — Acheter.
ACONVOYER. — Accompanyer, escorter.
ADONC. — Alors, donc.
ADOUBTER. — Douter, craindre, avoir peur.
ADVENIST. — Advint.
ADVIS. — Esprit de ressource, présence d'esprit. *Pourvus d'avis* : nous disons encore *avisé*.
AFFICQUET. — Objet servant à la parure, ornement léger.
AFFIERT (IL). — Il convient, il appartient.
AHURTER (s'). — Se heurter, se bousculer.
AIGUIÈRE. — Vase à mettre de l'eau (*aigue*, eau, du l. *aqua*).
AINS. — Mais, au contraire. — *Ains que*, avant que.
ALAINE. — Haleine.
ALARDE. — Voy. note de la page 172.
ALLAPIE. — Le pays d'Alep, entre l'Asie Mineure et la Syrie.
ALLGARBE. — Les Algarves, prov. méridionale du Portugal.
ALMAIGNE. — Allemagne.
AMANCHÉ. — Emmanché.
AMANDER. — Améliorer.
AMESURÉ. — Réglé, sage, circonspect.

GLOSSAIRE

ANCRÉ. — (Blas.) Se dit des pièces dont les extrémités sont recourbées en forme d'ancre.

ANDELOSIE. — Andalousie.

ANNELET. — Petit anneau.

APPAREILLÉ. — Préparé.

APPENSER (s'). — Délibérer, concevoir l'idée.

ARCANDOLLE. — Chemise.

ARMÉ. — (Blas.) Se dit soit d'un homme tenant un arme ou couvert d'une armure, soit d'un animal pourvu de griffes dont on indique l'émail.

ARMIGÈRES (ARMES). — Armes de guerre.

ARRAISONNER. — Faire entendre raison; questionner.

ARREST. — Le point de la lance appuyé au côté du combatant, et aussi la pièce de l'armure qui arrêtait la lance.

ARROY. — Arrangement, train, équipage (*Roi*, règle mesure).

ARSOIR. — Hier au soir.

ASSEBENOYS. — Habitants du Hasbain (Belgique).

ASSENÉ. — Qui est d'accord, en communion d'idées ou de sentiment avec quelqu'un (de *assens*, assentiment accord). On a dit de même, au moyen âge, *sené* pour *sensé* : les subst. *sens*, *assens* perdaient l's finale au régime.

ASSUBILLIER. — Rendre subtil.

ATOUR. — Toilette, parure.

ATOURNER. — Parer. (substantiv.) La toilette.

ATOUT. — Avec.

ATRAIRE. — Attirer.

ATTEMPÉ, ATTEMPRÉ. — Tempéré, modéré, calme, et fléchi.

ATTEMPRANCE. — Tempérance, modération.

AUTRUY. — Ce qui appartient à un autre (lat. *popul alterui*). *Autrui cuir*, le cuir, ou la peau d'autrui. — Substant. *l'autrui*, le bien d'autrui.

AVALLER. — Descendre. — (Activ.) Faire descendre abaisser (*aval*, en bas).

AVER. — Avaré.

BAGUES. — Bijoux, bagages.

BAHOUR. — Siège simulé, divertissement guerrier.

BAHAIGNE, BEHAIGNE. — Bahême.

BAILLER. — Donner, confier.

- BALAIS, BALLOYS.** — Rubis balais, pierre précieuse.
- BANDE.** — (Blas.) Pièce qui traverse l'écu de l'angle droit du chef à l'angle gauche de la pointe.
- BANDEROLLE.** — Banderolle, petite bannière attachée à la lance.
- BARDES.** — Harnois de guerre qui protégeait le poitrail et les flancs du cheval.
- BARECTE, BARETTE.** — Bonnet.
- BARRE.** — (Blas.) Pièce qui, au contraire de la *bande*, traverse l'écu de l'angle gauche du chef à l'angle droit de la pointe.
- BASSINET, BACINET.** — Coiffure de guerre, composée d'un bonnet de mailles et d'une visière mobile en forme de muscau pointu.
- BASTON.** — Ce mot servait à désigner toute espèce d'arme offensive.
- BEAIGNE, BEHAIGNE.** — La Bohême.
- BEIGNIR.** — Bénir.
- BELLEMARINE.** — La côte Barbaresque.
- BENEYSSON.** — Bénédiction.
- BENOIST.** — Béni, bienheureux.
- BESANT.** — Ancienne pièce de monnaie. — (Blas.) Pièce ronde de métal, c'est-à-dire d'or ou d'argent. — On trouve aussi ce mot employé pour *talent, capacité, valeur*.
- BIENHEURÉ.** — Bonheur.
- BIEVRE.** — Peau de loutre ou de castor.
- BILLECTÉ.** — (Blas.) Semé de billettes. — *Billette*, pièce en forme de carré long, posée d'ordinaire verticalement.
- BOLIES (SOLLES).** — Solles bouillies.
- BOUCAINGHAM.** — Buckingham.
- BOUESME.** — La Bohême.
- BOULGERRIE.** — Bulgarie.
- BOULLAINE.** — Boulogne-sur-Mer.
- BOURDEUR.** — Mauvais plaisant.
- BOUTER.** — Jeter, pousser. *Bouter hors*, mettre hors, retirer.
- BRANLE.** — Risque. — Espèce de danse.
- BRIGANDINE.** — Armure du torse, ayant la forme d'un corset.
- BRUINE.** — Brume, brouillard.
- BRUIT.** — Renommée. *Il leva bruit*, il acquit du renom.

due, à tort, avec la *bure*, étoffe beaucoup plus grossière :

Car ausinc bien sunt amoretes
Sous buriaus comme sous brunetes.

(*Roman de la Rose*).

Bureau, bure de l'espèce la plus grossière.
BUFFE. — Partie du heaume qui couvre les joues.
BURELLÉ. — (Blas.) se dit de l'écu couvert de bureles. —
Burèle, fasce diminuée d'un tiers.
BUSINE. — Trompette.

CABASSER. — Gaspiller. — Il signifiait aussi intriguer,
grapiller, filouter.

CAMBRUGES. — Cambridge.

CAMPANE. — Cloche.

CAMPONNÉ. — Voy. *Componné*, qui est la forme régulière.

CAOURS. — Cahors, ville.

CAPPONNÉ. — Voy. *Componné*.

CAPPTAU DE BUEIL. — Voy. la note de la page 273.

CARRE (LE). — Le Caire.

CECILLE. — Sicile.

CHAILLE, CHAILLOIT. — Voy. *Chaloir*.

CHALIS. — Bois de lit.

CHALOIR. — Importer. — *Ne vous chaille*, qu'il ne vous
importe pas. — *Non chaloir*, indifférence.

CHAMPFRAIN. — Armure qui protégeait la tête du cheval.
CHASTIER. — Corriger, admonester, instruire. Ce mot
n'impliquait pas autrefois l'idée d'une répression.

CHASTOY. — Enseignement, remontrance.

CHENEVAS. — Corbeille.

CHEROIR. — Choir, tomber.

CHEUZ (je). — Je tombai.

CHETIF. — Originellement captif (l. *captivus*; anc. frans
caitis); puis malheureux, misérable, méprisable, débile.
Cette dernière signification lui est seule restée.

CHIEF. — Tête, chef. *Au chief*, au bout. — (Blas.) *Ti*
supérieur de l'écu.

CHIERRE, CHERR. — Visage, accueil.

CHIQUETÉ. — (Blas.) Echiqueté, se dit de l'écu ou d'
partie de l'écu divisée en carrés égaux dont l'ense
figure un échiquier.

CHIL. — Pavillon, tente.

- CLISSER.** — Glistier.
COUVRECHIEF. — Coiffure, enveloppe.
COGNOIS (je). — Je connais, je reconnais.
COGNOISSANCE. — Connaissance, reconnaissance.
COIEMENT. — Tranquillement, doucement, sans bruit (*coi*, du l. *quietus*).
COMPARER. — Donner compensation, payer au figuré.
COMPONNÉ. — (Blas.) Se dit des pièces formées de *compons* (carrés) d'émaux alternés. — *Franges d'argent espoussées de soie*, franges où l'argent alterne avec la soie.
CONFORMER. — Confirmer, affirmer.
CONFES. — Confessé.
CONNIN, CONNIL. — Lapin.
CONTENDRE. — Tendre à, avoir pour but.
CONVOYER. — Accompagner.
COP. — Coup.
COSTISSE. — (Blas.) Cottice, bande diminuée d'un tiers.
COULONGNE. — Cologne.
COULPE. — Faute.
COURATIER. — Courtier.
COURCER, COURSER. — Mettre en colère, chagriner. *Se courser*, se courroucer.
COURRE. — Anc. forme de l'inf. Courir, encore employée dans *chass d courrs*.
COURTOYSES (ARMES). — Armes de parade servant aux joutes, aux tournois.
COY. — Tranquille, silencieux.
CRUEUX. — Cruel.
CUEURS. — (P. 268). Chœurs d'églises.
CUEILLIR. — Arranger, disposer.
CUYDER. — Croire.

DAMP. — Seigneur (l. *Dominus*), titre d'honneur attaché à certains offices ecclésiastiques. On disait aussi *den* et *dom*, qui s'est conservé.
DANGIER. — Proprem. Territoire assujéti (l. *Dominium*); d'où sujétion, difficulté, et sens actuel. P. 43, l. 4, il signifie Difficulté; à la ligne suivante, il a le sens actuel.
DELAIER. — Retarder, remettre.
DELICT, DELIT. — Plaisir, agrément.
DELICTER (se). — Se plaire, se réjouir.

DENTÉ. — (Blas.) Se dit des animaux montrant leurs dents, dont on indique l'émail.

DEPARTIR. — Partager, séparer, distribuer. — *Se départir*, séparer. — Substant. : « Et sur ce fut leur départir. »

DERNIER (SE). — Se distraire, se divertir ; se dispenser.

DERNIÈREMENT. — Dernièrement, en dernier lieu.

DECHVOIR (il). — Il tombe (de *dechoir*).

DECHOIR. — Abattu.

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

DECHOIR (il). — Il tombe (de *dechoir*).

DECHOIR (se). — Se distraire, se divertir ; se dispenser.

DECHOIR (se). — Dernièrement, en dernier lieu.

- DUEL.** — Deuil, tristesse, affliction.
DYE. — Disc (subj. prés.)
EFFROY. — Trouble, esclandre.
EMBUSCHER (s'). — S'embusquer, se cacher. « Embusché du deul soubz l'ombre du parler... » (page 227). Traduisez : dissimulant (sa restorée maladie) sous l'ombre du chagrin que lui causait le langage de la reine.
EMPAINDRE. — Pousser (l. *Impingere*).
EMPERIERE. — Impératrice.
EMPIECE. — De longtemps.
EMPRENDRE. — Entreprendre.
EMPRÈS. — Près.
EMPRISE. — Entreprise.
ENCHOIR. — Tomber dedans.
ENCHONNE. — Ancône, ville.
ENDENTÉ. — Dentelé.
ENDEMANTIERS. — Pendant ce temps-là. *Endemantiers que*, pendant que.
ENDOUSSÉ. — Adossé, dos à dos.
ENGIN. — Esprit, adresse, invention (l. *Ingenium*).
ENGRESLÉ. — (Blas.) Se dit des pièces bordées de dents fines, à intervalles arrondis.
ENSIEUVIR. — Suivre, imiter.
ENSUYVIR (s'). — S'ensuivre.
ENTENDIS QUE. — Tandis que.
ENZ. — Dedans.
ERRER. — Voyager, marcher.
ES. — Dans les.
ESBANoyer (s'). — Se divertir.
ESBATEMENT. — Amusement.
ESBAY. — Ebahi, étonné.
ESCARTELÉ. — (Blas.) Se dit de l'écu divisé en quatre carrés égaux.
ESCHAQUETÉ. — V. *Chiqueté*.
ESCHEVER. — Eviter.
ESCLISSER. — Glisser.
ESCONDYRE. — Econduire, refuser.
ESCONSER (s'). — Se cacher, disparaître.
ESLE. — Aile.
ESLESSÉ. — (Blas.) Alésé, se dit des pièces honorables dont les extrémités n'atteignent pas les bords de l'écu.
ESLEU. — Choisi.

- ESLIRE.** — Choisir.
ESMAYER (s'). — S'émouvoir, s'effrayer.
ESPARTER (s'). — Se partager, se disperser.
ESPRIT. — Esprit (l. *spiritus*).
ESPICES. — Confiseries.
ESPRENDRÉ (s'). — S'agiter, s'émouvoir.
ESPRINS. — Epris.
ESQUELLES. — (Pron. contracté). Dans lesquelles.
ESSE. — Est-ce.
ESTABLE. — Stable, ferme, constant.
ESTAULX. — Echafauds.
ESTRAPPE. — Croc-en-jambe.
ESTRAINCT. — Serré (l. *stringere*).
ESTRANCE. — Subst. formé avec le verbe *Estre*. *En malh estrance*, en mauvais état, en mauvaise situation.
ESTRANGE. — Etranger. *Vins estranges*, vins de pays étrangers.
EXAULCIER. — Exalter.
EXOYNE. — Empêchement, accident.
EXOYNÉ. — Empêché, incommodé.

FACE (DE PRIME). — De prime abord.
FAILLY. — Manqué. *Failly gentil homme*, faux gentilhomme; *failly cueur*, cœur sans générosité.
FAISSE. — (Blas.) Fasce, pièce placée horizontalement sur l'écu.
FAISSÉ. — (Blas.) Se dit de l'écu divisé horizontalement en plusieurs parties égales (ou fasces) d'émaux alternés. *Faissé contre faissé*, se dit de l'écu parti (c.-à-dire divisé verticalement en deux parties égales) et fascé, les émaux étant opposés de la droite à la gauche.
FAULDRAY, FAULDRA, FAULDRONT. — Futur de Faillir. *Quant ils fauldront*, quand ils seront épuisés.
FEABLE. — Fidèle, digne de confiance.
FEABLEMENT. — Fidèlement; avec confiance.
FEL. — Dur, impitoyable, perfide.
FERIR. — Frapper.
FERRURES. — Bijoux.
FIERT (il). — Il frappe (de *Ferir*).
FINER. — Finir, achever, et aussi trouver.
FONDEUR, FONDERESSE. — Fondateur, fondatrice.
FORS. — Excepté, hors.
FOUYR. — Fuir.

- FRAINDRE.** — Briser, rompre.
FRETÉ. — (Blas.) Se dit de l'écu couvert de cottices ou bâtons entrelacés, au nombre de six au moins.
FRISQUE. — Gaillard, léger, gracieux.
GAIGNE, GAINGNE. — Gain.
GARDEBRAS. — Pièce de l'armure couvrant le bras.
GENÉNNÉ. — Tourmenté.
GENET. — Petit cheval espagnol.
GENT. — Gentil.
GJET. — Action de jeter. — *Espée de gjet*, épée qu'on lançait à son adversaire; elle était retenue par des courroies.
GERONNÉ. — (Blas.) Gironné, se dit de l'écu divisé en huit girons; le giron est un triangle isocèle dont la pointe est au centre de l'écu.
GONFANON. — Bannière.
GOULLE. — Gosier, bouche; par extens. Gourmandise.
GRANAICHE. — Grenache.
GUEULLES. — (Blas.) Rouge (émail).
GUIGNER. — Cligner de l'œil, regarder de côté.
HACQUENÉE. — Cheval de parade.
HANNOYERS. — Habitants de Hainaut.
HARDEMENT. — Hardiesse.
HARNOYS. — Armure, équipement
HEAUME. — Casque, et particul. casque fermé, c'est-à-dire couvrant le visage, avec une grille devant les yeux.
HELASSE. — Voy. *Las*.
HERBERGER. — Héberger, loger.
HERMENIE. — Arménie.
HOM. — Anc. forme de Homme (d'où le pronom indéf. *Ou*).
HOURY. — Tribune dominant la lice d'un tournoi.
HOUSÉ. — Chaussé (v. franç. *Huezs, heuzs, housse, chaussure*).
HOUSSEURS. — Harnois du cheval.
HUY. — Aujourd'hui. *Huy matin*, ce matin.
HUYS. — Porte.
ILEC, ILLECQUES. — Là
IMPUGNER. — Attaquer. *Impugner vérité*, mentir.
IRE. — Colère.

IREUX. — Enclin à la colère.

JA. — Déjà. Avec une négation, jamais, sûrement.

JACOIT CE QUE. — Quoique (anc. orthogr. : *jà soit ce que*).

JACQUES. — Vêtement de dessus, espèce de jaquette.

JEMMÉ. — Tourmenté.

JOUSTE, JOUSTE. — Près de (l. *justa*).

JUS. — En bas.

LAMBHAULX. — Plur. de *Lambel*, sorte de frace découpée dans sa partie inférieure, s'élargissant vers le bas et ne touchant pas les bords de l'écu. Les cadets posent un lambel en chef sur les armes de leurs maisons.

LAMES. — Pièces composant l'armure et engagées les unes sous les autres comme des tuiles.

LANGUÉ. — (Blas.) Se dit d'un animal dont la langue est visible sur l'écu.

LANGUES (GENS DE DEUX). — Interprètes.

LAS. — Fatigué, malheureux, désolé. *Né! las moi est devenu Hélas!*

LÉ. — Côté.

LEAL. — Loyal.

LEANS. — Là-dedans.

LECTRES. — Lettres, devise.

LECTUAIRE. — Électuaire, élixir.

LEGIER (DE). — Légèrement.

LESSER. — Laisser.

LEZ, LETZ. — Côté, bordure. — *De lez*, à côté de.

LIEMENT. — Joyusement.

LIEPART. — Léopard.

LIESSE. — Joie, allégresse.

LINGE. — Menu, délié, fin.

LOSENGE, LOUSENGE. — Losange; (blas.) pièce héraldique présentant cette figure.

LOSENGÉ. — Orné, couvert de losanges.

LUICTER. — Lutter.

LYE. — Gai, réjoui. — *Ung diamant lye*; M. Marie Guichard explique ces mots par « un diamant d'une belle eau »; mais plus loin nous trouvons *Dyamaus lyez en or*, qu'il faut peut-être traduire par « enchassés dans l'or »; ailleurs : *Rubis balloys en or lie*.

MACHOUERE. — Mâchoire.

- MAIL.** — Maillet; le dos de la hache.
MAINDRE — Moindre.
MAINS. — Moins.
MAIS DE. — *Malgré, en dépit de.* — *Mais que, pourvu que; dès que, avant que, plutôt que.*
MAL (fém.) **MALB, MALLE.** — Mauvais.
MALLEVEISIE. — Malvoisie.
MARCHE. — Pays de frontière.
MARCHIS. — Gouverneur d'une marche. *Marchis et marquis* : c'est le même mot deux fois énoncé; la première forme indique la fonction, la seconde le titre.
MATHE. — Triste; pour *Mate*, fém. de *Mas*, batta, déconfit : *éche et mas*.
MECTEZ. — Limites.
MELICQRE. — L'île de Malte (*Malita*).
MELLEU. — Milieu.
MERCY. — Grâce. *Votre mercy, par votre grâce, grâce à vous.*
MÉRITER. — Revaloir, rendre.
MERLETTE. — (Blas) Petit oiseau sans bec et sans pattes.
MERRONS. — Mènerons.
MESCHIEF. — Mésaventure, malheur.
MESCHINE. — Jeune fille, servante.
MESPRENDRE. — Errer, mal agir.
MEUR. — Mûr.
MIS, MYE. — Pas, point.
MISTE. — Gracieux, élégant.
MOLLECTE. — (Blas) Étoile à six rayons.
MONTVILLIER — Montivilliers, près de Harfleur.
MONTJOYE, MONJOIE. — Cri de guerre des Français, nom du roi d'armes de France. Ce mot servit d'abord à désigner des monticules de pierres et de débris d'armes que les soldats vainqueurs élevaient en signe de réjouissance. De là la signification d'Abondance (p. 86) et celle de Modèle (p. 188).
MORIGNÉ (RIEN). — Bien élevé, de bonnes mœurs. (L. *Mores*).
MORISQUE. — Danse mauresque.
MORVEMENT. — Tristement, de mauvais gré, de mauvaise grâce.
MOULT. — Beaucoup, très.
MOUSTIER. — Monastère.
MOYNEAUX. — Petits moines, novices.

- MUSSER. — Cacher.
- NAVRE. — Blessé.
- NOBLES. — Monnaie anglaise créée par Édouard III.
- NOYSE. — Bruit, querelle.
- NOYSEUX. — Bruyant, querelleur.
- OCCIRRE. — Tuer.
- OCTROY. — Permission.
- OFFENDRE. — Offenser, attaquer.
- OLIFANT. — Éléphant. Par extens. Cor, dans les textes anciens.
- ONCQUES. — Jamais. *Oncques puis*, jamais depuis lors, jamais plus.
- ONGLÉ. — (Blas.) Se dit des animaux dont les ongles ont un émail particulier.
- OPILÉ. — Comprimé, obstrué.
- ORES. — Maintenant.
- ORLE. — (Blas.) Bordure étroite qui ne touche pas les bords de l'écu.
- ORPAYERIE. — Orfèvrerie, ouvrage d'orfèvrerie.
- ORREZ. — Futur de Ouir.
- OST. — Armée, camp.
- OSTERICH. — Autriche.
- OSTRUSSE. — Autriche.
- Ou. — Au, en le.
- OUTRAGEUX. — Excessif, qui commet des excès. — *Outrage, excès (l. ultus)*.
- OUVRE. — Travailler, mettre en œuvre.
- OY. — Oul, entendu.
- OYL. — Oui.
- OYSELLET. Petit oiseau. Voy. la note de la page 197.
- PAL. — Pieu. — (Blas.) Pièce posée verticalement sur l'écu.
- PALIS. — Palissade.
- PALLÉ CONTRE PALLÉ. — (Blas.) Se dit de l'écu couvert de pals, quand la partie inférieure de ces pièces diffère de la partie supérieure.
- PAOUR. — Peur.
- PARDURABLE. — Éternel.
- PAREMENT. — Parure, vêtement paré. *Chambre de parement*, chambre de parade.

- PARFIN. — Fin. (*Par*, préfixe explétif).
- PARFOND. — Profond.
- PART (DE). — (P. 146, l. 26). De la part de. *De par* (p. 150, l. 29), même sens. La seconde de ces locutions, que nous employons encore, est une altération de la première.
- PARTEMENT. — Départ.
- PARTIR. — Diviser, partager (l. *Partirs*). « L'honneur... dont monseigneur et moy y partons » (page 227), auquel monseigneur et moi avons part. — *Se partir*, s'en aller.
- PAS. — Passage. Voy. la note de la page 246.
- PASSANT. — (Blas.) Se dit d'un animal qui semble marcher.
- PATIN. — Espèce de soulier.
- PAULX. — Pieux (plur. de *pal*).
- PAVAIZ, PAVAYS. — Bouclier.
- PAVESME. — Bouclier.
- PENAR. — Flèche (l. *Penna*, plume).
- PENER (SE). — Prendre de la peine, prendre la peine de.
- PENSEMENT. — Pensée, réflexion.
- PER. — Pair, pareil. « Les roys d'armes et heraulx du roy, per à per à ceux de France et à leur basse main », c'est-à-dire côte à côte avec eux, par couples, et à leur gauche.
- PERSERT. — Voy. la note de la page 360.
- PERTUIS. — Ouverture.
- PEUSINE. — D'après Le Duchat, ce mot serait une corruption de *pavoisins*, dimin. de *pavois*; par conséquent la *peusine* serait un petit bouclier.
- PICAUDE. — Piqure.
- PIEÇA. — Jadis, il y a longtemps. *Dès pieça*, depuis longtemps (v. franç. *Piece*, espace de temps : *il y a grant piece a, grant piece a*).
- PLAISANCE (TOUAILLE DE). — Il faudrait sans doute un grand P. — Plaisance, ville d'Italie.
- PLANTÉ. — Abondance, grand nombre.
- PLEIGE. — Caution, répondant, otage.
- PLOY. — Pli.
- POILE. — Poêle.
- POMMELÉR (CROIX). — Croix dont les montants se terminent par des boules.
- POTENCÉE (croisette). — (Blas.) Petite croix dont les

MONTANTS se terminent en forme de croissant ou de T.
POULCHE (LANCES A). — Lances terminées aux jointures à pied.

POULCHER. — Rafoler.

POULCHER. — Polagner.

POUX DE LANCHE. — Action d'engager la lance. Voy. *Pouler*.

POURQUOI. — Voy. *pour* (p. 490).

POURQUOI. — Pourquoi.

PROFIT. — Profit.

PROFIT. — Profit.

PROFIT. — Profit.

PROFIT (PROFIT). — Cheval de la famille, pour *Profit*.

POCHETTE. — Poche.

QUARTIER. — (Blas.) Quart de l'écu divisé.

QUERRE. — Pour quérir, chercher.

QUERRE. — Anc. mesure de capacité.

QUEUX. — Cuisinier.

RAME. — Branche, ramere.

RAMENTEVOIR. — Rappeler à l'esprit, (1. *Mens*).

RAMPANT. — (Blas.) Se dit d'un animal dressé sur ses membres postérieurs.

RECORD. — Témoignage.

RECORDER. — Rappeler au cœur, (1. *Recordari*).

RECOISSTÉE (CROIX). — (Blas.) Croix dont les montants sont coupés par des traverses formant de nouvelles croix.

RECUEIL. — Accueil.

RECUEILLIR. — Accueillir.

REMEMBRANCE. — Souvenir.

RENOYÉ. — Renégat.

REPOST, REPOST. — Caché (part. pass. de *Repondre*).

REPOZÉ. — Discret.

REQUERRE. — Requérir.

RESTORÉ. — Guéri, rétabli.

RETRAIREMENT. — Prétérir de *Retraire*.

RETRAIRE. — Retirer. *Se retraire*, se retirer, s'en aller.

- RETRAIT.** — Prétérit de *Retraire*.
REVESQUIT (se). — Revint à la vie (prét. de *Revenir*).
REZÉ. — Rasé.
RIABLE. — (Mot corrompu). Risible (?)
ROMENIE. — La Romélie (presqu'île des Balkans).
RUMOREUX. — Médisant, querelleur.
RUYERS. — Voy. note de la page 295.
RUYSEL. — Ruisseau, source.
- SABLE.** — (Blas.) Noir (émail).
SAILLANT. — (De *saillir*). En parlant d'un cheval, agile, vif, bon coureur.
SAILLIR. — Sauter, sortir, jaillir.
SALLADE. — Espèce de casque.
SAPIENCE. — Sagesse.
SAPIN. — Satin, étoffe de soie.
SAULT (il). — Ind. prés. de *saillir*.
SAULTOUR. — (Blas.) Sautoir, pièce honorable ayant la forme d'un X.
SCELLE. — Sceau.
SCISME. — Schisme.
SE. — Si (conjonction).
SEBELINE (martre). — Martre zibeline.
SEIGNER (se). — Se signer, faire le signe de la croix.
SEIGNEURIE. — Dominer, se rendre maître.
SEJOUR (à). — Au repos, à l'aise, à loisir.
SEMBLER. — Ressembler à.
SEMONDRE. — Inviter, engager, sommer.
SEWESTRE. — Gâche.
SEoir. — Etre assis. *Se seoir, s'asseoir*.
SERGEANT. — Homme d'armes qui n'était pas chevalier. Il y en avait de toute condition, gentilshommes et roturiers.
SERVANT. — Voy. *Sergent*.
Si. — Ainsi, tellement, de telle sorte ; cependant, pourtant. — *Si* n'est souvent qu'explétif. — *Si comme, ainsi que*.
SINOPE. — (Blas.) Vert (émail).
SOMMIER. — Cheval de charge.
SOULAS. — Plaisir.
SOULERETZ. — Partie de l'armure qui couvre les pieds.

- SOULLEMENT (de).** — Imparf. de souler.
SOULNER (vous). — Imparf. et subj. prés. de souler.
SOULNER. — Avoir couronné.
SOULNER. — Souffrir, jallir. (Active) Tirer; faire lever.
SULTAN. — Sultan, ville de France.
SUSCICION. — Soupçon.
SUSCIN. — Chirurgeon.
SUSIN. — Assyrie.
SUS. — Debout. *Mettez sus, grandir, élever.*
SUSIN. — Suivre.
- TARANT.** — Marais.
TAMOUR. — Tambour.
TAMOURIN. — Pêch tambour, tambourin.
TANSON. — Marais.
TALLET, TALINT. — Dêlé.
TANT (de) que. — D'un bout que... à l'autre, autre, insinuant.
TARD. — Ronger, crever.
TARRE. — Tar.
TORREN. — Thorn, ville de Prusse.
TOUAÏLE. — Serviette, nappe, toile *Touaille de plâtras* (Voy. *Plâtras*).
TOURTRAILL. — (Blas.) Pièces de même figure que le *besant*, mais de couleur, et non de métal.
TOUSTÉE, TOSTÉE. — Rôtie.
TRAIRE. — Tirer. *Se traire, aller, se diriger.*
TRAPSONDE. — Trébizonde.
TRAVILLÉ. — Fatigué (de *travailler, travailler, prendre de la peine, souffrir*).
TREILLÉ. — Treillisé.
TRESPASSER (AU). — (P. 169). En dépassant son adversaire, par suite de l'élan donné au cheval.
TRESSUER. — Suer abondamment.
TRESTOURNER. — Tourner (un objet) en tous sens, bouleverser (l'esprit).
TRESTOUT, TRESTOUS. — Tout, tous sans exception (Très, l. *Trans*, au delà).
TROP. — Beaucoup. Ce mot n'impliquait pas alors l'idée d'excès.
TROUSSER. — Supercherie; attaque brusque, inattendue.

UNGS, UNES. — Une paire. — S'emploie devant les mots pluriels : *unes lices, unes heures, un livre d'heures.*

VAIR. — Changeant, de couleur changeante ou de diverses couleurs (l. *varius*). — (Blas.) Fourrure formant le champ de l'écu, alternativement blanche et noire.

VAISSEL. — Vase, verre.

VALERIUS. — Valère Maxime.

VALLESTAIN. — Wallenstein ou Walstein.

VAULSIST (il). — Imparf. du subjonct. de *valoir*. — Voy. ci-dessous.

VAULSIST (il). — Pour *voulsist*. Voy. *voulsiss*.

VAULT (il). — Ind. prés. de *valoir*. — Prétérit de *vouloir*, pour *voult* : « Tant le *voult* honorer que... le *vault* faire chief de cinq cents lances. »

VEEZ. — Voyez. — *Væx cy*, voici.

VENSISSE, VENSIST. — Imparf. du subj. de *Venir*.

VERGE. — Épingle, broche, ou plutôt Bague. (Voy. *Cent Nouv. nouv.*, III).

VERGETTE. — Dimin. de *verge*.

VERNÉ. — Orné.

VIERR (se) à. — Se tourner vers.

VIZ. — Visage.

VOIR. — Voy. *Vair*.

VOIRÉ, VAIRÉ. — (Blas.) Se dit de l'écu chargé de vair.

VOISE. — Aille, subj. présent.

VOISTRER (se). — Tourner sur soi-même, faire une volte.

VOULLER, VOLLER. — Chasser au vol, au faucon, à l'épervier. Subst. au plur. *Voullers*.

VOULSISSE, VOULSIST. — Imparf. du subjonct. de *vouloir* : *voulusse, voulût*. Ce temps est fréquemm. employé pour le conditionnel.

VOULT, VOULDRENT. — Voulut, voulurent.

VOULENTIERS. — Adj. Bien disposé.

VOYRE. — Vraiment, certes.

VOYS (je). — Je vais.

VOYSE, VOYSENT. — Subj. prés. de *Aller* : *aille, aillent*.

VEILLANCE (MALLE). — Malveillance (*je vueil, je veux*).

VUIDER. — Vider; priver, dépouiller.

VUYDÉ. — Vidé. — (Blas.) Se dit des pièces ajourées de manière à laisser voir le champ de l'écu.

YRE — Colère.

YSSIR. — Sortir.

YSTRAI, YSTRA. — Futur de Yssir.

ZEL. — Zèle.



TABLE

.

!



TABLE

	Pages
.....	I
e	3
yre et plaisante cronicque du Petit n de Saintré et de la jeune dame Belles Cousines.	5
t la Table de ce present livre. . .	431
.....	443
re	457

XXXXXXXXXXXX

XXXXXX

83 14 522ST2 53 005 BA ~~BA~~ 7200



[The body of the page contains extremely faint and illegible text, likely due to low contrast or blurring in the scan. No specific words or phrases can be discerned.]




PQ 1567 .H2 1890 C.1
L'histoire et plaisance cronic
Stanford University Libraries



3 6105 038 930 041

DOC	JAN 26	1993



STANFORD UNIVERSITY LIBR
STANFORD, CALIFORNIA 943